

清代傳記叢刊·綜錄類⑦
周駿富輯

國朝耆獻類徵初編(四)

卷三五九
至

(清)李桓輯



明文書局印行



國朝耆獻類徵初編卷三百五十目錄

忠義二十

阿敏道

薩因圖 齊旺等

布英克 五格爾等

奇徹布

車林多爾濟等

滿福

莫托和爾

三保等

唐喀祿

穆倫保 富錫爾等

納穆扎爾

三泰

彰武 奎瑪岱等

齊旺扎布

拜塔爾等

扎爾善 西林保等

宗室車爾登

達休車凌等

瑞綽爾圖 甯古禮等

高天喜

子仁等

鄂寶

三格

張凌霞

宋士印等

三都布 伯祿等

國朝耆獻類徵初編卷三百五十

通奉大夫前署江西巡撫江西布政使司布政使湘陰李桓輯

忠義二十

阿敏道

阿敏道蒙古鑲紅旗人姓圖爾格期氏世居察哈爾父阿吉斯官員外郎康熙三十五年隨西路大軍剿噶爾丹以糧運不濟兵士苦飢阿吉斯言於眾曰我等官兵世受國恩甘斃道路誓圖竭力前進眾皆諾及擊敗噶爾丹於昭莫多凱旋奉旨嘉獎交部許敘給雲騎尉世職卒阿敏道襲雍正三年授三等侍衛四年授二等侍衛九年四月率巴里呼兵百由固爾班塞堪赴巴爾坤軍

營十一月復 命偕侍讀學士查克丹調喀爾喀兵三千率之往
尋偕護軍統領費雅思哈赴烏爾輝音札罕練兵乾隆元年以許
準噶爾乞和撤大軍阿敏道還京三年授鑲藍旗察哈爾總管十
九年二月率察哈爾兵隨大軍收烏梁海十二月加副都統銜二
十年正月遷所獲巴爾沁人等於齊拉罕五月大軍定伊犁定北
將軍班第奏派管理臺站八月逆賊阿睦爾撒納叛阿巴噶斯哈
丹附逆肆掠臺站中斷阿敏道輒續以兵會定西將軍永常自木
壘退駐烏爾圖布拉克撤阿敏道還事 聞革永常職以策楞代
詔阿敏道率精騎馳赴伊犁偵班第信策楞等未卽遣 上詰責
之十一月率喀爾喀郡王品級連木楚克札布等以兵千往捕阿

巴噶斯哈丹賊眾二十一年六月授鑲藍旗蒙古副都統時回酋
波羅呢都霍集占有異志定邊右副將軍兆惠察知之遣阿敏道
率索倫兵百及厄魯特兵三千赴葉爾羌喀什噶爾撫諭之且密
飭擒致之閏九月至庫車回眾閉城不納阿敏道斬游騎四十餘
圍之回眾詭告曰厄魯特向係仇敵恐爲所害若撤還卽降阿敏
道允撤厄魯特兵入城止索倫百人從或慮危險阿敏道荅曰我
等招撫回眾惟期於國家大事有濟何暇他慮遂爲霍集占所
羈二十二年諭霍集占送阿敏道還不從謀加害庫車伯克呼
岱巴爾氏以告阿敏道謀脫歸不克死之從者百人皆遇害事
聞諭照陣亡例議敘加世職爲騎都尉兼一雲騎尉賜祭葬

如列入祀昭忠祠子彭蘇克燕丕爾襲世職

右 國史館本傳

薩因圖 齊旺等

薩因圖達呼爾鑲黃旗人姓琨齊由領催署章京乾隆二十一年
隨副都統阿敏道赴葉爾羌撫諭大和卓木布拉呢敦小和卓木
霍集占至庫車城爲霍集占所羈二十二年春與前鋒委署護軍
校齊旺領催委署護軍校隨赫領催委署驍騎校莽喀爾署護軍
校諾綽科皆遇害是年勦烏梁海戰死者驍騎校署參領扎布前
鋒署章京揚扎布前鋒署驍騎校尼喀岱藍翎長烏爾特克勦賊
於額林喀畢爾喀戰死者驍騎校署章京根敦勦賊於吞圖布戰
死者領催署驍騎校五林保解糧遇厄魯特賊死者護軍校署章
京根扎布驍騎校查巴克二十三年會勦庫車藍翎長巴里密特

護軍校多爾濟獎賞藍翎坤濟圖俱陣亡又追勦逆黨巴拉衮卓爾於瑪納斯河二等侍衛達爾漢陣亡佐領委署參領薩西爾圖力戰溺死其在喀拉烏蘇河勦賊陣亡者藍翎長達什前鋒署驍騎校圖倫楚二十四年定邊右副將軍富德追勦霍集占於阿爾楚勒大敗之藍翎委署參領端多克戰歿定邊將軍兆惠勦逆呼爾巴薩克於查蘇圖山六品官博克扎布戰歿時霍集占又遣逆黨克什克都扎木布寇和爾副都統和爾起敗之佐領委署參領科木布薩委參領巴圖爾領催委署章京玉木喀爾圖護軍署護軍校色爾古倫皆力戰陣亡領催署護軍校巴布岱隨副都統三格擒獲逆黨邁扎拉木歿於陣領催委署護軍校阿拉什護軍校

署章京丹布扎布護軍校多爾袞扎克亦於是年在喀拉庫爾勒
賊陣亡先後事 聞議卹 詔薩因圖等俱廕雲騎尉薩西爾圖
達什圖倫楚廕襲俱無考莽喀爾索倫正紅旗人姓圖克坦子扎
坤巴爾圖襲諾綽科索倫鑲藍旗人姓多拉爾子棍布扎布襲揚
扎布察哈爾鑲紅旗人姓奇里忒子額勒袞襲尼喀岱達呼爾正
黃旗人姓阿納塔子多爾濟阿襲坤濟圖索倫正藍旗人姓博爾
濟呼爾子圖爾巴勒忒襲端多克察哈爾鑲紅旗人姓洪霍堆子
花沙納木襲科木布薩察哈爾鑲黃旗人姓葉克永子阿克登阿
襲巴圖爾新巴爾呼鑲黃旗人姓敖諾思子瑚什多爾濟扎布襲
玉木喀爾圖新巴爾呼鑲紅旗人姓博爾濟呼爾子固克色布襲

齊旺察哈爾鑲白旗人姓巴雅呼克敦隨赫察哈爾鑲藍旗人姓
阿勒多扎克烏爾特克打牲正藍旗人姓拜丹特木齊根敦察哈
爾正白旗人姓博爾濟吉特五林保察哈爾正黃旗人姓圖魯克
忒渾根扎布喀爾喀鑲白旗人姓車們多爾濟查巴克喀爾喀正
黃旗人姓阿拉布土勒忒薩西爾圖呼倫貝爾正黃旗人姓克什
克勒忒達什察哈爾正白旗人姓布爾拉什克圖倫楚呼倫貝爾
鑲白旗人姓朋楚吉特勒博克扎布察哈爾正紅旗人姓烏蘇克
納色爾古倫察哈爾正黃旗人姓阿爾扎克丹巴布岱呼倫貝爾
正白旗人姓博爾濟吉特襲俱無考達爾漢三姓正黃旗人阿拉
什察哈爾正紅旗人扎布察哈爾鑲白旗人巴里密特達呼爾正

白旗人多爾濟達呼爾正紅旗人丹布扎布察哈爾鑲白旗人多爾袞扎克達呼爾鑲紅旗人姓薩俱無考

右 國史館本傳

| | | | | | | | | | | | |
|--|--|--|--|--|--|--|--|--|--|--|--|
| | | | | | | | | | | | |
|--|--|--|--|--|--|--|--|--|--|--|--|

174-014

布英克 五格爾等

布英克滿洲正黃旗人姓那拉官前鋒校署章京乾隆二十一年隨副都統阿敏道出師伊犁回酋布拉呢敦霍集占有異志阿敏道往庫車城諭之入城被羈布英克與署驍騎校五格爾魯普薩翰莫克庫獎賞藍翎達什奇爾俱從二十二年阿敏道謀脫歸不克死之詳大臣傳布英克等均被戕是年定邊將軍成衮扎布勦沙拉斯瑪唬斯賊詭就撫旋叛去副二等台吉沙克都爾扎布力戰歿於陣隨都統三格勦賊至博羅齊戰歿者二等台吉達瓦策凌獎賞藍翎署驍騎校德凌冊在阿爾呼特西伯勦賊死者頭等台吉巴克扎布又有署章京扎格達勦烏梁海署驍騎校柰雅圖

四庫全書
卷三百三十一
六

勦哈拉和落和爾沁追賊於塔爾巴哈台鄂林查勦賊於哈什俱
力戰陣亡獎賞藍翎諾海勦嗎哈沁死於烏魯木齊二十三年又
有回部伯克托克托隨靖逆將軍雅爾哈善勦逆回被害於庫車
城先後事 聞議卹奉 旨布英克廕雲騎尉子費凌阿襲沙克
都爾扎布達瓦策凌俱追贈頭等台吉巴克扎布著追封公爵俱
令其子承襲達什奇爾扎格達和爾沁俱廕雲騎尉襲無考托克
托伯克 贈散秩大臣職銜子色的克襲餘卹如例五格爾察哈
爾鑲紅旗人姓杭吉阿莫克庫索倫正紅旗人姓圖克坦柰雅圖
索倫鑲黃旗人姓敖拉德冊索倫正紅旗人姓珠車爾和爾沁
察哈爾正紅旗人姓圖克郭魯普薩翰察哈爾正紅旗人姓齊扎

布襲俱無考達什奇爾打牲鑲黃旗人沙克都爾扎布察哈爾正
白旗人姓襲俱無考沙克都爾扎布喀爾喀人達瓦策凌蒙古鑲
白旗人巴克扎布喀爾喀人扎格達蒙古人諾海察哈爾人旗姓
襲俱無考

國史館本傳

| | | | | | | | | | |
|--|--|--|--|--|--|--|--|--|---|
| | | | | | | | | | 三 行 本 書 在 本 學 校 可 用 四 行 下 |
|--|--|--|--|--|--|--|--|--|---|

奇徹布 車林多爾濟等

奇徹布滿洲正白旗人姓都拉爾官頭等侍衛乾隆二十二年隨定邊右副將軍兆惠出師伊犁四月與古爾班呼斯坦生擒宰桑巴桑得木齊普爾普達瓦等追剿阿睦爾撒納於額卜克特遇逆黨輝特台吉巴雅爾戰於塔爾巴哈台山大敗之擒巴雅爾五月哈薩克賊猝至奇徹布力戰中槍陣亡阿睦爾撒納自哈薩納竄歸伊犁六月一等子兼佐領委署營總車林多爾濟隨參贊大臣富德勦之歿於陣九月隨都統三格剿賊至博羅齊戰死者總管巴甯阿委署參領察旺多爾濟護軍校興袞十一月都統滿福由阿勒輝往剿沙拉斯嗎唬斯至肯色嶺賊敦多克哈什哈等詭降

突自密林中出肆逆滿福中槍歿詳大臣傳副總管委署營總珠
爾庫雲騎尉署參領袞楚克三等侍衛海林泰俱力戰死十二月
副都統順德訥勒庫魯特擒宰桑默羅等護軍校委署前鋒參領
納木扎布歿於陣同時委署筆帖式富永達克西阿俱以捕嗎哈
沁戰死先後事 聞議卹 詔奇徹布廕一等輕車都尉世襲罔
替餘俱廕雲騎尉車林多爾濟加一雲騎尉奇徹布子富珠隆阿
襲車林多爾濟子那木扎爾襲巴甯阿子永安襲察旺多爾濟子
扎木巴爾扎布襲興袞子松都布襲珠爾庫子開齊那襲袞楚克
子敏珠爾襲海林泰子那爾胡善襲納木扎布子巴特瑪多爾濟
襲富永子五十八襲達克西阿子四十九襲巴甯阿滿洲正黃旗

人姓覺羅察旺多爾濟興袞俱察哈爾正紅旗人察旺多爾濟姓
濟拉特興袞姓鄂托果忒珠爾庫滿洲鑲黃旗人姓墨爾哲勒袞
楚克察哈爾正紅旗人姓布古斯海林泰滿洲鑲黃旗人姓鈕克
特達克西阿滿洲正紅旗人姓章佳車林多爾濟滿洲鑲黃旗人
納木扎布蒙古正紅旗人富永滿洲正藍旗人姓俱無考

右 國史館本傳

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

174-022

滿福

滿福滿洲鑲藍旗人姓瓜勒佳氏康熙五十二年襲世管佐領雍正五年授三等侍衛署參領乾隆三年授護軍參領七年擢蒙古鑲藍旗副都統九年轉護軍統領十三年二月授熱河副都統四月擢古北口提督十七年調拉林副都統二十年授都統駐巴里坤 諭率吉林兵千馳赴軍營二十二年七月 命駐防吐魯番尋授領隊大臣八月定邊將軍成衮扎布由珠勒都斯一路進剿請令滿福以兵三百巡查阿勒輝衮西喇及烏納哈特十三臺站搜剿嗎哈沁 允之九月沙拉斯嗎曉斯既降復叛掠臺站 諭滿福由阿勒輝往剿十月偵賊窟呼魯木什烏蘭和屯田巴顏阿

璠追緝 詔巴里坤辦事大臣阿里衮馳往協勦兵未合滿福遇賊於肯色嶺擊之賊敗走有沙拉斯得木齊敦多克哈什哈嗎唬斯得木齊敦多克車凌者僞遣人乞降且言賊酋已就擒請除道迎滿福信之時我兵僅二百七十餘行次哈喇和落徑險林密下有深溝滿福誤爲賊所紿急麾前隊返賊千餘突出林中我兵被圍滿福厲聲大呼力戰被創墮溝中死之事 聞 諭曰滿福雖爲賊所愚究屬捐軀盡節著照陣亡例議卹尋 賜祭葬諡武毅入祀昭忠祠 命圖形紫光閣儒臣擬贊曰言率新附渠酋是擒而何汗裸鼠首狼心遇虎不撓穿齧賊輩睽彼陣雲精英不昧

右 國史館本傳

莫托和爾 三保等

莫托和爾黑龍江正白旗人由頭等侍衛委署營總乾隆二十二年隨都統滿福出師回部九月勦沙拉斯嗎唬斯至背色嶺被圍與署前鋒參領三保忠泰驍騎校委署前鋒參領達爾金查佐領委署參領拉爾濟岱署章京進巴扎拉吉爾圖署護軍校徹靈泰車里克勒依納穆五巴什署驍騎校阿玉爾剛格阿尼雅圖俱力戰死是年在博羅齊勦厄魯特陣亡者巴圖魯三等待衛努呼德委署參領達三保委署章京塔木博薩里色木保領催委署驍騎校鄂林查素哲博索克在烏魯木齊阿善果爾陣亡者驍騎校委署參領凱瓦勒圖領催委署驍騎校特卜庫勒圖在特納格爾陣

亡者佐領委署參領伊爾格勒圖委署章京吉勒果勒薩爾庫勒
領催委署驍騎校阿爾圖蒙庫嚕庫護軍署驍騎校阿拉西在薩
里克博里克陣亡者委署章京幹西木保迫扎哈沁賊陣亡者護
軍委署護軍校達扎布在安集海陣亡者署驍騎校多魁事 聞
議卹奉 旨俱膺雲騎尉車里克勒依子策德卜襲納穆子冒奇
塔特襲餘襲無考三保吉林正白旗人姓巴魯特忠泰打牲正黃
旗人姓佟佳達爾金查索倫正黃旗人姓達巴圖進巴察哈爾鑲
白旗人姓烏梁海阿玉爾察哈爾鑲紅旗人姓鄂奇特剛格吉林
正藍旗人姓瓜勒佳阿尼雅圖索倫鑲黃旗人姓敖拉塔木博薩
達呼爾正黃旗人姓敖拉里色木保達呼爾正藍旗人姓阿勒素

哲索倫鑲藍旗人姓赫音凱瓦勒圖特卜庫勒圖俱達呼爾正黃
旗人姓敖拉伊爾格勒圖達呼爾正白旗人姓果布爾吉勒果勒
達呼爾正黃旗人姓烏里蘇薩爾庫勒索倫正黃旗人姓阿拉爾
阿爾圖達呼爾正黃旗人姓敖拉蒙庫噶庫阿拉西俱察哈爾鑲
紅旗人蒙庫噶庫姓巴魯爾阿拉西姓達朗古特幹西木保達呼
爾鑲白旗人姓得敦布達扎布察哈爾鑲藍旗人姓綽羅斯拉爾
濟岱索倫正紅旗人扎勒吉爾圖察哈爾鑲黃旗人徹靈泰車里
克勒伊納穆俱察哈爾正黃旗人五巴什察哈爾正白旗人努呼
德黑龍江鑲白旗人達三保索倫鑲白旗人鄂林查索倫正白旗
人多魁察哈爾正紅旗人姓俱無考索博克旗姓俱無考

國史館本傳

右 國史館本傳

十一

唐喀祿

唐喀祿蒙古正藍旗人姓他塔喇氏雍正十三年由筆帖式授理藩院堂主事乾隆六年遷員外郎十九年七月賞給副都統銜赴北路軍營理新降輝特台吉阿睦爾撒納班珠爾等游牧二十年正月奏班珠爾屬多老稚不能耕恐飢餒軍機大臣劾其冒瀆諭曰班珠爾等投誠以來朕屢次施恩見距夏秋尙遠果有必須接濟之處朕自加恩賞給何須預爲陳請前以唐喀祿尙能通曉蒙古言語是以賞給副都統銜俾照管阿睦爾撒納等游牧乃一切未能盡心徒事瑣屑著卽撤回仍在員外郎上行走尋奏畱同理游牧之扎薩克林丕勒多爾濟諭曰眾厄魯特俱隨大軍進

物游牧處復有何事唐喀祿擅將將軍調遣之人不行發往甚屬
可惡著該部嚴察議奏尋議照溺職例革職得旨唐喀祿不應
僅予革職在家安居著交理藩院作爲筆帖式行走不必給予頂
帶九月給還員外郎原職命護送濟隆呼圖克圖由巴林赴伊
犁十二月管理定邊右副將軍薩喇爾游牧二十一年四月諭
曰北路軍營辦事乏人員外郎唐喀祿尙諳蒙古事務著賞副都
統銜授爲領隊大臣隨同哈達哈辦事五月命率駐防扎布堪
兵一千隨大軍赴哈薩克索叛賊阿睦爾撒納七月賊固爾班和
卓潛遁烏梁海唐喀祿報定邊右副將軍哈達哈馳勦擒之得
得嘉獎授副都統賜孔雀翎尋阿睦爾撒納黨達瓦藏布由額

爾齊斯糾烏梁海博博等肆劫唐喀祿以兵五百投索倫總管鄂博什擒降其眾三百餘又咨會副都統舒赫德派兵赴額爾齊斯駐防閏九月 命駐科布多辦事十一月奏言科布多地近卡倫兵丁不敷差遣請令撤回大軍及臺站兵內酌留二百名報 聞十二月授理藩院侍郎尋補鑲藍旗蒙古副都統二十二年二月奏言輝特降眾自遷至扎克賽地方自相劫掠且係阿睦爾撒納親屬請遷往呼倫貝爾齊齊哈爾等處又巴勒濟得木齊亦願遷往察哈爾 詔如所請尋授參贊大臣偕杜爾伯特汗策凌等堵剿噶勒雜特賊眾三月奏言喀爾喀地方有扎哈沁特楞古特奇爾吉斯烏爾罕濟蘭人等約萬餘日久難免滋事請將扎哈沁人

移駐卡倫內特楞吉特奇爾吉斯烏爾罕濟蘭人給東三省兵丁
爲奴 上可其奏是月擒輝特逃賊策卜登多爾濟等奏入 諭
部議敕四月奏請移杜爾伯特游牧於烏蘭固木得 旨俞允並
獎其辦理妥協時西路大軍剿叛賊哈薩克錫喇 命唐喀祿以
兵駐額爾齊斯爲聲援會阿睦爾撒納自哈薩克竄歸爲西路軍
所敗 諭偕喀爾喀郡王品級車木楚克扎布畱心堵剿八月奏
言臣等辦理阿睦爾撒納所畱種地之烏梁海等處途次偵杜爾
伯特貝勒巴圖博羅特台吉阿喇善等潛與阿睦爾撒納通臣遣
兵趨擒之於輝巴朗山後並剿滅烏梁海五十餘戶見領兵赴塔
爾巴噶台搜拏阿睦爾撒納及哈薩克錫喇 諭曰唐喀祿等和

衷商辦甚合機宜著交部議敘並將御用荷包鼻煙壺加恩賞賜
九月 諭曰據兆惠奏唐喀祿等咨報選兵三百名令瑚爾起進
勦餘兵卽行撤回唐喀祿等係特派擒勦哈薩克錫喇之人到塔
爾巴噶台等處輒行撤兵殊屬乖謬著交部嚴加議處至唐喀祿
等撤回兆惠已經具奏而伊尙未奏到是又必自分彼此仍畱北
路具奏以致遲滯耳尋唐喀祿奏至言軍糧不敷馬復疲乏已遵
前 旨撤兵 諭曰朕屢諭伊等追擒哈薩克錫喇何嘗令其撤
兵卽有豫籌撤兵之語亦謂交辦事竣之後耳豈見諭擒賊而卽
令撤兵耶唐喀祿若但歸咎於口糧馬力將兵撤回不過交部議
處乃竟以遵旨撤兵飾詞取巧僅予革職議處不足示懲著革去

侍郎及副都統職降爲藍翎侍衛交納穆扎爾差遣效力十月
諭曰據烏梁海人等告稱阿爾台以外逸賊頗多已諭護送哈薩
克來使之和碩齊詳細搜查著傳諭納穆扎爾等派唐喀祿帶兵
二百同侍衛二人赴彼處適中之地駐劄一有信息卽行接應唐
喀祿係獲罪之人今令效力自贖宜知奮勉十一月 命協勦巴
哈蔓集等賊眾尋以阿睦爾撒納竄鄂羅斯 命偕和碩齊駐額
爾齊斯等處偵禦二十三年正月 諭曰阿桂等奏稱和碩齊唐
喀祿遵旨將哈薩克使臣送至邊界卽前往額爾齊斯之和尼邁
拉呼布空郭勒地方堵勦沙喇伯勒逋逃賊眾著傳諭伊等奮勉
擒勦勿致免脫三月定邊將軍兆惠奏土爾扈特舍稜等謀竄鄂

羅斯 命唐喀祿與和碩齊速往堵剿四月偵舍稜秋阿古爾哈
齊海率兵追至布固圖河舍稜等勞章扎卜被擒詭爲兄乞降唐
喀祿未信和碩齊速縱之還越日舍稜詭約降且獻酒和碩齊飲
之浼唐喀祿造其營賊忽謀唐喀祿及侍衛富錫爾穆倫保佛爾
慶額力戰均遇害和碩齊更衣降賊參贊大臣阿桂以 聞 諭
曰唐喀祿雖一時被誘遇害尙能奮勇捐軀深爲憫惻著交部照
陣亡副都統例議卹侍衛富錫爾穆倫保佛爾卿額等亦著交部
議卹俱給世職尋 命入祀昭忠祠給騎都尉世職子唐岱襲富
錫爾佛爾卿額滿洲鑲黃旗人穆倫保滿洲正白旗人均入祀昭
忠祠其子襲雲騎尉

三十三

右 國史館本傳

三

穆倫保 富錫爾等

穆倫保滿洲正白旗人姓瓜勒佳由前鋒校洊升二等侍衛乾隆二十二年與三等侍衛富錫爾藍翎侍衛佛爾卿額俱從理藩院侍郎鑲黃旗蒙古副都統唐喀祿出師伊犁二十三年三月定邊將軍兆惠奏土爾扈特舍楞等謀亂鄂羅斯命唐喀祿由布空果勒速往堵剿四月追至布固圖河賊詭降乞唐喀祿造其營賊眾大譟穆倫保富錫爾佛爾卿額從唐喀祿格戰死之唐喀祿詳大臣傳是年秋兆惠檄諸路兵會剿逆回霍集占自阿克蘇赴赫爾羌十月十三日被圍於黑水副將軍富德奉諭旨策應二筆侍衛富紹從二十四年正月初六日至呼爾滿遇賊騎五千轉戰

五日四夜大破賊富紹與前鋒校永安九柱署護軍校達什巴素
皆歿於陣藍翎長永寶亦於是役殺賊負重傷越日傷發歿於軍
營先後事 聞議卹 詔俱廕雲騎尉穆倫保子木克登阿襲富
錫爾從子韋駝保襲佛爾卿額子博凌阿襲富紹無嗣停襲永安
子歡岱襲九柱子額爾登額襲達什子多爾吉襲巴素子公阿襲
永寶子海盛襲富錫爾佛爾卿額俱滿洲鑲黃旗人富錫爾姓富
察佛爾卿額姓果固爾富紹永安俱滿洲正黃旗人富紹姓巴雅
拉永安姓納喇達什察哈爾正藍旗人姓他布諾忒永寶滿洲正
紅旗人姓李佳九柱滿洲正黃旗人巴素察哈爾鑲黃旗人姓俱
無考

右 國史館本傳

因明書狀頁後刀扇
卷三十三上忠義二十一

何事にも先を以てし
三三三三三三三三

一

納穆扎爾

納穆扎爾蒙古正白旗人姓圖伯特氏父拉錫官領侍衛內大臣有傳納穆扎爾初由閒散授藍翎侍衛洊授頭等侍衛乾隆十年六月授正白旗滿洲副都統十二月調鑲藍旗十三年九月署總管內務府大臣尋遷戶部侍郎十五年調工部時西藏郡王朱爾墨特納木扎勒謀叛 詔納穆扎爾偕都統班第往駐藏十六年三月奏言藏中增噶卜倫辦事見充噶卜倫者亦係公爵餘俱扎薩克台吉今增設之員請並給扎薩克銜以符體制 從之尋命增設卡倫兵十一月奏自喀喇烏蘇至那克桑喀勒占庫車等處增臺八飭扎薩克台吉等巡察十七年正月奏準噶爾通藏隘

口係阿里那克桑騰格里淖爾阿哈雅克四路見俱設卡倫嚴防
從前準夷犯藏係繞勒底雅路而入此路見亦派兵防守報 聞
十九年 命赴北路軍營管理新降杜爾伯特及輝特和碩特等
游牧二十年三月奏言厄魯特人赴京領俸餉值夏令恐不耐炎
暑請加體恤 命副都統多爾濟運應支俸餉至張家口給之四
月以輝特和碩特生計維艱奏給糧畜接濟 上允所請五月同
喀爾喀親王得親扎布由塔密爾安置輝特和碩特十三旗人於
固爾班舒魯克杜爾伯特十旗人於鄂爾海西喇烏蘇分界駐牧
設卡倫防範六月杜爾伯特遭霜雪傷畜奏給口糧 賜米五百
石歲之時將軍班第奏輝特降酋阿睦爾撒納謀據準噶爾狀

命納穆扎爾偕參贊大臣阿蘭泰等駐防烏里雅蘇臺十月調戶部侍郎二十一年六月奏言伊克明安台吉德濟特同逆賊阿睦爾撒納叛遁請以其屬分給輝特不從叛之扎薩克阿卜達什等及喀爾喀又言和托輝特郡王青衮雜卜自軍營叛遁臣恐眾喀爾喀被煽徧諭所部示以利害 上獎之尋授參贊大臣赴將軍成衮扎布營領索倫兵追勦青衮雜卜十一月擒諸杭哈將噶斯諭曰納穆扎爾帶兵追擒一聞逆賊所在疾馳前進立爲掩獲甚爲勇往出力著加恩封爲一等伯 賜號勤襄十二月 命赴喀爾喀車臣汗部查緝齊木齊格特人之肆竊者尋於呼倫貝爾之西墨爾根哈瑪爾俱就擒 上嘉其功下部議敘二十二年二月

授工部尙書兼正紅旗滿洲都統四月 命仍赴北路駐科布多
辦事五月移駐布延圖十月署定邊左副將軍二十三年二月奏
言烏梁海部眾歸誠其酋察達克等授內大臣散秩大臣等職所
屬鄂拓克內每得秦有得木齊收楞額辦理庶務請將得木齊改
佐領收楞額改驍騎校給頂帶歲貢貂皮送烏里雅蘇臺以 恩
賞緞布給之三月納穆扎爾回京六月 命赴西路軍營授參贊
大臣署將軍印務七月授靖逆將軍由庫車會剿回酋霍集占等
九月阿克蘇城歸附 詔納穆扎爾同參贊大臣三泰往會定邊
將軍兆惠軍兆惠遣副都統愛隆阿侍衛奎瑪岱以兵來迎納穆
扎爾路遣愛隆阿先還而自與三泰奎瑪岱乘夜進騎兵僅二百

餘遇賊三千被圍力戰矢盡死之三泰奎瑪岱俱歿於陣事聞諭曰靖邊將軍納穆扎爾參贊大臣三泰巴圖魯侍衛奎瑪岱奉命前赴軍營輕裝進發所領兵丁僅二百餘人設令先到大營固可會同進剿卽後至一二日亦與愛隆阿一同駐守乃星夜備行之時適遇賊眾猖獗伊等並不肯於中途退避自全惟知直前衝擊以致授命捐軀忠毅之氣深可嘉憫納穆扎爾著贈公爵三泰贈子爵俱世襲罔替奎瑪岱照奇徹布例賞給世職應得卹典仍著該部察例具奏尋賜祭葬如例諡武毅入祀昭忠祠贈三等義烈公以子保甯襲二十四年回部平上追悼納穆扎爾及三泰爲國盡節與前西藏殉節之都統傅清左都御史拉布敦伊

犁狗節之將軍班第參贊大臣鄂容安比烈 御製雙義詩紀其事
詩曰雙忠昔集事雙烈能忘身茲作雙義詩其故得細陳曰
納穆扎爾曾贊北路軍奮勇剿逆賊封伯酬其勲副都統三泰英
氣頗超人均御前侍衛素悉厥忠純兆惠富德肇從戎久效勤欲
代俾將母二臣被選掄去歲黑水役固守遺索倫致信愛隆阿權
退催後援可支百日閒速進莫遠巡將軍及參贊輕進徒俱焚營
待師並來何慮狂狙信爾時二臣者馳驛往軍門過愛隆阿營卻
近黑水濱所遣人未遇厥聲前忽聞知賊與我戰聞戰恥退奔徒
攜百餘騎赴義命同捐凶信驛遞來痛淚傷心魂使早知拒守退
俟熊羆羣同進可樹功何致均沈淪卽先至一日合兆惠軍屯亦

可旋今歲奚煩以身殉不前復不後此實若有神富德自和闐重
至黑水津葉爾奇木降諸事粗處分痛念我將士沙場化爲燐黃
頭雖不備掩骼權爲墳猿鶴昔屬幻邱隴今可因循以此事奏西
望揮淚頻豐碑旌墓門千秋西海垠捐軀固臣節任爾非所論惟
予則何忍此恨終當伸夷考六人跡事異心同均與國休戚其甯
止曰蓋臣史筆多譎傳永言傳其真尋 命圖形紫光閣 御製
贊曰我懷賢勞命將往代正值黑水猖獗鼠輩以二百眾陷萬賊
中因緣殉節勇濟以忠長子保甯襲公爵見官伊犁將軍第三子
保泰見官察哈爾都統駐藏辦事

右 國史館本傳

義烈公納穆扎勒伊犁將軍保文端公之父乾隆閒葉爾羌殉烈
至今城門上時見公像伊犁南門外龍王廟相傳龍神像似義烈
公或當時軍士愛戴爲之也

右紀聞陳康祺撰

三泰

三泰漢軍正白旗人曾祖內大臣華善以其先原係蘇完人姓瓜勒佳奏請改入滿洲籍詳華善傳祖石文炳襲三等伯官福州將軍有傳父觀音保任都統三泰由藍翎侍衛洊授二等侍衛乾隆二十二年四月遷正紅旗漢軍副都統十月升吏部右侍郎二十三年正月軍機處行走四月調戶部左侍郎六月 詔三泰與尙書納穆扎爾赴西路軍營以參贊大臣行走學習軍務七月逆回霍集占自庫車敗遁定邊將軍兆惠往擒剿 命納穆扎爾爲靖逆將軍與三泰等統索倫察哈爾及健銳營官兵往會兆惠軍兆惠軍至葉爾羌令副都統愛隆阿侍衛奎瑪岱以兵來迎納穆扎

爾遣愛隆阿先還自與三泰奎瑪岱乘夜進期以黎明趨程至兆
惠軍營隨行二百騎猝遇賊三千被圍奎瑪岱死之納穆扎爾矢
盡三泰墜馬徒步接戰俱中創陣歿 上嘉憫其忠毅 贈三泰
三等子爵並加 恩授其兄祥泰爲散秩大臣尋 賜祭葬如例
諡果勇入祀昭忠祠回部底定 上追悼納穆扎爾三泰 御製
雙義詩紀其事見納穆扎爾傳尋 命圖形紫光閣 御製贊曰
率二百人共詣軍營臨敵而退甯謂忠誠如早聞信何致殞身不
前不後失二賢臣子佛柱襲世爵及散秩大臣見官阿克蘇領隊
大臣

右 國史館本傳

彰武 奎瑪岱等

彰武滿洲正白旗人官三等侍衛乾隆二十三年隨靖逆將軍納
穆扎爾赴西路軍營七月由庫車城會剿逆回霍集占九月 詔
納穆扎爾往定邊將軍兆惠營兆惠遣巴圖魯三等侍衛奎瑪岱
以兵來迎於是彰武奎瑪岱與藍翎侍衛班泰管站四品參領西
拉布護軍校委署章京齊旺扎布等率騎兵二百餘乘夜進賊眾
三千突至彰武奎瑪岱班泰西拉布齊旺扎布俱從納穆扎爾力
戰矢盡死之納穆扎爾詳大臣傳二十四年參贊大臣承恩毅勇
公明瑞勦霍集占閏六月戰和斯庫魯克山以兵八百破賊六千
殺賊陣亡者前鋒校署前鋒參領薩哈禪烏爾圖納蘇圖佐領委

署參領古嚕扎布前鋒校布特納色津德副護軍校白斐納護軍
委署護軍校額莫根祕齊罕扣祿察布恩額藍翎長圖秉阿三保
任伊三泰阿南保齊里克圖藍翎巴圖魯琳保先後事 聞議卹
詔彰武奎瑪岱俱騰頭等輕車都尉世襲罔替餘俱騰雲騎尉彰
武弟哈什克襲奎瑪岱子索諾保護班泰子那爾蘇保護西拉布
子衮楚克襲齊旺扎布子鄂爾哲伊襲薩哈禪子索成襲烏爾圖
納蘇圖子永泰襲古嚕扎布子色楞襲布特納子六十五襲色津
德子得爾斌襲台斐納子舍紅阿襲額莫根子敏珠爾襲恩額子
綽克圖襲祕齊罕扣子巴雅爾圖襲圖秉阿子喜蘭阿襲祿察布
子巴圖爾襲三保住子果興阿襲伊三泰子達隆阿襲阿南保子

唐素里襲齊里克圖子博勒特襲琳保子富興阿襲奎瑪岱班泰
俱滿洲正白旗人姓烏蘇薩哈禪滿洲鑲黃旗人姓奇塔喇烏爾
圖納蘇圖蒙古正白旗人姓薩爾圖古嚕扎布察哈爾正黃旗人
姓薩拉諾特布特納滿洲鑲黃旗人姓百佳色津德台斐納俱滿
洲鑲白旗人色津德姓瓜勒佳台斐納姓納喇額莫根察哈爾鑲
黃旗人姓巴勒特祕齊罕扣祿察布恩額俱察哈爾正藍旗人特
齊罕扣姓呼拉爾丹祿察布姓哈什克特恩額姓花諾忒圖秉阿
滿洲鑲紅旗人姓薩克達伊三泰阿南保俱滿洲鑲黃旗人伊三
泰姓富察阿南保姓尼瑪察齊里克圖蒙古鑲黃旗人姓布魯特
琳保滿洲正藍旗人姓薩克達西拉布察哈爾正白旗人齊旺扎

布察哈爾正藍旗人三保住滿洲正白旗人姓俱無考

右 國史館本傳

齊旺扎布 拜塔爾等

齊旺扎布察哈爾鑲白旗人姓多羅特由護軍校署散騎郎乾隆二十三年請逆將軍納穆扎爾勦逆回霍集占齊旺扎布從十月赴定邊將軍兆惠軍營途次遇賊那穆扎爾戰歿詳大臣傳齊旺扎布與三等待衛拜塔爾俱死之十一月兆惠分兵撫定和闐霍集占來卻頭等待衛車林扎布噶卜舒同戰歿其在葉爾羌戰死者三等侍衛班第署護軍校沙木巴護軍校車木貝前鋒署護軍校九格空花翎阿濟圖署筆帖式哈爾噶爾泰在和碩戰死者驍騎校署參領端多克在喀拉烏蘇河戰死者護軍校署章京辨德在鄂根河戰死者署驍騎校特木德勒圖護軍校端多克領催署驍

回皇清廟典考卷三十三
騎校圖薩圖護軍署驍騎校達虎前鋒署護軍校車木博驍騎校
卓丹在喀爾滿達班汗部落勦賊戰歿者署驍騎校達爾庫二十
四年七月定邊右副將軍富德追霍集占至伊西洱庫淖爾署護
軍校西固勒特伊力戰陣亡又是年隨大軍追勦逆回至葉爾羌
力戰歿於陣者署驍騎校鄂勒西圖獎賞藍翎達什奇爾扎克什事
聞議卹奉 旨齊旺扎布廕雲騎尉子鄂勒恆額襲拜塔爾廕
雲騎尉子博勒圖爾襲車林扎布廕雲騎尉子額爾精阿襲噶卜
舒廕雲騎尉子烏里卓爾和襲沙木巴廕雲騎尉子完善襲薩爾
庫廕雲騎尉子阿克扎林襲餘卹如例班第察哈爾襲藍旗人姓
察哈沁車木貝達呼爾正黃旗人姓扎古哈爾噶爾泰索倫正白

旗人姓蘇都里曉騎校署參領端多克呼倫貝爾鑲白旗人姓永
西布辨德白都納正紅旗人姓扎思呼爾特木德勒圖達呼爾正
藍旗人姓博林果爾卓丹呼倫貝爾正白旗人姓果爾布薩爾庫
達呼爾正白旗人姓扎木齊克布西固勒特伊察哈爾鑲紅旗人
姓薩爾圖特鄂勒西圖索倫正白旗人姓古魯和爾達什奇爾達
呼爾鑲黃旗人姓敖諾思拜塔爾索倫正白旗人姓都里雅蘇車
林扎布察哈爾正藍旗人姓西扎布噶卜舒呼倫貝爾正藍旗人
姓烏里扎薩克沙木巴察哈爾鑲紅旗人姓博爾濟吉特阿濟圖
姓扎木棍楚布旗無考九格滿洲鑲白旗人姓薩爾巴特護軍
校端多克呼倫貝爾正紅旗人姓果爾圖沙布圖薩圖達呼爾正

紅旗人姓車林多爾默特達虎察哈爾正紅旗人姓查木多沙車
木博呼倫貝爾正紅旗人姓呼圖扎克什廕襲俱無考

右 國史館本傳

扎爾善 西林保等

扎爾善索倫正白旗人姓都拉爾任總管乾隆十九年征伊犁扎爾善隨大軍力戰有功 賜號巴圖魯二十三年隨定邊將軍兆惠追勦回酋霍集占至葉爾羌十月戰於黑水隨三等待衛原任前鋒統領參贊大臣鄂實等襲賊輜重扎爾善與佐領署參領西林保章京署參領簡保驍騎校署參領額克圖護軍校委署參領卓依寬藍翎侍衛法依松阿領催署參領布爾特赫德驍騎校署參領羅爾布領催署章京都倫徹驍騎校署章京穆哈納那爾泰護軍署驍騎校訥齊穆卜爾署護軍校布納爾圖護軍校班珠薩署驍騎校伊色爾圖領催署驍騎校伊林保驍騎校巴扎爾署章京賚三

察領催署護軍校博克前鋒署護軍校根對獎賞藍翎坤濟保領
催委署護軍校扎什奇爾前鋒署驍騎校拉新保皆力戰陣亡事
聞議卹 詔俱廕雲騎尉西林保吉林鑲藍旗人姓伊爾根覺羅
簡保吉林正紅旗人姓烏扎拉額克圖吉林鑲紅旗人姓庫雅拉
卓依寬新巴爾呼正藍旗人姓呼爾拉特法依松阿琿春鑲黃旗
人姓鈕瑚特布爾特赫德達呼爾正黃旗人姓烏扎拉庫羅爾布
索倫正紅旗人姓瑪克丹查都倫徹索倫正黃旗人姓達爾巴圖
穆哈納吉林鑲紅旗人姓蒙武索那爾泰吉林正紅旗人姓瓜勒
佳納齊穆卜爾達呼爾正黃旗人姓索都里布納爾圖達呼爾正
黃旗人姓敖拉班珠薩達呼爾正黃旗人姓瓦爾喀伊色爾圖索

倫鑲藍旗人姓都拉爾伊林保達呼爾鑲藍旗人姓格根巴扎爾
巴爾呼正藍旗人姓呼爾拉特賚三察索倫鑲白旗人姓赫音博
克達呼爾正黃旗人姓精奇里根對察哈爾鑲紅旗人姓卓忒坤
濟保達呼爾正黃旗人姓敖拉扎什奇爾拉新保俱達呼爾鑲黃
旗人姓敖諾恩製俱無考

右 國史館本傳

皇朝通志卷之三十一

三十一

宗室車爾登 達什車凌等

宗室車爾登鑲紅旗人官健銳營前鋒參領乾隆二十三年從定邊將軍兆惠督各路兵進剿回酋布拉呢敦霍集占由阿克蘇直抵葉爾羌屢敗賊眾賊竄庫車城十月謀知賊輜重屯城南英表奇盤山兆惠鼓兵進車爾登從之散秩大臣達什車凌率前隊進謀取道城東黑水襲之半渡橋圯賊二萬餘蜂至車爾登達什車凌力戰陣亡同死者戶部員外郎兼佐領赫泰戶部筆帖式德成藍翎侍衛豐泰原任參領遲維璧時西甯鎮總兵高天喜與副總管委署營總伊林阿總管賽沙爾率後隊兵督修黑水橋聞大軍被圍捨橋工往救天喜伊林阿賽沙爾同歿於陣天喜詳見大臣

傳議卹車爾登赫泰德成豐泰伊林阿賽沙爾俱廕雲騎尉維璧
係效力贖罪之員例無廕襲給卹銀入祀昭忠祠車爾登子景志
襲達什車凌弟彥扎布襲赫泰子廣鶴襲德成子永在襲豐泰子
和昌襲伊林阿賽沙爾襲俱無考赫泰滿洲正紅旗人姓赫舍里
德成滿洲正紅旗人姓佟佳豐泰滿洲正白旗人姓瓜勒佳伊林
阿滿洲鑲黃旗人姓莫爾哲吉勒達什車凌蒙古正紅旗人姓克
什克特賽沙爾蒙古正白旗人姓阿布拉吉勒忒維璧正白旗漢
軍

右 國史館本傳

瑯綽爾圖 甯古禮等

瑯綽爾圖滿洲鑲黃旗人姓薩瑪爾吉由護軍於乾隆十三年隨征金川有功洊升二等侍衛 賜巴圖魯名號二十三年隨定邊將軍兆惠剿逆回霍集占十月戰於葉爾羌瑯綽爾圖率前隊誘敵從之者巴圖魯二等侍衛甯古禮三等侍衛白達爾藍翎侍衛莫尼察特克哈什哈 密濟護軍委署護軍校巴爾達前鋒委署驍騎校鄂濟爾圖俱力戰陣亡瑯綽爾圖陷賊不屈死十一月參贊大臣舒赫德分遣軍安撫和闐等六城霍集占遣逆黨阿卜都克勒木等寇和闐藍翎署驍騎校鄂博隨大軍敗之歿於陣先後事 聞議卹 詔瑯綽爾圖廕雲騎尉子孔忠阿襲甯古禮白達

爾莫尼察巴爾達鄂濟爾圖鄂博俱廢雲騎尉甯古禮子富甯襲
 白達爾子齊齊渾襲莫尼察子森必爾圖襲巴爾達子徹林巴爾
 襲鄂濟爾圖弟車里木巴爾襲鄂博子達爾巴蓋襲特克哈什哈
 特密濟廢襲俱無考甯古禮滿洲正黃旗人姓富察白達爾莫尼
 察俱滿洲正白旗人姓墨爾丹特克哈什哈特密濟俱蒙古正紅
 旗人巴爾達鄂博俱蒙古正藍旗人鄂濟爾圖察哈爾正黃旗人
 姓俱無考

右 國史館本傳

高天喜 子仁等

高天喜甘肅西甯人由行伍拔把總乾隆二十一年從征西路軍營有功擢保甯堡守備二十二年正月隨參將邁斯漢援副將軍兆惠於伊犁路遇噶勒雜特賊百餘天喜擊殺之獲其駝馬聞兆惠被圍欲馳救邁斯漢怯不進巴里坤辦事大臣雅爾哈善奏革邁斯漢職 上嘉天喜奮勇效力 命卽代邁斯漢爲參將十二月遷金塔協副將二十三年三月追擊喀喇沁宰桑恩克圖等於庫隴癸山乘夜搗礮登敗賊眾 諭部優敘五月擢西甯鎮總兵授領隊大臣十月隨大軍赴葉爾羌剿逆回霍集占將軍兆惠以賊輜重屯城南取道城東往襲畱天喜督修黑水橋師渡未及半

賊突遮天喜聞兆惠陷陣中亟舍橋衝入鏖戰遂與原任前鋒統領鄂實原任副都統三格侍衛特通額俱歿於陣事 聞 諭曰高天喜奮勇殺賊盡瘁捐軀深可憫惻著照一品大臣例賞給卹典尋 賜祭葬諡果義入祀昭忠祠 恩賞騎都尉又一雲騎尉世職 御製詩惜之曰始由小校出從征優擢奇雄至總兵畱後修橋恥苟活復前入陣遂捐生綠旗中止一人實絕域外傳千古名裏血結纓甯讓古詩非獎勇獎忠誠二十四年 諭曰原任總兵高天喜隨將軍兆惠攻勦逆回奮勇殺賊捐軀效命已加恩賜恤念其家本寒微自隸行閒以勤勞疊膺擢用雖躋方鎮歷任未久其妻子之在甘肅者尤宜格外優卹著總督吳達善於藩庫內

賞給銀一千兩以資養贖仍不時加意照看伊子應行引見時卽
奏明送部候朕酌加錄用以示獎勞勸功之典二十五年回部平
命圖形紫光閣 御製贊曰爪牙之將用不拘資感予特達效命
何辭百戰百進義弗旋踵怒則面赤是謂血勇天喜長子仁於乾
隆三十三年三月襲世職授藍翎侍衛尋發本省以守備用十二
月補涼州鎮標左營守備三十七年引 見請隨征金川 諭曰
原任西甯鎮總兵高天喜前在西路軍營奮勉出力臨陣捐軀勤
勞可憫伊子守備高仁預保引見奏懇四川軍營效力著交與溫
福聽候差遣遇有都司缺出卽行補用尋授安西提標右營都司
三十八年隨勒昔嶺及達札克角屢敗賊眾會木果木軍營潰仁

赴援戰歿 賜卹如列入祀昭忠祠子勇忠襲世職候補遊擊天喜次子人傑由武舉於乾隆三十七年 恩賜一體殿試成武進士授監翎侍衛四十一年發本省以都司用四十三年補安遠營都司四十六年隨勦撒納爾逆回於華林寺力戰被創四十八年遷陝西提標右營遊擊四十九年偕總兵蘇林等勦石峯堡逆回復被創 諭獎其奮勇 賜戴孔雀翎尋遷蘭州城守營參將五十年差赴西甯被雷震卒子勇臣廕千總

右 國史館本傳

高總兵天喜其先爲準噶爾部人雍正中爲我兵所擄有高姓者撫以爲子故冒其姓焉雙額凸出鬚髯蝟刺每飲酒日以石計猶

不醮然當兆文毅公被困濟爾哈朗時數月音問不通當事者遣使偵之時風雪凜然人皆憚行惟公慨然應命往返數千里以十日還卒通兆公之信 上大喜立擢遊擊未逾年卽任至總兵官兆文毅公復被困黑水公率本部兵援之力戰而死 上甚悼之

右錄宗室昭棟撰

廣東省立第一中學

附

鄂實

鄂實滿洲鑲藍旗人大學士鄂爾泰第二子嗣其叔父御史鄂禮
後乾隆元年由廕生授三等侍衛十三年命往金川軍營授二
等侍衛十六年遷頭等侍衛十八年擢蒙古正紅旗副都統二十
年調滿洲鑲藍旗副都統兼管健銳營鄂實兄鄂容安時以參贊
大臣於伊犁陣亡鄂實請從征許之會準噶爾已故台吉達什
達瓦之妻率屬來歸命鄂實齎茶幣迎賚之卽赴西路軍營爲
領隊大臣達什達瓦妻尋請選所屬兵由珠勒都斯協剿叛賊阿
睦爾撒納逆黨諭鄂實同內大臣厄爾錐音率之進剿二十一
年正月授參贊大臣閏九月命還京授左翼前鋒統領仍兼副

都統二十二年正月復赴西路軍營授參贊大臣六月定邊將軍成衮扎布檄擒叛賊扎那噶爾布尼瑪等以地險馬疲中道而返諭曰若謂地險則賊眾何以能行若謂馬疲豈賊之馬獨能壯健鄂實等自應尋蹤追襲卽不能盡行剿滅而收其牲隻捉生取路自可前往何至撤回著查明覆奏鄂實等尋派兵二百令侍衛濟塞布副總管莽蘇爾等剿賊 上以鄂實不能親往 申諭詰責于二月降藍翎侍衛自備資斧在軍營效力是月扎哈沁賊哈爾勒拜等遁往瑪納斯河源鄂實追戮賊百四十餘獲牲械甚多定邊將軍兆惠以 聞 諭曰此次進剿正值隆冬大雪之時馬力自當疲乏尙能剿賊奏功使去年進兵若此何患無成彼時鄂實

係參贊大臣有事但諉之將軍不加策勵今自知負罪直前勦賊
朕深悉其隱著加恩授三等侍衛二十三年三月哈爾勒拜竄伏
額卜推河其黨達爾扎巴朗聚牧鄂實同侍衛老格等掩擊生擒
哈爾勒拜戮賊八十餘師次闖勒奇鄂實復同侍衛納蘭圖勦賊
巴爾達穆等俘三十戶收其牲械以歸 諭部議敘十月隨將軍
兆惠勦逆回霍集占於葉爾羌三戰殺賊甚多賊竄入城不出謀
賊輜重屯城南英我奇盤山謀取道城東乘虛往襲偕總兵高天
喜原任都統三格侍衛特通額等渡黑水未半橋圯賊悉眾拒鄂
實等力戰俱歿於陣事 聞 諭曰鄂實等奮勇殺賊盡瘁捐軀
深可憫惻鄂實著照伊任前鋒統領從優議卹尋 賜祭葬諡果

壯入祀昭忠祠 恩賞騎都尉又一雲騎尉世職子鄂瀾襲二十
四年回部平 命圖形紫光閣 御製贊曰其兄殉節其弟認使
欲報兄讐固請不已黑水之挫復以捐身超雪前罪賞延後昆

右 國史館本傳

三格

三格滿洲正白旗人姓棟鄂氏父訥親官至副都統乾隆二年三格由生員授藍翎侍衛洊授二等待衛十八年遷鑲白旗蒙古副都統十九年四月調三姓副都統五月調黑龍江副都統尋命領索倫巴爾呼兵三千赴西路軍營二十年四月分領第三隊索倫兵由西路進剿六月同都統銜策楞駐巴里坤辦事八月逆賊阿睦爾撒納叛其黨阿巴噶斯哈丹掠臺站諭同策楞防剿九月仍留巴里坤時策楞爲參贊大臣奏俟兵械齊備進剿上以策楞怯懦逮問三格係領隊大臣一意推諉亦革職畱軍營效力二十一年二月管理特納格爾臺站諭曰三格自革職後效力

軍營尙屬黽勉著加恩給副都統銜以示鼓勵九月補正白旗蒙古副都統十一月以兵二百接阿卜達禮託賴及阿察郭勒臺站擒戮呼爾璠賊眾五十餘十二月勦呼爾璠台吉賽音伯勒克等游牧於喀拉烏蘇盡收其駝馬 諭部議敘給三等輕車都尉世職尋隨大軍赴木壘烏蘭烏蘇科舍圖搜緝叛賊巴雅爾及扎哈沁游牧得 旨嘉獎 賜玉韞荷包鼻煙壺二十二年二月同侍衛圖倫楚奇徹布等由朱爾都斯進勦先是定邊將軍成衮扎布檄三格進勦賊扎那噶爾布未成擒九月我兵至博羅和羅遇叛黨額林沁達瓦等百餘戶三格突擊之適布魯古特台吉琿齊呼爾璠台吉達瓦斬扎那噶爾布赴總管端濟布營詐降並請招額

林沁達瓦三格信之遽撤兵還未幾琿齊等遁 敕將軍兆惠勘
奏兆惠奏三格受欺狀 命革副都統及世職以兵丁效力二十
三年隨將軍兆惠剿逆賊霍集占於葉爾羌至黑水被圍偵賊輜
重積城南謀由城東渡轉戰往取賊旅拒三格與原任前鋒統領
鄂寶侍衛特通額總兵高天喜力戰俱歿於陣事 聞 諭曰三
格奮勇殺賊盡瘁捐軀深爲憫惻著照伊原任副都統從優議卹
尋 賜祭葬入祀昭忠祠諡剛勇給騎都尉兼一雲騎尉世職以
其子薩炳阿襲二十五年 命圖形紫光閣 御製贊曰琿齊潛
遁疏防降謫從軍贖罪每戰必力黑水殞命豁罪論功圖像紫光
表忠無窮

國史館本傳

右 國史館本傳

三

張凌霞 宋士印等

張凌霞山西太谷人乾隆二年武進士 殿試一甲二名授二等侍衛八年選授福建督標右營參將十二年擢中軍副將十三年建甯土賊魏見聚眾滋事凌霞捕賊有功十五年擢雲南開化鎮總兵十六年奏劾提督冶大雄以嫁女受將備賀儀 上嘉其所奏據竇革大雄職十八年總督碩色奏凌霞紛更營務不能靜鎮降藍翎侍衛十九年復劾其總兵任內侵蝕俸餉革職擬罪如律二十二年奉 旨發往伊犁軍營效力二十三年以署守備隨定邊將軍兆惠勦逆回霍集占十月十三日兆惠被圍於黑水凌霞奮擊殺賊數十負重傷歿西甯鎮總兵高天喜援兆惠戰歿自有

傳千總宋士印張進朝把總王成玉外委把總林如茂張洪印衝入重圍俱力戰歿時甘肅提標千總委署左營守備馬英德西甯鎮哈拉庫圖爾守備彭承緒把總王珍白塔營外委千總武公延外委把總李印伏與逆黨阿布都克勒木等戰陣亡二十四年正月定邊右副將軍富德援兆惠敗賊於呼爾璊提標把總朱天佑力戰陣亡先後事 聞議卹奉 旨凌霞照守備陣亡例議卹廕衛千總子爾清襲英德承緒俱廕千總士印進朝成玉天佑俱廕把總餘卹如例英德甘肅人承緒四川丹稜人乾隆十三年武進士珍甘肅武威人印伏甘肅甯夏人士印甘肅張掖人進朝甘肅固原人成玉甘肅張掖人如茂甘肅固原人洪印甘肅甯朔人天

佑甘肅高臺人

右 國史館本傳

百五十四人姓名不詳

卷三十三

四

三都布 伯祿等

三都布蒙古正白旗人姓圖博忒官頭等侍衛乾隆二十三年從副將軍富德出師回部二十四年正月初六日至呼爾琿賊眾遮戰大軍奮擊五晝夜初十日逆酋布拉呢敦脅中槍傷昇入城賊眾大敗三都布陣亡同死者章京委署前鋒參領伯祿佐領署前鋒參領布親徹六品官玉穆六品官署參領查白克查布護軍校委署章京車布登領催委署章京莽額圖扎庫齊藍翎侍衛索卜廷查護軍校策布騰領催委署護軍校密濟特策林色楞扎布奇里穆領催委署驍騎校噶濟保額布克尼堪岱喀坦保烏爾翰伊巴袞齊事 聞議卹奉 旨俱廢雲騎尉三都布子額勒珠爾襲

查伯克查卜子德勒格爾襲餘襲無考伯祿伯都納正黃旗人姓
九蘇查白克查卜察哈爾正紅旗人姓綽羅斯扎庫齊吉林正紅
旗人姓瓜勒佳策布騰察哈爾鑲紅旗人姓鄂托郭忒密濟特新
巴爾呼鑲白旗人姓永西布色楞扎布察哈爾鑲白旗人姓阿布
哈薩噶濟保達呼爾鑲黃旗人姓敖諾思額布克巴爾呼鑲白旗
人姓都爾噶察尼堪岱索倫鑲黃旗人姓薩滿呼喀坦保索倫正
白旗人姓薩木哈烏爾翰吉林正紅旗人姓庫德伊巴袞查索倫
正紅旗人姓瑪克丹查布親徹呼倫貝爾正白旗人王穆察哈爾
正白旗人車布登察哈爾鑲紅旗人莽額圖呼倫貝爾正藍旗人
索卜廷查呼倫貝爾正白旗人策林察哈爾鑲黃旗人奇里穆察

哈爾鑲白旗人姓俱無考

右 國史館本傳

同車者其類省不系

三

國朝耆獻類徵初編卷三百五十一目錄

忠義二十一

拉什扎木素 奎素德等

德舒 素勒登額等

恆斌 馬成龍 江紀等

王呈瑞 子宗祐 馬子健等

毛大經 徐斌等

專塔 素泰等

蒙德 佛住等

珠魯訥

胡邦佑 許景淹等

明瑞

扎拉豐阿 觀音保 雷保 全祿等

德福 許斌 曾榮國等

占闢納 納蘭圖等

董璠 陳起龍等

富成 王振海等

國朝書目類編卷之三十三

普甯 六十一等

國朝耆獻類徵初編卷三百五十一

通奉大夫前署江西巡撫江西布政使司布政使湘陰李桓輯

忠義二十一

拉什扎木素

奎素德等

拉什扎木素察哈爾正紅旗人姓博爾濟吉特由四品台吉兼護軍校委署參領乾隆二十四年從參贊大臣承恩毅勇公明瑞剿逆回霍集占閏六月戰和思庫魯山以兵八百敗賊六千拉什扎木素死焉同死者雲騎尉佐領委署營總奎素德二等待衛控楚克扎布藍翎侍衛巴彥總管委署營總錦濟哈爾領催委署參領圖勒喀岱隆阿領催委署章京扎奇納莽喀爾伊布袞佐領巴爾

察海驍騎校果蘭泰領催獎賞藍翎委署驍騎校諾和爾圖護軍
委署護軍校喀拉奇塔特領催委署護軍校阿拉塔依扎什領催
委署驍騎校布爾多什拜拉圖朋楚克獎賞藍翎阿納查布爾哈
查喀克察事 聞議卹 詔拉什扎木素廕雲騎尉子袞布徹林
襲奎素德加一雲騎尉控楚克扎布無嗣停襲餘俱廕雲騎尉奎
素德達呼爾正黃旗人姓莫爾登錦濟哈爾索倫鑲黃旗人姓烏
扎拉圖勒喀達呼爾正黃旗人姓敖拉岱隆阿索倫正白旗人姓
多拉爾扎奇納達呼爾鑲黃旗人姓敖諾思莽喀爾索倫鑲藍旗
人姓依卜哲爾果蘭泰達呼爾正黃旗人姓敖扎拉庫諾和爾圖
達呼爾正白旗人姓布喀達渾喀拉奇塔特察哈爾鑲紅旗人姓

巴爾圖魯特阿拉塔新巴爾呼正白旗人姓喚差薩克達依扎什
察哈爾鑲藍旗人姓額綽忒布爾多什索倫正紅旗人姓多拉爾
拜拉圖索倫鑲紅旗人姓喀哈爾阿拉查索倫正白旗人姓那木
多克塔什布爾哈查索倫鑲紅旗人姓多拉布魯特襲俱無考控
楚克扎布巴彥朋楚克俱厄魯特人依布袞布特海正紅旗人巴
爾察海喀爾喀土謝圖汗部落人喀克察察哈爾正藍旗人姓襲
俱無考

右 國史館本傳

國朝詩林卷之二十一

十一

德舒 素勒登額等

德舒滿洲鑲紅旗人姓舒舒覺羅由繙譯舉人授內閣中書游升吏部郎中乾隆十三年隨征金川有功擢太常寺卿授安徽布政使調任福建二十二年以母憂回旗旋奉命赴巴里坤軍營二十三年從定邊將軍兆惠剿逆回霍集占於庫車城二十四年八月帥師剿瑪哈沁至巴爾坤和碩奮勇先進中鳥槍陣亡從死者河州鎮秦州營遊擊素勒登額筆帖式伊楞額驍騎校永保署驍騎校德福是役隨參贊大臣阿桂剿瑪哈沁戰死者雲騎尉署參領策靈旺布佐領署參領克普爾署章京和爾本驍騎校老格事聞議卹詔德舒廕騎都尉素勒登額加贈一級廕守備餘俱

廕雲騎尉德舒子福祿襲素勒登額從子永福襲伊楞額嗣子富
興襲德福子莽喀襲老格孫卓泰襲永保策靈旺布克普爾和爾
本襲俱無考素勒登額滿洲正白旗人姓他塔喇伊楞額滿洲鑲
白旗人姓瓜勒佳永保吉林鑲白旗人姓烏蘇德福滿洲鑲白旗
人姓舒穆祿克普爾索倫正藍旗人姓葉卜哲里老格滿洲正黃
旗人姓伊爾根覺羅策靈旺布察哈爾正白旗人和爾本喀爾喀
親王德親扎布旗分人姓俱無考

右 國史館本傳

恆斌

宗室侍衛公恆斌字紉文 太宗文皇帝第十子輔國公翰塞裔也充三等侍衛父薩喇善官吉林將軍以事謫伊犁方臥病不起公奮然曰古人有身代父役者吾何不爲遂陳情當事乞代奏有旨責其沽名褻職仍 命從父行 純皇帝殊惻然也公竟行晝夜侍父疾至廢寢食父每怒其愚公無幾微怨抵伊犁父疾以瘳阿文成公時爲伊犁將軍賢其行尋哈薩克新附遣使入貢奉旨擇賢員伴送阿公因命公充伴送官入京途閒馭陪臣忠信得大體 上召見加慰藉仍授三等侍衛畱京供職蓋 特恩也公請畢伴送事仍往伊犁侍父 上允之擢二等侍衛三十年烏什

回人叛公隨明忠烈公瑞由伊犁倍道進抵烏什戰屢捷三月朔
領兵爲左翼陣城南山下接戰賊更麇至公奮勇邀擊之所向披
靡賊懼隱城壕誘公公怒馬前萬鏃齊發不及禦歿於陣事聞
上軫惜因宥其父罪還京 賜卹如例廕雲騎尉

右錄宗室昭棟撰

馬成龍 江紀等

馬成龍河南開封人寄居雲南由行伍洊擢廣羅協都司遷曲尋
鎮中營遊擊乾隆三十一年隨總督楊應琚征緬甸擊賊塌尾江
陣歿同死者雲貴提標左營守備江紀曲尋鎮中營把總武遜賊
踞新街廣羅協都司劉天祐永順鎮右營把總陸其構奮力擊賊
俱歿於陣官兵分勦隴川嶺岡砦戶臘撤諸處雲南撫標右營千
總方沛永北鎮把總蕭玉吉馬維藩尋霑營外委李金榮並擊賊
隴川昭通鎮外委李奇擊賊嶺岡砦鶴慶鎮千總蕭曙擊賊戶臘
撤先後俱陣歿三十二年雲南普洱鎮把總韓榮擊賊打樂陣歿
其戰九龍江土鍋砦死者普洱鎮把總周殿英戰布濟死者四川

平番營外委姜廷杖事 聞議卹 詔成龍廕千總紀遜天祐其
構沛玉吉維藩曙榮殿英俱廕把總餘卹如例紀貴州遵義人遜
直隸宣化人寄居雲南南甯天祐山西右玉人其構雲南永昌人
沛雲南昆明人玉吉雲南永北人維藩雲南雲南府人金榮雲南
南甯人奇貴州威甯人曙雲南鶴慶人榮殿英俱雲南普洱人廷
杖四川茂州人

右 國史館本傳

王呈瑞子宗祐
馬子健等

乾隆三十二年四川建昌營守備王君呈瑞偕守備馬子健隨遊擊蘇爾相素克津泰入緬責貢以降聞於朝於是籍武德家獄其孤宗祐又十年遊擊蘇爾相遁歸白其事於朝曰蘇爾相囚素克津泰縊王呈瑞馬子健死於江皆不屈也於是官宗祐以完其家實爲武義君又十八年武義以清江營守備將兵黔楚間當苗眾始立功尋以都司將兵勦教匪於蜀以遊擊將兵靖永綏已從征興義苗平之勞績無算賞賚無算然寢食戈刃間凡三年裹創吮血虐以寒暑病殞歿不支未嘗一日休也嘉慶三年七月四日武義在蜀營攻王三槐於安樂坪大軍失利提督死武義收

散卒以寡搏眾身被數十劍力屈伏地北面大呼曰不能報君
恩矣遂卒於陳於是武德以忠節殉於緬其子武義以忠節殉於
蜀前後聞於朝大白於天下嗟乎奉使貴不辱命降不可也雖
不死可也使武德不死與蘇爾相遁歸雖至今存無益也武義艱
於獄勇於陳屢立戰功富貴而雍容雖白首統戎行可也然觀其
戰先士卒篤病不少懈其心以爲彰前名報國恩出萬死不獲
一生可也夫忠節天之榮名也其父取之其子又取之奉使臨敵
人臣之大端也其父緬頌之其子蜀頌之太平之時而以忠節著
尤不易之遭際也天何厚於王氏父子哉武德故黔人官於蜀遂
家於蜀之西昌武義官於黔葬於黔復家於黔之思南武義子振

基廕雲騎尉清慎有家法介安化令朱君以文請澤謂兩世忠節
宜誅也其辭曰

武德矯矯握節不屈魂趨金沙心向丹闕萬里孤臣不求人知忽
暴於朝天實爲之孤臣有子不絕如綫拜恩僭爵臥戈枕劍
凡師之捷在義與勇武義一呼兵躍馬駭首首獲魁積甲嶙峋武
義顧之寵賚又新先登陷陳病困不已生爲國士死乃肖子金
夷重夷有肉若糜血碧蜀天化爲虹霓鬼雄南鷺直叩阿瓦歸來
歸來同食方社卽酒載清豐碑峩峩忠乎孝乎所得孰多朱波
獻象岷絡如井如何瓊邪不幸斯幸烏江熊熊掌溪來同忠孝之
廬千古以風

國朝詩林卷之三十三

右誄程恩澤撰

毛大經 徐斌等

毛大經浙江西安人乾隆二十六年武進士授三等侍衛三十年發往雲南以遊擊用三十一年緬匪滋擾大經以提標左營遊擊防禦整控江及虎踞關鐵壁諸處三十二年正月總督楊應琚派赴猛卯江擊賊陣歿開化鎮左營都司徐斌景蒙營千總李鐔把總楊魁騰越協把總朱才達永北營把總張堅提標前營外委楊楷鶴麗鎮外委劉春盛景蒙營外委王英同時戰歿十一月貴州銅仁協左營千總岳屏解馬赴滇時官軍擊賊老官屯屏同雲南提標前營把總仲全貴州鎮遠鎮把總高升台拱營外委王應朝四川提標中營外委劉君相並戰歿貴州天柱營把總方應恆遞

送奏摺至錫箔遇賊死之三十二年正月雲南楚姚鎮守備高乾
四川重慶鎮標中營守備龔殿安雲南昭通鎮千總馬廷元擊賊
猛密皆陣歿貴州安籠鎮把總李忠外委黃大任並擊賊猛拜陣
歿先後事 聞議卹奉 旨大經廕衛千總子家信襲斌殿安乾
俱廕把總廷元忠等各加贈一級廕把總餘卹如例斌雲南昆明
人罇雲南景東人魁雲南蒙化人才達雲南騰越人堅雲南永北
人楷雲南太和人春盛雲南鶴慶人英雲南景東人屏貴州銅仁
人全雲南太和人升貴州安順人應朝湖南沅州人君相四川新
都人應恆貴州大定人乾四川成都人殿安山東歷城人廷元雲
南恩安人忠大任俱貴州南籠人

右 國史館本傳

國史館本傳 卷二十一 忠義 二十一

174-108

7

莫澗 扈璉等

莫澗福建上杭人乾隆十九年武進士三等侍衛二十五年分發雲南以遊擊用二十六年授督標前營遊擊三十二年擢東川營參將總督明瑞調征緬甸四月與督標後營遊擊扈璉同擊賊於木邦璉戰歿澗力竭自盡同時死者臨元鎮左營守備署都司劉紹高右營都司張璋千總張文煥開化鎮千總王敷永順鎮千總王尙義候補千總楊春榮楊含章臨元鎮左營把總馬再興曲靖協把總張成雲開化鎮把總林毓貴楚雄鎮把總聶連登督標把總崔直中四川巫山營把總劉成方重慶鎮中營把總王信雲南督標前營外委王起昌撫標右營外委張禧昭通鎮外委馬廷光

楚雄營外委周室輔楊乾元事 聞議卹奉 旨瀉璉俱廢衛千
總瀉子世隆襲璉弟琚襲紹高璋俱廢把總餘卹如例璉陝西長
安人乾隆十三年武進士紹高雲南鶴慶人璋四川華陽人文煥
貴州安順武舉敷雲南文山人尙義四川邛州人春榮雲南昆明
武舉含章貴州黔西武舉再興雲南建水人成雲雲南南甯人毓
貴雲南文山人連登雲南楚雄人直中籍無考成方四川人信四
川巴縣人起昌禧俱雲南昆明人廷光貴州威甯人室輔乾元俱
雲南建川人

右 國史館本傳

專塔素泰等

專塔滿洲正白旗人姓托和洛官藍翎長乾隆二十二年與署章京素泰俱隨大軍定伊犁以功授雲騎尉世職擢副前鋒參領委署翼長乾隆三十二年十月隨將軍明瑞征緬甸十一月渡打疊江過錫箔至蒲卡西賊伏兵突出領催署章京額林保委署前鋒校揚全署行營前鋒校釋仰保署前鋒校三格泰力戰陣歿進抵蠻結四山環繞賊立十六寨環浚深溝密豎木柵又列象陣堅拒專塔素泰各率所部鼓勇進毀其柵陣歿是役大兵奮勇勦殺無不一當百羣象皆反奔連破賊砦賊棄砦遁雲南提標前營遊擊班第三等侍衛蒙古勒藍翎侍衛克穆訥克前鋒校雙保署前鋒

校七十一副前鋒校神保住前鋒藍翎長富森布常貴俱爭先陷陣戰歿事 聞議卹 詔專塔素泰俱廕騎都尉專塔子達薩訥襲素泰子達爾布襲班第廕衛千總子保旺襲揚全等俱廕雲騎尉揚全子福保襲釋伽保子瑚琮額襲三格泰弟舒明襲克穆訥克子喇嘛扎卜襲雙保弟雙柱襲七十一子達春襲神保住子關索住襲富森布子蘇明阿襲蒙古勒常貴無嗣停襲額林保襲無考素泰蒙古正紅旗人姓鄂拉額林保達呼爾正黃旗人姓蘇都哩揚全滿洲鑲白旗人姓伊爾根覺羅釋伽保常貴俱滿洲鑲藍旗人姓鈕祜祿三格泰滿洲正紅旗人姓薩哈爾察班第滿洲正白旗人姓佟佳蒙古勒蒙古鑲黃旗人姓厄魯特克穆訥克蒙古

正黃旗人姓額爾哲特雙保滿洲鑲黃旗人姓李佳七十一滿洲
正紅旗人姓博和哩神保住蒙古正藍旗人姓巴魯特富森布蒙
古鑲紅旗人姓卓爾特

右 國史館本傳

國朝名臣言行錄

卷三

蒙德 佛住等

蒙德滿洲鑲白旗人姓薩克達由副護軍參領游擢貴州大定協副將乾隆三十二年十二月隨雲貴總督將軍明瑞征緬甸取道猛籠土司境就糧遇賊擊敗之旋趨猛密賊以眾拒蒙德率所部奮勇殺賊陣歿同時死者前鋒參領佛住副前鋒參領達哈布副護軍參領彤家寶護軍校烏勒登額大兵移駐小猛育時參贊大臣額勒登額頓兵旱塔退回虎踞關觀望不進三十三年正月賊偵知明瑞孤軍無援悉眾攻圍貴州遵義協副將五十四藍翎侍衛噶克查巴圖魯倭星額前鋒校德祿署前鋒校色欽藍翎長業楞額齊哩嗎實迪俱奮勇衝圍殺賊陷陣歿藍翎長景福傷重尋

國朝三才傳卷之三十三
三
歿時賊眾數萬犯木邦遊擊俊德與戰力竭死之先後事 聞議
卹奉 旨蒙德五十四加二級廕守備佛住達哈布彤家寶烏勒
登額倭星額德祿色欽業楞額齊哩嗎實迪俱廕雲騎尉景福廕
七品監生俊德廕衛千總蒙德子袞扎布襲達哈布子愛什拉襲
烏勒登額子廣慶襲五十四子佛保泰襲倭星額弟倭楞額襲德
祿子阜喜承襲業楞額子英敏襲齊哩嗎子德福襲實迪子諾音
布襲景福子錫拉布襲俊德子興義襲佛住彤家寶色欽襲俱無
考佛住滿洲正紅旗人姓鈕祜祿達哈布滿洲鑲紅旗人姓伊拉
里彤家寶滿洲正紅旗人姓佟佳烏勒登額滿洲鑲黃旗人姓瑚
錫哈里五十四滿洲正黃旗人姓富察倭星額滿洲鑲黃旗人姓

瑚魯德祿滿洲鑲紅旗人色欽滿洲正黃旗人俱姓納喇業楞額
滿洲鑲黃旗人姓費莫齊哩嗎蒙古正藍旗人姓克勒特實迪蒙
古鑲白旗人姓他塔喇景福滿洲正白旗人姓烏蘇俊德滿洲鑲
黃旗人姓佟佳

右 國史館本傳

國朝三才圖會卷之三十一

一

李全

李全山西陽曲人由行伍拔補撫標右營把總乾隆十年遷文水
縣城守營千總十六年俸滿引見命在巡捕營效力二十年
擢巡捕中營守備二十三年遷南營遊擊二十四年遷南營參將
二十六年三月軍政列一等五月諭曰李全前在兵部開列時
卽欲升用因其熟悉地方營務是以未經補放著加恩賞給副將
職銜仍管理南營參將事務三十二年擢雲南永昌鎮總兵九月
從將軍公明瑞剿緬甸由宛頂木邦進十一月至蠻結賊立砦山
岡列象陣明瑞令全同領隊大臣扎拉豐阿據東山梁張犄角擊
賊大破之十二月師至天生橋乘霧渡河全率左哨兵直薄賊壘

賊驚潰三十三年正月轉戰至蠻化賊蜂至衝突大隊全戰益力
受槍傷越數日卒事 聞 命優卹入祀昭忠祠並從祀旌勇祠
給騎都尉加一雲騎尉世職 賜祭葬子萬年襲官至廣西右江
鎮總兵

右 國史館本傳

珠魯訥

珠魯訥滿洲鑲白旗人姓那爾氏乾隆二十年繙譯舉人二十一年以筆帖式在軍機處行走遷吏部主事二十四年遷員外郎二十七年調戶部顏料庫三十一年正月擢湖廣荊州右翼副都統尋授禮部侍郎五月調工部兼正黃旗滿洲副都統十月署戶部侍郎三十二年正月兼署兵部八月 命爲參贊大臣駐雅爾尋赴雲南軍營統綠營兵四千駐木邦土司獲團自莽什率七百餘人來降請於清水河招商復業珠魯訥派弁兵彈壓十二月擺夷猥歇等五十人突出竹木林前鋒瑚什布把總姚俊擊之遂棄械降珠魯訥鞠得猥歇等爲緬賊守城狀盡斬以徇已而賊伏于家

國朝通志卷之三十三
若劫我偵事兵珠魯訥派巴圖魯侍衛色布騰效力總兵索柱等
乘夜搜捕賊潛遁派色布騰渡打疊江錫箔城抵將軍明瑞營復
令巴圖魯茂漢探錫箔城抵松砦路得 旨嘉獎將軍明瑞建橋
打疊江兵得濟珠魯訥防賊潛毀令參將王棟領前鋒護軍兵千
五百駐守疏入報 聞三十三年正月疏言自木邦至阿瓦城呼
橋錫箔結工宋賽順貴應設五臺錫箔鄰江險要派滿洲兵四百
綠營兵三百餘四臺派滿洲兵二百綠營兵二百每臺撥馬六十
以壯聲援 上嘉之時珠魯訥派索柱帶兵千人駐天生橋錫箔
江等處賊掩至參將王棟等接戰兩日賊驅眾運木造橋我兵衝
擊賊乘勢毀錫箔橋索柱等退守葫蘆口賊乘勢擾木邦珠魯訥

派總兵胡大猷領兵五百迎擊西山賊守備龔田守領兵二百迎擊東山賊珠魯訥帥兵晝夜攻擊賊詭言退木邦緩我兵未幾賊焚遊擊福珠營綠營兵潰賊夜圍中營珠魯訥手書奏交筆帖式福祿突圍出旋自盡事 聞 諭曰侍郎珠魯訥以參贊大臣駐劄木邦策應軍營因索柱領兵赴天生橋遇賊退回並棄錫箔橋梁不守以致賊匪尾入滋擾木邦珠魯訥悉力拒守與賊相持經十餘日尋以所統兵丁俱係綠營性懦成習見旁近小營失火紛紛潰散珠魯訥獨力不支卽於營內自盡雖與臨陣捐軀者相去一間其情亦屬可憫所有應行優卹之處該部查例具奏 賜祭葬如例 命入祀昭忠祠

國史館本傳

右 國史館本傳

胡邦佑 許景淹等

胡邦佑山東昌邑人父有亮官湖廣衡州協副將邦佑由廕生於乾隆八年授盛京工部主事是年裁盛京各部漢缺補刑部奉天司主事十三年選授福建龍巖州知州引見奉特旨以知府用授浙江甯波府知府二十年丁母憂二十三年服闋補貴州貴陽府知府二十七年以承修南明河無效革職三十年南巡迎鑾奉旨以同知用三十一年選授雲南永北府同知三十二年大軍征緬匪雲貴總督將軍公明瑞委辦糧餉時參贊大臣珠魯訥駐兵木邦邦佑以檄赴明瑞大營經其地三十三年正月初七日賊突至十六日同廣南府經歷許景淹俱隨珠魯訥擊賊以賊

眾兵少被圍邦佑景淹埋餉銀景淹遣家人賈俊齎印信馳報大
營十八日珠魯訥自盡詳大臣傳十九日城陷邦佑景淹死之廣
南營效力武舉方富戰歿事 聞議卹奉 旨邦佑加贈道銜
子瑀廕知縣景淹加贈鑾儀衛經歷廕一子入監讀書餘卹如
例景淹直隸饒陽人富雲南寶甯人

右 國史館本傳

何道深 李應芳等

何道深山西靈石人乾隆二十五年武進士授三等侍衛洊擢貴州提標右營遊擊三十二年十一月隨將軍公明瑞征緬甸由宛頂木邦渡打疊江過錫箔至蒲卡西敗賊伏兵是役死者雲南鶴麗鎮標千總李應芳貴州威甯鎮左營把總李永春大兵進抵蠻結賊立十六寨豎木柵列象陣力拒道深冒矢石攀柵先登火槍中右額紀功第一戰死者雲南提標後營遊擊邵應邨貴州定廣協右營守備程文進貴州長寨營把總文朝元提標外委李應選威甯鎮右營外委萬國榮維西協外委陳學孔大定協把總高欲平外委吳奇四川督標中營外委趙坤大兵分勦蠻化村貴州定

廣協右營千總田義力戰陣歿川北鎮中營把總廖雲腦中石傷尋歿十二月明瑞督兵由天生橋河上流取道猛籠趨猛密擊賊於小猛育道深爲十二營前鋒自平明戰至日中身被數創力竭陣歿四川提標中營守備馬定坤永甯營外委周元儒同受傷並歿三十三年正月賊復聚蠻結臨元鎮左營都司魏嶸陣歿安籠鎮中營守備馬汝良擊賊葫蘆口貴州撫標左營把總宋建勳擊賊大山南坡貴州右定協把總徐世清擊賊虎佈俱陣歿二月鶴麗鎮把總鄭維樹擊賊瓊乍里板貴州提標外委唐玉春擊賊黑水河俱陣歿丹江營外委劉有名齎摺至蠻結軍營遇賊死之安籠鎮右營千總侯升守備馬子健陷賊不屈自盡先後事 閩議

卹何道深加 贈一級廕守備子膺綬襲應芳加 贈一級廕
把總子上林襲永春加 贈一級廕把總弟永貴襲應邨加 贈
一級廕守備子之保襲文進加 贈一級廕衛千總朝元欲平義
雲各加 贈一級廕把總定坤嶸俱加 贈一級廕衛千總嶸子
汝惇襲汝良廕把總建勳世清維樹各加 贈一級廕把總子健
廕衛千總餘卹如例應芳雲南鶴慶人永春貴州威甯人應邨廣
東電白人乾隆二十五年武進士二等侍衛文進貴州安順人朝
元貴州大定人應選貴州安順人國榮貴州威甯人學孔雲南劍
川人欲平奇俱貴州大定人坤四川華陽人義貴州遵義人雲四
川閬中人定坤陝西咸甯人元儒四川越嶲人嶸雲南昆明人汝

良江南松江人建勳貴州貴陽人世清貴州黔西人維樹雲南鶴慶人玉春貴州安順人有名貴州施秉人子健雲南鶴慶人

右 國史館本傳

君諱道深字會源山西靈石縣人以武進士侍衛乾清門出爲貴州提標右營遊擊乾隆三十二年兵部尚書明瑞總督雲貴進討緬甸集諸道兵君初不與調明公聞君訓練營卒勇健有節度可用特檄以其眾至永昌至則果整練異他軍明公善之秋三路出師以軍隨幕府從取木邦破錫箔踰天生橋大戰蠻結先登奪柵殪醜紀功一等又從入至窳乍去賊巢阿瓦城益近賊斷木礮石守隘我師糧少火藥鉛丸盡師旋賊抄其後君爲殿遇山谷險阨

君必奮戰俾師得度至猛域未至猛域前二日君中烏槍夜息有軍校曰君傷重矣賊至日眾道險難與敵盍稱病且逸歸乎君曰賊眾乃將卒致力時也叱之退明日戰益力初明公將中軍趨錫箔別將分左右軍異路進約會師及至猛域兩軍不如約前阻大山賊盡塞蹊隘環圍數重軍殺馬以食三十三年二月丁卯明公令夜拔營起平明賊來邀君立高岡與相拒他軍士從其旁得去君朝戰至日中被數創仆君亡次日明公亦亡事 聞 上以中軍多戰功其沒以無援賜卹特厚左右兩軍死事者殺其制不與之等於是君得 贈武義大夫祀於昭忠祠祭葬卹廕如制君祖龍騰父思義皆 贈中憲大夫夫人梁氏先歿繼配武氏君之赴

永昌也武夫人方孕君沒猛域兩月子膺綬始生君撫士嚴而有
恩其聞檄令二日卽行而顧擇其無子無兄弟者皆勿從沒後軍
皆悲涕以其帶髮返次年 賜葬本邑銘曰

頤與何君眉目清美揖讓温温以與余友佩鞬橫戈徂險而馳急
難舍生義孰與多汾流之側君起厥邑往不生歸銘寔無極

右墓誌銘姚勳撰

明瑞

明瑞富察氏滿洲鑲黃旗人一等公富文子乾隆十四年由官學生襲世爵授二等待衛二十一年四月管理健銳營五月命以副都統銜赴西路軍營在領隊大臣上行走時阿睦爾撒納叛竄哈薩克明瑞隨定西將軍達勒黨阿追之再與哈薩克戰多斬獲上嘉之授副都統二十三年四月追擊推素隆集岩逃人八十餘戶降之殲其拒戰者收駝馬軍器得旨嘉獎之十一月授戶部右侍郎二十四年三月授參贊大臣御前侍衛尋諭曰明瑞自到軍營凡遇戰陣領兵奮勇行走可嘉加恩於見襲公爵加賞毅勇字號授爲承恩毅勇公五月隨將軍兆惠剿逆回霍集占於葉

爾羌敘功 賞雲騎尉世職八月逆酋大小和卓木遁率銳卒九百往追及之於和斯庫魯克山賊眾六千餘負隅固守奮擊之賊大敗尋復恃其馬力來拒陣斬賊五百餘級生擒及傷竄者無算諭交部從優議敘十月 賞戴雙眼花翎二十五年奉 旨明瑞所得之雲騎尉與伊弟奎林承襲明瑞承襲一等承恩毅勇公世襲罔替二十六年伊犁回部蕨功 命圖形紫光閣 御製贊曰椒室懿親年少志雄謂可造就俾學從戎獨出獨入既忠且壯屢列宏勳愜予所望五月授正白旗漢軍都統尋轉左侍郎二十七年三月 詔赴伊犁九月授領侍衛內大臣十月授伊犁將軍二十八年三月敘平定準噶爾及回部功給騎都尉世職哈薩克汗

阿布勒比斯來索逃回伊犁之額魯特明瑞以準噶爾已平額魯特等投回伊犁乃其故土斥責之並請 敕下烏里雅蘇臺將軍一體辦理 諭曰明瑞所辦甚爲得體從前雖無彼此不畱逃人之言但成衮扎布曾將自哈薩克逃出之額魯特給回阿布勒比斯遂欲援以爲例著傳諭成衮扎布等嗣後遇此等事俱照明瑞等所辦較之先是明瑞面奉 諭旨籌辦塔爾巴哈臺駐兵事宜至是奏言屯田兵應駐雅爾城畱馬兵三百照管貿易餘馬兵千二百交領隊大臣於周圍巡查雅爾與伊犁多往返文移請自額敏河沿至巴爾楚克沁達蘭設大卡倫三各駐兵三十其庫克托木嶺等處酌安卡倫則塔爾巴哈臺一帶聲勢相接見今烏魯木

齊駐兵較多於巴里坤請將二處辦事大臣撤回巴里坤提督移駐烏魯木齊總兵移駐巴里坤奏入 詔以烏魯木齊大臣移駐雅爾餘如所請二十九年四月奏請 閱 從之十二月疏言雅爾等處駐兵屯田所需軍器於綠旗兵內挑選匠作購備物料所有臨時添加輓車輛之馬俱於牧羣撥用報 聞三十年二月烏什小伯克賴黑木圖拉等聚眾五百餘乘夜焚掠據城爲變明瑞派副都統觀音保往援旋聞駐烏什副都統素誠自戕卽統兵進時參贊納世通先帶兵至烏什之鄂托巴什觀音保至納世通派守隘不令進勦復行文止明瑞兵明瑞慮觀音保兵旣撥防其進勦兵半係回人及布魯特不可恃仍統兵進奏入 上以所辦甚合

嘉之三月抵烏什賊眾二千餘來犯明瑞與觀音保等擊之奪礮臺七殺賊二百餘負傷入城山險城堅明瑞設防困之復遵旨查奏素誠狂縱激變及納世通凌辱回眾副都統弁塔哈掩飾兵敗狀命尙書阿桂赴烏什傳旨將納世通弁塔哈正法賊困守既久謀夜襲大營我軍偵知之預設備賴黑木圖拉中箭死賊復推其父額巴木圖拉爲阿奇木悉眾死守明瑞簡巴圖魯兵六百餘中夜攜雲梯分道潛往薄其城先登東北隅賊未覺挺刃交下守陴賊驚竄卽舉火繼進循城北至東北毀其堞天明收軍仍偪城築壘斷其樵汲賊糧盡內淩八月疏報稱克復烏什城上以所奏簡略敕明瑞阿桂將入城擒賊情形逐一奏聞尋會奏領兵

築堞圍城原充烏什商伯克沙布勒縛首逆額色木圖拉及助逆
要犯四十二人以獻首逆有名賊犯分別正法其被賊拘及匠孺
婦女萬餘口分起解送伊犁。諭曰賊人戕我大臣官兵以死拒
守及長圍久迫始縛獻首惡希冀苟免誅戮準以天理人情豈復
可赦惟盡以軍法從事始足申國讞而儆愚頑今伊等既從事姑
息著將送往伊犁人等卽交伊二人養贍交部卽嚴加議處又
諭曰素誠等苦累回人各情節從前得之俘囚之口今額色木圖
拉等正犯既經就獲理應嚴訊起覺緣由及素誠所犯是否屬實
使情罪確鑿以成信讞乃伊等一槩置之不問輒將賊黨正法有
是理乎明瑞阿桂此次辦理錯謬不得不交部議處以示懲創其

在軍將兵丁仍交部分別議敘部議革明瑞阿桂職 詔從寬
前任明瑞尋奏酌留兵五百駐守留原協領伊昌阿侍衛舒明阿
理土作原御史忠德理糧餉調巴里坤遊擊陳堯典理屯田得
旨烏什事端滿洲索倫兵無須多駐著留滿洲兵一百名索倫兵
一百名十月會奏回部事宜一阿奇木之權宜分別一格納坦之
私派宜革一回人之差役宜均一都官伯克之補用宜公一伯克
等之親隨宜節一賦役之定額宜明一民人之居處宜別一伯克
等與大臣官員相見之儀宜定議如所請行三十二年緬甸滋擾
總督楊應琚以措置乖方獲罪三月 命明瑞爲雲貴總督兼兵
部尙書議政大臣經理軍務六月奏言永昌騰越至順甯威遠普

洱沿邊土境延袤二千餘里旁途側出處處駐兵卽二三萬眾不
敷分派臣等酌議土境扼要總區如迤東之九龍江迤西之隴川
適中之黑山門應各酌留一營派土練固守委妥員統領選勇幹
馬兵土練不時遠偵遇賊隨時剿逐其小路令總區將弁派人時
往遊巡庶防兵減而聲勢不分至分路進剿臣訪由九龍江一帶
出口至阿瓦賊巢係由東轉南折而西隔越滾弄江下游倍遠新
街水路爲緬匪要地必竭力守禦新街以東俱石礮小澗舟不達
擬於新街上游伐木造船使木片沿江下先聲牽綴大兵自永昌
騰越出口以宛頂木邦一路爲正兵餘臨期相機或分兩路由猛
密等處剋期並進叢雜僻徑隨時出奇設疑使賊疲於奔救無暇

他出窺伺我軍裹糧前進較遞運多節省至奏摺文報黑山門遞放以內仍設臺站卽於進剿官兵內選妥幹勇壯數十齎交黑山門轉遞如經過外夷部落有誠心向化者再於其部落畱兵設站遞送 上嘉之十月授將軍管理總督事務十一月由宛頂木邦進抵日小破賊寨前渡打疊江錫箔卡以西擊敗賊伏兵至蠻結四山環繞賊立十六寨防守用溼木交排實以土環浚深溝外密豎木柵內立象陣伏兵明瑞統兵居中令領隊大臣扎拉豐阿李全居其東觀音保長青居其西賊突出犯西隊觀音保長青奮力勦擊明瑞督本隊兵並進斬級二百餘賊退保柵乃畱兵二千令副都統伍三秦音濟圖達興阿張兩翼以壯聲勢分滿洲綠旗兵

爲十二隊明瑞首先進擊賊驅羣象拒明瑞目傷槍策馬指揮不
少挫官兵奮擊羣象反奔我兵毀柵進無不一當百偏第二柵貴
州藤牌兵王連攀柵躍入縱橫賊隊中擊殺十餘人我軍遂擁入
鼓勇勦殺自申至戌賊棄寨竄斬級二十餘生擒三十四人獲軍
械糧畜無算捷聞諭曰明瑞秉性純誠才優幹濟前者西陲
之役每身先士卒效績宣猷昨歲來京陛見方值緬酋滋事前督
臣調度失宜因令節制雲貴並授爲將軍領兵進勦自任事以來
凡辦理軍營諸事均能悉心籌畫動合機宜自木邦整隊深入於
白小地方統眾毀寨今行次蠻結復親冒矢石殲賊因糧摧堅陷
銳以致目受槍傷猶鼓勇直前克揚我武自此酋眾望風驚潰刻

日直搗賊巢佇聞捷奏朕心深爲嘉慰明瑞見在所襲之公係承
恩世爵今旣屢著殊績自應特沛恩施用示優異著授爲一等誠
嘉毅勇公賞給黃帶紅寶石頂四團龍補服所有原襲承恩公著
伊弟奎林承襲十二月師次革竜地近天生橋渡口賊豫毀兩旁
所植大木於山頂立柵明瑞令達興阿率兵二千仍由大路進佯
爲奪取渡口之勢自督兵從間道繞至天生橋河上流乘霧畢渡
進據山梁賊眾驚潰我兵進至象孔取道猛籠土司境就糧遇賊
擊敗之士司逃避搜得窖米二萬餘石駐兵三日趨猛密躡賊境
數十里屢戰皆捷旋由大山移駐小猛育連攻賊營時參贊大臣
額勒登額領兵旱塔退回虎踞避賊繞從內地小隴川緩行巡撫

鄂甯檄援不應賊偵知孤軍併力攻圍我兵火藥糧餉俱匱以疲
馬廐作三日糧三十三年二月明瑞令將領分隊以次衝出自冒
矢石殿後胸背被槍陣亡都統扎拉豐阿護軍統領觀音保等亦
歿於陣事 聞 上軫悼 特旨照班第例從優議卹 御製輓
詩曰蠻結之捷鼓勇進孤軍深入心牽縈屢催繼援竟弗援債轅
驚馬誠堪驚然猶因糧勦猛密計當兩路兵合并誰料援師竟避
賊強弩未破營編輕蜂屯蟻雜截歸路將軍體卹諸辱兵攜數勇
士獨殿後不虞中要害斯傾嗟哉捐軀因爲國痛惜如矢股與肱
雙忠雙烈及雙義三逢斯四何爲情要當專祠表勳績俾爾千古
存如生恨細事益難中止雪讐大舉期功成四月柩至京 上親

臨奠酌旋 賜祭葬諡果烈 諭曰將軍公明瑞夙秉忠誠歷著
勳績昨命統兵進剿緬匪身先士卒屢挫賊鋒乃以懸軍深入而
額勒登額等有心逗遛後援不繼因於猛臘地方保護諸軍身畱
殿後衝冒矢石以受傷身殞已降旨加恩優卹並入祀昭忠祠以
酬忠盡從前駐藏大臣傅清拉布敦鋤凶死事曾敕建雙忠祠秩
在祀典茲明瑞勤事捐軀義烈尤堪嘉尙著循前例於京師特建
專祠舉行歲祀其先後陣亡之都統扎拉豐阿護軍統領觀音保
總兵李全王廷玉均予入祠從祀用慰忠魂嗣建旌勇祠 御書
賜額曰折衝抒蕞四十四年 御製懷舊詩列五功臣中詩曰凡
經百餘戰戰必先眾軍不謂世家胄而有如此人讀書知大義挽

勁鮮與倫短身既精悍謀略兼出羣功難僂指數嘉賚匪因親征
緬次猛臘獨入克捷頻恨愚忌功者逍遙河上陳力戰絕後繼終
焉捐其身於爾無悔怨於我增悲辛不須讀杜牧謂過使趙君子
惠倫襲一等誠嘉毅勇公世爵官至奉宸院卿別有傳

右 國史館本傳

果烈工於吟詩雨中過石門云自憐馬上橐鞬客獨立溪邊問渡
船元夜云陌上晚煙飛素練渡頭殘雪踰銀沙送弟瑤圃使烏斯
臧云塞分百戰袍渴共一刀血皆名句也

右隨園詩話張維屏錄

扎拉豐阿

扎拉豐阿赫舍里氏滿洲正黃旗人前鋒統領定壽之孫定壽自有傳扎拉豐阿襲二等輕車都尉世職乾隆十三年授三等侍衛十五年命乾清門行走二十年遷二等待衛二十三年隨副都統濟福赴青海勦沙喇斯嗎呼斯扎拉豐阿等巡至噶斯不見賊二十四年擢御前侍衛赴西路軍營隨勦逆回霍集占等參贊大臣阿里袞奏兵至陽河里克扎拉豐阿等領五百人捉生抵巴爾楚克擒獲多倫回人搜默特等三十餘八月命議敘追勦賊眾之大臣官兵等賜號西朗阿巴圖魯上御豐澤園幄次賜將軍參贊大臣等宴賞賚有差扎拉豐阿賞緞十匹銀百八十

兩三月署正黃旗蒙古副都統二十六年正月補正白旗漢軍副都統九月授參贊大臣赴烏里雅蘇臺是年 命圖形紫光閣御製贊曰手格猛虎曾不色變矧驅羣羊窮回敢面昔巴圖魯曰定將軍孫西朗阿克紹前聞二十七年敘平準噶爾回部功 賞雲騎尉併原襲世職爲一等輕車都尉旋派往科布多經理屯田六月 諭曰科布多新開屯田時派扎拉豐阿前往彼處雖將墾田二十頃之處呈報一次此時地土肥饒雨澤應時與否及禾苗若何滋長並未奏及伊係參贊大臣副都統又專辦軍屯有事自應入告著明白具奏八月奏稱科布多屯田約計大小麥收在七分以上惟所種粟因氣寒霜早秀而不實 諭曰杜爾伯特人等

在烏蘭古木耕種烏梁海人等在布拉罕察罕托輝耕種俱獲豐收科布多相距不遠從前扎哈沁等亦曾開墾收成尙好看來此次或播種稍遲或霜雪早降又或土性不宜種粟著傳諭扎拉豐阿詳詢該處舊日居人酌量辦理十月奏言科布多屯田用青稞籽種百石向蒙古遊牧貿易商民等購買不須運送 諭曰科布多既有內地商民行走將來生計必繁今伊犁等處俱建造城堡若照例興工甚屬有益科布多所有舊城基址旣稱地形卑溼著傳諭扎拉豐阿伊見在安營於科布多之南哈勒巴山卽於該處擇高燥之地計可容兵民若干不必過爲寬大派屯田綠旗兵從容興築辦理十一月奏言烏梁海大臣察達克等前往辦理庫克

新臣亦領兵五十名往偵探策應 諭曰此次察達克辦理庫克
新因庫克新原係伊部落人等逃入鄂羅斯又指伊等名目爲匪
是以自請往辦原不藉扎拉豐阿之助乃伊復請自行領兵前往
徒覺張皇於事無益著速行停止定邊左副將軍成衮扎布等尋
奏額爾齊思河渡口有兵馬旗纛蹤跡此處向係哈薩克行走之
路恐因伊等牧羣被烏梁海竊取自當加意防範 諭曰察達克
等曾請自行辦理庫克新今既有此蹤跡當候偵信明確酌量行
止昨扎拉豐阿奏請領兵策應察達克等已諭令不必前往此次
非專辦庫克新可比著扎拉豐阿同察達克等前往於偵探策應
之處自可相資爲用二十八年正月察達克擒戮庫克新扎拉豐

阿仍回科布多六月成裘扎布奏扎拉豐阿報稱科布多土肥但
蒙古等未諳耕種若添派綠旗兵百木石鐵匠數人於見在修補
農具將來建造城房俱有益下軍機大臣議行成裘扎布又奏扎
拉豐阿咨稱科布多修城請於種地綠旗兵四百名酌派八十名
委員監修兩年可竣於屯田無誤 允之十一月成裘扎布入覲
命扎拉豐阿往烏里雅蘇臺署理將軍印務尋來京二十九年充
右翼監督三十年三月署鑲黃旗漢軍副都統四月兼武備院卿
三十一年授正白旗護軍統領三十二年六月授領隊大臣赴雲
南軍營十一月隨將軍公明瑞至蠻結分據東山梁十二月明瑞
督兵進剿值大霧扎拉豐阿率左哨薄賊壘奪木砦一剿賊無算

三十三年正月給都統銜二月賊圍小猛育明瑞歿於陣扎拉豐
阿中槍陣亡事 聞 諭曰都統扎拉豐阿等隨明瑞進剿緬匪
勤事捐軀深堪嘉尚已降旨兵部從優議卹若僅循例議給世職
殊未副朕踰格酬庸之意扎拉豐阿舊有承襲一等輕車都尉世
職著加恩給予世襲一等男爵尋 賜祭葬入祀昭忠祠並從祀
旌勇祠諡昭節子春甯襲官至綏遠城將軍別有傳

右 國史館本傳

觀音保

觀音保姓瓜爾佳滿洲正黃旗人乾隆十五年授健銳營前鋒藍翎長尋補前鋒校二十一年署前鋒參領隨征回部從副將軍兆惠剿賊於濟爾哈朗沿途鏖戰甚力二十三年正月以送哈薩克貢馬來京 賞銀三十兩赴參贊大臣雅爾哈善隊內行走五月雅爾哈善奏兵抵庫車城上槍石如雨觀音保等負傷攻城殺賊甚多十月從定邊將軍兆惠渡黑水立營二十四年正月兆惠與副將軍富德合擊賊觀音保在事有功二月 詔獎軍營奮勉效力之員實授觀音保爲前鋒參領十月擢正紅旗漢軍副都統二十五年五月調正白旗蒙古副都統六月 恩賚軍營大員之未

預凱宴者 賞緞六端銀二百五十兩二十七年敘功給騎都尉
世職 命圖形紫光閣儒臣製贊二十八年派往伊犁二十九年
命在領隊大臣上行走 諭曰伊犁雅爾等處領隊大臣四員尙
覺不足著增爲六員伊犁酌派四員觀音保著駐劄伊犁三十年
二月烏什回眾滋事將軍公明瑞遣觀音保率援兵五百先是參
贊大臣納世通奏派觀音保堵隘 諭曰納世通奏將觀音保所
領兵丁撥往隘口堵禦甚屬非是觀音保前奏伊犁官兵旣屬可
用乃不以之剿賊而置之閒地豈恐觀音保分伊之功耶納世通
著嚴行申飭納世通奏觀音保進攻因額魯特兵先退以致受傷
失礙三月明瑞至烏什賊據城抗拒議分兩路擊之納世通等攻

城西明瑞偕觀音保攻城東尋偵賊屯近城山口觀音保創未愈
卽率兵四百奮勦明瑞分兩翼應之賊以馬步二千餘犯西路觀
音保馳擊賊披靡偕總管達克塔納等奪山隘槍矢並發賊敗入
城殺賊二百餘奏入 諭曰此次進攻方可謂之奮勇勦賊觀音
保負傷效力甚屬可嘉賜號卓里克圖巴圖魯六月明瑞奏言納
世通辦事錯謬已於軍前正法以觀音保代領其眾八月烏什城
內賊三四百犯西南隅長圍堵口觀音保率索倫兵力擊退之旋
復其城三十一年遷鎮藍旗護軍統領三十二年四月署雲南楚
姚鎮總兵五月授領隊大臣赴緬甸軍營十一月隨將軍公明瑞
至蠻結分據西山梁巖兵駐守日昃賊由密林中突出犯觀音保

隊觀音保等擊斬其眾二百餘十二月明瑞統兵督戰觀音保等領右哨乘霧深入破賊木砦三十三年二月師至小猛育賊四面合圍明瑞歿於陣觀音保中槍陣亡事 聞 上以觀音保舊有騎都尉世職晉給二等輕車都尉尋 賜祭葬入祀昭忠祠並從祀旌勇祠子盛明保襲五十六年因毆斃傭工婦人革職發伊犁以其子富增阿襲

右 國史館本傳

留保 全祿等

留保滿洲正紅旗人姓宜特墨乾隆三十四年四月以前鋒校隨
經略大學士公傅恆征緬甸六月署前鋒參領十月戰新街死之
護軍校署章京全祿領催署章京烏勒信護軍校廷柱藍翎長署
前鋒校托爾布扎勒芳阿藍翎長同祿富海領催署章京圖薩爾
額林保俱陣亡署前鋒參領吉勒彰阿護軍校署參領額勒和伸
佐領部委參領輝佐藍翎長三達色傷亡大兵既克新街十一月
進圍老官屯前鋒校托勒博護軍校柴達木陣亡前鋒校哈豐阿
傷亡是役先後死者副前鋒參領綽哈岱前鋒參領雅爾泰署參
領晉色保前鋒校扎爾珠觀音保護軍校那禮木前鋒獎賞藍翎

額勒謹護軍獎賞藍翎烏林保濟蘭泰驍騎校福志先後事 聞

議卹奉 旨畱保全祿烏勒信廷柱托爾布扎勒芳阿同祿富海

圖薩爾額林保吉勒彰阿額勒和伸輝佐三達色托勒博柴達木

哈豐阿綽哈岱雅爾泰觀音保福志俱廕雲騎尉畱保子吉彰阿

襲廷柱子額勒琿襲扎勒芳阿子亮保襲同祿子格綳額襲富海

子阿里雅襲額勒和伸子海林襲三達色子齊克唐阿襲柴達木

子阿林襲雅爾泰子延德襲晉色保廕七品監生扎爾珠那禮木

額勒謹烏林保濟蘭泰俱廕恩騎尉扎爾珠子巴哈布襲那禮木

子納寶襲烏林保子扎拉芬襲全祿烏勒信托爾布圖薩爾額林

保吉勒彰阿輝佐哈豐阿額勒謹濟蘭泰福志襲俱無考全祿滿

洲鑲藍旗人姓瓜勒佳廷柱扎勒芳阿俱滿洲鑲白旗人姓舒穆祿富海滿洲鑲黃旗人姓珠爾格特同祿滿洲鑲白旗人姓瓜勒佳吉勒彰阿滿洲鑲黃旗人姓伊爾根覺羅額勒和伸滿洲正白旗人姓費莫三達色滿洲鑲紅旗人姓他塔喇托勒博滿洲正白旗人姓額蘇里柴達木蒙古正紅旗人姓巴林哈豐阿蒙古鑲藍旗人姓巴約特綽哈岱滿洲鑲紅旗人姓納喇晉色保滿洲鑲白旗人姓瑚爾佳雅爾泰滿洲正黃旗人姓瓜勒佳扎爾珠滿洲正黃旗人姓瓜勒佳觀音保滿洲正紅旗人姓巴約特那禮木滿洲鑲黃旗人姓鄂羅額勒謹蒙古正黃旗人姓巴約特烏林保蒙古正白旗人姓薩哈爾圖濟蘭泰滿洲鑲藍旗人姓瓜勒佳福志滿洲正

藍旗人姓瑚魯烏勒信托爾布圖薩爾額林保輝佐俱黑龍江人
旗姓俱無考

右 國史館本傳

德福

德福蒙古正藍旗人姓巴魯特氏乾隆十三年由前鋒派往金川軍營十四年撤還授前鋒校二十年從征達瓦齊二十三年隨將軍兆惠勦逆回霍集占於葉爾羌師旋敘功 賞給雲騎尉世職二十六年授副前鋒參領三十二年赴雲南軍營 賜戴孔雀翎題補東川營參將將軍明瑞擊賊於蠻結猛育等處德福均在事有功遷騰越營副將三十三年擢鶴麗鎮總兵三十四年偕侍衛巴朗克車德等勦賊於猛戛賊酋苗温等敗遁斬獲甚眾尋隨大軍進攻老官屯賊據砦以死拒德福身先督戰被創死之經略傳恆以 聞 諭曰總兵德福身先士卒奮勇捐軀深爲軫惻著入

國朝正統以來有年
卷三十三

三

祀旌勇祠所有應得卹典該部察例具奏尋 賜祭葬如例並
命入祀昭忠祠子音德赫廕都司襲雲騎尉

右 國史館本傳

許斌 曾榮國等

許斌廣東澄海人由步兵於乾隆七年補南澳營把總升瓊州水師協都司二十九年擢閩浙督標水師營參將三十四年隨經略大學士傅恆征緬甸八月發騰越時大兵渡戛鳩江水陸並進斌以舟師沿江夾剿抵新街連敗賊眾十一月攻老官屯賊負險固拒斌帥眾奮擊與貴州朗洞營守備曾榮國大定協千總劉國佐隨營效力難磨衛千總魏汝悖貴州威甯鎮左營把總向連登鎮遠鎮把總劉開門福建水師營把總陳增雲南鎮雄營外委李洪魁貴州提標外委劉紹本威甯鎮左營外委蔡如均安籠鎮外委張猷台拱營外委呂成貴下江營外委姚世傑荔波營外委黃

夫爵同時陣亡貴州安順城守營右哨千總唐雄威甯鎮左營把
總潘汝穉俱傷亡是役福建水師營把總張萬福黃得彰戰歿於
戛鳩江雲南景蒙營守備王翰隨攻猛養砦力戰擒賊八人傷重
歿於軍福建廈門水師提標前營遊擊黃海戰新街中槍落水死
貴州鎮遠鎮左營外委覃育錦擊賊猛麻陣歿事 聞議卹奉

旨斌加二級廕守備孫纘襲榮國加一級廕衛千總子文煥襲海
加一級廕守備子喬襲國佐連登關門增汝穉萬福得彰翰俱廕
把總餘卹如例榮國國佐俱貴州大定人汝惇雲南昆明人父嶸
官都司於三十三年戰歿於蠻結附何道深傳連登貴州安順人
關門湖南衡山人增福建閩縣人洪魁雲南鎮雄人紹本貴州大

定人如均貴州開泰人猷貴州南籠人成貴貴州黎平人世傑貴
州都勻人天爵貴州荔波人雄貴州安順人汝彝雲南平彝縣人
葛福得彰俱福建人翰江南當塗人海福建龍溪人育錦貴州思
南人

右 國史館本傳

1111111111

1111

占闢納 納蘭圖等

占闢納滿洲鑲黃旗人姓罕察乾隆十三年由前鋒藍翎長隨征金川二十一年隨征準噶爾有戰功擢三等侍衛洊升頭等侍衛二十三年 賞巴爾撒赫巴圖魯名號委署翼長三十六年十月隨將軍溫福征金川十二月大軍攻巴朗拉山占闢納從山石奮擊奪賊礮六復占據東面礮後高峯力戰伏賊出大軍擊敗之占闢納與前鋒參領蘇珠克圖巴圖魯納蘭圖四川成都城守營參將觀泰同歿於陣是役在得爾密擊賊陣亡者藍翎侍衛繖達色前鋒校兆海攻貧哩陣亡者藍翎長拴住與被賊獲逸出自盡者護軍參領尼三泰先後事 聞議卹奉 旨占闢納廕騎都尉子

瑚圖理襲納蘭圖雲騎尉子三扎布襲觀泰廕守備子敏祿襲繖
達色雲騎尉子喀圖善襲兆海雲騎尉子圖爾富襲拴住雲騎尉
子實德襲尼三泰恩騎尉子常存襲納蘭圖蒙古正藍旗人姓噶
齊特觀泰滿洲鑲紅旗人姓瓜勒佳繖達色滿洲鑲紅旗人姓敖
拉兆海拴住俱滿洲正黃旗人兆海姓伊爾根覺羅拴住姓富察
尼三泰滿洲鑲紅旗人姓瓜勒佳

右 國史館本傳

董璠 陳起龍等

董璠四川茂州人由行伍歷拔四川松潘鎮右營千總從征金川
乾隆三十六年攻賊於巴朗山奮勇前擊屢殲賊眾歿於陣同時
陣亡者四川維州協左營把總陳起龍貴州平遠協左營外委張
起朋是年甲金達陣亡者四川馬邊營外委楊元龍斯當安陣亡
者貴州仁懷營外委張起雲約咱陣亡者四川峽邊鎮把總蔡朝
鳳四川督標左營外委單應魁得爾密陣亡者四川川北鎮左營
把總孫連三十七年阿克木雅陣亡者陝西提標右營把總趙朗
木雅山陣亡者陝西固原城守營把總馬伏祥甘肅廣武營把總
夏仁陝西鞏昌營把總梁攀龍甘肅鎮羌營外委宋如松甘肅涼

州鎮中營外委葉生桂甘肅提標中營外委馬進保先後事 聞
賞卹如例璠起龍朝鳳連朗伏祥仁攀龍俱 恩廕把總璠其子
福襲仁其子發奎襲餘襲無考起龍四川平番人啟朋貴州平遠
人元龍四川富順人起雲貴州遵義人朝鳳四川清溪人應魁四
川成都人連四川華陽人朗陝西長安武舉伏祥甘肅固原人仁
甘肅甯夏人攀龍甘肅口縣人如松甘肅平番人生桂甘肅武威
人進保甘肅張掖人

右 國史館本傳

色楞泰 松德等

色楞泰蒙古鑲白旗人姓鄂努特乾隆十四年由護軍授副護軍校十五年授護軍校二十年擢副護軍參領尋擢護軍參領二十一年隨征伊犁授正黃旗營總二十四年授甘肅河州協副將三十六年大軍征金川四川總督文綬奏色楞泰曾經打仗頗爲奮勇令帶西甯鎮兵一千赴川十二月抵軍營三十七年正月由鄂克什進會大軍攻美諾十七日參贊大臣五岱岱攻北山頂色楞泰在色爾接應賊突至力戰殲十餘賊歿於陣四月大軍攻墨壘溝貴州黔西協副將松德進至遜克爾宗遇賊轉戰連日死之七月四川試用副將巴格復帶兵攻墨壘溝與貴州大定營都司巴靈

阿四川試用都司永安泰俱殺賊陣亡十月由墨壑溝進攻甲爾木陝甘督標右營守備和純武戰歿是月大兵攻克路頂宗陣亡者貴州朗洞營守備安陀保先後事 聞議卹俱如例色楞泰松德巴格各加 贈二級廕守備巴靈阿永安泰和純武安陀保各加 贈一級廕衛千總色楞泰子孝順阿襲松德子巴哈襲巴格子哈番泰襲巴靈阿子烏爾袞襲永安泰子國仁阿襲和純武弟明安保襲安陀保子吉祥襲松德滿洲正藍旗人姓完顏巴格巴靈阿俱滿洲正黃旗人巴格姓烏雅拉巴靈阿姓甯古塔永安泰和純武俱滿洲鑲紅旗人永安泰姓伊爾根覺羅和純武姓瓜勒佳安陀保滿洲鑲黃旗人姓費莫

右 國史館本傳

國史館本傳

卷二十一 忠義

三十一

東亞書局發行

115

富成 王振海等

富成四川松潘人由行伍累擢四川維州協右營千總隨征金川
乾隆三十七年正月擊賊於卡爾金陣亡是年木陽岡陣亡者甘
肅提標左營把總王振海達克素陣亡者貴州長壩營把總劉元
奉倪連陞董馬砦陣亡者貴州凱里營把總王應科貴州威甯鎮
左營外委徐詳貴州大定協右營外委胡宗賢阿仰陣亡者貴州
大定協外委劉焜布朗郭宗陣亡者貴州朗洞營把總張世傳貴
州鎮遠鎮右營外委汪應照日爾砦陣亡者陝西岐山鎮把總馬
永泰四川維州協左營把總羅忠玉貴州畢赤營把總張文龍貴
州大定協左營外委夏朝桂木了砦陣亡者四川疊溪營把總許

之茂先後事 聞議卹成振海元奉連陞應科世傳永泰忠玉文
鼈之茂俱廕把總餘卹如例成子國柱襲振海子倉襲文鼈弟文
魁襲餘襲無考振海甘肅張掖人元奉貴州安順人連陞貴州大
定人應科貴州定番人詳貴州威甯人宗賢貴州畢節人焜貴州
大定人世傳山西平陽人應照貴州石阡人永泰陝西鳳翔人忠
玉甘肅甯夏人文鼈貴州遵義人朝桂貴州平遠人之茂四川平
番人

右 國史館本傳

普甯 六十一等

普甯滿洲正黃旗人姓伊爾根覺羅乾隆十九年由健銳營前鋒校署筆帖式隨征伊犁二十一年授護軍校遷佐領二十五年授副護軍參領三十一年授護軍參領三十六年五月隨將軍溫福征緬甸十月調征金川三十七年正月大軍勦僧格宗分兵截取卡了普甯由西山根沿河攻甲木藍翎侍衛明勇巴圖魯六十一由喇嘛寺攻郭松連獲礮卡是月藍翎侍衛哈爾趙勦賊於達木巴宗木耳宗有功奉 諭授三等侍衛三月攻阿喀木雅哈爾趙陣亡四月攻墨壟溝普甯六十一同歿於陣同時傷亡者二等侍衛額林普爾副護軍參領西蘭保額爾謹三等侍衛和善伊爾素

拉藍翎侍衛拉漢保是役攻資哩陣亡者藍翎侍衛三達爾七月
攻固卜濟奪南山礮戰歿者前鋒章京額爾濟圖十月攻路頂宗
死者署筆帖式五十三攻木爾古魯山死者藍翎長雅平阿十二
月攻克明郭宗陣亡者六品銜藍翎長西勒敏護軍校阿格拉克
藍翎長博和勒岱先後事 聞議卹俱奉 旨廕雲騎尉普甯子

忠惠襲六十一子華沙布襲哈爾起子璽豐額襲西蘭保子瑪琳
保襲額爾謹子巴爾松襲和善子特默格襲伊爾素拉子勒克沁
保襲拉漢保子沃紳保襲額爾濟圖子喜沁保襲五十三弟五十
六襲雅平阿子瑪崇阿襲餘襲無考六十一滿洲正藍旗人姓瓜
勒佳哈爾起滿洲正白旗人姓庫雅拉西蘭保滿洲正黃旗人姓

富察額爾謹滿洲正白旗人姓達瑚哩和善伊爾素拉俱滿洲鑲黃旗人和善姓瓜勒佳伊爾素拉姓納喀塔拉漢保滿洲正白旗人姓郭佳額爾濟圖滿洲鑲黃旗人姓西特爾五十三蒙古正紅旗人姓博爾濟雅平阿滿洲正白旗人姓庫雅拉西勒敏滿洲鑲黃旗人姓瑪佳阿格拉克蒙古鑲藍旗人姓鄂努特博和勒岱蒙古正藍旗人姓額魯特額林普爾三達爾旗姓無考

右 國史館本傳

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

10/10

國朝書獻類徵初編卷三百五十二目錄

忠義二十二

辭琮 張清士等

袁國璉 何其勳等

張守成 馬雄等

郭士才 文元等

馬虎

西靈阿 濟爾噶朗等

萬和 楊仕成等

釋迦保 特音布等

武丕爵 余成奉等

巴朗 額爾賽等

多隆武 二達色等

董天弼

牛天昇

曹永言 惠世溥等

沈寬 洪文紹等

馬全

皇朝通志卷之三十三

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

國朝書獻類徵初編卷三百五十二

通奉大夫前署江西巡撫江西布政使司布政使湘陰李桓輯

忠義二十二

薛琮 張清士等

薛琮陝西咸甯人河南南陽鎮總兵翼鳳子乾隆十六年由廕生效力巡捕營期滿授四川達州營守備歷南坪營都司峽邊營游擊三十六年擢漳臘營參將八月大學士四川總督阿爾泰檄征金川琮帶兵克納頂邊谷諸碉寨十二月定邊右副將軍溫福督兵攻巴朗拉琮奮勇出力奉 諭交部從優議敘會攻卡了獲喇嘛等寨遂由東面山根沿河直取卡了克之又乘勝奪東北山梁

通甲木賊巢三十七年二月攻阿仰之東山復由甲木噶爾金後山繞道取墨壘溝占木城四石卡二十一斃賊四十六四月攻墨壘溝琮督兵直進斃賊二百餘燬木柵十餘奪礮七十餘賊悉力死拒礮寨林立琮奮力仰攻被槍傷歿於陣同死者四川建昌鎮標右營都司張清士平番營都司陳定國阜和營守備虎成林督標左營千總王國英建昌鎮標左營千總魏以賢嘉順營千總劉嵩貴州黔西協左營千總王天池畢赤營千總顏登第水城營千總蘇玉貴四川義邊營把總黃安國會川營把總陳玉龍劉千嘉順營把總劉崑龍靖遠營把總謝在洪永定協把總喻萬成貴州威甯鎮標左營把總任公望右營把總趙維月陳陞黔西協左營

把總楊宗貴平遠協右營把總周啟仁四川建昌鎮左營外委鄭
九品右營外委董玉林貴州威甯鎮右營外委陳英平遠協左營
外委熊應林大定協右營外委姚世俊事 聞 諭交部從優議
卹又 諭曰薛琮自入軍營甚屬出力前於進攻墨壘溝效命捐
軀甚屬可憫著加恩照副將銜議卹並著查明薛琮如有子嗣卽
行送部引見部議上奉 旨琮加贈二級嗣子國棟廕守備清士
定國成林俱廕千總國英以賢嵩天池登第玉貴安國玉龍千崑
龍在洪萬成公望維月陞宗貴啟仁俱廕把總餘卹如例清士直
隸無極人乾隆二十六年武進士藍翎侍衛定國四川清溪人成
林四川華陽人國英四川成都人成賢四川西昌人嵩陝西漢陰

國朝三才圖會卷之三十三
人天池貴州黔西人登第貴州威甯人玉貴貴州畢節人安國四
川華陽人玉龍干俱四川西昌人崑龍四川冕甯人在洪四川華
陽人萬成四川西昌人公望雲南昆明人維月貴州南籠人陸貴
州平遠人宗貴貴州大定人啟仁貴州貴定人九品玉林俱四川
西昌人英貴州普定人應林世俊俱貴州大定人

右 國史館本傳

惟歲在辛卯八月小金川怙凶稔惡血鄰於身厲兵進討是冬總
督桂君林戡約咱明年壬辰正月克卡了次達烏惟達烏迤北厥
東名翁古爾壘厥西名布勒尼得兩崖拔水數千仞溪流湯沸箭
激中微徑若綫賊因是築柵固守頓軍十旬餘謀者言達烏東爲

婁仰崖嶂忽斷忽竦如翹如削莫能措拇指乃西甲爾木山峻揭
霄表巔復起峯七深雲泄雨迄暑雪雹弗輟然睇其勢可出達烏
後抵僧格爾宗桂君領之命參將薛君琮帥四川貴州暨土司兵
三千循墨壘溝越是山北抵於郭舟會大雨霰竟三日夜咫尺弗
可辨識而甲爾木西有峯曰博六古通金川賊緣是來援踞嶮斷
道糧絕軍饑踣斃力戰死覆沒者幾三千眾逾月桂君得罪罷
上命今定邊右副將軍禮部尙書阿公桂乘傳總其師既至以狀
聞於朝 上曰維參將薛琮申討逆醜捐軀效命朕甚憫焉其贈
副將其子召入見餘士卒予卹又越四月阿公破翁古爾壘蹙郭
舟山下遺尸千餘具遣四川總兵英泰貴州總兵王萬邦齎少牢

奠祭復以狀聞 上曰其爲共冢立祠祀辭琮是冬阿公剋僧格
爾宗殄美諾醜徒蟻潰鼠竄小金川底平明年總督劉君祇奉
明詔乃驅蠻隸伐山庀材乃飭工役范土合埴樹臬揆日相於茲
山之陽剋開犖确作廟三重中置辭君栗主前祀從征諸校又斷
巨扁悉揭諸士卒名於廡環以山泉樹以灌木其廟高題大棟崇
崇隆隆傳以丹綵煥如霞虹番蠻行者越一二舍外可企而見指
而數也夫豈有所侈於此誕以慰忠魂表毅烈俾稔我能羆之士
不二心之臣生敵王愾死爲鬼雄雲旗風馬來往邊徼其曷敢恃
而爪牙角距以嬰 天誅以迄冥殛者繼自今結壘霍爾諸部落
俯首帖尾情服砥屬維億萬年咸若采衛將於是廟是徵庶以仰

對 聖天子卹死喪忠綏父荒迭之盛意廟既成會余從軍在蜀
君屬書其事且爲禮神之詞鑲諸石詞曰

九州之外兮萬山蒼莽石房如筍兮羣蠻所聚夕雪霰兮朝而雨
峯棱剡剡兮弗可以履阻中原兮萬千里靈何爲兮羣萃止 礮
石兮闐闐旗旒兮翩翩裹餼糧兮爭後先妖星吐芒兮晝緯於天
蠻之來兮如椽煙霧兮冪冪溪流兮激激義不反顧兮將焉食無
食兮強起殺賊如麻兮鼓聲死吁嗟死兮氣未衰挾慧帚兮乘奔
雷 靈朝游兮嶺雪白靈暮歸兮陣雲黑鳶鳴啄兮奚所恤彼蠻
跳跟兮手搏以食灑血爲漿兮剗肝爲炙 帝有命兮來九重恤
熬延嗣兮 恩無窮瘞枯髓兮幽宮葺榱桷兮青紅坎坎鼓兮踴

國朝文獻通考卷之三十三
四
蹲舞樽緹齊兮體在俎噴其嗜兮什伯伍靈醉飽兮彎強弓揭長
檄兮廉羌戎疇怙亂兮殛其躬析而魂魄兮菹醢同嗟而狺狺兮
敢不龔覩此廟貌縣高空

右廟碑王昶撰

袁國璉 何其勳等

袁國璉四川成都人由行伍拔補提標右營把總乾隆二十三年大金川賊番滋擾邊界督臣開泰委國璉偕守備溫欽赴綽斯甲布防範尋擢左營千總二十七年金川侵據丹壩復委國璉馳往查辦卽派駐綽斯甲布禦守三十一年賊復擾丹壩並格藏嘉官寨國璉率土兵擊退之擢建昌鎮左營守備三十五年調戡邊營守備三十六年小金川侵據鄂克什地國璉率屯漢兵至畢旺拉奮力擊賊盡克其礪卡三十七年大軍攻資哩賊眾力拒國璉督兵橫擊殲賊二十餘擒賊二燬其礪寨擢永甯協右營都司是役也四川永甯協千總何其勳提標前營千總胡印川北鎮中營把

國朝名將列傳卷之三十三
總余瑞龍貴州長壩營把總楊天錫平遠協左營把總謝景標長
寨營外委董玉德四川普安營外委趙廷樸陝西提標左營外委
□金黃凱俱歿於陣六月進攻南山梁賊併力抵禦國璉越眾先
登奮勇衝擊受槍陣亡同時戰歿者美美卡則貴州撫標右營把
總彭連得鶉鴿崖則陝西提標中營把總黨國棟北山梁則貴州
長寨營外委楊恆工思略則貴州台拱營外委劉紹周事 聞議
卹國璉廕千總餘俱廕把總國璉子超襲天錫子得明襲連得子
應元襲餘襲無考其勳四川宜賓人印四川成都人瑞龍四川
閬中人天錫貴州安南人景標貴州平遠人玉德貴州定番人廷
樸四川馬邊廳人金陝西長安人凱四川松潘廳人連得貴州貴

陽人國棟陝西長安人恆貴州畢節人紹周貴州鎮遠人

右 國史館本傳

皇朝通志卷之六十一

六

張守成 馬雄等

張守成甘肅固原人乾隆十三年金川土司沙羅奔搆毀侵犯內地守成以行伍隨征二十三年出征葉爾羌庫車等處皆有戰功洊升陝西興漢鎮右營千總三十六年復隨征金川三十七年十一月參贊大臣舒常督兵攻取日旁山賊槍石抵禦守成力戰死先是三月官軍進勦革布什咱之吉地陝西略陽營守備馬雄乘賊驚潰突據默資溝師遂克十一月雄隨攻日旁奮勇撲礮受重傷尋歿 上憫之同時陣亡者湖南鎮筵鎮標中營守備朱言貴州銅仁協左營外委田宗如三十八年陝甘督標前營千總朱彥甘肅肅州鎮右營千總張秉儀陝西延綏鎮中營千總李國清湖

北衛昌營千總譚世敏湖北襄陽鎮中營把總張楚龍陝西興漢
鎮右營把總陳廷棟甘肅廣武營把總趙梅年湖北鄖陽協把總
祝正倫陝西宜君營外委白復明陝西舊縣關營外委曹彩甘肅
提標中營外委孟大得趙輔甘肅提標左營外委王鉞馬禮甘肅
玉泉營外委王萬祿甘肅涼州鎮右營外委劉士珍皆擊賊於日
旁戰亡事 聞守成廕把總雄言俱廕衛千總宗如彥秉儀國清
世敏楚龍廷棟梅年正倫俱廕把總餘 賞卹如例守成子鈺襲
秉儀子倉襲廷棟子禮襲梅年子治勇襲正倫子秉禮襲餘襲無
考雄江西南昌人言湖南保靖人宗如貴州銅仁人彥甘肅武威
人秉儀甘肅張掖人國清甘肅永昌人世敏湖北恩施人楚龍湖

北襄陽人廷棟陝西咸甯人梅年陝西興安人正倫湖南武岡人
復明陝西宜君人彩陝西興安人大得輔鉞禮俱甘肅張掖人萬
祿甘肅中衛人士珍甘肅武威人

右 國史館本傳

174-198

郭士才 文元等

郭士才貴州威甯人乾隆三十六年由行伍隨征金川有戰功授威甯鎮左營把總尋擢畢赤營千總三十七年十一月進攻翁古爾壘布拉尼得楞及紐寨各地方賊碉林立悉力抗拒士才首先奮擊拔其柵躍入賊隊力戰死官軍乘勢追勦大獲全勝貴州黔西協左營外委文元同歿於陣副將軍阿桂以 聞 諭曰貴州千總郭士才首先拔開木柵騰身躍入以致陣亡實堪憫惜著加恩贈都司銜交部議卹仍著賞銀一百兩給付其家並著阿桂查明郭士才有無子嗣如已及歲卽送部引見部議上廕千總子朝甫襲是月貴州銅仁協左營千總盧章隨攻明郭宗陝西固原城

守營把總滿吉隨攻路頂宗貴州大定協左營把總陳大忠隨攻
多功山四川安阜營外委胡永華隨攻猛固寨皆戰死其後先陣
亡者甲爾木則陝甘督標左營守備王吉漢四川懷遠營千總黨
繼成雲南曲尋協左營千總雷士奇四川松潘廳左營外委張斌
雲南東川營外委何開宗陝西潼關協外委張金湧甲魯則四川
會鹽營千總魯清四川敘馬營把總孟以仁事 聞議卹元章吉
大忠永華俱廕把總吉漢廕千總繼成士奇斌開宗金湧清以仁
俱廕把總章子志道魏吉子朝貞龔吉漢子銓龔繼成子洪科龔
清子憲章龔餘龔無考元貴州黔西人章貴州定番人吉甘肅固
原人大忠貴州黔西人永華四川屏山人吉漢陝西榆林人繼成

四川西昌人士奇雲南南甯人斌四川松潘廳人開宗雲南東川人金湧陝西米脂人清四川冕甯人以仁四川永甯人

右 國史館本傳

古今圖書集成

十一

馬虎

馬虎甘肅武成人由行伍於雍正四年從征準噶爾有功拔把總累遷西甯鎮標中軍守備乾隆十三年派赴金川軍營十四年撤還十七年遷南川營都司二十年大軍勦準噶爾虎赴西路軍營管馬以倒斃過多部議降三級留軍營效力二十一年隨勦叛賊沙克都爾曼濟等二十二年赴闕展屯田二十四年以墾穫較多議敘加一級二十六年遷提標右營游擊二十七年遷西安城守營參將二十八年賞副將銜領換班兵赴伊犁屯田二十九年議敘加一級三十年補慶陽協副將三十一年三月議敘開復前所降級六月賜孔雀翎三十三年擢湖北襄陽鎮總兵三十七

年七月率兵二千赴金川軍營派由綽斯甲布進勦十月由木池抵俄坡之東攻宜喜山梁克礪卡各二十二月同領隊大臣舒常擊敗東澗來犯賊偵復潛出西澗以火器奮擊賊遁三十八年正月進攻達爾圖山梁大礪賊自密林中突犯虎力戰被槍卒諭曰馬虎自調赴軍營以來甚爲奮勉此次攻擊賊卡身先士卒陷陣捐軀殊堪憫惜著加恩照王玉廷李全之例交部議卹尋賜祭葬如例入祀昭忠祠 予騎都尉又一雲騎尉世職子壯猷襲見任山西大同鎮標左營游擊

右 國史館本傳

西靈阿 濟爾噶朗等

西靈阿蒙古正紅旗人姓鴻果羅特乾隆十三年由護軍襲騎都尉又一雲騎尉世職二十四年授三等侍衛三十五年授陝西鎮塘營游擊三十六年升湖北武昌營參將隨征金川三十八年正月大軍攻達爾圖西靈阿力戰受傷歿二月攻當噶爾拉昔嶺同陣亡當噶爾拉者藍翎長濟爾噶朗空銜藍翎巴圖哩陣亡昔嶺者六品頂戴藍翎八十三三月藍翎長永喜以復攻昔嶺戰死四月藍翎長哈達遜以復攻當噶爾拉戰死六月藍翎六十四以復攻達爾圖戰死空銜藍翎智色藍翎長巴圖伯爾以復攻昔嶺同戰死先後事 聞議卹西靈阿 恩廕守備餘俱廕雲騎尉西靈

阿子扎拉芬襲濟爾噶朗子索珠襲巴圖哩子拜達勒襲八十三
子德善襲永喜子明祿襲六十四子巴揚阿襲智色子額德蒙克
襲巴圖伯爾子巴雅爾們都襲哈達遜子襲無考濟爾噶朗滿洲
鑲白旗人姓卓勒巴圖哩滿洲正藍旗人姓關佳八十三滿洲鑲
紅旗人姓趙佳永喜滿洲正藍旗人姓烏察喇哈達遜索倫正紅
旗人姓巴約特六十四滿洲正紅旗人姓烏扎拉智色蒙古正黃
旗人姓巴約特巴圖伯爾蒙古鑲黃旗人姓厄魯特

右 國史館本傳

萬和 楊仕成等

萬和貴州威甯人由行伍拔補貴州都勻協右營把總尋升大定協左營千總乾隆三十七年隨征金川以功升安籠鎮右營守備三十八年正月賊踞空卡山兩旁山峯和奮勇攻取礪卡身冒石矢殲賊甚多歿於陣同時陣亡者四川小河營千總楊仕成甘肅花馬池營千總劉彩四川提標前營把總范惠貴州安南營把總姜興周貴州荔波營把總丁鳳貴州天柱營把總會景陝西興漢鎮中營把總辛朝臣陝西延綏鎮左營外委許成是月大兵復攻日耳寨四川綏甯營千總趙全柱陣亡二月攻丹噶山四川建昌鎮左營千總富國安陣亡先後事 聞議卹和 恩廕千總仕成

彩惠興周鳳景朝臣全柱國安俱廕把總餘 賞卹如例和弟洪
襲彩子廷棟襲鳳子中貴襲景子鴻灝襲朝臣子陞襲全柱子金
環襲國安子恩龍襲仕成惠興周成襲無考仕成四川眉州人彩
甘肅張掖人惠四川成都人興周鳳俱貴州遵義人景貴州天柱
人朝臣陝西興安人成陝西榆林人全柱四川三臺人國安四川
松潘人

右 國史館本傳

釋迦保 特音布等

釋迦保烏朗哈特氏蒙古鑲白旗人乾隆二十年由健銳營前鋒
隨征準噶爾有功 賞空藍翎二十四年擢護軍校先後得功牌
十二十六年委署烏槍護軍參領二十八年授公中佐領三十二
年揀發雲南以游擊補用三十三年緣事革職時大軍征緬甸奉
旨釋迦保著畱軍營效力贖罪三十七年以在事奮勉 賞給都
司銜發往四川軍營三十八年三月副將軍豐昇額率師潛赴日
旁進及木柵賊眾越溝來拒釋迦保督兵力戰屢偪賊寨歿於陣
六月木果木師潰刑部主事特音布遇害十二月甘肅提標中營
參將富金保復擊賊於日旁受重傷尋歿是年陣亡者領催委署

散騎郎塞什保隨勦阿克木雅力戰死之前鋒六品頂戴藍翎雙
德擊賊於空卡奮勇殲賊力竭死藍翎長博貝擊賊於達扎克角
死之空銜藍翎巴圖帶鄂克什兵往會頭溝搜勦殲賊三被害先
後事 聞議卹釋迦保以奮勇捐軀奉 旨照參將例贈卹與富
金保同廕守備餘俱廕雲騎尉釋迦保子祥福襲特音布子多爾
遜襲富金保子關聖保襲塞什保子噶林保襲餘襲無考特音布
完顏氏滿洲正白旗人富金保富察氏滿洲鑲黃旗人塞什保烏
蘇氏呼倫貝爾鑲藍旗人雙德薩瑪哩氏滿洲鑲藍旗人博貝博
爾濟氏蒙古正紅旗人巴圖把岳忒氏蒙古正白旗人

右 國史館本傳

武丕爵 余成奉等

武丕爵陝西華州人乾隆二十九年由武舉補甘肅提標右營千
總三十六年升紅崖堡守備三十七年隨征金川三十八年六月
擊賊於大板昭奮勇衝殺攻取礮卡陣亡先是三月賊踞昔嶺貴
州撫標右營千總余成奉四川漳臘營千總魏元相甘肅肅州城
守營把總魏炳孝四川重慶鎮右營外委張士倫四川松潘鎮中
營外委金芝連貴州朗洞營外委王占得同力攻勦歿於陣是月
又攻當噶拉甘肅西甯鎮中營把總徐登貴戰死四月攻酋峯陝
西西鳳協營外委梁信戰死八月攻瑪爾底貴州古州鎮左營千
總楊正春戰死先後事 聞議卹丕爵 恩廕千總成奉元相炳

孝登貴正春俱廕把總餘襲如例丕爵子天秩襲成奉弟成行襲
元相子國忠襲登貴子寶善襲正春弟士興襲餘襲無考成奉貴
州南籠人乾隆三十二年由行伍隨征緬甸拔補貴州撫標左營
把總三十六年調征金川升本職元相四川宜賓人炳孝甘肅肅
州人士倫四川瀘州人芝連四川松潘人占得貴州貴定人登貴
甘肅西甯人信陝西榆林人正春貴州遵義人

右 國史館本傳

巴朗 額爾賽等

巴朗額魯特人姓噶里雅斯乾隆二十年九月大軍征準噶爾巴朗來歸授藍翎侍衛隸蒙古正黃旗二十一年八月遷三等侍衛二十四年十二月遷二等侍衛乾清門行走二十七年十一月遷頭等侍衛三十五年八月擢鑲藍旗蒙古副都統三十七年金川用兵十月奉 旨揀派健銳火器兩營官兵往軍營令巴朗統領十二月授領隊大臣三十八年閏三月將軍溫福攻昔嶺巴朗帶兵四百分取第五碉敗賊六月溫福軍潰於木果木巴朗戰歿諭曰副都統巴朗屢經勇往立功今力戰死事實堪軫惜著照扎拉豐阿之例議卹仍著查明伊子交御前大臣帶領引見候朕另

降諭旨部議上奉 旨贈都統銜 賜祭葬廕騎都尉又一雲騎尉子吉克進扎布襲同死者雲騎尉護軍參領特斯古巴圖魯額爾賽護軍參領阿哈達前鋒參領觀音保護軍參領布林巴圖魯德保協領額塞副護軍參領烏爾泰明德保長興防禦德祿護軍校署護軍參領華尙阿前鋒校署護軍參領福祿前鋒校富森布護軍校德福明志德祿驍騎校崇啟邁斯哈拜唐阿空翎雅秉阿議卹奉 旨額爾賽廕騎都尉餘俱雲騎尉額爾賽子納松阿襲觀音保子七十三襲德保子色楞特襲阿哈達子吉勒瑪善襲額塞防禦德祿襲無考烏爾泰子德保襲明德保子萬普襲長興子鶴齡襲華尙阿子布音保襲福祿子雙福襲富森布子源善襲德

福子八十四襲明志弟五十一襲護軍校德祿子富興襲崇啟子
爾布通武襲邁斯哈子尙安襲雅秉阿子延崇阿襲額爾賽滿洲
鑲黃旗人姓布雅穆奇觀音保蒙古鑲白旗人姓吉爾捫德保滿
洲正黃旗人姓烏察喇阿哈達滿洲正黃旗人姓伊爾根覺羅額
塞蒙古正紅旗人姓畢魯烏爾泰滿洲鑲白旗人姓烏蘇明德保
滿洲鑲紅旗人姓富察長興滿洲鑲藍旗人姓伊拉哩防禦德祿
滿洲鑲黃旗人華尙阿滿洲正白旗人俱姓瓜勒佳福祿滿洲鑲
白旗人姓烏扎拉富森布滿洲正紅旗人姓納喇德福滿洲鑲黃
旗人姓伯爾卓克明志滿洲正紅旗人姓巴雅喇護軍校德祿蒙
古正白旗人姓巴嚕特崇啟滿洲正藍旗人姓瓜勒佳邁斯哈滿

洲鑲黃旗人姓郭爾斯雅秉阿滿洲鑲黃旗人姓溫特赫

右 國史館本傳

多隆武 一 達色等

多隆武滿洲正藍旗人姓赫舍哩乾隆十三年由健銳營前鋒隨征金川十九年征伊犁均在事有功共得頭等功牌六二等功牌一三等功牌一二十一年擢藍翎長二十三年升藍翎侍衛二十九年授護軍副參領三十四年授參領隨征緬甸得頭等功牌三十五年授護軍營總三十七年授甘肅河州協副將調征金川三十八年二月將軍溫福由功噶爾拉進攻派多隆武帶兵駐松林口防守後路大營旋移木果木派多隆武守北面山梁 諭曰多隆武等既派令防守木果木之北面山梁此一帶卽伊等專責儻賊棄礮突出殺之甚易著傳諭多隆武等時刻畱心瞭望毋稍

忽略六月大營陷多隆武戰歿 諭交部議卹部議上 賜祭葬
如例廕守備弟綳僧額襲同時被害者陝西靖遠協副將二達色
西安城守營參將珠蘭泰與漢鎮左營遊擊韓慶春邠州營都司
王滇貴州上江協左營都司七十一甘肅遠安營都司巴克唐阿
四川永甯協右營都司阿金太四川軍營試用都司扎魯貴州台
拱營守備五達色四川松潘鎮右營守備馬什太三等侍衛哈勒
殼藍翎侍衛羅爾占護軍授六品頂帶藍翎圖沁四達色拴珠果
甯阿前鋒授六品頂帶藍翎諾爾布前鋒授空銜藍翎達崇阿海
明昌太常青護軍校授空銜藍翎永安常魯六十六三音布崇祿
碩音泰富昌阿威格塔斯哈德祥富昌和玉岱青阿藍翎長恩格

津前鋒藍翎長富甯阿德善健銳營前鋒扎青武格護軍校福祿
領催委署驍騎校甯喜奉 旨二達色珠蘭泰韓慶春王渾俱廕
守備七十一廕驍騎校巴克唐阿阿金太扎魯五達色馬什太俱
廕千總餘俱廕雲騎尉二達色子班濟布襲珠蘭泰子海常襲韓
慶春子韓世榮襲王渾子王順恩襲七十一子佛爾青襲巴克唐
阿子靠山襲阿金太子多果襲五達色子佛靈額襲馬什太弟馬
雲太襲哈勒毅子赫豐額襲羅爾占子法里善襲圖沁弟圖薩襲
四達色子愛隆阿襲拴珠子占住襲果甯阿子忠德襲海明子敏
安襲永安弟永慶襲常魯子齋格襲六十六子阿克棟阿襲崇祿
子圖塔布襲碩音泰子全福襲富昌阿子琨布襲威格子蘇爾芳

阿襲塔斯哈子倭興額襲德祥子雙柱襲富昌子達明襲富甯阿
子德克錦襲德喜子永善襲扎青子阿克敦襲武格子關善襲福
祿子全德襲餘襲無考二達色蒙古鑲白旗人姓罕嚕特殊蘭泰
漢軍正白旗人姓石韓慶春漢軍正白旗人王溟漢軍正黃旗人
七十一滿洲鑲黃旗人姓伊拉哩巴克唐阿滿洲正黃旗人姓瓜
勒佳阿金太滿洲正藍旗人姓富察扎魯滿洲正黃旗人姓巴雅
爾五達色滿洲正藍旗人姓烏爾古齊馬什太滿洲正藍旗人姓
馬佳哈勒毅琿春鑲黃旗人姓博爾卓羅爾占滿洲正黃旗人姓
馬佳圖沁滿洲鑲黃旗人姓溫徹亨四達色滿洲鑲白旗人姓瓜
勒佳拴珠蒙古正黃旗人姓巴約特果甯阿蒙古鑲黃旗人姓徹

默特諾爾布蒙古正白旗人姓巴約特達崇阿滿洲鑲藍旗人姓
溫特赫海明蒙古正黃旗人姓他塔喇昌太蒙古正紅旗人姓柯
埒永安滿洲鑲藍旗人姓卓諾爾常魯滿洲鑲黃旗人姓富察六
十六滿洲正紅旗人姓西特爾三音布滿洲正紅旗人姓瓜勒佳
崇祿滿洲鑲紅旗人姓完顏碩音泰滿洲鑲紅旗人姓伊爾根覺
羅富昌阿滿洲正藍旗人姓章佳威格蒙古正紅旗人姓巴嚕特
塔斯哈蒙古正藍旗人姓克楚特德祥滿洲正白旗人姓瓜勒佳
富昌蒙古正藍旗人姓達延恩格津索倫正紅旗人姓都爾本富
甯阿蒙古鑲白旗人姓巴嚕特德喜滿洲正藍旗人姓薩密勒扎
青滿洲正藍旗人姓瓜勒佳武格滿洲正藍旗人姓棟鄂福祿滿

洲鑲白旗人姓瓜勒佳甯喜滿洲鑲紅旗人姓沃色常青和玉岱
青阿旗姓俱無考

右 國史館本傳

董天弼

董天弼順天大興人由武進士授四川提標前營守備乾隆十三年授馬邊營都司隨征贍對金川有功十七年遷戩邊營游擊二十二年遷提標中軍參將二十四年授維州副將三十年金川土舍郎卡與丹壩構兵天弼偕游擊宋元俊往勘郎卡乞還所掠人口退卡角拆毀穆爾津岡礮卡事平十月遷松潘鎮總兵三十三年擢提督三十四年郭羅克賊番阿玉楚扣等途劫喇嘛諾彥綽爾濟槍傷三人上命天弼查辦尋以未獲要犯苟且息事申諭之三十五年四月小金川土司澤旺逆子僧格桑乘隙攻鄂克什土司色達克拉圍官寨八月天弼赴達木巴宗飭小金川與鄂

克什息兵僧格桑退墨穆爾吉日古魯地方色達克拉以官寨糧
盡求徙達木巴宗天弼與總督阿爾泰議畱把總一兵二十及土
練四百分駐之三十六年六月逆賊僧格桑復圍鄂克什之達木
巴宗木耳宗資糧並據瓦寺巴朗拉天弼由打箭鑪馳赴西路調
省標及松維等營官兵備剿七月天弼抵眠龍岡賊已據巴朗拉
築礮卡爲久守計且斷我兵進剿路 上以天弼遷延坐待意存
推諉 申諭之八月阿爾泰造皮船渡河天弼議襲山神溝以解
鄂克什圍且言木坪之甲金達雜谷之會頭溝可分兵進尋由山
神溝至德爾密克石礮七斬賊數十餘赴嶺竄並據畢旺拉天弼
遣土練四百駐畢旺拉賊乘霧雨來犯守礮土兵驚潰失所得礮

卡天弼疏請治罪 諭曰董天弼所請交部治罪之處且可不必
得失乃行兵之常董天弼前此進兵尙屬勇往此時帶兵本少不
敷調撥阿爾泰又不早爲籌撥接應以致如此且看如何奮勉以
定功罪再不努力則獲罪滋重矣董天弼於番地情形稍爲諳悉
著馳往阿爾泰軍營會商進剿時天弼以德爾密畢旺拉已失達
木巴宗被困久帶兵五百由木坪之堯積順山而下並咨阿爾泰
派漢土官兵二千隨剿 諭曰此行頗勇往看汝如何以功抵罪
耳十一月攻甲金達對面山梁克礪卡二天弼以鄂克什牛廠爲
賊來路分兵殲守廠賊二十餘遂據之乘勝上下攻擊賊潰遁木
坪鄂克什及三土司交界要隘皆爲官兵所獲未幾賊復襲奪牛

廠 上以天弼深染綠營惡習 諭曰董天弼在甲金達山梁運
邇不進牛廠得而復失伊前在德爾密時得卡不能固守及由山
神溝木坪堯磧紆繞程途致賊酋得以處處預爲準備是小金川
之事始終由阿爾泰董天弼貽誤所致今阿爾泰已經革職董天
弼厥罪維均董天弼調度乖方終無可辭已有旨將董天弼革去
提督畱於軍營當兵如再退縮玩誤卽在軍營正法尋 命擊解
成都監禁十二月天弼改由蒲松岡小路進攻抵達木巴宗賊由
對河南山突犯我兵擊敗之鄂克什土司得出遂克木耳宗 諭
曰董天弼自辦小金川以來屢次失機且敢捏詞諱飾其罪實無
可這是以前有旨將伊革去提督以兵丁畱於軍營效力贖罪如

尙不知悛改卽擊解成都監禁請旨辦理今伊於十五日奏攻解
達木巴宗之圍並收復鄂克什各寨克木耳宗等語此次官兵奮
勉必係常保住帶領滿洲兵丁鼓勇直前因而綠營知所觀法是
以稍有起色但董天弼究係在事出力朕不肯竟置之不論已傳
諭溫福等宥其一死仍畱軍營效力贖罪尋提督阿桂奏天弼於
軍營事務尙屬經練請代總兵和邦額管理火藥軍械三十七年
二月將軍溫福偕阿桂克資哩飭天弼率兵五百駐舊營四月起
補副將五月總辦資哩臥龍關防範督催事尋擢總兵 命統兵
赴會頭溝天弼由會頭溝至梭磨官寨梭磨土婦請以兵一千援
勦八月 賞戴孔雀翎九月天弼領兵至堪卓溝 上命鄂寶催

國朝通志卷之三十三
三十三
備糧運天弼遂由納雲達入賊境五十餘里賊築石卡拒官兵奮
勇勦殺遂據登格山梁復由郭噶爾抵咱瑪山梁攻穆陽岡木了
山梁克石卡三十餘木城三殺賊百餘 上以天弼奮勇攻勦甚
屬可嘉下部議敘十二月奏報攻克大板昭木了寨獲卡十六大
礮三十六因言如意壩北曰喀爾薩爾應分兵防範疏入 諭曰
董天弼奏攻克大板昭木了寨等處情形若於溫福至布朗郭宗
之前督兵攻破賊寨自當優敘勞績乃溫福於初十日晚攻克布
朗郭宗十一日早攻克抵木達擒獲澤旺而董天弼所奏攻克大
板昭等寨則係十一十二兩日此乃賊眾聞知大兵已得布朗郭
宗等處勢難復拒因而畏罪逃竄董天弼不過得其空寨而壩內

尙鋪張派兵勦擊欲居克獲之功總由霑染綠營惡習豫爲粉飾言之能無汗顏朕於軍營功過悉皆覈實豈爲此等虛詞所惑惟所稱誘賊出卡土兵堵截卡門賊不能退驚惶被戮等語此等土兵尙屬出力著溫福等查明量加獎賞又據奏如意壩北地名喀爾薩爾亦爲通金川要路且係我兵後路見在分據布置防範等語此事甚有關繫昨溫福奏董天弼駐守布朗郭宗已如所請並諭劉秉恬駐美諾率同經理著溫福傳諭董天弼務須實心妥辦勿再稍萌虛僞故智以致貽誤干咎尋授領隊大臣三十八年正月仍命爲四川提督二月諭天弼帶兵七百駐丹壩天弼偕總督劉秉恬合疏言布朗郭宗一帶美臥溝曾頭溝瑪爾璫大板

昭喀爾薩爾路通金川西南簇拉角克溝尤爲接壤除將溫福所
管官兵分駐各隘外梭磨至丹壩七八站丹壩至綽斯甲布軍營
又五六站賊匪潛行請添調川兵一千六百以一千赴美諾分撥
布朗郭宗等處以六百赴丹壩分派要地防護糧餉 上從之三
月 上以總兵五福赴丹壩 命天弼駐布朗郭宗六月天弼退
居美諾小營賊乘虛夜襲底木達布朗郭宗等處皆失守 諭曰
昨據阿桂奏劉秉恬來初二日札稱昨夜三更賊襲底木達等處
董提督見往官寨未知下落可見董天弼毫無準備遂爾乘勢滋
擾今復據劉秉恬奏該處被賊竟由董天弼不在官寨駐守嚴防
另立小營以致賊人窺覘空虚乘夜肆其搶占董天弼之怯懦玩

誤實爲罪不容誅昨已降旨將伊革職拏問據報見在不知下落
卽或事急自戕或竟爲賊所害亦屬死有餘辜其子並應查拏交
部治罪所有原籍及任所資財從前曾加恩賞還者仍著嚴行查
抄以示懲儆八月劉秉恬疏報天弼失事時夜由小營馳守抵木
達礪寨途遇賊右脅中槍死下部知之子聯毅乾隆三十五年舉
人以天弼駐守貽誤發往伊犁效力年滿四十六年 恩賞內閣
中書五十五年任淮安府同知卒

右 國史館本傳

高宗純皇帝乾隆四十一年大小金川平頭人七圖葛拉爾思甲
布傳送 行在 純皇帝命軍機大臣問爲逆狀對甚悉復言陷

底木達時四川提督董天弼將所部二百人抽短兵力戰不可敗
夜半領兵頭人以烏槍數百幹環擊殺之先是在軍諸大臣劾董
公失守要隘 純皇帝徙公之子聯毅等伊犁至是 赦還復聯
毅舉人原資 賜內閣中書聯毅等乃招魂葬公於城南之兆公
諱天弼字霖蒼先世明永樂中自無爲州遷大興遂世爲大興人
曾祖大才祖承詔父其倫皆 贈明威將軍母劉氏 贈淑人公
雍正十年武進士授四川提標前營守備從討瞻對升馬邊營都
司從討大金川軍功加三等升峽邊營游擊大金川旋請降罷師
升漳臘營參將調綏甯營再調提標中營率師討巴塘平之升維
州營副將小金川與黨壩爭地公單騎入其境諭以禍福兩土司

皆聽命郭羅克者黑帳房部落也掠衛藏入貢喇嘛僧公奉總督
檄出黃勝關察之郭羅克不承公夜合雜谷兵偪賊巢先發烏槍
驚其馬羣馬盡逸賊不得遁生擒其酋麻茲滾布得所掠物事定
升松潘營總兵旋 賜花翎升四川提督乾隆三十六年小金川
酋僧格桑復叛圍沃日土司於達圍公由臥龍關往勦拔密耳賊
據斑斕山死守公仰攻八日糧匱士卒拔草茹之不得已退軍至
關大學士溫福公自雲南來亦至關公請統大軍堅守自將重慶
兵一千循黃草坪救沃日道甲金達山較斑斕尤斗峻不可上乃
下令軍中求閒道得近山得勝溝溝在兩厓閒厓壁高數仞賊夾
溝設守卡厓上會大風雪公將健卒夜伏馬鞍行溝中賊守者皆

不覺遂直抵達圍破賊達圍始解乘勝拔日隆關迎大軍會於
關下時大軍久不得公軍問諸大臣已劾公逗撓而公以用奇大
勝得免死爲卒伍將兵五百人守資利寨參贊額駙玉色與公論
軍事大奇之入請 賜副將銜拔會頭溝升重慶營總兵拔卓克
采復 賜花翎拔橫梗山梁抵谷葛復繞坎竹溝閒道進攻燒大
木城一旁擊礮寨數十皆下連拔沒藥山大板昭復迎大軍會於
布朗郭宗時南路參贊阿桂公亦拔美諾賊巢僧格桑陷底木達
賊巢竄入大金川大軍拔底木達是役也公常爲軍鋒而得勝溝
坎竹溝之捷冒死入險地以迎大軍功爲最三十八年 純皇帝
聞大金川酋索諾木嘗助小金川 命溫福公爲定邊將軍討之

擢公爲四川提督守黨壩將軍奏底木達新定乃賊巢且諸軍要隘公宿將宜鎮之與兵五百人守底木達底木達當賊衝勢危甚而將軍復調兵三百赴大營其後路接應兵一千二百亦撤之當是時將軍自屯木果木軍屢勝之後不以賊爲意七圖葛拉爾思甲布等千餘人乘軍惰因先後詭降將軍開軍門納之使雜廝養七圖安堵爾等因得入大營誘降人爲內應且探知底木達兵弱無後援遂定計先犯底木達道通卽劫木果木大營六月初一日賊自山後擁眾來犯公遂遇害年六十二後九日賊劫大營將軍亦死焉公貌瓌瑋美須髯臨陣常身先士卒所向無前有哈羅克二赤驃馬極雄健將軍嘗索之公曰天弼上陣倚此二馬金川小

醜必蕩平俟手梟二逆並二馬上將軍嗚呼孰知公之志以此竟不遂哉後 純皇帝命阿桂公爲定西將軍進戰皆捷僧格桑死獲其尸攻克索諾木賊巢於葛拉依俘送京師設鎮安營鎮其地如公所豫策焉 皇上御極錄死事後 子公世襲恩騎尉公配吳夫人繼田夫人子六長聯毅由中書爲淮安府襄河同知次聯理與公同死事次聯璽縣學廩生次聯琛聯珩早卒次聯瑄國子監生女七俱適名族公歿三十八年陽湖惲敬爲文刻石於公墓之左銘曰

天縱 高宗收諸逆夷歸四海家將將臣臣罪罪功功慄而不譁公起遠疏志攫鯨鯢擲之泥沙將尊師微爲賊所窺來蹈其琅生

誣幾死死誣不生孰詫而嗟 高宗至明死與其孤生高其身將
士感銜 皇武所周廓無垠涯公神之行沛然江流勢不可遮二
馬尙從歷塊蹴塵上躡蒸霞刻石墓左公願領之我銘無夸

右神道碑銘輝敬撰

| | | | | | | | | |
|--|--|--|--|--|--|--|--|--|
| | | | | | | | | |
|--|--|--|--|--|--|--|--|--|

牛天昇

牛天昇山西太谷人乾隆七年武進士授藍翎侍衛十三年授江西興國營都司十八年遷廣東將軍標右營游擊二十六年遷湖北德安營參將二十七年調撫標中軍參將二十九年遷湖南寶慶協副將三十二年擢湖北襄陽鎮總兵三十三年八月丁母憂三十六年正月服闋補四川川北鎮總兵會大兵討金川十月天昇率本標兵赴木坪一路協同提督董天弼進剿三十七年正月大軍由達木巴宗分三路趨資哩天昇偕侍衛阿爾蘇納擊賊於瑪爾瓦爾濟山巔連戰三晝夜克卡卡十與大軍會資哩事聞交部議敘諭曰總兵牛天昇在軍營甚屬奮勉著加恩賞戴花翎

以示鼓勵二月大軍圍資哩月餘天畀分攻南山參贊五岱攻北
山未克 上以阿喀木雅爲兩山要路得此可破資哩降 旨訓
諭天畀時據特克裕爾山梁爲得爾蘇山賊所阻旣得 旨借侍
衛烏什哈達等以兵四百覓路伏箐中誘阿喀木雅賊出寨擊之
賊敗匿天畀由山梁至山麓迤邐列兵截賊援三月賊四百餘復
突出寨又二百餘自得爾蘇山來援天畀衝賊壘戰斃五十餘負
傷竄得 旨嘉獎會參贊大臣阿桂代五岱攻北山築石卡直下
坡壩賊不支大軍應之天畀亦由南山夾勦賊大潰遂克資哩
獎賚之未幾阿喀木雅及得爾蘇賊亦潰天畀親赴各巖洞箐林
捕逸賊自得爾蘇山巔下至河岸盡據之接北山麓五月偕副都

統富勒渾設卡偪賊賊夜劫者三皆擊走之六月攻據喇卜楚克山巔賊相對守甚密富勒渾繞出其後奪大卡四天昇由前登奪大卡一殺賊六十餘兩林賊百餘突截天昇後援至遁天昇督兵運木於槍石中縱火焚賊卡十一月偕章京德保等自達克蘇山麓進攻布朗郭宗取德木達礪寨三石卡七 諭部議敘十二月隨大軍克布朗郭宗及底木達小金川賊酋僧格桑之父澤旺就擒三十八年三月大軍進剿攻功噶爾拉天昇偕副都統烏什哈達等冒雪登山口兩峯奪其礪四月賊由山後犯我木柵天昇督擊敗之將軍溫福奏天昇帶兵打仗不辭勞瘁承辦軍營事務亦諳練請令轄貴州隨征兵卽署貴州提督 上如所請六月木果

木大營失利溫福遇害天畀力戰被重傷死之 諭曰牛天畀係國家出力有用之人今力戰死事實堪軫惜著交部議卹尋 賜祭葬如例諡毅節入祀昭忠祠 命圖形紫光閣儒臣擬贊曰綠營健將埽噶拉境躬犯矢石捍衛昔嶺經數十戰兵不挫劔於木果木臨危授命 予騎都尉兼一雲騎尉世職三十九年 諭曰提督牛天畀在四川軍營打仗出力屢著勞績前因在木果木陣亡時降旨查明伊子令其承襲世職茲經御前大臣將伊子帶領引見據其長子牛敬一奏稱係文生員未習弓馬情願將世職讓與伊弟牛敬憲承襲情詞殊爲可憫牛敬一旣經入學鄉試尙堪造就著加恩賞給舉人俾令力學奮勵以冀有成所有騎都尉兼

一雲騎尉世職卽著牛敬憲承襲並交與該撫對品以都司補用
仍令其隨營學習訓練弓馬勉圖上進以副朕優恤成全至意敬
憲見任陝西蘭州城守營參將

右 國史館本傳

三十三卷之三

三

174-244

曹永言 惠世溥等

曹永言浙江金華人由武舉揀發補江南大河衛千總累升四川督標右營守備疊溪營都司綏甯營參將乾隆三十六年隨征金川十一月提督董天弼派永言帶兵駐守牛廠石卡賊夜出奪卡去天弼自劾並請治永言暨都司福敏泰罪 諭曰董天弼奏已經攻得之牛廠石卡復爲賊奪去咎無可追但伊見在統兵進剿若另易生手轉恐難於得力是以所請議處不卽交部伊等功罪自在俟成功之日再行覈辦三十八年六月木果木師潰死之同時陣亡者四川委用參將惠世溥陝西漁渡路營游擊胡國英甘肅安西提標右營都司高仁張義營都司馬良棟陝西提標右營

守備哈文虎四川漳臘營守備譚世俊陝西安州營千總趙廷堯
紅德營千總林喜保甘肅鎮彝營千總張世祿巴燕戎格營千總
李金印四川提標營千總邢廷棟維州協左營千總陳明德疊溪
營千總高天祿貴州安籠鎮右營千總羅坤提標後營千總王大
恩威甯鎮標左營千總黃天美陝西常樂堡把總李曰洪延安營
把總耿顯固原鎮標右營把總彭顯珍甘肅甘州城守營把總張
孝廉莊浪營把總馬正元西甯鎮標前營把總趙廷儒鎮海營把
總張廷棟河州協右營把總關信臨洮營把總郭進梅思觀堡把
總呂奉四川提標左營把總馬占魁提標後營把總達正遠川北
鎮標中營把總游躍鯤左營把總張吉忠州營把總張其中維州

協左營把總徐剛右營把總楊維樑南坪營把總孟懷玉漳臘營
把總丁元功黎雅營把總岳方善貴州提標左營把總孫元普後
營把總李芝安籠鎮中營把總王燦鎮遠鎮標右營把總陳洪猷
平越營把總雷鼎陝西提標右營外委楊世傑興漢鎮標右營外
委楊坤甘肅威遠營外委趙一林高臺營外委李良棟永固協左
營外委甘可祥鎮彝營外委張漢傑大馬營外委孫建學馬營墩
營外委張士法四川茂州營外委羅武小河營外委金國有貴州
長寨營外委徐有德台拱營外委何通達普安營外委陳錫爵事
間議卹永言世溥國英俱廕守備仁良棟文虎世俊俱廕千總餘
俱廕把總永言子世勳襲文虎弟文彪襲世俊子得勝襲廷堯子

重禮襲喜保子進祿襲金印子建喜襲廷棟子惇襲天祿子佐清
襲天美子正品襲曰洪子喜閏襲顯珍子良善襲廷儒子六十襲
信子宗聖襲進梅子啟福襲奉子成有襲方善子岱襲鼎子啟舟
襲坤子發榮襲餘襲無考國英四川太和人雍正十二年由行伍
出征苗疆累升至游擊仁甘肅西甯人原任西甯鎮總兵高天喜
之子由廕襲騎都尉授藍翎侍衛游擢都司良棟雲南趙州武進
士文虎直隸河間人原任西安提督哈國興之子由廕襲守備發
往四川軍營世俊四川巴縣人廷堯甘肅鞏昌人喜保甘肅固原
人世祿金印甘肅西甯人廷棟陝西階州人明德四川華陽人天
祿四川龍安人坤貴州南籠人大恩湖南桃源人天美貴州威甯

人曰洪陝西米脂人顯甘肅河州人顯珍甘肅西甯人孝廉甘肅
肅州人正元甘肅鎮番人廷儒甘肅碾伯人廷棟信進梅俱甘肅
河州人奉甘肅西甯人占魁四川閬中人正達四川成都人躍鯤
四川永甯人吉四川太平人其中四川巴縣人剛四川松潘廳人
維樑四川成都人懷玉四川松潘廳人元功四川華陽人方善四
川成都人元普芝俱貴州安順人燦貴州貴陽人洪猷貴州鎮遠
人鼎貴州平越人世傑陝西長安人坤陝西興安人一林甘肅西
甯人良棟可祥漢傑俱甘肅肅州人建學甘肅山丹人士法甘肅
張掖人武四川茂州人國有甘肅文縣人有德貴州平遠人通達
貴州鎮遠人錫爵貴州安南人餘籍無考

右 國史館本傳

沈寬 洪文紹等

沈寬陝西長安人由行伍游擢四川建武營遊擊乾隆三十六年
隨總督桂林征金川時賊屯約咱寬隨副將宋元俊參將薛琮等
奮擊奪其碉俘賊六殲百四十七馘三十九捷 聞交部優敘三
十七年二月進剿吉地賊列碉固守寬隨元俊等斷其水道圍三
晝夜於碉後穴地入縱火焚擊殲賊百四十復圍賊於丹東破之
乘勝馳抵覺拉喇嘛寺以巨礮轟擊賊潰斃頭人一俘七十五月
三雜谷土司願出兵二千五百隨剿將軍溫福以寬悉番情密檄
體察誠僞七月大軍自丹壩入寬率土兵爲前鋒開山通道九月
克咱嗎山樑及穆陽岡木丁等處碉卡深入九十餘里 上嘉其

奮勳擢參將三十八年五月補貴州丹江營參將六月木果木師
潰死之同時被害者陝西汾州營都司洪文紹四川茂州營都司
邢天培甘肅松山營守備查洪玉泉營守備楊文舉鎮番營守備
左文龍興武營守備史可久陝西延綏鎮標中營守備張玉七里
關營守備都云成貴州安籠鎮右營守備羅文元陝西固原鎮標
中營千總楊海洮岷協千總徐進寅提標後營千總梁廷雲甘肅
涼州鎮標右營千總韓增壽西甯鎮標前營千總陳玉署前營千
總候補千總張孝謨後營千總孫殿甲肅州鎮標中營千總楊國
珍永固營千總張我德四川提標前營千總蘇許川北鎮標左營
千總史維紀重慶鎮標左營千總李宏基陝西延綏鎮中營把總

萬邦甯右營把總張耀城守營把總海喜昇洮岷協把總吳公詔
提標左營把總王臣商州營把總來思起城守營把總馬世駿甘
肅中衛營把總李連元洪廣營把總馬廷傑柳若椿循化營把總
李合鎮海營把總趙明洪巴燕戎格營把總王則元肅州鎮標中
營把總陸進成右營把總高自月城守營把總李奉章金塔協把
總宋得張自新鄭仁表陝西提標右營外委張清芳漢中城守營
外委韓文貴慶陽協外委雷地發洮岷協外委馬守良甯羌營外
委高斯美甘肅西甯鎮標右營外委李作貴前營外委朱顯龍惠
泰後營外委任成傑俄卜嶺營外委張士俊河州協右營外委馬
得中衛營外委汪路鼃提標前營外委黃文彪肅州鎮標左營外

委侯業興右營外委張思臣城守營外委閻宗青四川督標中營外委黃伸提標左營外委石璽安阜營外委賈廷臣馬邊營外委孫洪緒綬甯營外委張耀忠州營外委侯兆祥事 聞議卹奉

旨寬廕守備文紹天培洪文舉文龍可久玉云成文元俱廕千總餘俱廕把總寬子璋襲文紹子永祥襲洪子登科襲文舉子純武襲可久子訓爲襲玉子建德襲云成子中禮襲海子延喜襲進寅子亮襲玉子尙舉襲殿甲子廣劉襲許子士游襲維紀子欽臣襲邦甯子年清襲喜昇子彪襲公詔弟登祿襲臣子攀龍襲世駿子憤志襲合子成襲明洪子進文襲餘襲無考文紹雲南元江府武舉天培山西徐溝縣武進士洪甘肅肅州人文舉甘肅張掖人文

龍陝西長安人可久甘肅蘭州人玉甘肅武威人云成甘肅環縣
人文元貴州永豐人海甘肅固原人進寅甘肅河州人廷雲陝西
咸甯人增壽甘肅武威人玉甘肅張掖人孝謨陝西整屋人殿甲
甘肅甯朔人國珍甘肅肅州人我德陝西長安人許維紀俱四川
閬中人宏基四川華陽人邦甯甘肅甯夏人耀陝西榆林人喜昇
甘肅固原人公詔甘肅平涼人臣思起俱陝西長安人世駿甘肅
階州人連元甘肅甯夏人廷傑甘肅靈州人若椿陝西榆林人合
明洪俱甘肅西甯人則元甘肅甯夏人進成甘肅安西人自月奉
章得自新仁表俱陝西長安人清芳陝西榆林人文貴陝西南鄭
人地發甘肅安化人守良陝西長安人斯美陝西城固人作貴陝

西榆林人顯龍甘肅西甯人秦陝西長安人成傑士俊得俱甘肅
西甯人路鼐甘肅中衛人文彪甘肅蘭州人業興甘肅肅州人思
臣甘肅甯夏人宗青甘肅肅州人伸四川成都人璽廷臣俱四川
華陽人洪緒四川永甯人耀四川巴縣人兆祥四川忠州人

右 國史館本傳

馬全

馬全山西陽曲人初名璵由乾隆十七年一甲三名進士授二等侍衛二十年授福建撫標右營遊擊以與同官互爭革職寄籍順天大興充行伍改今名二十五年復中式一甲一名武進士授一等侍衛二十七年扈 駕南巡 命署江西南昌鎮總兵 賜戴花翎二十八年奏言所屬各營向例每年冬巡視一半臣恐各弁不實力操練隨時親往查閱怠玩者立予參革示警又廣信瑞州二府封禁山雖據塘汛報無奸民闖入臣所至仍親赴各隘口督查 諭曰聞汝甚屬奮勉如此方是三十年授江南蘇松鎮總兵三十四年擢江南提督三十五年奏請改歸山西原籍 上允之

三十六年六月疏言中樞政考一書凡營伍兵制無不備載營弁均宜講習請校訂頒行武職五品以上各衙門俾知有遵守部議副將以下例不頒給書籍照例准赴部刷印祇領七月同總督高晉疏言崇明鎮孤懸海外巡哨全用水兵而額設馬百四十餘匹金山柘林青村南匯四營爲沿海屏藩汛防皆資馬力而額設止七十餘匹應衷多益寡以收實用請將崇標四營之馬各裁十匹分撥金山等營草料加餉隨馬移收拔補戰兵以資差操其崇標裁馬戰餉留爲拔補水兵用三十七年又請裁事簡地僻之廣德營守備移設南匯營與都司千總輪巡匯頭洋面部議均如所請行尋調甘肅提督 陸見 賜黑狐馬褂三十八年正月 命赴

金川軍營爲領隊大臣二月將軍溫福移營木果木全偕都統海
蘭察等分攻昔嶺奪礮二賊眾蝟集槍石迸至我軍自子迄申於
冰雪中鏖戰賊敗退會日暮佯撤兵誘賊尾追伏發大敗之 諭
曰此次官兵不避槍石破礮殺賊均屬可嘉其中馬全等尤爲奮
勇出力著交部從優議敘尋議給功加三等三月偕副都統銜烏
什哈達等捕昔嶺山麓逸賊伐木開道建柵二十餘間三月烏什
哈達等進攻達扎克角山全偕署總兵海祿建十餘柵爲聲援六
月調四川提督是月木果木大營潰溫福遇害全殿後力戰竟夜
死之 諭曰提督馬全係國家出力有用之人今力戰死事實堪
軫惜著交部議卹 賜祭葬諡壯節入祀昭忠祠 予騎都尉又

一雲騎尉世職以其子國銳襲四十一年命圖形紫光閣御製贊曰挾翼雖英御須造父設非其人良材徒苦陷木果木將軍債轅殿後捐軀愧情難言國銳任直隸宣化鎮標左營遊擊

右 國史館本傳

公諱全陽曲人初名琮姓馬氏字具堂號純齋曾大父化龍大父
驥生雲朝雍正甲辰進士官至參將有四子瑤瑤其三公季珮
三世皆以公貴 誥贈振威大夫江南提督初公考爲陝西孤山
守備時梁夫人姪公或夢開牙迎上官乘軒入已而公生早疑疑
出頭角授孝經喜誦始於事親三言乾隆十三年大兵征金川公
年十七從父於軍父卒與兄瑤以喪歸葬應募西安軍門乾隆壬

申連雋 賜一甲第三人及第授二等侍衛出爲福建撫標右營
遊擊公年未壯與同官靳搯不相下俱劾去旣而幡然折節更名
曰全至京師入伍巡捕營傅文忠公奇其才乃以兵試己卯庚辰
再捷 上御紫光閣親校進士識公曰爾馬琮耶何以至此公叩
首引罪而技故絕人 上大悅 賜第一人自古科甲之奇一身
再及第而名益歸未有如公者也授頭等待衛二十七年扈 駕
江南授南昌鎮總兵官 賜花翎三十年移鎮蘇松駐崇明巡海
島登羊山姦宄絕跡三十四年擢江南提督三十七年冬調甘肅
提督復畱江南入 覲時方討金川公請行 上可之 賜元狐
馬褂加領隊大臣馳驛赴軍三十八年二月抵控喀營每戰輒克

國朝通志卷之三十三
殺賊二百餘攻獲昔嶺木果木礮樓數十 賜荷包四功牌一是
時大軍駐木果木險與賊拮夏五月公遣兄子國錡歸曰告汝父
善事我毋我無以家爲矣六月十一日賊誑公大呼殺賊於昔嶺
死之時有 命調四川提督而公死事 聞 上震悼卹典有加
世襲騎都尉又一雲騎尉 賜祭葬 御文勒碑 予諡壯節入
祀昭忠祠公生雍正十年壬子三月二十九日卯時殉事時年四
十有二生平忠孝友弟沈勇有大略或驚其兩起家冠倫魁而勳
業不竟其年爲憾而不知公之獲死所歸列星可爲完人而無愧
也配段夫人子四國銳襲職騎都尉又一雲騎尉授都司發山西
委用國綱爲公弟後國鍵國鎰乾隆四十年三月二十五日葬於

陽曲城東水峪邨先人之阡國銳乞銘於珪珪不獲辭銘曰
嗚呼癸巳孟陬遇公王胡隆角高鳩聃耳方臚嗟偉丈夫甲第燦
燦雄魂殷鬢公平曷盱晉山牙牙豐碑龍拏歸復在天不磨不渝

右墓誌銘朱珪撰

馬壯節公諱全初中乾隆壬申武探花因與同僚角觝故罷官入
京營爲武弁傳文忠公甚倚任之復中庚辰狀元時人榮之洊至
四川提督從征金川時溫相國福擁兵不進公慨然曰金川蕞爾
小夷經大兵兩度撻伐不能獲尺寸之利乃至屯師經年老師糜
餉安用將帥爲也今相國以台司重臣不能出險用奇使彼畏威
革面惟知置酒高會撻辱士卒終將何物歸報 天子真所謂空

插羽扇無計請纓者也温笑斥其妄其後木果木之敗公殿後隊
手戮數十賊力戰乃死同難者有董提督天弼牛提督天昇皆不
及公之勇烈云

右錄宗室昭槱撰

國朝耆獻類徵初編卷三百五十三目錄

忠義二十三

吳鉞

趙文哲

王日杏等

吳璜

張大經

李棟

李顯祖等

陳聖矩

次子理躍
錢國佐等

阿爾素納

吳錦江

李丕等

扎拉芬

拉托爾凱等

秦紹榮

胡永福等

觀森保

瑚圖禮等

富森布

綽爾齊哈等

傅良臣

姚應奉

楊有鳳

馬國樑等

索柱

福勒等

陶思連

胡朝臣等

楊發育

陳明德等

劉天德

張兆虎等

汪汝鳳

劉建武等

阿咱納

阿那等

沈齊義

陳枚等

音濟圖

幹福等

常保

岱青阿等

曹陞

呂勝等

國朝耆獻類徵初編卷三百五十三忠義二十三目錄

程美等

李成時

國朝耆獻類徵初編卷三百五十三

通奉大夫前署江西巡撫江西布政使司布政使湘陰李桓輯

忠義二十三

吳鉞

君姓吳氏諱鉞字炳臣號左黃固始人父士能庠生君生三歲而孤既長貌魁岸多力性剛直遇鄉里不平事多爲人排解或怒色爭聞母命輒愾服不敢言屢躓於場屋乃納粟得主簿分發四川署彰明彭縣典史借補營山縣典史乾隆丁亥戊子閒滇省方用兵兩解牛馬赴滇軍功加一級三十八年正月大兵深入金川委守控喀糧站調澤耳多糧站君精神周而遇事敢爲官雖卑大吏

倚重俟功成奏且破格用六月十一日賊犯木果木大營大帥死
澤耳多去大營以東澤耳多以西松林溝赤里角溝站俱被奪聲
洶洶賊垂至有勸君走者君奮然曰吾奉命守此與站存亡分也
與吾共殺賊者吾骨肉也因拔所佩刀立木城旁曰敢言走者斬
眾心稍定迨賊至君率兵及夫役等相接殺賊勢稍潰俄望見飛
騎四面如雲集自顧敗殘士卒餘無幾流矢火光燒木城環相攻
也曰死耳死耳余官雖卑恨不能報國矣遂被害被害時猶徒
手殺數人血淋漓徧體事聞贈鑿儀衛經歷入昭忠祠蔭一
子廷淦如其官

贊曰方金川未平時余以公事奉命赴軍前聞人士言木果木

之變諸君死事狀稱吳君死尤烈比還京與君從弟香亭太常言之因爲余述其生平如此殆忠孝出於其性者然余與君叔爲同年友知其先有以武功顯者今君文吏且小吏耳而卒能殺身成仁於以光 國典而無愧於其先也嗚呼可不謂偉男子哉

右傳周煌撰

四十一
五十二
六十三
七十四
八十五
九十六
一〇七
一一八
一二九
一三〇
一三一
一三二
一三三
一三四
一三五
一三六
一三七
一三八
一三九
一四〇
一四一
一四二
一四三
一四四
一四五
一四六
一四七
一四八
一四九
一五〇
一五一
一五二
一五三
一五四
一五五
一五六
一五七
一五八
一五九
一六〇
一六一
一六二
一六三
一六四
一六五
一六六
一六七
一六八
一六九
一七〇
一七一
一七二
一七三
一七四
一七五
一七六
一七七
一七八
一七九
一八〇
一八一
一八二
一八三
一八四
一八五
一八六
一八七
一八八
一八九
一九〇
一九一
一九二
一九三
一九四
一九五
一九六
一九七
一九八
一九九
二〇〇
二〇一
二〇二
二〇三
二〇四
二〇五
二〇六
二〇七
二〇八
二〇九
二一〇
二一一
二一二
二一三
二一四
二一五
二一六
二一七
二一八
二一九
二二〇
二二一
二二二
二二三
二二四
二二五
二二六
二二七
二二八
二二九
二三〇
二三一
二三二
二三三
二三四
二三五
二三六
二三七
二三八
二三九
二四〇
二四一
二四二
二四三
二四四
二四五
二四六
二四七
二四八
二四九
二五〇
二五一
二五二
二五三
二五四
二五五
二五六
二五七
二五八
二五九
二六〇
二六一
二六二
二六三
二六四
二六五
二六六
二六七
二六八
二六九
二七〇

11

趙文哲 王日杏等

趙文哲江蘇上海人由廩生於乾隆二十七年 南巡召試 賜
舉人授內閣中書在軍機章京上行走三十三年以原任兩淮運
使盧見曾查抄案文哲通信寄頓革職時大軍征緬甸署雲南總
督阿桂奏請帶往軍營三十五年經略大學士公傅恆以文哲遇
事奮勉奏復原職三十六年隨將軍溫福征金川三十七年擢戶
部主事三十八年木果木師潰死之同時被害者刑部主事王日
杏新繁縣知縣徐瓚鄧都縣知縣楊夢槎合州吏目羅載堂其在
各臺站被害者潼川府通判汪時漢州知州徐詒內江縣知縣許
椿大竹縣知縣程蔭桂秀山縣巡檢郭良相納谿縣典史許濟其

沿途被害者候補從四品王如玉候補知縣孫維龍張世永布政

司照磨倪鵬候補縣丞倪霖秀山縣典史周國衡事 聞議卹文

哲 恩贈光祿寺少卿長子秉淵經大學士舒赫德奏准以內閣

中書用歷升四川成都府知府嘉慶七年 賞道銜次子秉冲見

仁通政使南書房行走日杏 贈光祿寺少卿如玉 贈太僕寺

少卿瓚夢槎時諡椿蔭桂維龍世永俱 贈道銜鵬霖俱 贈鑾

儀衛經歷載堂良相俱 贈府知事濟國衡俱 贈主簿日杏子

光顯瓚子日簪夢槎弟乘槎時子琳椿子煌蔭桂子煥如玉子榮

榮諡子方瑞世永子德標俱廕知縣良相弟良俊鵬子廷棟霖子

炳載堂子啟元俱廕主簿濟子廷梓廕吏目餘廕無考日杏江蘇

無錫人瓚江蘇陽湖人夢槎江蘇金匱人載堂順天宛平人時浙
江錢塘人諡湖北黃岡人椿浙江嘉善人蔭桂浙江仁和人良相
廣西臨桂人濟順天東安人如玉山西靈石人維龍順天宛平人
世永陝西渭南人鵬直隸臨榆人霖浙江仁和人國衡順天甯河
人

右 國史館本傳

乾隆三十八年春定邊將軍大學士溫公福次昔嶺討金川酋六
月己丑朔美臥溝失守戊戌將軍以師退距木果木北嶺不數里
歿於陳戶部河南司主事趙公死之越九日予聞自雅州試署爲
位以哭又二旬聞 詔贈光祿寺少卿入祀昭忠祠 予祭葬馳

驛歸里廕一子入監讀書期滿予官是冬小金川復平明年二月
孤秉淵自京返旄而以書抵蜀先請爲隧道之文嗚呼公詩名在
天下節義在 國史有子世其業死亦可無憾而予言尤有信者
憶戊子冬予使黔歸次淇縣時公坐漏言前運使盧見曾逮問事
落職從雲貴總督今將軍阿公桂討緬賊入滇驚相遇於道倚枯
柳相泣語移時別其明年今將軍拜副將軍公從經略大學士傅
公恆出萬仞關歷猛養猛拱攻老官屯十一月緬酋降而公病先
入關以薦得 旨候引 見又明年從副將軍駐騰越防秋又明
年辛卯十月討小金川公從溫將軍自永昌疾馳二十晝夜抵成
都明年十二月小金川平遂移討金川會予視學入蜀謂賊平可

與公亟見而樂淵亦從予而西以次年閏禊日返自木果木軍營
傳語予甚悉時公已遷官不三月而變作凡從軍六年至是而授
命焉嗚呼難言矣公長予五歲丁卯秋以詩相質於舉場始定交
自後王光祿鳴盛吳舍人泰來王考功昶黃司諭文蓮錢詹事大
昕曹中允仁虎在蘇州與公爲七子詩傳至日本其國相高棟爲
七律人贈一章寄估舶以達人豔稱之而其後多自以少作爲悔
錢以辛未奏賦 行在授內閣中書至丁丑而王與曹繼之子亦
與是選始過公高行之居癸未春兩家聯舫入京僦屋同與居後
三年子弟攜家亦至居始析公兩放會試未得列館職而書局總
裁官歷舉公分修平定準噶爾回部方略 御批歷代通鑑輯覽

大清一統志及未成之音韻述微鑑古輯覽熱河志諸書均計日
程課自予入詞館所纂書尙多然不及公十五六而公又以其閒
寅入酉出儼直草詔令賦詩談讌俱不廢或賣文以佐祿入所不
逮去年春 四庫全書館局開一時績學之士多奏名入翰林
賜進士其與公同獲罪者皆起而公積軍功稍遷遇變又不爲同
行者之苟免設公舉禮部必不直軍機不直軍機人知公學之博
說之長而不知才之足以決事卽一言不密又非出有意退而授
徒著書亦足以開益於人而傳於後乃援薦援畱輾轉再四至以
身殉爲可哀也公自爲高才生有忌而鱗以隱事者其人後公官
中書以死視之猶蒯首之一映卽東華車馬不失職之文人所辛

勤而僅有者不朽果安在也夫亦可無憾爾矣公諱文哲字損之號璞函世爲上海人學使者以孝友純密舉優行壬午應南巡召試賜舉人授內閣中書遷戶部河南司主事特贈中憲大夫光祿寺少卿曾祖繼膺祖璧國子生候選州同知父紳歲貢生兩世以公故贈徵仕郎內閣中書祖母張氏母張氏吳氏皆贈孺人配張恭人後公七年卒側室萬孺人子秉淵廕內閣中書秉沖監生入直懋勤殿學泗醴源學海女一所著羣經識小錄若干卷文集若干卷嬋雅堂詩十二卷藏海廬詩四卷姬觥集十卷詞四卷其歿也距生雍正三年九月二十九日年四十有九以某年月日葬縣之某里

右墓碑吳省欽撰

趙文哲字損之松江上海人世業儒居於鄉君生有異質讀書輒數行下窮覽極搜靡不通究所居有田二頃許課耕暇卽執卷以吟葢方其少時讀書之樂未有能過者也旣充學官弟子試必冠其曹同時如青浦王昶嘉定王鳴盛曹仁虎皆以詩學鳴一時獨於君折服嘆遜自謂不及君體貌羸瘦不勝衣而隱然自高遇事不少屈抑閣學李鶴峯視學江蘇尤知君稱爲曠代才比李公移任浙江則延君入幕勘文字君於是徧歷浙東西名勝地幽巖異壑所得必書而詩學益進矣乾隆壬午 天子南巡江浙 召試君第一等 賜舉人內閣中書丙戌入軍機處行走君旣富文學

又精神奕然處劇境無滯難左右禁近臣方重倚毗而君以漏泄禁中語去官時尙書阿公桂將督師滇南幕府闕書記聞君才奏請君暨郎中王昶同行君慨然辭家匹馬短衣從阿公以南由楚之黔之滇之緬甸其山川奇怪皆昔人目所未經君悉誌以詩侷儻瑰奇生動變化蓋進而益上矣旣而阿公由滇之蜀大學士溫公方督師勦金川見君與語大悅之乃畱幕府贊戎事時方與阿尙書分兵王郎中遂從阿尙書去溫公重君甚一飯一飲必與偕片時不見輒令人覘君何作無所苦否已而連克金川地三十七年十月遂勦平美諾以功復中書又授戶部主事隨營治事三十八年六月蠻人以聞誘我軍有爲之應者勢洶洶潰亂在軍者逆

國朝通志卷之三十三
知明日鬱卒且大至相率逃竄君毅然以爲身爲幕府贊畫且疊
荷 國恩詎可捨帥臣去卒與俱死事 聞 朝廷追贈君光祿
寺少卿蔭一子知縣君死時年四十九前此有璞函詩彙十二卷
于役滇蜀又有詩集若干卷藏於家

右傳程晉芳撰

夢麟云損之綺歲卽有盛名於吳會閒嘗撰毛詩辨論數十篇博
而能精多東萊華谷貴與諸家所未發洵乎爲湛深經術之士

右正雅集符葆森撰

王日杏

王日杏字丹宸號漱田無錫人祖雲錦康熙丙戌 廷試進士第

一改翰林院修撰提督陝西學政父諱興洛君幼時讀書上口卽
倍誦旣長善書法於魏晉以降墨跡石刻無不臨摹輒畢肖又嫻
習時藝慨然有用世志乾隆癸酉舉於鄉甲戌考取內閣中書行
走軍機處每扈從 行圍遇公事旁午坐馬上盤一膝置紙膝上
信筆作小楷疾如飛而工秀獨絕同輩中嗟嘆以爲莫能及有官
中書者見機要大臣跪一足請事君見而怒罵曰子非人壞 朝
廷綱紀吾不能與子共事遂告之大學士陳文勤公逐之蓋數十
年前士大夫以禮自持於君猶見前輩風采云君性耐繁劇退食
之暇輒以文筆書畫自娛生平未嘗見倦色屢擢戶部郎中出知
銅仁府明法善斷人稱之曰王青天公事累誤降調抵京時大學

士温公辦理緬甸將往滇南聞君至請與偕行奉 命再授內閣
中書仍辦軍機事由滇之蜀進討金川佐謀畫著有勤績木果木
之變君方引眾南有紅衣賊立高壘飛片石正中君額以死事
聞 贈授光祿寺少卿蔭子光顯知縣

右傳程晉芳撰

孫維龍

孫維龍字普田號最堂本浙之餘姚人寄籍宛平乾隆二十五年
成進士簡發安徽以知縣用凡一攝潁州府通判授黟縣知縣調
知鳳陽縣題署亳州知州計薦一等以公事降調奉 旨仍以知
縣用候補四載適金川請能事官佐戎事君銜 命暨吳君璜輩

千餘人同往其死也在亂軍中不得其真耗君性質直而慷慨勇於爲善然常鬱鬱以爲身親民之官而志有不行故遇可以致力者無弗致焉其在黟初立書院延碩士劉君大榭以教士大榭字賈南桐城人方官黟縣訓導旣去而君延之分祿米以贍弟子黟縣東三十里漁亭鎮爲浙楚通衢河之兩岸架木以渡水潦驟溢民以涉爲苦君乃建石橋構山亭冬夏施湯水以濟人人以不困慰之民惑風水說年久不葬親或貧不能舉者君爲鬻地勸勉之葬者千有餘家其在鳳陽戊子己丑間遇旱災賑貸君曰是不可以假胥役手夜夜戴星起躬親煮粥散錢弗一毫懈吏畏而民歌之謂孫公活我人或稱君者愧作色曰君胡然此皆小小不足

國朝通志卷之三十四
道也蓋君方欲以其學之所得上焉致之 朝廷下惠及百姓而
竟齋志以攷傷哉君無子以族子永煥嗣歿時年四十三

右傳程晉芳撰

吳璜

吳璜字鑑南會稽人父煥文號樸庭工詩能文乾隆丙辰舉博學鴻詞科試不第於後困頓場屋爲諸侯賓客以老君旣名父子又舅氏商太史寶意亦以詩名君聰慧善聽受故幼而能長而工遇名流得一字一句諷誦不休或錄而藏之人笑爲詩癖勿恤也庚辰成進士授戶部主事貧益甚作詩益勤苦手鈔近人詩數十冊猶以爲未足己丑選授澧州未蒞任以憂去壬辰復待選來京師詩筆益道健兼治古文屢屢乎成集矣旣而四川總督劉秉恬以方用兵攻大金川請簡文員十餘人聽指揮君與同年孫君維龍適與斯選將行債家促迫幾不得發比至蜀入軍需局治糧事番

人來攻君與孫君皆歿於陣所輯他人文及自著從軍詩多泯歿
惟藏家彙存焉事 聞 朝廷贈君按察使司副使蔭一子知縣

右傳程晉芳撰

吳璜字方向號鑑南浙江山陰人曾祖諱溶哲康熙壬子舉人官
內閣中書佐大司馬畱村公平廈門軍功加二級晉 封賜一品
蔭祖諱根由歲貢宰玉山安肅兩縣考諱爚文世稱樸庭先生國
子監生有文不遇爲時推重別有傳生二子公其長也母商氏爲
元江府知府諱盤之妹公生具宿慧能承家學乾隆己卯舉京兆
鄉試庚辰成進士除戶部雲南司主事己丑出知湖南澧州至河
南尉氏父卒於塗貧不能歸時知衛輝府朱政爲公同榜進士延

公掌書院服闋獨扶父柩歸里與母合窆於型塘先域癸巳再謁
選益空乏三月揀發四川馳入衛輝仍寄孥於政去至西安資斧
竭中丞畢公沅贈金三十鎰乃得行四月十二日抵成都金又竭
拮据得十鎰買鞍馬五月十七日詣登春軍營山水惡劣積雪不
融盛暑扶纊猶有寒色大將軍某素失將士心六月二日賊圍登
春急初十之夕木果木一軍潰大將軍死明夕總督衝圍得出登
春一軍亦瓦解公偕妻叔周輔鈞馳至崇德山梁賊槍中輔鈞騎
突逸不能止返顧公爲礮石飛擊人馬墜溪河中同墜者四千餘
人時年四十七事 聞得 贈加道銜入祀昭忠祠子安祖方十
齡得蔭如公秩同時死兵禍爲予友者則有南昌彭同知元璋大

興孫知縣維龍陽湖王主事日杏松江趙主事文哲維龍先一日
死日杏後一日憩山塢中賊飛石死文哲被賊斷臂死元瑋挾三
奴徒行賊且大至乃奮身躍江中死時年六十有一公性嗜學重
友義爲舅氏商公愛重能苦吟篇成數改竄求必傳一字不安至
廢寢食飲酒談文終夕不倦奴子苦飢怨聲喃喃如弗聞者然議
論馳騁輒以人倫綱紀爲任都下端人名士咸器之所著有蘇門
紀遊及黃孫山房詩六卷惟入蜀所作棄亂軍中可惜也
論曰予聞周生云登春突圍時鑑南苟疾馳尙得脫願攬轡夷猶
謂周生日儉生無補於事死吾職妻子君之責也語未絕遂墜澤
中嗚呼予在越州與公交游且一載或目爲詩人至此而公之論

定矣予蓋聞公平日所志者大也然而報國僅止於此乎予又
怒焉垂淚已

右傳蔣士銓撰

陸燿日鑑南舉京兆出蘭泉王舍人之門

右兩浙輶軒錄張維屏錄

張大經

張大經山西鳳台人乾隆十六年一甲一名武進士授頭等侍衛
二十年授湖北武昌城守營參將二十三年以承緝逆犯馬朝柱
限滿無獲部議降一級調用二十四年捐復補山東濟南城守營
參將二十八年遷文登營副將三十四年擢陝西興漢鎮總兵三
十六年領西甯及陝西兵各一千赴金川軍營三十七年二月大
軍圍資哩派由中路擊賊九月進勦兜烏山梁大經以兵千駐守
阿喀不雅十一月移駐木蘭壩鄂克什舊寨十二月大軍旣克木
爾古羅及卡了進勦布朗郭宗大經偕侍衛普爾普等直徧賊寨
克之焚其樓斃賊甚眾 諭部優敘功加三等會副將軍阿桂已

克美諾逆酋僧格桑遁往布朗郭宗大經隨將軍溫福追勦至底
木達擒僧格桑之父澤旺三十八年二月大軍攻功噶爾拉大經
偕副都統烏什哈達等冒雪登山口兩峯奪其礮是月大軍移營
木果木大經以兵五百分駐簇拉角克 上以其地在功噶爾拉
了口之北形勢險要後路防範宜嚴 諭增兵協防四月偕烏什
哈達等攻達扎克角山擊敗伏箐賊沿山而下攻得斯東寨賊棄
寨遁六月木果木軍營失利溫福遇害參贊大臣海蘭察檄大經
撤兵出遇賊於乾海子路險不能騎徒步力戰死 諭曰總兵張
大經效命行間亦殊可憫著照高天喜之例酌減議敘 命祀昭
忠祠尋議照陣亡旗員二品大臣例 恩廕騎都尉子無咎襲見

任福建提標後營游擊

右 國史館本傳

國朝通志卷之三十四

四

李棟縣 李顯祖等

李棟縣直隸豐潤人由乾隆二十八年武進士授藍翎侍衛三十
二年授山西殺虎口都司三十八年揀發金川軍營以游擊補用
六月賊窺簇拉角克山梁棟縣擊退之是月木果木師潰率兵役
突圍出遇賊於乾海子手刃三賊中槍傷亡同時陣亡者貴州平
越營游擊李顯祖黔西協左營都司劉宏達雲南永北營守備何
國柱甘肅西甯鎮後營守備巫泰候補守備李品先鄔翼麟陝甘
習標後營千總浦仁甘肅提標中營千總李友才西甯高溝堡千
總王洪甯夏鎮前營千總陳世寶左營千總朱紫文縣營千總柏
文景俄卜嶺營千總劉玘文陝西鎮羅堡把總尤玉清歸德堡把

總辭甫唐甘肅西甯鎮右營把總陳玉琳王文成永安營把總楊
成正北川營把總楊斌威甯堡把總姚進功靈川營把總趙興基
甯夏鎮前營把總杜士英右營把總王肇基貴州長寨營把總周
華畢赤營把總呂文富黃平營把總郭岷甘肅提標中營外委朱
尙志後營外委朱尙忠李元馥西甯鎮右營外委徐照得馬得林
威遠營外委王學玉喇課營外委馬伏成興武營外委劉世禧碾
伯營外委吳進祿平羅營外委岳正四川重慶右營外委馬世奇
松潘鎮左營外委文成林右營外委馮子卓貴州提標外委張甫
成事 聞議卹棟縣顯祖宏達俱廕守備國柱泰品先翼麟俱廕
千總餘俱廕把總棟縣子衍祚襲顯祖子永福襲國柱子君佐襲

秦子咸若襲品先子一皋襲翼麟子玉襲友才子德秀襲洪子永
德襲文景子長清襲玉清子建功襲甫唐子耀襲文成弟速成襲
成正子彬襲斌子興禮襲餘襲無考顯祖直隸南宮人宏達貴州
鎮遠人國柱雲南恩安人秦陝西長安人品先雲南開化人翼麟
湖南武陵人友才洪俱甘肅西甯人世寶甘肅平涼人文景甘肅
大通人玘文甘肅武威人玉清甫唐俱陝西榆林人玉琳甘肅張
掖人文成成正斌俱甘肅西甯人肇基甘肅甯夏人華貴州遵義
人文富貴州大定人岷湖南武陵人尙忠甘肅蘭州人尙志元馥
俱甘肅張掖人照得甘肅武威人學玉伏成俱甘肅西甯人甫成
貴州安順人餘籍無考

皇朝通志卷一百三十三

右 國史館本傳

本

陳聖矩 次子理躍
錢國佐等

陳聖矩山西太谷人乾隆四年武進士十九年選湖廣提標左營
守備累升四川黎雅營游擊三十二年隨征緬甸因在事有功加
一級回任三十六年隨征金川九月攻甲金達有戰功三十八年
帶兵五十駐守馬爾底六月賊眾奄至聖矩被圍度勢不能支乃
盡焚火藥糧草偕次子理躍入烈燄死同時陣亡者底木達則四
川重慶鎮中營游擊錢國佐八角礮則四川會鹽營守備王汝衡
科多橋則陝西興漢鎮左營把總李承本大壩溝則貴州清江協
右營把總楊通陝西提標前營千總年大銀昔嶺則直隸清江協
左營外委李永慶達爾圖則貴州長壩營外委李連元事 聞議

卹聖矩加 贈一級與國佐俱廕守備汝衡廕千總餘俱把總聖
矩孫德文襲國佐子元勳襲汝衡子懿襲承本子懷勇襲餘襲無
考國佐雲南南甯人乾隆十年武進士由藍翎侍衛授貴州荔波
營守備二十年升陝西延綏營都司二十八年升四川重慶鎮中
營游擊汝衡四川成都人承本陝西興安人通貴州普定人大銀
陝西長安人永慶直隸南宮人連元貴州畢節人

右 國史館本傳

阿爾素納

阿爾素納吉林滿洲鑲黃旗人姓祿葉勒氏乾隆二十一年由前鋒隨征西路二十五年還京授藍翎侍衛二十七年授三等侍衛三十四年隨征緬甸十月大兵勦新街阿爾素納在事有功授二等侍衛 賜號額騰伊巴圖魯三十五年赴金川軍營三十六年十二月大兵攻巴朗拉阿爾素納同侍衛額森特先登奪賊兩礮中山峯復隨攻山頂礮卡夜克之大兵遂越巴朗拉嶺三十七年正月分三路攻資哩阿爾素納同總兵牛天昇由瑪爾瓦爾濟進奪卡甚眾二月大兵破賊卡阿爾素納等截殺匿地溝賊殆盡卽駐守南山會參贊大臣五岱分攻北山石卡南山阿喀木雅賊潛

往阿爾素納等邀擊之賊敗遁三月移攻阿喀木雅賊夜遁阿爾素納從南山協勦奮勇進奪沿山數卡賊突來犯擊敗之尋復由喇卜楚克繞攻資哩南山同牛天昇分兵衝壓羣賊勢六月大兵三路攻美美卡阿爾素納由南山溝下繞出賊卡後與各隊兵合圍賊大木柵賊拒敵衝入賊陣短兵鏖戰斃賊數百尋同總兵李照樹柵進攻賊二百餘來犯阿爾素納接戰殺賊甚眾旋同副都統海蘭察夾攻木城斬賊三百餘因立卡駐守七月擢頭等待衛八月大兵至貢噶誘賊出戰阿爾素納等伏兵四路進攻殺賊百餘十一月進攻兜烏同總兵哈國興等克穆拉斯郭大寨據兜烏山頂與總兵馬彪合附近礪卡悉攻克 諭曰此次在事奮勉之

頭等侍衛阿爾素納著賞給副都統銜尋授領隊大臣三十八年
三月大兵至木果木分六隊乘夜進剿阿爾素納與海蘭察等合
攻賊礮自子迄申克兩大礮毀之 諭獎阿爾素納等尤奮勉出
力 命優敘時阿爾素納駐守兩山間賊二百餘來侵阿爾素納
等分兵夾攻多殺賊我兵追至山腳奪據石卡二復於溝底樹柵
進偏賊窘迫夜來犯我兵追殺賊俱受傷竄聞三月同副都統烏
什哈達領兵一千五百由達扎克角下攻木城賊百餘出拒我兵
殺三四十人官兵卽據木城乘勝下壓連克礮樓一石卡二尋授
鑲白旗蒙古副都統四月率兵攻達扎克角山梁克木城礮卡五
伏賊自箐殲之隨攻克得斯東寨仍樹柵繼進賊三四百來犯阿

爾素納等勦殺過半五月合攻昔嶺對面山峯木寨阿爾素納等
冒槍石擊之殺賊甚眾賊從林後溝中出斷我歸路我兵力擊之
斃賊數十復於達扎克角高阜築礮臺轟賊傷斃甚多六月木果
木失事阿爾素納率滿洲兵撤出行至大壩溝遇賊力戰歿於陣
事聞上悼惜之命照扎拉豐阿例議卹贈都統銜入祀
昭忠祠賜祭葬如例給騎都尉又一雲騎尉世職無子以從弟
尼堪襲兩金川平命圖形紫光閣儒臣擬贊曰攻巴朗拉絕嶽
先登三軍從之以是著稱資哩斯當鷲若鷹隼大壩殺賊名彰身
殞

右 國史館本傳

吳錦江李丕等

吳錦江江蘇上元人由武舉效力兵部期滿投四川提標前營守備乾隆二十九年遷督標中軍都司三十三年遷會鹽營遊擊三十七年隨松潘鎮總兵宋元俊征金川三月官軍改革布什咱錦江隨元俊由章谷渡河據格藏橋剿敗之 諭交部議敘遂由默資溝進抵吉地用火彈燒斃守碉賊百餘旋擢漳臘營參將三十八年正月副將軍阿桂派帶綠營兵八百守吉地丹東一帶臺站四月因差往吉地之兵丁白樂堯乞補路票將吉地字改寫鑪城錦江未能根究經阿桂奏參 諭曰兵丁奉差舞弊情罪最重該參將既經察出路票乞改情弊自應將白樂堯嚴審重懲乃並不

立時向究仍聽其自行前往實屬膜視輕縱吳錦江著革職畱於
軍營自備資斧效力贖罪旋隨攻當噶爾拉山梁陣亡奉 諭著
交部照參將例議卹賜祭葬加贈二級廕守備子春襲同時陣亡
者陝西提標中營千總李丕黃浦營把總馮世祿四川建武營把
總蕭洪緒潼縣營外委李明陝西漢鳳營外委王應舉木瓜園堡
外委王府霞涇州營外委薛孟華潼關協左營外委陳森貴州大
定協右營外委楊淮志湖廣宜章營外委陶起龍議卹奉 旨李
丕馮世祿蕭洪緒各加贈一級廕把總餘卹如例丕陝西鳳翔人
世祿陝西榆林人洪緒四川巴縣人明四川平武人應舉陝西鳳
州人府霞陝西榆林人孟華陝西朝邑人森陝西同州人淮志貴

州大定人起龍籍無考

右 國史館本傳

皇清宣統元年庚申年
三月初三日

三

扎拉芬 拉托爾凱等

扎拉芬滿洲正藍旗人姓烏朗哈特乾隆二十年由健銳營前鋒
出征回部凡葉爾羌喀什噶爾阿勒楚爾伊西洱庫爾淖爾諸戰
皆與焉前後共得功牌十一歷任空銜藍翎長護軍校委署護軍
參領副護軍參領三十三年揀發湖南以參將用三十四年補桂
陽營參將三十七年升長沙協副將八月 命赴金川南路軍營
三十八年以軍營出力擢永州鎮總兵三十九年正月領兵取拉
科奮勇擊賊中槍傷尋歿三月前鋒拉托爾凱進攻喀利歿於陣
七月賊至布達什挪參領觀新保驍騎校特特依護軍校納達齊
擊之均戰歿十一月賊復擾回郭洛藍翎長博崇烏死之先後事

聞各 賞卹如例 思廕扎拉芬爲都司拉托爾凱觀新保特特
依納達齊博崇烏爲雲騎尉扎拉芬子哈凌阿襲納達齊子烏爾
衷布襲博崇烏弟圖經阿襲餘襲無考拉托爾凱滿洲鑲藍旗人
姓達古多爾新特特依呼倫貝爾正藍旗人姓赫爾拉特納達齊
滿洲正黃旗人姓赫舍里博崇烏滿洲正紅旗人姓納喇觀新保
籍無考

右 國史館本傳

秦紹榮 胡永福等

秦紹榮漢軍鑲黃旗人西安駐防乾隆二十年由委署驍騎校出征回部得頭等功牌一三十八年隨征金川三十九年師進凱立葉次莫爾敏山進攻迪噶拉穆扎大礮賊力拒紹榮奮勇衝擊歿於戰駐防驍騎校委署參領胡永福同日陣亡當師進凱立葉時賊眾盤踞山峯槍石俱下湖北竹谿營千總吳正孝湖北撫標右營把總余國良湖北道士汛營把總曹玉林皆戰歿嗣是大軍進勦遜克爾宗貴州古州鎮左營守備張芸四川維州協左營把總張國成四川松潘鎮中營外委羅騰龍四川茂州營外委張國臣貴州提標左營外委徐沛俱力戰死先後事 聞議卹紹榮永福

俱 恩廕雲騎尉芸廕千總正孝國良玉林國成俱廕把總沛以
爭先出營越眾追勦身冒矢石遂致捐軀 上甚憫之奉 旨照
千總例廕把總餘 賞卹如例紹榮子世宗襲餘襲無考永福漢
軍鑲黃旗人正孝湖北竹山人國良湖北江夏人玉林湖北漢陽
人芸四川永甯人國成四川納溪人騰龍四川松潘人國臣四川
茂州人沛貴州石阡人

右 國史館本傳

觀森保 瑚圖禮等

觀森保吉林正紅旗人姓薩克察乾隆三十四年由防禦委署參領隨征緬甸得頭二三等功牌各一三十八年調征金川攻克色湖普列頭等功 賞戴孔雀翎三十九年二月擊賊於達爾圖陣亡三月甘肅甯夏鎮右營守備瑚圖禮隨大軍攻取當噶爾拉力戰受傷尋沒六月進剿猛固寨委署參領密雅瑪察委署驍騎校托尼保皆爭先擊賊歿於陣是月佐領佛喜亦擊賊於策耳腳陣亡七月復攻木雅山賊力坦藍翎侍衛和屯空銜藍翎關德死之事 聞議卹觀森保 恩廕雲騎尉瑚圖禮廕千總密雅瑪察托尼保佛喜和屯關德俱廕雲騎尉觀森保子福錫保襲瑚圖禮孫

托音太襲關德子楚隆凱襲餘襲無考瑚圖禮滿洲正黃旗人姓
瓜勒佳乾隆十九年由藍翎侍衛隨征準噶爾敘功 賞雲騎尉
世職尋升三等侍衛授四川松潘鎮左營遊擊三十三年隨征緬
甸緣事革職三十七年隨征金川以在軍營奮勉 恩賞守備銜
旋實授密雅瑪察索倫鑲黃旗人姓鄂諾思托尼保索倫正白旗
人佛喜滿洲正藍旗人俱姓沃哱和屯吉林正白旗人姓溫特赫
關德滿洲鑲黃旗人姓瓜勒佳

右 國史館本傳

富森布 諱爾齊哈等

富森布蒙古鑲紅旗人姓巴爾噶沁乾隆三十六年由烏槍護軍
出征緬甸調征金川攻巴朗斯當安明郭宗等處其得功牌八三
十七年授六品頂帶藍翎三十八年攻阿喀木雅得功牌一三十
九年正月補授烏槍藍翎長三月擊賊於羅博瓦奮勇衝殺歿於
陣同時陣亡者三等侍衛綽爾齊哈六品頂帶藍翎塔斯哈前鋒
署驍騎校富昌前鋒校法克津領催委署七品官翰濟勒圖羅博
瓦既克賊據喇穆喇穆大兵進擊達錫納阿哈泰舒隆阿扎拉芬
巴爾渾察蒙古勒岱皆死之事 聞議卹 恩廕富森布等雲騎
尉富森布子舒明阿襲塔斯哈弟豐紳布襲富昌子阿木昌阿襲

法克津子額騰保襲達錫納子錫蒙額襲阿哈泰子魯太襲舒隆
阿子倭克錦襲扎拉芬子奇成額襲餘襲無考綽爾齊哈滿洲鑲
黃旗人姓阿朗塔斯哈蒙古正黃旗人姓巴林富昌吉林正白旗
人姓溫特赫法克津滿洲正藍旗人姓關佳翰濟勒圖呼倫貝爾
正黃旗人姓都拉爾哈爾察海滿洲鑲白旗人姓厄魯特達錫納
滿洲鑲黃旗人姓完顏阿哈泰滿洲正白旗人姓富察舒隆阿滿
洲正藍旗人姓郭爾羅斯扎拉芬蒙古正紅旗人姓巴約特巴爾
琿察索倫正紅旗人姓琨蒙徹蒙古勒岱呼倫貝爾正藍旗人姓
墨爾迪思

右 國史館本傳

傅良臣 姚應鳳等

傅良臣漢軍鑲黃旗人西安駐防參領乾隆十三年出征金川二十年出征回部得頭等功牌一三十八年隨征金川攻克沙壩山得二等功牌二三十九年三月擊賊邁過爾山梁身冒矢石陣亡同時陣亡者湖南提標右營把總姚應鳳貴州丹江營把總嚴廷玉先是二月賊踞羅博瓦湖廣督標左營千總周誥四川重慶鎮標左營千總張魁四川普安營把總劉宗文貴州清江協左營把總劉正魁奮勇攻擊同歿於陣是月大兵復攻賊於澤思滿四川松潘鎮左營外委韓登甲杜之貴同力戰死五月攻賊於僧格宗四川夔州協右營把總任天奇陣歿十二月攻賊於色格洛貴州

長寨營把總謝晉陣歿先後事 聞議卹良臣 恩廕雲騎尉應
鳳廷玉誥宗文正魁天奇晉俱廕把總餘 賞卹如例良臣子國
勳襲應鳳子寶襲廷玉子以寬襲餘襲無考應鳳湖南武陵人廷
玉貴州安順人誥湖北安陸人宗文四川成都人正魁貴州威甯
人登甲之貴俱四川松潘人天奇四川夔州人晉貴州普甯人張
魁籍無考

右 國史館本傳

楊有鳳 馬國樑等

楊有鳳甘肅西甯人由武進士授湖南常德城守營守備乾隆三十三年升永順協中軍都司三十八年升湖廣提標右營遊擊隨征金川三十九年正月攻絨布寨三月進攻思底奮勇戰歿是時陣亡者甘肅同心城守備馬國樑湖廣提標右營千總劉清湖南長安營千總寇齊輝雲南提標中營千總趙廷蔭四川嘉順營千總劉千雲南東川營把總陳登祥湖南臨武營把總王宗成湖南靖州協外委羅大朋貴州定廣協右營外委王云陝西西鳳營外委趙榮先是擊賊思底者四川建昌鎮中營守備羅國賢貴州銅仁協右營把總吳學聖歿於陣事 聞議卹有鳳 思廕守備子

應春襲國樑廕千總清齊輝廷蔭千登祥宗成俱廕把總國賢廕
千總學聖廕把總餘 賞卹如例國樑子佑襲清子光宗襲齊輝
子仁德襲廷蔭子必顯襲登祥子策襲國賢子得貴襲學聖弟學
龍襲餘襲無考國樑甘肅甯夏人由行伍歷拔甘肅平羅營千總
升本職清湖南武陵人齊輝湖南零陵人廷蔭雲南太和人登祥
雲南東川人宗成湖南宜章人國賢四川松潘人學聖貴州印江
人大朋湖南靖州人云貴州定番人榮陝西鳳翔人千籍無考

右 國史館本傳

楊有鳳西甯武舉乾隆三十二年任永順協都司慷慨有氣節遇
事不阿徇上官意歲延師於武勝宮教營中子弟建城西五里橋

以利行者後擢提標遊擊三十八年調征金川歿於陣永順人建
專祠祀之

右傳李元度撰

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

索柱 福勒等

索柱蒙古正黃旗人姓齊卜楚特乾隆二十年由護軍授藍翎長三十六年隨征緬甸旋調金川三十七年授烏槍護軍校三十八年委署烏槍護軍參領三十九年擢副護軍參領三月大軍攻羅博瓦了口索柱自礮下山坳繞道進取遇賊奮擊得石傷賊復由登古山梁潛襲營盤索柱擊走之六月進攻色湖普索柱偕烏槍護軍參領福勒奮不顧身歿於陣是役也參領克星額護軍參領鐵柱署參領翰登徹署驍騎校二達色富紹領催明柱俱力戰死四川瀘甯營守備五達色受槍傷奉 旨獎賞尋擢湖南辰州協都司四十年三月五達色擊賊於達佳布陣亡先後事 聞議卹

索柱等俱 恩廣雪騎尉五達色鷹衛千總索柱子雙德襲福勒
子雲保襲克星額子富紹襲鐵柱子薩秉阿襲二達色子錫喇納
襲明柱子永強阿襲富紹子多隆額襲五達色子伊凌阿襲翰登
徹子襲無考福勒滿洲正黃旗人姓烏扎拉克星額吉林正白旗
人姓伊拉哩鐵柱滿洲正黃旗人姓他塔喇翰登徹索倫正紅旗
人姓薩木喜爾二達色三姓正黃旗人姓瑚圖哩明柱拉林正黃
旗人姓格爾齊富紹三姓鑲白旗人姓徹葉勒五達色滿洲正黃
旗人姓沙喇圖嚕騰

右 國史館本傳

陶思連 胡朝臣等

陶思連湖北穀城人由行伍拔補湖北襄陽鎮中營把總乾隆三十七年隨征金川功列超等者三三十九年六月進攻色溯普山勢險峻賊築堅礮拒守思連掣紅旗奮勇先登軍士蟻附而上連斫賊目克二礮中槍次日創發死時貴州平越營把總胡朝臣攻第三礮亦首先躍上中槍傷亡將軍阿桂等以 聞 諭曰陶思連胡朝臣以微末員弁俱能奮勉先登撲礮殺賊以致捐軀殊堪憫惜著各賞銀一百兩仍照所請交部議卹是役陣亡者湖北襄陽鎮中營千總盧綜湖南鎮筵鎮前營外委張得勝四川建昌鎮中營外委任朝聘貴州撫標左營外委王元昌攻達爾圖陣亡者

貴州平遠協左營外委張世忠遵義協左營外委張玉魁平越營外委文華四川冕山營外委陳倫攻攬拉陣亡者貴州朗洞營外委戴勳凱里營外委李時庸攻布達什那陣亡者湖北荆門營外委曾從德攻克木什陣亡者四川重慶鎮右營外委王瑄先後事聞議卹俱廕把總朝臣姪長壽襲餘襲無考朝臣貴州安順人綜湖北竹谿人得勝湖北江陵人朝聘四川西昌人元昌貴州南籠人世忠貴州平遠人元昌世忠俱於三十二年以行伍出征緬甸有戰功玉魁貴州遵義人華貴州平越人倫四川越嶲人勳貴州施秉人時庸貴州平越人從德湖北鄖縣人瑄四川彭縣人

右 國史館本傳

楊發育 陳明德等

楊發育漢軍鑲黃旗人乾隆二十九年由候補筆帖式授鑾儀衛整儀尉游升雲麾使尋擢陝西宜君營參將隨征金川三十七年進攻甲爾壘發育率漢土官兵由格爾格堡直趨甲魯賊潰克其礪乘勝進剿南山梁發育身先士卒徑上山頂奪取木柵復克山下石卡三十九年七月副將軍明亮督派弁兵圍攻達爾圖一帶山梁賊佛力抵拒發育力戰死四川靖遠營守備陳明德重慶鎮千總王謚西甯鎮左營把總巴光得陝西提標前營外委崔偉皆死之時後先陣亡者貴州平遠協左營守備羅禮甘肅涼州鎮中營千總吳朝洪雲南提標左營千總王訓昭通鎮中營把總宗燦

美甘肅古城堡外委馬傑提標後營外委徐彪先是三十八年正月副將軍璽昇額攻擊達爾圖大礪甘肅提標中營把總劉見清四川永甯協左營把總黃世貴甘肅廣武營把總陸瀄乾悉歿於陣十月甘肅玉泉營把總王經亦隨攻達爾圖戰亡四十年湖南鎮筵鎮前營把總張文升四川川北鎮中營把總王得升皆擊賊於達爾圖陣亡事 聞議卹發育廕守備子魁寶襲明德廕千總謚光得偉俱廕把總禮廕千總朝洪訓燦美傑彪見清世貴瀄乾經文升得升俱廕把總明德子綸襲光得子如舉襲朝洪子國俊襲見清子喜襲瀄乾子建襲餘襲無考明德四川西昌人謚四川成都人光得甘肅西甯人偉陝西長安人禮湖南邵陽人朝洪甘

肅武威人訓雲南昆明人燦美四川敘州人傑甘肅肅州人彪見
清俱甘肅張掖人世貴四川永甯人溘乾經俱甘肅甯夏人文升
湖南辰州人得升四川華陽人

右 國史館本傳

圖書集成
刑名典

卷四

劉天德 張兆虎等

劉天德貴州威甯人由行伍歷拔四川松潘鎮左營守備隨征金川乾隆三十九年七月擊賊於遜克爾宗奮勇戰歿四十年二月大兵仍擊賊於遜克爾宗湖北衛昌營千總張兆虎湖北撫標左營把總唐文恕甘肅肅州城守營把總王忠貴州上江協右營把總賈文光雲南尋甯營把總段世彩貴州鎮遠鎮左營外委翁紹義俱歿於陣五月陝西提標右營把總劉廷玉湖北荊州城守營把總雷雲甘肅提標中營外委魏廷亦戰歿於遜克爾宗時陣亡舍圍柱卡者貴州鎮遠鎮左營外委黃玉林陣亡下巴木通者貴州鎮遠鎮中營千總王天祿陝西延綏鎮左營把總慕天伏貴州

長寨營把總晏文龍陝西定邊營把總折雄貴州提標左營外委
冉世華先後奏 聞議卹天德 恩廕千總兆虎文恕忠文光世
彩廷玉雲天祿天伏文龍雄俱廕把總餘卹如例天德子明襲文
光弟文魁襲雄子文貴襲餘襲無考兆虎湖北東湖人文恕湖北
江夏人忠甘肅肅州人文光貴州定番人紹義貴州玉屏人廷玉
陝西長安人雲湖北荆門人廷甘肅張掖人玉林貴州鎮遠人天
祿貴州大定人天伏甘肅固原人文龍貴州貴陽人雄陝西榆林
人世華貴州安順人世彩籍無考

右 國史館本傳

汪汝鳳 劉建武等

汪汝鳳雲南恩安人由行伍拔補雲南提標右營把總乾隆三十
八年隨征金川在事奮勉超升守備隸昭通鎮標候補三十九年
七月賊踞凱立葉汝鳳率師兩面夾攻奪取山峰礪卡陣亡是年
湖南提標左營把總劉建武擊賊於羅博瓦陣亡四十年貴州黃
平營把總賽鼎祿甘肅山丹營把總祁成得陝西固原城守營把
總李現德貴州定廣協左營外委陳大謨擊賊於蚌噶俱陣亡四
川重慶鎮右營外委王廷相陝西撫標左營外委劉浚擊賊於布
咱爾尼陣亡貴州遵義協右營千總黃文釗亦於布咱爾呢受傷
歿先是賊犯深嘉卜隨營把總郭連熊久鳳奮力追剿歿於陣又

四川普安營把總張魁擊賊於明郭宗陣亡四川疊溪營外委顧
大佺擊賊於路頂宗陣亡先後事 聞議卹汝鳳 恩廕千總建
武鼎祿成得現德文釗魁俱廕把總餘 賞卹如例汝鳳子銓襲
餘襲無考鼎祿貴州黃平人成得甘肅西甯人現德甘肅甯夏人
大謨青州定番人廷相四川巴縣人文釗四川青神武舉魁四川
成都人大佺四川茂州人建武浚連久鳳籍無考

右 國史館本傳

阿咱納 阿那等

阿咱納四川維州雜谷腦人襲土把總乾隆三十六年派往金川
軍營管領屯兵三十七年攻克巴朗山擢土千總進攻日耳達圍
美美卡各賊寨所至奮勇傷左股及右臂擢土守備又攻資哩路
頂宗明郭宗傷右肘又攻鄂什咱昔嶺周卜濟傷首及背擢土都
司三十八年攻八角礪空卡俱有功三十九年七月攻遜克爾宗
歿於陣是役陣亡者土千總加都司銜阿那土把總加都司銜阿
邦三十七年七月攻北山梁陣亡者土千總加守備銜安皆攻哈
木色陣亡者土把總加千總銜阿斯喇八月攻美美卡陣亡者土
千總加都司銜桑其十月攻猛固寨陣亡者土守備加都司銜楊

在朝徐元琨土千總朗扎什阿朋土兵加把總銜安甲攻明郭宗陣亡者土把總加都司銜嘎山布三十八年三月攻昔嶺陣亡者土千總坤朋三十九年六月攻色溯普陣亡者土把總阿咱拉四十年七月攻科布曲陣亡者守備加都司銜崑蓬先後事 聞並加銜一等 賞卹如例阿咱納弟木爾結襲土千總餘襲無考安皆阿斯喇俱四川草坡寨人桑其大寺寨人楊在朝徐元琨郎扎什俱木坪人阿朋大寺寨人安甲嘎山布俱草坡寨人坤朋九子寨人崑蓬上孟寨人三十九年攻遜克爾宗 賞戴花翎阿那等籍無考

右 國史館本傳

沈齊義 陳枚等

乾隆三十九年八月二十八日夜四鼓陽穀縣黨家店奸民王倫糾眾入壽張城爲亂知縣沈君聞變具衣冠出莅宅外斥曰吾非賊吏爾等劫我何爲賊伏拜曰知公廉我等亦素沐公恩但須及早從順順則生逆則死君駭曰爾等不顧赤族之誅乃欲反耶遂大罵賊謂公不知生死麾其眾曰我等且退令公靜自爲計遂退去君念賊雖退勢必復來卽入內解其印授其從祖叔父瀚及兄子上麟令掘坎埋諸臥內旋復出眾賓親哭挽其臂勸令他逸君怒曰君等鬢髮半斑猶作兒女子語吾舍一死之外更何他往揮其臂疾趨宅外值家人牽馬至請君入省告急君曰若使吾蒙面

見上官乎批其頰而斥之須臾賊復至迫脅再三有涕泣求拜者
一隨役亦爲泣求君大怒拳足交下曰汝官役俱欲從賊耶賊以
兵脅之君毒罵不絕口賊至畏惡不忍聞乃遂攢殺之君素有惠
政雖鄰邑皆感之會前數日聞陽穀有妖人聚眾君遣人四出偵
刺賊懼禍及首劫壽張君遂罹於難事 聞 詔贈中憲大夫加
銜分巡道廕一子遺官 諭祭於家 賜葬烏程縣某所之原君
諱齊義字立人世居烏程之馬要鎮伯兄齊禮始登進士官檢討
君領乾隆九年鄉薦三十一年大選天下舉人分發各省以知縣
用君得山東歷署泗水費齊東四縣三十四年題授泗水歲餘
以疾去三十七年復題授壽張享年五十有八君初往鉅野辦振

稽凡應振之戶書名於冊君慮胥吏作奸振時或易以他冊私有
刪除輒手自登記歷數十里皆然一不假手於人冠有剪辮之獄
民譌言妖人翦人髮辮以咒語攝其魂令移他處錢物人已被翦
者不數日輒卽死君訊無絲毫實悉縱去無所問後他縣獄上皆
獲譴人始服君有識汶上爲入都孔道東門口石橋久圯君撤而
新之南旺蜀山馬踏三湖爲曹渠水櫃隄壞君出資修築工固而
民不擾泗水多閒田而民間畜蠶者少君悉令栽桑飼蠶自此隙
地皆桑繭絲之饒甲他邑擗設書院膏火令諸生得萃處其中時
時入省其課講評不倦一時學使所選錄及膺鄉薦者悉出書院
遠近慕作人之化費有冤獄君特緩其事或以吏議懼之君曰與

其令民以冤死毋甯被劾去官齊東饑民多流食他所後聞振米來歸冊已具不復能增君爲覈其口數悉加振全活萬計壽張南鄙趙王河涇塞三十餘年大雨至水無所洩禾麥皆淹死居民不能爲田多逃去君請募夫開鑿凡三十餘里上引范濮諸水悉達諸五空橋自是南鄙無水患民皆復業學宮明倫堂廢爲墟莽先後更數十令莫一視君爲重建故明藩府私田賦極輕 國朝謂之更名地近奉部議加賦壽張更名地二千四百餘頃先於雍正間歸入籽粒地加賦顧其名目猶存君檢尋舊牘得其原委申請如故民以不擾民久欠倉穀不能償有 詔察其無力者予免君恐胥吏需勒親詣諸鄉覈其饒乏故事歲辦河工稽料及解京黃

蠟分里購買吏緣爲奸利君往他所買解民遂不復知有是累君所至求民利病若其身事自鉅野汶上旋省民老幼婦女攜扶載道相送百里不絕泗水一十四里里各鐫文以誌遺愛殉節後邑民號慟雖婦女皆失聲來祭奠者不絕泗水汶上士民皆遠來哭奠君聽訟用古教化法準情析理動以天性格以至誠在壽張一日方聽事兩造相持慟哭聲震內衙諸賓親竊往窺之蓋邑民有兄弟訟者君用數言開諭遂相與感泣歡好如初祖諱鼎元早世父諱正烏程學生兩世皆以君伯兄貴得 贈封如其兄之官娶陸氏繼張氏子男三懷忠縣學生麟太學生騏尙幼女二一適某學生某一在室者君弟齊信所生君幼撫爲己女十月二十一日

君凶問至女號泣自縊死 詔爲建坊以旌之孫男二裔松君性孝友嘗計偕北上旣治裝會其弟病遂輟行爲畱視湯藥弟卒收其嫠孤撫養之與人交不輕諾已諾必復其爲吏恂恂然凡可以致名聲博進取者一切讓人於利所在畏避如懦夫至其臨大節獨奮然蹈白刃而不懼豈非信道篤而自知明古所稱君子人與黨家店隸陽穀南十一都倫於壽張首亂一時誤指爲壽張民世遂爭以養惡咎君甚者謂奸民爲亂有司以苛政激之賴 天子聖明嘉君守土之義 特加閔恤君之節始獲顯聞於世昔張巡殉節睢陽議者罪其貪人愚其死守孔宗且死儂智高之亂人猶論其在京東時不能自重至爲世所指目所謂好議論不樂成人

之美者豈其自昔爲然與余與君同年鄉舉慕君之節死而又悲其吏蹟聞而弗章會諸孤求墓誌乃按其事狀爲博徵而敷著之庶以傳信於後旣又爲之銘曰

史衰死節貴死其職失守奔亡雖死猶斥矯矯沈君不渝其志赴死如歸莫之能制忠貞未剖讒矢集之曰此擾攘吏實激之賊黨旣俘大僚會鞠雖伊虺豺銜恩有夙剝膚剔肉辭不再更君行彌彰帝閔加旌我次君蹟勒銘茲石石久可磨銘昭無極

右墓誌銘王元啟撰

沈齊義烏程人乾隆甲子舉於鄉丙戌會試下第以知縣揀發山東試用題署泗水謝病去三十七年病痊補壽張攜一子麟赴任

三十九年八月聞王倫逆謀日練民壯欲捕之民壯劉煥倫義塔以告倫倫黨乃以二十八日夜半寇陷縣城齊義聞變蒼黃出慰諭之賊不退請齊義順其教齊義不許賊乃曰官不從卽死請官退思之羣擁齊義入諸友勸其僞從爲後圖齊義艱然出賊黨多胥役又環拜泣請官降齊義叱之賊復擁齊義入恃其子應順天鄉試乃令所親懷印走自整衣冠出大罵賊賊不能堪亂刀刺之以死賊黨李士節舁其篋如寒士歎曰好官好官以紅氈裹其尸置署後事 聞 天子嘉齊義與堂邑知縣陳枚盡臣節合守土義且賊均供年大有縣官不擾民民自作亂能以身殉難得邀殊恩交部照武將陣亡例議卹 贈齊義道銜同陳枚內閣撰

請敕各給祭葬銀百兩蔭一子入監讀書口月期滿照例銓官大學士舒公巡撫楊公至堂邑壽張安民率監司守令臨齊義及枚喪上香三奠酒三拜三歎息而去學博丞尉武弁死事者命道府參遊分祭奠觀者皆感泣陳枚全州人乾隆癸酉舉於鄉壬辰會試下第以知縣揀發山東試用委署聊城繼署堂邑三十九年二月到任八月二十八日王經隆招其黨四百人集張四孤莊縱火殺怨家至壽張迎王倫枚簡丁壯會汛弁楊兆相捕經隆家屬及其黨歸臺妻賊怒甚九月初四日帥眾攻堂邑堂邑城惡兵役僅百數十人不足守枚時已解任奮然曰吾會官茲土義不當謝局外卽帥民夫守東門弟元樑王申武舉亦慷慨執戈隨賊破南門

枚與元樑疾馳禦之元樑手刃數賊賊縛枚及无樑扛赴王倫屯前偪令跪枚不屈且大罵賊先斷枚兩足已斷其兩手又支解元樑弟兄同時死北教場 贈卹如例吳璵福山人居家杜門教讀長吏求一見不可得乾隆三十六年由歲貢選堂邑訓導攜姪文秀僕王忠到官賊入城劫學署見其老置不問璵叱曰我年已七十餘甯偷活汝甯聞從古邪教誰逃死耶蛇詎成龍官兵卽日來誅汝等汝亟去賊怒殺璵及文秀與忠璵 贈國子監學錄並議卹文秀及忠孥又劉希燾長樂人援例選陽穀縣丞分駐阿城鎮乾隆二十三年到任歷奉差委署鄒縣曲阜皆稱職列壬辰卓異正薦引 見回任候升九月初六日奉調赴縣城防守禦賊於東

門外遂被殺後蒙議卹 贈希燾鑾儀衛經歷餘卹如例方光祀
漢川人援例入宛平籍遂授陽穀典史乾隆二十九年到任陽穀
獄在城西南隅去縣署二里許典史署在其傍九月初三日賊入
城光祀率姪義入獄防守賊破監門劫獄囚遂殺光祀及義 贈
光祀府知事義亦邀議卹如吳文秀武弁有幹福滿洲鑲紅旗人
由沙溝營都司升壽張營遊擊九月初三日隨兗鎮追賊被戕陽
穀城下楊兆立滋陽人莘縣汛把總奉調守陽穀城亦見殺其兄
卽兆相爲堂邑汛把總賊入堂邑兆相率兵二十七人守南門與
賊力戰送被害頭腦俱裂後與兆立俱 贈加一級蔭一子以把總
用

皇朝通志卷之三十三

右傳潘相撰

音濟圖 幹福等

音濟圖滿洲鑲黃旗人姓都拉爾由前鋒洊擢二等侍衛乾隆三十
十二年隨征緬甸攻取蠻結蒲卡力戰被傷 賜號哈布泰巴圖
魯擢頭等侍衛加副都統銜三十七年隨征金川三十九年五月
諭曰音濟圖先在雲南軍營屢勉故施恩賞給副都統職銜此次
四川軍營並無格外效力之處著革去副都統職銜仍著在乾清
門二等待衛上行走八月二十八日山東逆匪王倫倡亂擾壽張
沙溝營都司署壽張遊擊事幹福隨兗州鎮總兵惟一往剿九月
初三日至陽穀幹福力戰陣亡初七日賊犯臨清大學士舒赫德
奉 命督師二十二日賊擾河西檄音濟圖帶京兵二百往剿二

十三日至塔灣之賊音濟圖帶東三省善射手自辰至酉三戰殺賊六百餘夜追擊之六十里生擒百餘人奪銅礮一軍械無算賊退踞臨清舊城二十四日大軍進圍之偵知賊首王倫住城中汪姓大宅復派音濟圖帶滿漢兵千二百往擒賊猶糾夥迎敵大兵槍礮齊發賊度不能支踞屋死守遂四面合圍牆壁俱焚圮王倫尙未弋獲二十六日音濟圖復詢知所在帶兵直入屋內擒王倫逆黨突至音濟圖受刀傷倫遂竄去旋自焚 諭曰舒赫德等奏逆匪王倫已被音濟圖擒住復被羣賊搶去實爲可惜音濟圖此次頗屬奮勉著仍賞給頭等侍衛及副都統銜尋傷重卒事 聞奉 旨照副都統傷亡例議卹廕騎都尉子英桂襲幹福滿洲鑲

紅旗人姓西特爾加 贈一級廕衛千總子六十五襲

右 國史館本傳

國朝通志卷之三十三

三

常保 代山青阿等

常保滿洲鑲藍旗人姓薩達哈乾隆二十六年由護軍投護軍校二十九年委署護軍參領三十三年授湖北施南協中軍都司三十七年隨征金川有功三十八年擢竹山營遊擊三十九年正月參贊舒常攻達爾圖各處山梁時冰雪凝山徑險隘難登常保率士兵千潛踰石拉溝奮勇直前擒賊二殲賊二十餘擢武昌城守營參將七月勦舍衛格羅奮勇夾攻賊稍卻復追擊之克其卡殲賊四十餘得 旨褒獎 命遇應升之缺升用九月擊賊於木克什偕藍翎長岱青阿力戰死其對面之格木勻賊修戰礮力拒藍翎長和裕擊之歿於陣先是攻達爾圖時參領烏林泰委署前鋒

參領三官保委署參領佛爾慶額領催福廕保委署七品官墨爾格德空銜藍翎法泰俱以力戰死事 聞議卹常保廕守備子書蘭襲餘襲雲騎尉岱青阿子永福保襲和裕子邁拉遜襲烏林泰子額勒登保襲三官保子明善襲佛爾慶額子墨爾格訥襲福廕保弟埒恩泰襲墨爾格德子納海襲法泰子福爾祐木保襲岱青阿滿洲正黃旗人姓鈕祜祿和裕滿洲正黃旗人姓舒穆祿烏林泰吉林正紅旗人姓雅爾薩喇前征巴里坤得功牌三征金川攻取阿克雅馬柰等處得功牌四三官保滿洲鑲黃旗人姓瓜勒佳佛爾慶額滿洲正藍旗人姓伊爾根覺羅福廕保甯古塔正白旗人姓鈕祜祿由緬甸調征金川奮勉立功 賞戴藍翎墨爾格德索

倫鑲藍旗人姓葉墨勒法泰甯古塔鑲黃旗人姓巴魯特

右 國史館本傳

國朝通志卷一百一十二

三

曹陞 呂勝等

曹陞貴州安順人乾隆三十七年由行伍出征金川三十八年補貴州威甯鎮右營把總升安籠鎮左營千總尋升朗洞營守備三十一年升安籠鎮右營都司是年九月擊賊於布達什挪陣亡同時陣亡者湖南長沙協左營千總呂勝貴州安籠鎮右營千總王安章雲南鶴麗鎮右營千總太澍又是年擊賊於木勻洛陣亡者湖南永順營守備王攀龍貴州定廣協右營外委董成璠擊賊於格隆古陣亡者陝西洮岷協左營千總金世重四川疊溪營外委王朝貴擊賊於格古了口陣亡者湖南鎮筵鎮左營千總傅興國擊賊於喀利陣亡者貴州清江協左營外委陳卓擊賊於空卡陣

亡者陝西延綏鎮中營外委張寅事 聞議卹陞 恩廕千總勝
安章澍俱廕把總攀龍廕千總世重興國俱廕把總餘 賞卹如
例陞子繼善襲安章子應奉襲澍子延勳襲興國子之章襲餘襲
無考勝湖南宜章人安章貴州鎮遠人澍貴州大定人攀龍雲南
鎮雄人成璠貴州定番人世重甘肅固原人朝貴四川松潘人興
國湖北江夏人卓貴州定番人寅陝西榆林人

右 國史館本傳

李成時 程美等

李成時湖北恩施人由行伍累升湖南綏甯營守備乾隆三十八年隨征金川三十九年擊賊於木克什受傷尋歿九月雲南鎮雄營把總程美亦以攻取木克什受傷歿其陣亡於木克什者湖南鎮算鎮前營把總蕭宗信四川泰甯協左營把總買國林先是賊踞石真噶四川提標中營把總唐偉甘肅提標前營外委曹玉亮陝西宜君營外委郭天孝貴州平遠協左營外委姚紹其甘肅西甯鎮前營外委張勳甘肅提標左營外委徐文祿甘肅循化營外委李忠祥同力攻擊奪取礮卡俱陣亡先後事 聞議卹成時恩廕千總美宗信國林偉俱廕把總餘 賞卹如例成時弟成秀

襲國林子玉襲餘襲無考美雲南鎮雄人由行伍拔補本職乾隆三十七年隨征金川進攻甲爾木喇穆喇窠等處賊併力抵禦美身冒矢石奪取礮卡得超等功牌一頭等功牌二宗信湖北恩施人國林四川西昌人偉四川成都人玉亮甘肅張掖人天孝陝西長安人紹其貴州平遠人勳陝西長安人文祿甘肅張掖人忠祥甘肅河州人

右 國史館本傳

國朝耆獻類徵初編卷三百五十四目錄

忠義二十四

敦住 烏爾瑞阿等

噶爾炳阿 烏巴齊等

瑪爾占 英格等

佛遜 官德等

瑯泰 瑪濟等

登色保 巴達子等

余之格 劉魁等

何連陞 李自新等

張瑞英 楊洪等

神保 阿奇納等

科瑪 額爾錦保

佛倫泰 桑吉納等

庫勒德 木克登保等

崔文傑 王家光等

石柱 方士貴等

國興 韓世貴等

達蘭泰 諾亨保等

范宜申 向貴等

楊開成 馬伏等

穆哈納 阿拉里等

沈溶 張顯揚等

王興邦 馬文等

七十八 三星保等

楊遇春 胡思順等

國朝耆獻類徵初編卷三百五十四目錄 忠義二十四目錄 一

薩爾吉岱

寓住布等

曹順

秀林

呼爾棟阿等

常祿保

周文秀

陳文等

穆克登布

蘇福等

巴西薩

普木楚克等

僧保

頁布肯等

國朝耆獻類徵初編卷三百五十四

趙奉大夫前署江西巡撫江西布政使司布政使湘陰李桓輯

忠義二十四

敦住 烏爾瑤阿等

敦住滿洲正黃旗人姓瓜勒佳父馬爾薩任內大臣兼參贊大臣
出師準噶爾陣亡 賞騎都尉又一雲騎尉世職事見本傳敦住
於乾隆元年承襲二十一年授鑾儀衛整儀尉二十二年遷治儀
正二十五年升雲麾使二十七年授河南撫標中營參將三十四
年俸滿來京 特授頭等待衛三十八年派赴金州三十九年委
署福建建甯鎮總兵七月隨副將軍明亮進攻宜喜賊礪林立官

軍冒雨攻撲敦住督戰乘勝將達爾圖俄坡各礮盡克之十一月
進勦日旁敦住由木克什進擊短兵搏戰盡力追戮歿於陣事

聞敦住 詔列前五十功臣圖像紫光閣 御製贊曰披堅破銳

突將無前眾志成城而各力宣威震邛笮拉朽摧枯宜喜已克惜

哉捐軀先是大軍攻取木克什賊力拒副前鋒參領烏爾璫阿死

之是年攻克日旁喀咱普穆當噶等處護軍校富敏藍翎侍衛鄂

羅什呼藍翎長訥墨庫領催委署七品官昌保領催委署筆帖式

博音達爾領催委署七品官巴善保藍翎長富倫保俱後先陣亡

議卹如例敦住廕雲騎尉併前世職為三等輕車都尉子格綳額

襲餘俱廕雲騎尉烏爾璫阿子瑚圖靈阿襲富敏子阿明阿襲昌

保子烏雲保襲巴善保弟巴善太襲餘襲無考烏爾璫阿蒙古鑲黃旗人姓吉爾們富敏滿洲鑲白旗人姓瓜勒佳鄂羅什呼訥墨庫俱滿洲正白旗人姓厄魯特昌保伊通鑲黃旗人姓伯爾卓克博音達爾呼倫貝爾鑲紅旗人姓察哈爾巴善保蒙古鑲黃旗人姓布魯富倫保滿洲正白旗人姓納喇

右 國史館本傳

噶爾炳阿 烏巴齊等

噶爾炳阿滿洲鑲白旗人姓富察乾隆三十八年由藍翎護軍隨征金川有戰功升護軍校三十九年委署護軍參領是年十二月大軍由密拉噶拉木進偪康薩爾賊併力守禦移師遜克爾宗前後夾擊賊槍石齊下噶爾炳阿力戰死時騎都尉委署參領烏巴齊委署閒散章京和盛保防禦赫陞保委署驍騎校德明阿皆死之先是九月領催委署驍騎校巴爾呼前鋒委署驍騎校巴彥布烏槍護軍校烏爾袞泰領催委署官瑚什隨將軍阿桂分攻遜克爾宗衝勦賊眾並克護日爾巴當噶附近碉卡悉歿於陣事聞議卹噶爾炳阿等俱廕雲騎尉噶爾炳阿子博爾中武襲赫陞保

子色布精額襲巴爾呼子存住襲巴彥布子庫克精額襲餘襲無
考烏巴齊呼倫貝爾鑲白旗人姓永舍布赫陞保吉林正白旗人
姓鄂羅巴爾呼拉林鑲黃旗人姓博爾濟巴彥布甯古塔鑲藍旗
人姓巴雅喇烏爾袞泰滿洲正藍旗人姓兆佳餘無考赫陞保於
乾隆二十一年出征巴里坤得功牌七三十八年隨征金川偕巴
爾呼進攻阿喀木雅美美卡色湖普等處皆有功巴彥布烏爾袞
泰俱以前征緬甸攻克新街老官屯各給功牌調征金川巴彥布
隨攻得里日寨有功列超等

右 國史館本傳

瑪爾占 英格等

瑪爾占察哈爾正白旗人姓巴爾汗由準噶爾投效聞散授乾清門藍翎侍衛乾隆二十四年隨征葉爾羌有戰功三十七年擢三等侍衛尋派赴金川三十八年隨攻日旁因山路崎嶇馬蹶墜傷自請效力軍營副將軍豐昇額以 聞 諭曰瑪爾占山行馬倒受傷甚重尙以仍來軍營效力爲請其感戴朕恩悃誠可念著加恩授爲二等侍衛如調養可愈仍令前往軍營以遂其願三十九年正月進剿凱立葉直撲賊碉乘勝抵迪噶拉穆扎督兵力戰斃賊多名 上嘉其奮勇投頭等侍衛 賞拉布巴爾巴圖魯名號授領隊大臣三月逾凱立葉奪取第三峯殲賊三十餘七月攻克

該布達什諾木城至色湖普前礮奮勇攻撲賊潰瑪爾占受傷

諭曰頭等侍衛拉布巴爾巴圖魯瑪爾占自抵軍營久經出力此次又奮勇得傷著加恩賞給副都統銜十二月進攻康薩爾大礮木城賊併力衝突瑪爾占力戰歿於陣是役也參領英格委署閒散章京老格防禦觀泰烏槍護軍校慶安委署驍騎校德明德隆特太前鋒海福俱陣亡委署參領烏爾青額力戰受傷尋歿事

聞議卹瑪爾占 詔列後五十功臣圖像紫光閣 命儒臣擬贊

恩廕騎都尉子達蘭泰襲英格等俱廕雲騎尉英格子尼瑪善襲觀泰子博貝襲慶安子祥福襲德明子英額爾泰襲德隆子扎延泰襲海福子額爾德尼襲烏爾青額子五雲泰襲餘襲無考英格

吉林正藍旗人姓巴哩老格黑龍江正黃旗人姓鄂羅觀泰甯古
塔正藍旗人姓烏蘇慶安滿洲鑲黃旗人姓富察德明索倫鑲紅
旗人姓納喇德隆甯古塔鑲藍旗人姓喀爾拉特太黑龍江正藍
旗人姓徹默特海福滿洲鑲黃旗人姓畢嚕烏爾青額吉林鑲白
旗人姓博赫里

右 國史館本傳

佛遜 官德等

佛遜滿洲鑲紅旗人姓覺爾禪乾隆十六年由騎都尉世職授副護軍參領二十三年升前鋒侍衛二十五年擢前鋒參領三十五年授甘肅永昌協副將三十七年六月率陝甘兵征金川十月大軍由咱瑪攻克木了山梁佛遜督兵防卡得 旨優獎三十八年以疎防逃兵部議降二級調用暫停開缺三十九年正月副將軍豐昇額進攻卓克采派佛遜防守附近拉覺溝納雲達等處四月復派防孟拜拉薩爾赤鄂羅後路時卓克采糧站失餉山西巡撫兼理軍營糧務鄂寶奏參佛遜擅撤護糧弁兵以致失事 命部嚴加議處嗣將軍阿桂查佛遜所撤弁兵係奉文調赴谷噶且該

員在營素尙得力奏請免議得 旨俞允四十年擊賊於遜克爾宗中礮亡時後先陣亡者烏槍護軍校官德委署護軍校錫蘭泰健銳營前鋒翎長富森太委署筆帖式舒龍阿委署七品官布延圖呼實藍翎長七十三事 聞議卹佛遜照遊擊例廕守備官德等俱廕雲騎尉佛遜子蘇爾通阿襲官德子舒昌阿襲富森泰子郭仁布襲七十三子尙阿布襲餘襲無考官德滿洲正藍旗人姓馬佳錫蘭泰滿洲正藍旗人姓瓜勒佳富森太滿洲鑲紅旗人姓他塔喇舒龍阿齊齊哈爾鑲黃旗人姓尼瑪齊布延圖呼倫貝爾正藍旗人姓烏納特呼實齊齊哈爾正藍旗人姓瓜勒佳七十三滿洲正紅旗人姓瓜勒佳

右 國史館本傳

國史館本傳

八

同治庚午年八月十五日

十

瑯泰 瑪濟等

瑯泰滿洲鑲藍旗人姓他塔喇乾隆三十年由烏槍護軍投護軍校三十五年署烏槍護軍參領三十七年授副烏槍護軍參領隨征金川四十年二月隨副將軍豐昇額由遜克爾宗進剿賊死力抗拒瑯泰臂受槍傷越日亡同時陣亡者驍騎校委署防禦瑪濟領催委署驍騎校那思圖三月由勒吉爾博攻克達佳布俺吉兩寨鐵賊二百餘毀其碉驍騎校委署參領圖布楞車領催委署驍騎校達爾呼勒岱藍翎哈布青阿委署筆帖式書隆阿悉歿於陣先是正月將軍阿桂督遜克爾宗兵進剿勒吉爾博碉寨佐領伊爾賽直前攻撲傷亡烏槍護軍校委署章京邁拉遜空銜藍翎達

蘭泰皆陣亡事 聞議卹瑋泰等俱廕雲騎尉瑋泰子富甯阿襲
達爾呼勒岱子阿蘭太襲哈布青阿子惠哈納襲邁拉遜子永福
襲達蘭泰弟畢科襲餘襲無考瑤濟索倫正紅旗人姓溫都征金
川得功牌四 賞沙布得克巴圖魯號戴孔雀翎圖布楞車呼倫
貝爾正紅旗人姓達布圖前出征準噶爾緬甸皆有功達爾呼勒
岱吉林蒙古鑲黃旗人姓布爾哈齊哈布青阿甯古塔正黃旗人
姓珠爾格特俱於進攻阿喀木雅美諾色泐普等處奮勉立功列
超等得功牌邁拉遜滿洲正藍旗人姓舒穆祿乾隆二十七年由
護軍派戍伊犁三十三年隨征緬甸歷攻猛麻老官屯得功牌三
達蘭泰吉林鑲紅旗人姓烏蘇餘籍無考

右 國史館本傳

國史館本傳 卷一百一十四 四

登色保 巴達子等

登色保滿洲鑲紅旗人姓郭佳乾隆三十七年六月由前鋒校奉旨發往金川南路軍營交將軍阿桂調遣十一月攻克甲爾木山梁奮勇殲賊 賞戴花翎授前鋒侍衛尋擢前鋒參領三十九年三月領隊大臣奎林進勦斯第克平寨賊悉眾來援鏖圍官軍登色保奮前衝擊偕侍衛珠爾格德併力抵禦賊卻拔圍出四十年二月攻取琅谷力戰死十月前鋒參領巴達子亦擊賊於琅谷傷亡是年委署參領錫爾扣前鋒校兆珠富里善烏槍護軍校喜德戰歿於甲索委署驍騎校墨呼藍翎前鋒烏善保戰歿於碾占委署驍騎校納斯圖副前鋒校恩特赫默戰歿於促浸河事 聞讓

卹俱廕雲騎尉登色保子墨爾根襲巴達子子瑪奇泰襲兆珠子
 明海襲富里善子綳僧額襲喜德子保明襲墨呼子岱音保襲烏
 善保子烏爾星額襲納斯圖子額騰義襲恩特赫默子納明襲錫
 爾扣襲無考巴達子察哈爾鑲黃旗人姓拜布拉克錫爾扣呼倫
 貝爾鑲藍旗人姓瑚伯兆珠滿洲鑲黃旗人姓闕富里善滿洲正
 黃旗人姓瓜勒佳喜德滿洲正藍旗人姓瓜勒佳墨呼吉林鑲黃
 旗人姓奇塔爾烏善保伯都納鑲紅旗人姓哈蘇理納斯圖吉林
 鑲藍旗人姓巴納特恩特赫默蒙古正紅旗人姓鄂吉

右 國史館本傳

余之格 劉魁等

余之格廣西雒容人乾隆十三年武進士以衛守備用二十七年
援例改捐營守備分發廣東試用三十一年選補雲南城守營守
備三十七年隨征金川以功升廣東廣羅協中軍都司尋擢雲南
昭通鎮右營遊擊屢立戰功列超等者五四十年二月升四川漳
臘營參將擊賊於喇穆喇穆力戰歿於陣七月大兵進勦得爾烏
雲南臨元鎮右營守備劉魁戰歿復攻札烏古雲南提標中營把
總羅邦甯戰歿九月陝西西鳳營把總王原四川重慶鎮左營把
總岳虎四川冕山營外委周紹文均於札烏古戰歿是年陣亡於
噶爾丹寺者貴州古州鎮右營把總李光宗陝甘督標左營外委

石茂陣亡於郪谷者四川赤水營把總馬見甘肅廣武營把總馬
登魁先後事 聞議卹之格 恩廕守備魁廕千總邦甯原虎光
宗見登魁俱廕把總餘 賞卹如例之格子燾襲虎子陞貴襲登
魁子忠襲餘襲無考魁四川松潘人由行伍歷升本職前攻緘布
寨記超等功邦甯四川江油人前攻石真噶礪以功 賞戴藍翎
原陝西鳳翔人虎四川忠州人紹文四川松潘人光宗貴州遵義
人茂甘肅臯蘭人見四川華陽人登魁甘肅河州人

右 國史館本傳

何連陞 李自新等

何連陞貴州南籠人由行伍拔補安籠鎮右營外委乾隆三十七年隨征金川三十八年投安南營把總三十九年升安籠鎮右營千總署古州鎮左營守備四十年升黔安協左營都司三月大軍攻取邁過爾連陞力戰受傷尋歿十二月將軍阿桂督師攻克科布曲遂進取索隆古賊恃險力抵貴州安籠鎮右營守備李自新奮勇擊賊直上山梁歿於陣走是賊據巴札木副將軍明亮督兵進勦克其碉貴州上江協右營千總高應貴死之湖北均房營把總劉仲亦擊賊於札木斯當安陣亡時將軍阿桂復從舍圖柱卡繞截圍攻各路賊眾併力迎拒貴州鎮遠鎮左營外委黃玉林貴

州黃平營外委王正信戰歿副將軍明亮亦由石真噶攻克沙爾
尼溝四川越嶲營外委魯澤溥奮力撲礮被害先後事 聞議
卹連陞自新俱 恩廕千總應貴仲俱廕把總餘卹如例連陞弟
連興襲應貴子登雲襲餘襲無考自新貴州咸甯人乾隆三十二
年由行伍出征緬甸有功三十六年調征金川拔補貴州咸甯鎮
右營外委洵升本職應貴貴州安順人仲湖北興山人玉林正信
俱貴州鎮遠人澤溥四川冕甯人

右 國史館本傳

張瑞英 楊洪等

張瑞英貴州威甯人乾隆三十二年由行伍隨征緬甸三十三年拔補貴州撫標右營把總三十四年升鎮遠鎮左營千總三十八年隨征金川三十九年升大定協右營守備四十年三月擊賊於空薩爾身受重傷越日傷發歿先是三十九年七月雲南開化鎮左營都司楊洪亦於空薩爾擊賊受傷歿是年十二月陣亡於空薩爾者甘肅提標左營把總馬守倉甘肅西甯鎮前營外委王明永固協左營外委夏文舉甘肅興武營外委張積功貴州大定協左營外委郝秀陳克新貴州威甯鎮右營外委陳攀桂貴州銅仁協右營外委胡之高貴州鎮遠鎮左營把總許士洪四十年正月

陣亡於空薩爾者陝西延綏鎮右營把總屈必成貴州朗洞營把
總陳章湖南鎮筵鎮左營千總張登科甘肅甯夏鎮中營千總李
殿雄是年七月陣亡於空薩爾者湖南督標中營千總李興邦事
聞議卹瑞英洪 恩廕千總守倉士洪必成章登科殿雄興邦廕
把總餘卹如例守倉子奉詔襲必成子邦彥襲餘襲無考洪雲南
楚雄人守倉甘肅鞏昌人明甘肅河州人文舉甘肅張掖人積功
甘肅羅平人秀貴州南籠人克新貴州黔西人攀桂貴州大定人
之高貴州銅仁人士洪貴州清平人必成甘肅甘州人章貴州黎
平人登科湖南武陵人殿雄甘肅甯夏人興邦湖北江夏人

右 國史館本傳

神保 阿奇納等

神保滿洲正白旗人姓瓜勒佳乾隆二十年由健銳營前鋒出征伊犁得頭等功牌三尋升副前鋒校二十四年隨征回部屢立戰功三十年復征烏什敘功列超等遷前鋒校三十二年隨征緬甸以奮勇擊賊委署前鋒參領尋授陝西臨洮營都司擢黃浦營遊擊三十八年調征金川以力戰得超等功牌五升湖北興國營參將四十年四月副將軍明亮督師攻達爾圖神保率眾追擊受重傷尋歿是年委署參領阿奇納擊賊於木雅山死之委署副參領常祿隨攻噶西喇嘛寺受槍傷亡防禦僧西保戰歿於雅克木雅領催委署驍騎校德保戰歿於下巴木通健銳營前鋒校達崇阿

戰歿於達佳布前鋒委署七品官音德戰歿於喀咱先後事
議卹神保 恩廕守備阿奇納等俱廕雲騎尉神保子奇成額襲
常祿子烏靈阿襲僧西保子噶林保襲德保子烏敦保襲達崇阿
弟賽崇阿襲音德弟錦德襲阿奇納襲無考阿奇納蒙古正紅旗
人姓博爾濟常祿滿洲鑲白旗人姓索綽絡僧西保吉林鑲藍旗
人姓他塔喇德保甯古塔正紅旗人姓墨爾迪勒達崇阿滿洲正
黃旗人姓呼色哩音德蒙古正紅旗人姓達延

右 國史館本傳

科瑪 額爾錦保

科瑪滿洲正黃旗人姓敖拉乾隆三十七年六月由三等侍衛差往四川南路軍營隨將軍阿桂征金川十一月大軍攻克邦甲山梁科瑪自翁克爾壑力戰至美諾連奪碉寨十二月 賞納親巴圖魯名號三十八年五月攻當噶爾拉山梁科瑪率所屬用刀斧斫斷木欄直至碉下毀石牆衝入焚賊渠一餘賊擒戮無算奉諭擢二等侍衛十月隨大軍克復美諾十一月攻克拉約三十九年正月帶兵六百截取卡卡角二月繞過卡卡角山後奮力仰攻殲賊甚多三月副將軍明亮分兵攻斯第科瑪以兵三百繞至西山岡破賊碉二七月分攻達爾圖第六碉克之十月擢頭等侍衛

旋授領隊大臣十一月帶兵六百攻谷爾提生擒賊番索爾甲木
達爾甲等又帶兵攻沙壩山直抵色格落喀爾提擲火彈燒賊寨
二百餘 諭曰明亮奏攻取沙壩山寨落科瑪甚爲出力著加恩
賞給副都統銜四十年四月分攻得楞大礮遂由得楞力戰至基
木斯丹當噶陣歿署七品官額爾錦保從之死 諭曰明亮奏副
都統銜科瑪攻取基木斯丹當噶時殺賊深入身受槍傷陣亡科
瑪自到四川軍營以來每次打仗盡力奮勉此次殺賊勇往直入
以致殞命甚屬可憫著交部照例議卹 命圖形紫光閣列前五
十功臣中 御製贊曰堂堂之陣亦藉出奇潛行僻路附葛蹕嶺
直越峯頂火攻石礮破二百寨色格功高部議上 賜祭葬如例

廕騎都尉子阿林保襲額爾錦保廕雲騎尉子五十九襲甯古塔
正紅旗人姓喀勒佳

右 國史館本傳

廣東省立第一師範學校

VI

佛倫泰 桑吉納等

佛倫泰滿洲正白旗人姓庫雅拉乾隆二十九年由拜唐阿授藍
翎侍衛三十三年遷三等待衛三十六年五月隨將軍溫福征緬
甸十月調征金川十二月隨大軍攻克巴朗拉 賞扎勒丹巴圖
魯名號三十七年二月攻資哩佛倫泰衝入大石卡殲賊四十餘
生擒十二三月隨大軍攻破資哩四月帶兵五百克取咱贊及溝
東諸寨五月伏兵東瑪寨堵剿斯滿美美卡等處賊六月攻美美
卡佛倫泰自西山上直抵卡前多斬獲七月遷二等待衛九月隨
攻路頂宗十二月隨攻底木達三十八年二月分攻達爾圖帶兵
由大礮東面進殺傷甚多三月復攻達爾圖斫斷木柵衝入賊礮

上嘉其奮勉閏三月由北路進攻日旁四月於日旁之密林遇伏賊勦敗之三十九年隨將軍豐昇額攻凱立葉二月伐迪噶拉穆扎山木植擢頭等侍衛九月攻遜克爾宗兩目受石傷四十年正月攻康薩爾克其礪奉 諭加副都統銜旋授領隊大臣二月攻勒吉爾博山梁三月攻羣尼木思工噶克等處多戰功四月大軍勦基木斯丹當噶佛倫泰由薩克薩谷進至榮噶爾博奮勇攻擊與驍騎校署參領桑吉納佐領兼雲騎尉阿拉海領催署章京伊保署驍騎校音德赫堪太阿密屯善泰巴雅斯呼隆同時陣亡 諭曰副都統銜佛倫泰攻取榮噶爾博山梁第八大礪直抵礪下受鳥槍傷陣亡甚屬可憫著交部照例議卹 命圖形紫光閣列

前五十功臣中 御製贊曰功成一將那保無虞爭前恥後舊風
未渝當噶之戰直進身殞使我心惻優卹惟允部議上 賜祭葬
如例廕騎都尉子鈕鈕襲桑吉納等俱廕雲騎尉桑吉納子佟保
襲伊保子圖欽布襲善泰子德星布襲巴雅斯呼隆子德克精額
襲餘襲無考桑吉納吉林鑲黃旗人姓薩哈爾阿拉海索倫正黃
旗人姓鄂羅伊保甯古塔正黃旗人姓格爾齊音德赫蒙古正白
旗人姓克埒特堪太吉林鑲藍旗人姓納喇阿密屯呼倫貝爾正
黃旗人姓達布圖善泰甯古塔鑲藍旗人姓索齊爾巴雅斯呼隆
吉林鑲紅旗人姓布魯特

右 國史館本傳

庫勒德 木克登保等

庫勒德滿洲正藍旗人姓沃埒乾隆三十七年由藍翎侍衛隨將軍溫福征金川三十八年五月隨攻昔嶺及達扎克角木柵授三等侍衛旋擢二等侍衛三十九年九月攻遜克爾宗受槍傷十月將軍阿桂督兵攻克默格爾山梁庫勒德奮勇出力 賞朗親巴圖魯名號四十年正月攻克康薩爾受石傷四月復隨大軍攻遜克爾宗又攻木思工噶克陣亡奉 諭圖形紫光閣列次五十功臣中 命儒臣擬贊 賜祭葬鷹雲騎尉弟圖倫保襲與庫勒德同死木思工噶克者委署驍騎校木克登保六十七在遜克爾宗死者前鋒校濟住護軍校雷敬署驍騎校伊特赫勒前鋒藍翎長

烏彌泰藍翎長官泰議卹俱陰雲騎尉濟住子福克旌阿襲留毅
子威赫諾襲烏彌泰子恆善襲官泰弟齊隆阿襲餘襲無考木克
登保滿洲鑲紅旗人六十七齊齊哈爾正藍旗人俱姓烏扎拉濟
住滿洲正紅旗人姓伊爾根覺羅留毅滿洲鑲紅旗人姓瓜勒佳
伊特赫勒呼倫貝爾正白旗人姓奎車里克烏彌泰蒙古鑲白旗
人姓巴爾噶沁官泰滿洲正紅旗人姓伊爾根覺羅

右 國史館本傳

崔文傑 王家光等

崔文傑陝西華州人由行武拔補四川阜和營把總乾隆三十六年隨征金川升本營千總尋授本營守備三十七年十一月攻西山頂石卡拔之進據得里日寨各碉寨復自邦甲山頂繞出賊後奪取石卡十二月克拉咱寨擢雜州協營都司三十八年閏三月攻當噶爾拉山梁殲賊二十餘六月由色木則後山潛撲賊卡潰其眾升阜和營遊擊三十九年七月乘雨攻拔俄坡格魯克古賊碉九月攻木克什受槍傷四十年四月進剿當噶歿於陣同時陣亡者湖南永綏協左營千總王家光攻勒吉爾博陣亡者雲南昭通鎮左營遊擊寇建尉貴州安籠鎮守備左明德銅仁協左營外

委劉起龍四川梁萬營外委王振國攻木斯工噶陣亡者甘肅甯
夏鎮左營守備馬進忠攻得楞陣亡者甘肅裴家營把總雷喜雲
南昭通鎮中營把總石連城事 聞議卹文傑建尉俱廕守備明
德進忠俱廕千總餘俱廕把總文傑子天祿襲建尉子登墀襲明
德子貴襲進忠子旺襲餘襲無考家光湖南永州人建尉甘肅甯
夏武舉明德貴州貴陽人起龍貴州人振國四川松潘人進忠甘
肅西甯人喜甘肅靖遠人連城雲南恩安人

右 國史館本傳

石柱 方士貴等

石柱甘肅武威人乾隆三十五年由行伍拔補甘肅涼州鎮前營把總三十七年投蔡旗堡千總隨征金川尋升洪廣營守備四十年擢陝甘督標中營都司是年四月大軍攻取榮噶爾博山梁大碉賊併力抵禦槍石如雨石柱奮勇爭先直抵碉下力戰殲賊歿於陣雲南大理城守營千總方士貴同時陣亡五月賊仍踞榮噶爾博貴州提標左營把總張得功四川普安營把總楊連通貴州長寨營把總朱士貴甘肅金塔寺協左營外委王國甫貴州長壩營外委萬星明俱力戰死之七月甘肅提標後營外委杜斌林甘肅靖遠協左營外委白玉璽亦於榮噶爾博陣亡事 聞議卹柱

恩廕千總方士貴得功連通朱士貴俱廕把總餘卹如例襲俱無
考方士貴雲南鎮雄人由行伍隨征金川拔補雲南提標中營外
委尋以攻克格魯瓦覺力戰殲賊得頭等功 賞銀牌擢升本職
得功貴州安順人連通四川松潘人朱士貴貴州威甯人國甫甘
肅肅州人星明貴州貴陽人斌林甘肅張掖人玉璽甘肅洮州人
皆由行伍拔補本職

右 國史館本傳

國興 韓世貴等

國興貴州大定人乾隆三十二年由行伍隨征緬甸三十三年補水城營外委尋授平遠協左營把總三十五年遷大定協左營千總三十六年隨威甯鎮總兵王萬邦征金川十二月大軍攻克巴朗拉將軍溫福奏貴州綠營員弁出力奉 諭國興著賞戴藍翎三十七年正月參贊大臣五岱攻資哩之北山頂檄興帶勁兵爲前隊遇賊擊走之四月隨攻墨壘溝甲爾木摧雲南永北營守備五月攻東瑪大礮官兵設木卡拒賊興帶兵三百守卡賊眾乘夜來犯興滅火待之賊近卡槍礮齊發賊大敗殲擒無算 諭曰國興靜侯賊番來犯猝起勦擊殲戮多人出力奮勉著賞換花翎旋

擢貴州黔西協左營都司三十八年擢荔波營遊擊三十九年十月將軍阿桂督兵攻勒烏圍凱立葉諸寨興屢樹戰功四十年正月擢朗洞營參將 賞圖多布巴圖魯名號四月會攻木思工噶克興用斧斫開木城率眾擁入勦殺甚多克其碉奉 諭國興著加一等卽行升用賊悉眾來奪木思工噶克碉興督兵射賊賊散而復聚者七俱經官兵勦退國興負重傷越日尋歿 諭圖形紫光閣列次五十功臣中 命儒臣擬贊 賜祭葬加 贈二級廕守備弟璉襲是役同死者四川重慶鎮標中營守備韓世貴貴州平越營把總王全鎮遠鎮標中營把總王彪古州鎮標左營外委袁成遠都勻協外委徐成貴文玉美周連甘肅涼州鎮標前營外委

張全玉四川疊溪營外委朱國相議卹各如例世貴加 贈一級
廕千總全彪俱加 贈一級廕把總襲俱無考世貴四川松潘人
全貴州遵義人彪貴州安順人成遠籍無考成貴貴州普定人玉
美連俱貴州都勻人全玉甘肅武威人國相四川茂州人

右 國史館本傳

國朝書目考卷之三

三

達蘭泰 諾亨保等

達蘭泰滿洲鑲藍旗人姓薩克達乾隆三十四年由護軍隨征緬甸擊賊於新街老官屯拔柵轉戰敘功列超等得頭等功牌一三十七年二月命選年壯得力營弁赴金川達蘭泰與焉五月隨勦明郭宗以功授親軍校三十八年攻克昔嶺並奪獲達札克角水泉授藍翎侍衛三十九年將軍阿桂偕參贊海蘭察攻羅博瓦山峯突有賊二百餘來援達蘭泰迎擊殲賊三十餘賊潰旋帶兵繞至了口下痛勦賊眾上據山峯奏入 上嘉之賞額依巴爾巴圖魯號授三等待衛尋擢二等待衛四十年正月分攻甲爾納來珠寨有賊繞官兵後自山梁下達蘭泰豫設伏奮擊箭斃多賊餘

負傷遁五月擊賊於達撒谷賊力拒達蘭泰被數創傷亡事聞命列前五十功臣繪像紫光閣御製贊曰或仰而攻或俯而壓仰以鷹抄俯如馬蹋么膺迹遁鬼蜮魂消追奔逐北處處功高廕雲騎尉子永福襲是役陣亡者護軍參領諾亨保副烏槍護軍參領常通錦州佐領托津七品官錫喇納均議卹如例廕雲騎尉諾亨保子阿克棟阿襲常通子泰興阿襲錫喇納子多倫襲托津襲無考諾亨保滿洲正黃旗人姓敖拉常通滿洲正白旗人姓索穆克奇托津滿洲正藍旗人姓巴爾錫喇納吉林鑲白旗人姓瑚爾哈喇

右 國史館本傳

范宜申 向貴等

范宜申漢軍鑲黃旗人乾隆三十年由閒散授鑾儀衛整儀尉尋升湖南撫標中軍守備隨征金川攻克當噶赤耳斯丹等處功列超等擢湖南撫標右營都司旋升湖廣提標遊擊四十年五月進攻宜喜宜申奮勇擊賊 賞戴孔雀翎六月副將軍明亮帥師攻取額爾替宜申身冒槍石踊躍直前歿於陣是役同時陣亡者甘肅提標前營千總向貴貴州永城營外委郭廷相甘肅興武營外委孫俊英甘肅西甯鎮前營外委姚希秀是月攻緘布寨陣亡者四川敘馬營把總張國材陳敬修四川阜和營外委劉應照其攻巴占礪陣亡者陝西定邊營把總祁伏甘肅平羅營把總鄒孟華

甘肅涼州鎮右營把總周玉事 聞議卹宜申廕守備貴國材敬
修伏孟華玉俱廕把總餘卹如例宜申子廣和襲貴子甯周襲伏
子承榮襲孟華子捷襲餘襲無考貴甘肅張掖人國材四川南充
人敬修四川中江人伏甘肅蘭州人孟華甘肅平羅人玉甘肅武
威人廷相貴州大定人俊英甘肅甯夏人希秀甘肅西甯人應照
四川華陽人

右 國史館本傳

楊開成 馬伏等

楊開成四川達州人由行伍累升四川松潘鎮右營千總乾隆四十年升會鹽營守備隨征金川是年七月擊賊於勒烏圍陣亡同時陣亡者陝西漢鳳營千總馬伏趙連登四川永甯協右營千總馬漢鳳陝西洮岷協左營把總祁燧甘肅金塔寺協把總張進朝甘肅涼州鎮左營把總孫儒雲南開化鎮把總譚洪勳甘肅玉泉營把總李玉雲南楚雄營把總馬芳貴州提標左營外委張卓貴州長寨營外委楊大本甘肅提標右營外委海玉柱甘肅西甯鎮右營外委沙兆慶馬得林甘肅古城堡外委韓友福事 聞議卹開成 恩廕千總伏連登漢鳳燧儒洪勳玉芳俱廕把總餘卹如

例開成弟開貴襲連登子欽襲漢鳳子定元襲餘襲無考伏甘肅
涼州人乾隆二十三年由行伍出征西路二十九年拔補陝西提
標前營外委三十五年補本營把總三十八年升本職連登甘肅
涼州人漢鳳四川松潘人燧陝西固原人進朝甘肅肅州人儒甘
肅武威人洪勳雲南開化人玉甘肅甯夏人芳雲南楚雄人卓貴
州安順人大本貴州貴陽人玉柱甘肅張掖人兆慶得林友福俱
甘肅西甯人

右 國史館本傳

穆哈納 阿拉里等

穆哈納滿洲鑲紅旗人姓瓜勒佳乾隆三十七年由護軍校空銜
藍翎隨征金川十九年攻克默格山梁及凱立葉等處礮寨敘功
授三等侍衛四十年四月進勦木思工噶克了口穆哈納奮勇直
前奪其礮賊潰將軍阿桂以 聞得 旨穆哈納著加一等升用
五月進偪巴木通賊悉力抗拒時濃霧四塞穆哈納督率弁兵分
路截擊斃賊五十餘又殲伏賊於深箐中盡克其礮卡得功牌十
八 賞巴爾丹巴圖魯名號八月擊賊於勒烏圍力戰死事 聞
議卹奉 旨繪像紫光閣列後五十功臣 命儒臣擬贊 恩廕
雲騎尉子富盛襲同時陣亡者委署翼長阿拉里領催沙爾呼達

領催委署閒散章京阿林保佐領委署參領森保獎賞藍翎披甲
額勒登保藍翎前鋒巴雅爾前鋒富明德烏槍護軍伊明阿富海
領催白林查巴愛均議卹如例廕雲騎尉阿拉里子愛隆阿襲阿
林保子色克精額襲額勒登保子克星額襲巴雅爾子內勒庫襲
沙爾呼達等子襲無考阿拉里滿洲正紅旗人姓伊爾根覺羅沙
爾呼達滿洲正白旗人姓瓜勒佳阿林保吉林正紅旗人姓穆達
齊森保齊齊哈爾正黃旗人姓沃色額勒登保吉林正紅旗人姓
巴約特巴雅爾吉林正紅旗人姓巴林餘籍姓無考

右 國史館本傳

沈溶 張顯揚等

沈溶四川安縣人由武舉補授貴州威甯鎮標右營千總乾隆三十
十八年擢荔波營守備三十九年升湖北蘄州營都司隨征金川
力戰共四十五次得頭等功牌二升襄陽鎮右營遊擊四十年八
月大軍攻取蚌噶碉卡溶爭先擊賊受重傷尋歿是月雲南曲尋
協中軍都司張顯揚雲南昭通鎮中營把總李如迎亦以隨攻蚌
噶歿於陣十二月進剿格隆古賊併力抵禦湖南綏甯營千總蕭
尙文偕甘肅西甯鎮中營把總馬順力戰死之先後事 聞奉
旨議卹溶 恩廕守備顯揚廕千總如迎尙文順俱廕把總溶子
文同襲餘襲無考顯揚雲南甯甯人由行伍升貴州提標中營把

總三十九年拔補昭通鎮左營千總升左軍守備旋擢本職如迎雲南昭通人由行伍隨征金川攻取沙壩山邁過爾山梁奮勇撲礮拔補本職尙文湖南新田人由行伍隨征金川進攻美諾得頭等功牌一又進攻當噶拉受刀傷拔補湖南鎮筭鎮左營外委又進攻喇穆喇穆及布達什那色湖普日耳等處皆有戰功洊擢本職順甘肅西甯人

右 國史館本傳

王興邦 馬文等

王興邦四川西昌人由行伍累升四川永甯協左營千總乾隆三十
十九年隨征金川以功升越巂營守備四十年九月進勦烏岳興
邦奮勇擊賊歿於陣十一月攻取碾占甘肅提標中營千總馬文
雲南鶴麗鎮把總陳應俊湖南鎮筵鎮右營把總唐元倫湖北鄖
陽鎮協標右營把總賈文魁雲南昭通鎮右營把總全先發甘肅
提標後營外委王殿魁皆力戰死之四十一年進攻噶喇依甘肅
臨洮營千總楊玉傑貴州大定協左營把總高玉甘肅西甯鎮左
營把總高增壽四川黎雅營把總曹國全四川建昌鎮中營外委
楊得榮皆同時戰歿先後事 聞議卹興邦 恩廕千總文等俱

廕把總殿魁等俱議卹如例與邦子燦襲文子化蛟襲玉傑弟玉喜襲增壽子速成襲餘襲無考文殿魁俱甘肅張掖人應俊雲南永善人乾隆三十一年由行伍出征緬甸擊賊受傷三十七年調征金川以隨攻僧克宗力戰擢外委又以攻克基木斯當噶等處敘功拔補本職元倫湖南芷江人文魁湖北襄陽人先發雲南昭通人玉傑增壽國全俱甘肅西甯人玉貴州大定人得榮四川西昌人

右 國史館本傳

七十八 三星保等

七十八滿洲正紅旗人姓伊爾根覺羅乾隆三十一年由烏槍護軍隨征緬甸屢立戰功三十二年升藍翎長三十四年遷護軍校三十六年委署護軍參領三十八年調征金川進攻阿喀木雅寨得頭等功牌一四十年五月授副烏槍護軍參領 賞敕圖布巴圖魯號十月大軍由達烏達圍繞進攻取當噶克底綽爾丹色木里莫魯古七十八力戰死藍翎侍衛三星保烏槍護軍多隆武皆同時陣亡先是四月防禦富甯阿由得楞進攻戰歿五月防禦常壽戰於赤爾丹噶奮勇衝擊歿於陣七月驍騎校新福擊賊於得爾烏委署七品官桂保擊賊於喇嘛寺皆同時戰歿事 聞議卹

七十八等俱 恩廕雲騎尉七十八姪托克托布襲三星保子額
爾格保襲多隆武子福桑阿襲常壽子懷塔襲餘襲無考三星保
滿洲鑲黃旗人姓瓜勒佳多隆武滿洲正藍旗人姓伊爾根覺羅
富甯阿滿洲正黃旗人姓沃色常壽甯古塔鑲白旗人姓博和里
乾隆二十一年出征巴里坤有戰功三十四年偕多隆武隨征緬
甸各得功牌一三十八年調征金川進攻阿喀木雅美諾等處常
壽多隆武奮擊敘功皆列超等新福滿洲鑲白旗人姓敖拉桂保
索倫正黃旗人姓墨爾迪勒

右 國史館本傳

楊遇春 胡思順等

楊遇春貴州定番人乾隆三十二年由行伍出征緬甸三十六年
調征金川奮勇撲碉得超等頭等功牌各一拔補貴州定廣協左
營把總三十九年派駐喇穆喇穆五月賊番數百乘夜劫卡時守
卡兵僅五十遇春聞賊至急率兵發連環槍悉力迎擊自戌至丑
卡幾壞遇春額受石傷戰益力會遊擊福敏泰等援兵至賊潰將
軍阿桂以 聞得 旨超補湖南永綏協左營守備 諭曰楊遇
春竭力守卡賊不能動甚屬可嘉而福敏泰於追賊之際奮勇應
援亦堪嘉獎見在軍營正需勇幹將弁此等出力人員自宜亟加
拔擢以示鼓勵適阿桂奏到題升各員內有參將守備等缺已降

旨將福敏泰升補參將楊遇春超升守備各路將軍參贊可將此
諭知將領弁兵俾其益加奮勉四十年十月進攻達烏達圍歿於
陣先後陣亡者雲南元江營守滿胡思順湖南永州鎮右營把總
趙奇陝西靖遠協左營把總孫簡四川漳臘營千總潘榮貴提標
後營把總虎占魁重慶鎮右營外委王世先成都城守營外委魏
攀龍事 聞議卹遇春思順俱廕千總餘俱廕把總遇春子國興
襲餘襲無考思順雲南開化人奇湖南武陵人簡甘肅涼州人榮
貴占魁俱四川成都人世先四川巴縣人攀龍四川雅安人

右 國史館本傳

薩爾吉岱 甯住布等

薩爾吉岱齊齊哈爾鑲紅旗人姓博和爾乾隆三十八年由藍翎侍衛隨征金川攻克馬柰日旁等得功牌五三十九年八月帶兵攻該布達什諾色湖普衝入賊隊鏖戰殺賊盡克其碉卡 賞善巴巴圖魯名號十月從攻默格爾凱立葉克之授三等待衛十一月進剿格魯克古了口賊眾負險據寨槍石齊發併力抗拒薩爾吉岱奮登了口射斃數人賊遁官軍乘勢追擊越山溝四山梁五殲賊二百餘奪碉五十寨卡三百餘四十年七月攻達瑪噶朗衝上山梁克其碉八月軍偪勒烏圍分道進擊轉經樓賊眾竄擁來援薩爾吉岱伏兵橫擊賊潰九月由達烏達圍抵當噶克底薩爾

吉岱爲前哨冒雨乘霧拔柵登擊斃數賊遂奪其礮盡殪之閏十月擊賊於西里之阿穰曲指揮士卒倚柵下射中槍亡將軍阿桂以聞命列前五十功臣圖像紫光閣御製贊曰賊之長技在於善守反而用之拏柵進取滴博蓬婆威名遠服惜哉陣亡於阿穰曲西里之役同時陣亡者二等待衛甯住布委署參領永德烏槍護軍校烏爾圖翰都理珠前鋒校平保永甯藍翎長博碩圖圖爾璽齊哈爾烏槍藍翎長都爾圖空銜藍翎圖爾色均議卹如例廕雲騎尉薩爾吉岱子孟庫襲甯住布子碩洛襲烏爾圖子凌志襲翰都子鼎珠襲平保子保德襲永甯子懷塔布襲餘襲無考甯住布滿洲正藍旗人姓關佳永德吉林正黃旗人姓鄂羅烏爾

圖滿洲正紅旗人姓烏延翰都蒙古正紅旗人姓哈蘇特理珠蒙
古鑲白旗人姓畢嚕平保滿洲鑲白旗人姓納喇永甯蒙古正藍
旗人姓額布素特博碩圖呼倫貝爾正紅旗人姓達布圖圖爾璽
齊哈爾鑲藍旗人姓瓜勒佳都爾圖蒙古正白旗人姓赫爾拉特
圖爾色黑龍江正藍旗人姓達延

右 國史館本傳

四庫全書
禮記注疏
卷三十三

三

曹順

曹順四川閬中人由行伍拔外委乾隆三十二年隨征蠻獠有功拔把總三十六年將軍溫福調征金川以功授千總三十七年七月大兵攻固卜濟山梁賊柵二阻木蘭壩路順隨溫福赴固卜濟山下賊迎拒官兵攻之賊匿柵內發槍石有賊目突出南門順斬之奪門焚柵痛殲逸賊焚斃者百餘獲刀槍衣物無算下部議敘尋遷貴州興化營守備十一月 賞戴孔雀翎遷四川松潘左營都司十二月溫福等攻明郭宗由木雅山至木爾古魯山麓奪賊寨卡進據嘉巴 上以順隨營打仗奮勉出力 賞扎親巴圖魯號三十一年三月順偕頭等待衛烏什哈達帶兵至與噶拉會攻

昔嶺順與司嚮托爾托保領瓦寺鄂克什士兵先偪卡殺賊匪數
十 諭曰都司曹順及司嚮托爾托保奮勇殺賊實爲可嘉著賞
緞二匹閏三月攻昔嶺第五礮順與副都統巴朗普爾普等分兵
攀登溝內伏賊突拒斬賊目順面中石傷八月遷山東壽張營遊
擊三十九年遷湖南澧州營參將四十年二月將軍阿桂奏順手
殲賊目領士兵打仗奮勇 詔授湖南衡州協副將四月阿桂籌攻
宜喜同日先攻木思工噶克及得式梯使賊不暇接應令書麟等
攻木思工噶克了口礮卡羣尼正面礮賊齊赴援順攻峯右礮克
之官兵由康薩爾進據了口山峯賊悉力拒一日內退而復進者
七順與三等待衛穆哈納等擊斃賊遂克擦庸礮寨及附近木柵

石卡我兵復由舍圖柱卡分道斷賊榮噶爾博山後路順領土兵循山場進放槍縱火與參贊大臣豐昇額兵犄角進賊不能支穴寨後竄順擊斃之餘皆墜箐死克石礪十二平房七遂據遜克爾宗 諭曰曹順屢次出力自應格外加恩著傳諭阿桂軍營總兵缺出奏請補授十月擢甘肅肅州鎮總兵閏十月攻西里山麓黃草坪順奮勇騎木柵射殲賊十餘麾兵進攻暗中槍陣亡 諭曰曹順自調赴軍營以來節次剿殺賊眾無不奮勇爭先著有勞績是以屢次擢至總兵今因攻克黃草坪礪卡先登督戰受傷陣亡深爲憫惜著交該部查照李全之例給予應得卹典仍入祀昭忠祠並著該員本籍督撫查明曹順之子見年若干先行奏聞俟其

國朝通志卷之三十三
服闋後卽行送部引見四十一年金川平 命圖形紫光閣

御製詩曰始由偏裨洊至總戎騎牆殺賊受傷殞躬賞延於世爲之
惜悼繼世朱門歌舞以笑子子元襲騎都尉又一雲騎尉見官甘
肅花馬池營參將

石 國史館本傳

秀林 呼爾棟阿等

秀林滿洲正藍旗人姓索徹哩乾隆三十三年由烏槍護軍隨征緬甸攻新街老官屯晝夜奮擊傷左膝三十五年回京三十六年復挑赴雲南尋調金川三十七年投護軍校四十年委署護軍參領九月大軍由達烏達圍繞進攻克當噶克底及色木里喇嘛寺等處碉卡乘勝進據達思里噶拉依莫魯古一帶山梁秀林冒雨力戰受槍傷十一月克獲木巴爾遂進倡科布曲秀林奮勇擊賊歿於戰同時陣亡者副前鋒參領呼爾棟阿委署參領多爾濟賡騎校委署參領阿西克防禦董邦起藍翎侍衛富普內親軍校芬普恩佛木丕爾前鋒委署七品官科靈阿事 聞議卹秀林等均

恩慶雲騎尉秀林子明保襲呼爾棟阿子多倫太襲科靈阿子德昌襲餘襲無考呼爾棟阿滿洲鑲藍旗人姓瑚爾色乾隆二十七年派戍伊犁三十年出征烏什三十六年復征緬甸皆有戰功多爾濟呼倫貝爾鑲白旗人姓齊布齊諾特乾隆三十八年隨征金川攻克蚌噶立功列超等 賞戴花翎阿西克呼倫貝爾正紅旗人姓烏哩雅特董邦起漢軍鑲藍旗人芬普恩滿洲正白旗人姓郭佳科靈阿滿洲鑲藍旗人姓西特爾餘旗姓無考

右 國史館本傳

常祿保

常祿保滿洲鑲藍旗人姓赫舍哩氏雍正十三年由閒散襲其遠祖德祿軍功所給騎都尉世職於乾隆十八年授三等侍衛二十七年授直隸居庸路營都司三十一年調正定鎮王家坪都司三十五年遷四川提標左營遊擊三十六年從征金川三十七年遷成都城守營參將隨副都統海蘭察等進攻得拉密色欽山梁賊潛伏密林內常祿保往來衝擊之十月隨定邊將軍溫福等攻明郭宗附近山梁議敘功加一等紀錄五次十一月大兵進攻路頂宗之喀木色爾寨常祿保隨海蘭察由山南大澗潛越山頂克之殲賊無算隨進取博爾根山仰攻克木城受石傷溫福等上其功

得 旨賞戴孔雀翎三十八年六月隨副都統阿爾素納等分路
進攻昔嶺大碉賊百餘從傍衝拒常祿保督兵橫擊敗之七月駐
日壘要隘三十九年二月授甘肅河州協副將三月定西將軍阿
桂等攻克羅博瓦常祿保駐防山嶺賊九百餘乘雪夜分兩隊潛
劫常祿保營四面環攻勢甚倡常祿保箭射槍擊督兵力戰禦之
被槍石傷賊竄入卡內者皆殲之副都統烏什哈達等先後援至
常祿保勇氣倍增率陝甘官兵內外夾攻賊敗竄 諭曰此次賊
眾潛來劫營經官兵奮勇合擊痛加殲戮甚屬可嘉常祿保功績
尤爲出眾著賞給西爾努恩巴圖魯名號賞銀一百兩並著以總
兵升用遇有缺出卽行補授尋授廣東高廉鎮總兵官四十年七

月分攻苗則大海各碉賊掘壕排松簽鹿角備禦甚嚴常祿保分兵出賊後併力乘勢合攻雅木賊碉克之九月大兵由達烏達圍繞道分七路進攻達思里噶拉依山梁常祿保率兵各路接應攻獲碉卡甚眾十一月大兵分五路仰攻科布曲山梁賊死拒槍石交下常祿保被傷猶力戰歿於陣事 聞 賜祭葬如例 命圖形紫光閣儒臣擬贊曰雪夜賊來犯羅博瓦悉力殲擊傷因兵寡苗則大海賊後繞攻捐軀科布敢戰名雄尋 恩廕其子瑚松阿爲都司襲騎都尉世職

右 國史館本傳

周文秀 陳文等

周文秀貴州南籠人由行伍拔補貴州安籠鎮左營把總乾隆三十六年隨征金川攻克巴朗山斯當安資哩日耳董瑪寨美美礪等處以奮勇超眾拔補大定協左營千總又攻獲美美卡路頂宗明郭宗猛烈達爾圖身被槍石傷以功升威甯鎮左營守備又攻克沙壩山凱立葉升四川泰甯協中軍都司又攻克喇穆喇穆布達什那等處升水城營遊擊四十年十一月攻獲西里第貳山峯復進攻科布曲歿於陣攻西里陣亡者雲南提標中營千總陳文甘肅大通協左營千總淡明志貴州威甯鎮右營千總王占魁陝西延綏鎮右營把總閻大強雲南昭通鎮前營把總毛榮甘肅西

甯鎮右營把總鮮友才雲南昭通鎮中營把總陳枚甘肅巴燕戎
格營外委杜永浩貴州鎮遠鎮中營千總黃永佩雲南鎮雄營把
總馬亮貴州威甯鎮左營外委楊易富事 聞議卹文秀廕守備
文明志占魁大強榮友才枚永佩亮俱廕把總餘卹如例文秀子
廷翰襲文弟武襲明志子繼忠襲友才子榮襲餘襲無考文雲南
太和武舉明志陝西南鄭武舉占魁貴州普定人大強甘肅文縣
人榮雲南臨安人友才甘肅西甯人枚雲南鎮雄人永浩甘肅西
甯人永佩貴州鎮遠人亮雲南東川人易富貴州大定人

右 國史館本傳

穆克登布 祿福等

穆克登布滿洲鑲紅旗人姓黃佳乾隆二十七年由烏槍護軍派
戍伊犁三十年平烏什城得功牌四三十二年隨征緬甸得功牌
二三十三年補烏槍藍翎長三十八年調征金川十月進攻阿克
木雅得功牌一四十年二月攻勒吉爾博山梁賊碉峻險首登梯
被石擊墜復躍起上碉殲斃甚夥升委署護軍校七月攻克拉枯
喇嘛寺委署烏槍護軍參領十二月擊賊於噶喇依與藍翎長祿
福同歿於陣是年陣亡於當噶者藍翎侍衛富津防禦根春藍翎
驍騎校舒爾鴻額前鋒委署驍騎校噶嚕陣亡於榮噶爾博者三
等侍衛羅羅驍騎校委署參領阿里保空銜藍翎扎瑪庫陣亡於

巴占者防禦哲坤保參領得森特陣亡於噶西喇嘛寺者領催委
署參領烏勒綬圖藍翎長烏德爾事 聞議卹 恩廕穆克登布
等雲騎尉穆克登布子盛明襲祿福子永保襲根春子七十四襲
舒爾鴻額子勝保襲噶嚕子德濟襲羅羅子富哩善襲哲坤保子
阿林保襲得森特子明善襲餘襲無考祿福滿洲鑲黃旗人姓鴻
寶爾富津呼倫貝爾正白旗人姓勒木布爾格根春吉林正白旗
人姓蘇都里舒爾鴻額吉林正藍旗人姓溫都噶嚕吉林正藍旗
人姓扎拉哩羅羅滿洲鑲黃旗人姓烏哩斯阿里保齊齊哈爾正
黃旗人姓巴哩扎瑪庫索倫正藍旗人姓赫音哲坤保吉林正紅
旗人姓伊蘇得森特吉林鑲黃旗人姓巴魯特烏勒綬圖呼倫貝

爾正白旗人姓喀喇寬烏德爾索倫正藍旗人姓伊布葉

右 國史館本傳

國朝通志卷之四十四

四

巴西薩 普木楚克等

巴西薩索倫正紅旗人姓布拉穆由佐領襲三等輕車都尉乾隆三十八年隨征金川三十九年大兵攻羅博瓦山高峻巴西薩率眾攀登賊憑高下壓應弦立斃遂據山梁盡克木城石礮列超等功 賞塔爾濟巴圖魯名號 賜戴花翎四十年攻康薩爾直抵礮根山梁盡處皆懸崖賊無路可竄與官兵殊死戰巴西薩死焉諡圖形紫光閣列後五十功臣中 命儒臣擬贊 賜祭葬廕雲騎尉世職襲無考與巴西薩同死康薩爾者委署護軍參領普木楚克三等輕車都尉八十三佐領阿爾賽委署參領額勒登保委署驍騎校甯濟圖巴蘭保雅哈哩阿津泰甯濟佈委署閒散章京

扎爾蘇議卹俱廕雲騎尉普木楚克子尙安襲額勒登保子輝色
保襲巴蘭保子富勒呼訥襲雅哈哩子巴噶保襲阿津泰子徹楞
額襲扎爾蘇子博慶襲餘襲無考普木楚克蒙古正藍旗人姓布
庫斯八十三察哈爾正紅旗人姓鄂吉阿爾賽齊齊哈爾正黃旗
人姓舒穆祿額勒登保吉林鑲白旗人姓奇塔爾甯濟圖索倫正
黃旗人姓瓜勒佳巴蘭保吉林正藍旗人姓博赫哩雅哈哩伯都
訥鑲白旗人姓瑚璉阿津泰拉林正白旗人姓巴哩甯濟佈察哈
爾正黃旗人姓巴哩扎爾蘇吉林正黃旗人姓克勒特

右 國史館本傳

僧保 頁布肯等

僧保吉林鑲藍旗人姓瑚圖理由領催委署驍騎校尋委署閒散章京乾隆三十四年隨征緬甸得三等功牌一三十八年調征金川四十年大軍進勦扎烏古由什扎古琅谷兩路攻撲乘勢分據碉卡自日斯滿至臨河縣長二十餘里盡克之僧保奮勇殲賊歿於陣前鋒校頁布肯力戰死先是副將軍明亮以石真噶爲保護沙爾尼要口督兵奮擊委署驍騎校孟庫護軍獎賞藍翎文德委署七品官觀音保皆戰歿烏槍翎長博崇武藍翎前鋒巴雅擊賊於格隆古領催空銜藍翎福木保擊賊於蚌噶藍翎長祿爾擊賊於噶爾朗噶副前鋒校吉爾章阿擊賊於格古了口皆同時陣亡

事 聞均議卹如例 恩廕雲騎尉僧保子松山襲頁布肯子明
興襲孟庫子蘇勒方阿襲博崇武子萬甯襲巴雅子達蘭泰襲福
木保弟色蘭泰襲祿爾子托克托布襲吉爾章阿子富明阿襲餘
襲無考頁布肯滿洲正白旗人姓伊爾根覺羅孟庫吉林正黃旗
人姓溫都乾隆三十八年由緬甸調征金川進攻阿喀木雅丹噶
山當噶爾拉得楞等處敘功列超等者三頭等者二文德吉林正
藍旗人姓伊蘇觀音保呼倫貝爾正藍旗人姓瓜勒佳隨攻金川
馬柰有戰功列超等記冊博崇武滿洲鑲紅旗人姓巴爾達乾隆
三十四年偕頁布肯隨征緬甸攻克老官屯各得頭等三等功牌
一巴雅吉林正藍旗人姓珠爾格特福木保甯古塔正白旗人姓

伊拉理祿爾滿洲鑲紅旗人姓石佳吉爾章阿滿洲鑲紅旗人姓
舒穆祿

右 國史館本傳

皇清宣統元年庚申二月

卷三十一

七

國朝耆獻類徵初編卷三百五十五目錄

忠義二十五

烏爾納 納嵩額等

新柱 和泰等

王宗龍 張進賢等

韓成璘 韓光英等

圖欽保

王三杰 師永澄等

濟勒泰 賽音察渾等

宗室明善 永信等

孫受 程錕等

李南暉 子思沆 費元澄等

邵如椿 從子曾變

熊恩紱

赫生額 長庚等

耿世文 王宗武等

周大綸

李喬基

鄭嵩 徐慶等

楊彪 黃殿臣等

貴林

楊起麟 邱能成等

杭富 林玉得等

國朝耆獻類徵初編卷三百五十五

通奉大夫前署江西巡撫江西布政使司布政使湘陰李桓輯

忠義二十五

烏爾納 納嵩額等

烏爾納滿洲鑲藍旗人烏納喇乾隆二十年以護軍隨征伊犁二十九年授護軍校三十年隨征烏什三十四年遷委署護軍參領三十二年擢副護軍參領尋授甘肅蘭州城守營參將三十九年二月隨將軍阿桂征金川攻克沙壩山 賞戴花翎四月投廣東廣州協副將九月攻遜克爾宗四十年二月攻甲爾納寨俱受槍傷四月攻榮噶爾博賊援至擊敗之擢陝西延綏鎮總兵五月攻

克邁過爾據凱立葉議敘功加一等紀錄五次六月隨攻木思工
噶克勒吉爾博得式梯等處議敘功加三等又功加一等八月大
軍攻勒烏圍烏爾納奪轉經樓及各寨木城九月大軍攻西里烏
爾納督兵造甲爾日磔浮橋賊至擊敗之力戰至科布曲克賊卡
一閏十月領前隊兵渡科布曲河攻克大碯一十二月克科布曲
第四碯四十一年正月隨大軍由格隆古進攻噶喇依三等待衛
納嵩額章京雅庫陣亡二月攻克噶喇依喇嘛寺火起延燒至火
藥房烏爾納救之死焉 諭曰烏爾納自赴軍營凡遇打仗無不
努力奮勇並受傷數處今大功告成乃因火藥轟起石塊中傷身
死甚爲可憫著加恩交部照受傷身故例議卹 命圖形紫光閣

御製贊曰平生若懦戰則信勇雖屢受傷進不旋踵功成事定賊
寨火延歿於弗值實可嗟焉 賜祭葬廕都司子三雲保襲納嵩
額雅庫俱廕雲騎尉納嵩額子多倫保襲滿洲鑲黃旗人姓托科
羅雅庫索倫正白旗人姓鈕祜祿襲無考

右 國史館本傳

國朝通志卷之四十五

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

新柱 稱泰等

新柱滿洲鑲白旗人姓烏佳由親軍校授甘肅涼州鎮標守備洊
擢河州協副將乾隆四十六年三月撒拉爾逆回蘇四十三因爭
立新教起事新柱往勦至白莊遇賊陣亡事 聞 詔加贈二級
履守備子海甯阿襲賊犯蘭州世襲佐領陝甘督標左營參將和
泰登城射賊中鳥槍死同死者蘭州城守營中軍守備善德河州
鎮奇台堡守備袁尙仁大學士公阿桂尙書和珅先後奉 詔赴
甘肅軍營督勦四月十七日和珅 至軍營賊踞八蜡廟水磨溝
掘壕死拒十九日陝西固原鎮總兵圖欽保率兵越水磨溝進偪
賊巢賊從山坡逆撲延綏鎮標遊擊愛星阿從圖欽保奮力斫賊

圖欽保馬蹶墜山下被傷卒愛星阿戰死圖欽保詳大臣傳六月
賊退守華林寺阿桂督官兵大破之首逆就戮戰死者靖遠協下
馬關把總盧文璧議卹和泰加 贈二級廕守備弟五泰襲其佐
領世職子佛見額襲善德廕千總子扎蘭泰襲愛星阿廕守備孫
五十四襲尙仁文璧俱廕把總襲無考和泰滿洲鑲紅旗人姓覺
羅禪善德滿洲正紅旗人姓庫雅拉愛星阿滿洲正黃旗人姓錫
克特里尙仁文璧俱正白旗漢軍

右 國史館本傳

王宗龍 張進賢等

王宗龍陝西長安人由行伍隨征金川累功授陝甘督標前營千總洊擢甘肅涼州鎮前營都司四十六年三月河州撒拉爾番營蘇四十三叛宗龍與同營都司張進賢隨涼州鎮總兵德甯往剿時河州右營守備李奇把總朱廷奇外委李九章徐烈率兵守河州城陷死之賊進犯蘭州宗龍力戰金城關陣亡六月賊踞華林寺大軍攻之首逆就戮餘匪竄卡內死拒進賢戰歿同死者肅州鎮標中營千總蔡珏是役先後陣亡者甘肅西甯鎮前營千總署守備徐登彥肅州鎮丹山營千總陳禮四川慶甯營千總楊茂湖南綏靖營千總徐英甘肅提標右營把總朱光祿涼州鎮標後營

把總許誥甯夏鎮標前營把總邵敏涼州鎮標右營把總趙良楷
大通協把總楊國仕平羅營把總杜綖西甯鎮把總郭啟伏四川
懋功營把總張大翔甘肅提標右營外委馮雲左營外委馬士望
涼州鎮羌營外委王吉善張士俊河州鎮循化營外委劉漢奇台
堡外委陳伏得提標額外外委□榮□天昌楊天得永安營外委
邵殿元李喜得河州鎮中營外委馬瑞督標中營效力武舉李得
花馬池額外外委魏龍四川懋功營外委路公舉先後事 聞議
卹 詔宗龍進賢各加一級廕千總奇珏登彥禮茂英光祿誥敏
良楷國仕綖啟伏大翔各加一級廕把總餘卹如例進賢甘肅固
原人奇甘肅永昌人廷奇甘肅文縣人九章陝西富平人烈甘肅

河州人珏甘肅皋蘭人登彥甘肅西甯人禮甘肅張掖人茂四川
華陽人英四川成都人光祿甘肅張掖人誥甘肅永昌人敏甘肅
甯胡人良楷甘肅武威人國仕甘肅高臺人綆甘肅甯夏人啟伏
籍無考大翔四川巴州人雲甘肅張掖人士望甘肅皋蘭人吉善
甘肅武威人士俊甘肅平番人漢奇甘肅河州人伏得甘肅大通人
榮天昌俱甘肅張掖人天得甘肅河州人殿元甘肅大通人喜得
甘肅西甯人瑞甘肅河州人得甘肅皋蘭人龍甘肅靈州人公舉
四川人

右 國史館本傳

韓成璘 韓光英等

韓成璘甘肅河州人先世韓完卜當明季由降番累功授世襲三品土指揮使 國初來歸成璘於乾隆三十一年襲世職四十六年撒拉爾逆回蘇四十三倡新教糾眾滋事三月圍蘭州成璘從官軍勦賊陣亡四月賊據水磨溝空銜土千總韓光英戰死六月大學士公阿桂都統海蘭察等統大軍破賊於華林寺首逆伏誅陣亡者空銜土把總阿蔥餘賊死守華林寺七月海蘭察率師圍之盡殲匪黨土外委郎卡太歿於陣是役先後陣亡者都司銜土千總朋坤空銜土把總福星土外委舍拉山扎四十九年鹽茶廳逆回田五句結固原回匪李化玉等謀復新教陷通渭縣阿桂復

奉 命督師賊分據石峯堡底店鎮六月大軍攻克底店山梁陣
亡者土把總落如保七月勦平石峯堡陣亡者土千總俄什舟日
先後事 聞議卹成璘加銜一等弟成璋襲土指揮使光英阿蔥
福星各照八品官給卹郎卡太照土千總例議卹坤朋落如保俄
什舟日各加銜一等餘卹如例光英甘肅循化廳人阿蔥四川人
坤朋小金川人福星四川人郎卡太四川雜谷廳人舍拉小金川
人山扎四川人落如保俄什舟日俱四川雜谷廳人

右 國史館本傳

圖欽保

圖欽保滿洲鑲黃旗人姓瓜勒佳氏由前鋒授前鋒校乾隆三十
二年隨將軍明瑞征緬甸屢著功績 賞戴孔雀翎三十三年大
兵勦蠻結賊匪大捷圖欽保在事有功授三等侍衛 賜法福禮
巴圖魯號三十五年遷健銳營副前鋒參領三十七年二月隨將
軍阿桂征金川十一月大軍造皮船乘夜渡河分三隊襲烏達西
山碉卡圖欽保同總兵王萬邦由東面進攻木城石碉同時克獲
捷 聞得 旨嘉獎授額外參領復與侍衛三寶等合兵至邦甲
山梁緣溝登山勦賊克石城大碉及各石卡乘勝下夾攻賊潰竄
十一月抵納圖納扎木副將軍明亮等分兵三路圖欽保與遊擊

谷生炎等合攻山坡礮卡克之時賊方悉力拒守石城圖欽保復
借侍衛德赫布千總劉世勳等三面合圍壘石卡偪之賊棄城夜
遁大兵至僧格宗圖欽保由河西科多渡橋攻河東賊掘山路官
兵奮勇進至喀咱木籠山梁抵奢壘賊潰奔美諾三十九年圖欽
保同參領拉布棟阿率兵五百取馬柰克之敘功擢湖南長沙協
副將四十年大兵抵薩克薩谷其北曰茹寨麥方熟賊設戰礮抵
死衛護圖欽保領兵由薩克薩谷力攻克之焚沿河各寨賊竄出
前後受圍中箭被槍及墜河斃者無算茹寨麥田十餘里皆爲我
兵所據事 聞 諭曰圖欽保攻勦茹寨尤爲出力著交將軍等
記名遇有軍營總兵缺出奏請補授七月大兵分二路攻石真噶

山下木城圖欽保由左路繞過木城燬山下賊寨賊駭竄閏十月
攻克扎烏古山梁圖欽保在事有功得 旨功加一等十二月擢
陝西固原總兵四十一年凱旋 命圖形紫光閣 御製贊曰承
平日久敢恃內安永憶文子厥有名言嘉我諸臣遇兵則奮竭力
敵愾世承家訓四十六年三月撒拉爾逆回滋事圖欽保率兵五
百援勦圖欽保偕總兵德甯等迎擊手殲賊四復與總督勒爾錦
提督仁和等守城時大兵雲集賊退踞入蜡廟水磨溝一帶掘坎
濠以死拒之四月圖欽保同都統海蘭察率兵越水磨溝由山梁
進徧賊巢而逆回等從山坡撲上圖欽保持刀奮力斫賊眾馬蹶
墜山下被傷卒大學士公阿桂尙書和珅奏 聞請卹 諭曰圖

欽保奮勇勦賊臨陣捐軀殊堪憫惻著照陣亡例議卹尋 賜銀
七百兩加 贈三級 賜祭葬如例入祀昭忠祠授其子藍翎侍
衛明昌都司銜擢爲三等待衛

右 國史館本傳

王三杰 師永澄等

王三杰甘肅甯夏人乾隆十三年以馬兵隨征金川有功授千總二十二年隨征回部三十七年隨征金川攻甲木受槍傷擢陝甘督標右營守備四十一年擢陝西固原鎮左營遊擊四十六年三月撤拉爾逆回蘇四十三滋事三杰隨固原鎮總兵圖欽保往剿賊寇蘭州陝甘督標右營千總師永澄戰歿四月賊踞水磨溝三杰隨圖欽保直偪賊巢力戰同陣亡圖欽保見大臣傳是役先後陣亡者固原鎮標右營千總馬登榜平涼城守營千總單應學陝甘督標中營把總張廷棟後營把總惠君遴陝西提標前營把總楊成舉延安營把總常世魁白土營把總馬曰基陝甘督標中營

外委張文斌宋廷才提標後營外委張廷奇固原鎮標中營外委
黎守才馬成傑延綏鎮響水堡外委折能靖遠營外委王得興漢
鎮中營外委陳文科左營外委王恆貴王智定邊營革職把總李
增福先後事 聞議卹三杰詹守備子錫爵襲永澄登榜應學廷
棟君遴成舉世魁曰基各廕把總增福 賞給原銜廕監生餘卹如
例永澄甘肅甯夏人登榜陝西西甯人應學甘肅固原人廷棟陝
西長安人君遴甘肅固原人成舉甘肅張掖人世魁陝西長安人
曰基陝西安康人文斌廷才俱甘肅皋蘭人廷奇陝西長安人守
才成傑俱甘肅固原人能陝西榆林人得甘肅固原人文科陝西
甯鄭人恆貴陝西長安人智陝西平利人增福陝西府谷人

右 國史館本傳

國史館本傳
卷一百一十五

The image shows a large, empty rectangular frame with a thick black border. Inside this frame, there are several vertical lines that divide the interior into a series of empty rectangular columns. There are 10 columns in total, each of varying widths. The lines are slightly irregular, suggesting a scanned or hand-drawn document. The overall appearance is that of a template for a ledger, a list, or a data table.

濟勒泰 賽音察渾等

濟勒泰滿洲正白旗人姓果穆爾乾隆四十年以拜唐阿隨征金川有功擢三等侍衛四十六年甘肅河州撒拉爾番回蘇四十三作亂三月犯蘭州涼州營驍騎校賽音察渾戰歿時大學士公阿桂奉命往甘肅督勦濟勒泰從四月賊踞水磨溝戰歿者駐防西安前鋒校富亮閏五月初九日濟勒泰由龍尾山踰溝殺賊百餘中槍陣亡同死者甯夏佐領署前鋒翼長明福十五日攻破水磨溝賊卡戰歿者藍翎長托倫保六月十五日大軍乘陰雨出賊不意月土囊填壕進雲騎尉三等侍衛吉爾坦保三等侍衛全海西安防禦羅密等俱力戰殲賊無算首逆就戮餘匪竄華林寺吉

爾坦保死焉同死者拜唐阿塔克達那二十三日攻華林寺賊於
卡內施礮石死拒全海羅密焚燬賊巢奮勇衝殺並歿於陣七月
初五日領侍衛內大臣海蘭察率兵圍華林寺賊殲之陣亡者佐
領良丕爾司鞍果倫察傷亡者監翎侍衛瑪圖那事 聞議卹

詔吉爾坦保廕騎都尉弟都爾博襲濟勒泰等俱廕雲騎尉濟勒
泰子賽爾納襲賽音察渾子福興阿襲富亮子色精額襲明福子
德勝保襲托倫保子阿渾保襲塔克達那子多明阿襲全海子布
勒恆襲羅密子權衡襲良丕爾子納木他勒襲果倫察弟克木克
柯襲瑪圖那子哈達那襲賽音察渾蒙古鑲白旗人姓烏吉格特
富亮吉爾坦保塔克達那全海俱滿洲正白旗人富亮姓溫達吉

爾坦保姓果爾敏塔克達那姓庫雅拉全海姓納喇明福滿洲正
紅旗人姓蘇佳托倫保羅密俱滿洲鑲白旗人托倫保姓倂爾岱
羅密姓富察果倫察索倫正紅旗人姓果爾敏瑪圖那滿洲鑲黃
旗人姓舒穆祿良丕爾阿拉善蒙古人姓無考

右 國史館本傳

宗室明善 永德等

宗室明善鑲紅旗人乾隆三十四年以戶部員外郎隨大學士公傅恆征緬甸有功三十八年補鑾儀衛冠軍使兼公中佐領三十九年授鑲紅旗漢軍副都統四十年授參贊大臣往烏里雅蘇臺辦事四十七年授鑲紅旗滿洲副都統四十八年授陝西西安副都統四十九年甘肅鹽茶廳小山回人田五私倡新教糾眾滋事五月攻通渭縣聚石峯堡明善由靜甯州之偏麻堡進剿抵高廟山奮勇奪賊頭卡以兵少賊眾中矛傷陣亡同死石峯堡者佐領永德暨子馬兵德順佐領署營總黑漢章京署參領瑪色禮暨子領催穆特本驍騎校署參領德成阿暨子前鋒永盛署驍騎校福

爾清阿瑪尙阿暨子馬兵富隆阿在石溝莊陣亡者章京署參領
隆科事 聞議卹 詔明善廕騎都尉餘俱雲騎尉明善子克昌
襲見任刑部員外郎承德孫奎福襲黑漢子祿明襲瑪色禮孫青
舒襲德成阿子永興襲瑪尙阿子富興阿襲福爾清阿子善福襲
隆科無嗣停襲承德蒙古正黃旗人姓百五忒黑漢滿洲鑲白旗
人姓赫錫特瑪色禮滿洲正藍旗人姓瑪佳德成阿滿洲正黃旗
人姓費莫瑪尙阿福爾清阿俱蒙古正藍旗人瑪尙阿姓蟒努特
福爾清阿姓克勒德隆科滿洲鑲紅旗人姓費莫

右 國史館本傳

孫受 程錕等

孫受甘肅武威人由行伍擢江西饒州營守備乾隆三十五年
遷武甯營都司四十一年遷陝西神木營遊擊四十八年擢撫標中
軍參將四十九年四月甘肅鹽茶廳小山逆回田五作亂陷安西
州營汛受率陝西兵往長武堵剿時賊黨犯靖遠城總督李侍堯
調兵勦之固原鎮前營把總程錕遇賊於狼山陣亡五月官兵敗
賊於打喇赤陣戮田五圍餘匪於馬家堡賊遁據通渭之石峯堡
受攻之奪賊卡一賊分兵來拒受力戰歿於陣同死石峯堡者西
安軍標中營把總何得福撫標右營外委任逢春左營外委趙登
雲賊擾靖甯州官軍追之戰於鄒家河陣亡者西安軍標右營千

總候補守備陳開學陝西撫標左營千總楊疇右營外委田應魁
西安軍標右營外委張永福六月大學士公阿桂尙書福康安奉
命督師檄調各路官軍會剿大破賊於底店鎮四川松潘鎮左營
守備白玉昇戰歿事平議卹奉 旨受廕守備子信襲錕得福開
學疇俱廕把總玉昇千總餘卹如例錕得福俱陝西長安人逢春
陝西咸甯人登雲陝西長安人開學甘肅甯夏人疇山西孟縣人
應魁永福俱陝西長安人玉昇四川峨眉人

右 國史館本傳

李南暉 子思亢
費元燈等

李南暉甘肅通渭人由舉人於乾隆三十年任四川威遠知縣以疾告歸四十六年河州撒拉爾逆回蘇四十三肆擾通渭縣警備南暉有守禦功四十九年鹽茶廳小山逆回田五作亂五月攻通渭縣城南暉率子姪家丁並召募壯夫百五十人登城拒守擲大石殺賊數十城陷巷戰被執與子貢生思沆同罵賊死兄子監生師沆自經死家眾死者數人事 聞 諭曰李南暉以致仕在籍之員竟能率領子姪家丁同民夫守護城池追賊匪進城復格鬪捐軀父子暨姪同時畢命深堪嘉憫著加恩賞給知府職銜並著該部照知府陣亡例議給卹廕尋議上奉 旨李南暉加贈太僕

寺卿子宗沆廕知縣先是署安定縣典史費元燈以檄赴官川偵賊於四月二十七日行至馬家堡遇賊被害時賊聚石峯堡逆黨馬建功在通渭糾回眾將會之脅大莊回民馬世雄世雄不從告試用吏目署通渭縣典史溫模模得預知賊計爲守禦備總督李侍堯奏補世雄千總與守城城陷之日模自經死世雄戰死議卹元燈 贈主簿子振基廕吏目模加知縣銜照知縣例議卹 贈道銜孫肇蘭廕知縣世雄子得榮廕千總元燈浙江歸安人模廣東長樂人

右 國史館本傳

溫模 劉德等

公諱模字孫朗一字法可長樂登雲鄉人曾祖蘭如附監生祖廷
鑑 贈儒林郎父元祚州同知公守正不阿在鄉里表表著風節
事親孝居喪如禮少習舉子業試不售既而入貲爲吏日分發甘
肅借補通渭縣典史在任三載革里役雜派宿弊爲清乾隆甲辰
小山逆回田五爲亂聚石峯堡肆掠村落遂犯通渭城令王懷閉
關不出公率兵民登陴固守七晝夜鼓聲如雷兵民皆奮力用命
會糧盡與學博劉公議開倉給諸守者粟王令持不可諸守者稍
稍散去城將陷公仰天大呼曰事去矣吾豈偷生以負 皇上乎
馳抵官廨正衣冠北向拜仲子熙開在側抱膝大哭曰爲臣死忠
爲子死孝兒今日從大人於地下矣公從容謂之曰汝死義也如

吾後事何熙開不得已走出公鍵戶自經氣乍絕而城陷縣令王
懷割其鬚竄入鄉里訓導劉德墜樓折脛死而復蘇邑人李南暉
率宗人巷戰被執罵賊死而都司福德保適至賊竄事平大學士
阿公嘉勇侯福公以公死事 聞 純皇帝嘉悼之 贈府知事
加知縣銜旋晉道銜 賜祭葬祀昭忠祠廕一子知縣卹諸死事
者而置王懷於法

論曰訓生也晚不及見公諸父兄云公美鬚髯顏色峭厲見者肅
然起敬嗚呼公之節著於天壤矣懿哉懿哉

右傳溫訓撰

邵如椿 從子曾燮

乾隆四十九年甘肅逆回田五寇通渭文學邵君倡義集士民固守城陷死之後十有六年當嘉慶五年吾友蜀人張夔龍告余曰邵君之死踰年而執事宰咸甯既請於憲府表其閭矣墓在縣西之仁投原迄今未有銘其幽者願終惠之余應曰諾君諱如椿字莊園浙江紹興人考南之挾申韓之術遊陝西最久君遂占籍咸甯補弟子員而食餼焉家貧苦君能世其父業攜孥就通渭知縣之聘其年五月田五自鹽城南竄距縣城信宿而近謀者以告知縣將逃君曰子宰一邑而使城中生聚皆陷於賊其可乎且逃則死於法守則死於賊與死於法甯死於賊耳縣令許諾然惟怯不

任事君乃立於門闥袒而大呼曰好男子當從我守城殺賊俄頃應者數千人乃令壯者執刀矛老弱運雙石並集城上而身率猶子曾變登西墉以當賊衝十一日賊至城下城垣庫薄又倉卒不能具火器賊蟻附而上君手短刀格鬪良久不支被執見賊方屠戮乃曰首議守城者是我也何多殺他人爲賊遂斫額批耳斷頤洞腰腹剗左右臂凡十三創而曾變奮力捍衛君亦被十一創偕君罵不絕口以死君死年四十一曾變年十八知縣匿旁舍得免事定逮入都以矢陷城池論如律夫知縣當死而不死君可以無死乃不忍守陣者多死而已獨不死然卒同歸於死先後特蚤莫閒耳一則與日月爭光一則不免於伏歐刀都市士大夫不幸而

遭禍變可以知所自處矣君性穎異父教之甚嚴益自刻苦奮勵
有聲庠序知華州潘時選知蒲城縣葉藩咸嗟異其才延致幕下
居父喪哀毀骨立水漿不入口者數日其忠孝純備自性生也娶
諸氏生女適張興治卽張夔龍之子也再娶余氏生次女在室城
破後一日大兵至賊退余氏年二十有二匍匐積屍間得君及曾
變之體沐浴具棺斂號哭隨之哀動行路立孤不育故鄉遠不可
歸乃攜次女依長女比屋以居紡績續食鄰里稱女宗焉惟君死
事之烈應銘法乃爲之辭曰

衣逢冠進綴綴然居恆緩服以儒傳臨事髮植忘軀孱曲踊距躍
直無前一呼壯夫爭摩肩亦有旄倪相後先登陴而守何瑕堅下

視蜂蟻善撲綠墨雲壓堞虹飲川樓櫓拉雜隨飛煙城亡與亡甯
獨全體爲質的叢戈鋌猶子甫逾舞象年迺奮折刃張空拳通中
大創身棄捐鬼雄相持上訴天積骸辦取終幅纏髮而行哭杞婦
賢潔比霜玉慰下泉素澹東注高其壩元堂之安永無遷有過此
者必式焉

右墓誌銘莊斡撰

熊恩紱

直隸大順廣兵備道熊公旣死事之五月逆黨徐克展就禽於是
詔贈公太僕寺卿官其一子後五年其長子方受成進士入翰林
予假還籍將以乾隆五十七年某月某日歸葬於廣西宣化縣之
某鄉某原我 國家傳歷 四聖承平百四十餘載自回部伊犁
以至青海西藏大兵所至悉皆蕩定幅員廣袤遠軼秦漢方內又
安蚤開晏閉少犬吠之警聞有造作不靖無不應期摧殄靡有遺
種斯乃 國家景運靈長將帥效命宣力固焯焯其可紀已若其
逆芽方見而能先事區畫逆折其成謀使不得逞甯躬發大難犯
白刃就剗割而不欲貽 國家以亡矢遺鏃之費卒之士宇甯謐

民人不見死亡之苦寇盜之患雖其效命宣力與戰勝攻取者有
聞而知幾之識取義之勇爲傲福於 國家寵靈甚大若公者其
亦烏可以少也始單縣有劉某者世習八卦教煽惑鄉里官捕而
殺之械其子洪繫之獄人復就獄中傳其術從者益眾自山東河
北直隸諸郡縣比屋皆是無慮數萬餘人而段文經故胥吏以事
斥革家居性險狡數挾數以役人人服其黠羣奉之爲帥立期約
往劫單縣獄因攻奪州郡時公方備兵大頓廣聞之下元城令密
捕之而郡縣吏皆通賊多爲耳目者走白賊熊公將屠滅汝等矣
賊賊且恚遂於閏七月十四日夜半毀署入殺公公始聞謹聲疑
失火持印出已知有變亟還命家人守庫舉印授繆恭人而挺身

出大罵賊攢刀斫之賊故與其黨有成約至是以先期起不及召其黨莫知皆不應賊見公已死散劫郡縣署郡縣署已有備不勝而走逸之旁境以次獲之故徐克展獲於亳州明日出公尸面如生怒目奮髯兩手猶作搏賊狀家人以守庫被殺者六人而印爲繆恭人所匿得免余聞邪教之起蔓延三省者數十年大府以下盡惴惴懼撻釁禍不脫死而幸以無事屬 國家金甌鞏固草寇竊發一時如蘇四十三林爽文其稽天誅者遠不過而歲近祇旬月聞耳賊卽一旦並發非能有所加也然其閒公私之煩擾軍興之促急徵調之旁午雖卽時殄滅而縣官已被其耗蠹比之先事逆折其成謀俾之奔迸走逸竄伏無所而市肆一不驚者不同日

而論矣此公所爲以身當其衝卽九死而不悔而爲 國家寵靈
所傲福者也公之死也 朝廷初疑有他故未卽降 詔洎徐賊
覆訊得實乃議 予蔭 予卹蓋情事不可以不明而權衡必歸
於至當烏虜公其可以無憾也已公以館選歸進士班銓敘始終
政績皆在直隸初令成安調天津以獲盜同知河閒保定列大計
遷永平守乾隆四十三年 上東巡 召對 行在稱 旨擢兵
巡霸昌道逾年改大順廣生平不事聲迹故歷官幾三十載無殊
擢然循謹號稱職爲政務持大體慎刑罰勤撫字時語人曰慮囚
但久跪索供感寒溼病足或抑發他疾皆足以取死豈獨三木能
死人也嘗一過成安時去爲令者已十年矣父老猶識公爭拜馬

首邀公飲村廟入廟見設位書公諱字問之則邑士民所建以祈
朔望者公亟命撤之烏虜繇公之見思則公之施於人者可知也
公諱恩紱字隆輔先世四川巴縣人自曾祖國佐始家廣西之永
康州國佐某科舉人祖一元州學生父廣遠雍正乙卯副榜以公
貴州學君以下皆 贈如公官妣皆 贈恭人公以乾隆壬申舉
於鄉是歲成進士入詞館甲戌散館適贈公屬疾公雅不欲試不
獲已於父命及試以父疾憂甚意不在試遂以譌脫列三等其仍
歸進士班以此生乾隆元年某月日春秋五十有一配繆氏 封
恭人子三方受方懷方訓方懷早卒方受庶吉士協充 國史館
纂修方訓蔭生候選縣丞銘曰

清膺天命統育萬方嘘之拂之薰其善良蠶茲逆匪敢萌不軌公
 曰翦之乃復千紀載厲其醜載淬其鋒狻猊狃狃橫罹厥凶雖凶
 於身於國無咎上奠下安惟我則有守職捐軀上軫我皇匪
 也有辭厥德懋彰迺崇其階迺爵其子惟國有臣用光青史猗
 嗟熊公伊古循吏慈惠之師拊循直寄最其顛末列之幽墟子孫
 萬年勿泐勿渝

右墓誌銘毛燧傳撰

赫生額 長庚等

赫生額滿洲鑲白旗人姓和爾以高祖董阿賴世襲二等輕車都尉乾隆三十四年授護軍參領三十六年補福建福甯鎮中營遊擊四十三年升泉州營參將四十九年升北路協副將五十一年十一月臺匪林爽文滋事隨臺灣總兵柴大紀禦勦至大墩賊勢遽擁赫生額不屈遇害北路理番同知長庚與其次子嵩喬同殉彰化鳳山俱陷時福甯鎮標右營遊擊延山隨征鳳山至五十二年三月賊復攻鳳山延山陣亡九月賊攻鹽水港三等待衛巴圖魯福克精額奮勇堵禦中礮卒事平 恩廕赫生額加一雲騎尉子常春授一等輕車都尉世職長庚廕雲騎尉子音登額襲延山

廕雲騎尉子六十三襲福克精額廕雲騎尉子富安襲長庚鑲藍旗滿洲姓伊拉里乾隆四十三年由內閣中書揀放福建漳州府通判四十九年升本職延山正黃旗蒙古姓額哲特由馬甲補副烏槍護軍參領隨征金川屢有功得超等功牌三十七 恩入郊勞宴乾隆四十八年發往福建以遊擊用五十年補本職福克精額鑲黃旗滿洲姓額諾乾隆三十七年由黑龍江打牲人補護軍駐京四十三年升藍翎侍衛四十四年升三等侍衛四十九年隨大兵至甘肅剿滅小山逆回得頭等功牌一三等功牌一 賞奇誠額巴圖魯名號

右 國史館本傳

耿世文 王宗武等

耿世文貴州普定人父玉以本省提標左營千總於雍正十三年隨勦古州逆苗陣亡附曾唯傳世文由提標馬兵廕把總乾隆十九年七月拔定廣協把總二十三年十一月拔本協右營千總二十九年俸滿引 見奉 旨以守備題補三十年二月委署貴陽營守備三十二年六月隨征緬甸連破賊柵擢台拱營守備蠻結老官屯諸戰俱功列頭等升清江協左營都司旋署朗洞營參將四十七年九月升福建福甯鎮左營遊擊五十一年七月捕獲諸羅劫囚匪徒楊光勳等奉 旨議敘十一月臺匪林爽文滋事世文率本標三營弁兵赴彰化協同副將赫生額搜捕駐大墩賊夜

攻世文竭方堵禦陣亡同亡者臺灣北路都司王宗武臺灣鎮左
營千總陳世傑右營外委方日高左營額外外委吳國寶中營額
外外委毛進豐臺灣北路協中營把總陳國印外委王光明福甯
鎮標右營額外外委陳清彰化城陷彰化知縣俞峻鹿仔港巡檢
署彰化典史馮啟宗十二月賊攻諸羅臺灣鎮右營遊擊李忠揚
中營千總蘇明耀左營千總魏大鵬臺灣北路協左營守備郝輝
龍把總楊連彪中營外委李國安諸羅典史鍾燕超俱被害賊復
攻鳳山臺灣南路營千總丁得秋外委康宗保王朝桂許連升陣
亡鳳山知縣湯大奎聞警自刎子荀業亦被賊戕典史史謙遇害
賊連犯中港竹塹篷山大穆降諸處臺灣北路協右營把總高茂

尹貴臺灣城守營把總吳洪參革千總沈端各戰死事 聞議卹
奉 旨世文廕雲騎尉子德明襲宗武等俱廕雲騎尉端廕恩騎
尉餘卹如例宗武子凱襲世傑子飛鳳襲國印子勝襲光明弟三
元襲忠揚子景雲襲大鵬子廷桂襲輝龍子大壽襲連彪繼子登
魁襲國安子欽襲得秋子壽祿襲朝桂子登成襲大奎孫貽汾襲
茂子恩顯襲洪子鵬高襲餘襲無考宗武直隸遵化州人世傑福
建龍溪人日高福建莆田人國寶福建南平人進豐福建福鼎人
光明福建龍溪人清福建閩縣人峻浙江臨安人乾隆三十五年
舉人啟宗浙江山陰人忠揚陝西大荔人乾隆三十一年武進士
明耀福建晉江人大鵬福建連江人輝龍福建邵武人連彪福建

長汀人國安福建侯官人燕超廣東長樂人得秋福建閩縣人宗保福建晉江人朝桂福建連江人連升福建晉江人大奎江蘇武進人乾隆二十八年進士謙順天宛平人茂福建龍溪人洪福建南平人貴福建漳平人端福建詔安人

右 國史館本傳

湯大奎

子荷業
史謙等

乾隆五十一年冬臺灣賊民林爽文起彰化躡諸羅莊大田據瑯璣犄角以應其黨曾伯達等南陷鳳山鳳山知縣湯君死之越三年己酉正月始克歸葬於武進龍虎塘之原孤范業偕君壻莊宇遠來請表其恂懷玉諾之以病未果日月逾邁墓有宿草故人大

節耿於心目其敢以不文辭君之在鳳山也秩滿候代屬賊勢蔓
延縣故無城僅土垣三尺許君率僚佐募鄉勇日夜爲守禦計一
夕酌酒勞客君舉雅俗語爲儷句口占曰今日不知明日事他生
未卜此生休典史史謙訝其語不祥君曰人孰無死身旣許國
成敗聽之願諸君其相勉爾神色忼壯座客爲之罷酒平明賊果
來攻與參將瑚圖里禦之賊稍卻參將馳馬逐賊去君聞城北有
警急馳歸得內應四人斬以徇方獎厲兵役煮鬻糜餉眾賊已突
進北門入縣治典史守獄死閩人王明素負膂力力屈亦死僕林
坤手格之斷四指身斫數創暈絕仆地君則朝服坐聽事手劍擊
賊賊刃交下猶瞑目詈不止時惟長子苟業從之官先以君詩文

國朝通志卷之三十三
昇舅弟王崧令遠辟身蔽翼其父不去遂同遇害時十二月十三日也君死賊旋散去故吏某等斂之置柩堂皇君居中典史左荀業右縣民吳世芳訪其元別葬龜山之麓官兵初復鳳山崧與世芳至葬處蹤跡僕有洪賜者識君繫髮綫形容亦約略可辨因併入棺明年三月鳳山再失縣治焚燬殆盡事平譌傳柩爲良民私葬巡撫懸賞購之不得五十三年春值清明日崧與林坤酌酒舊所翻視瓦礫復得君父子骸骨於餘燼中更斂如制當是時臺灣南北守令丞倅相繼被戕至有爲賊踣頓困辱而後死死而功罪或不足以相揜者君歿之明年閩中大吏以縣有應解未解之帑檄封里中舊產旋奉 特旨給還又明年督撫上其居官死事狀

賜製雲騎尉世職 予祭葬此固 聖天子綜覈名實獎勸忠義
亦君廉惠素著獲上有道故能純終領聞視矯強倉卒傲倖於不
朽之託者蓋未可竝日語矣初君移殯臺灣郡城之南壇見夢林
坤曰滯此何爲曷不速返坤瞿然覺乃謀歸故事沒於官者旣抵
里棺例入城君棺本輕過其家忽重執紼者喘汗悚惕久而後行
同里許承志君莫逆交也客臨清夢與君讌飲酒半君忽高歌多
軍中曲詞甚激楚許聞欲泣君笑曰丈夫亦效兒女子態耶其靈
爽不泯如此君諱大奎字曾輅一字穉堂中乾隆壬午舉人癸未
進士卒年五十九配王氏子二荀業國子監生范業孫二貽汾貽
浚女二嫁莊宇達汪世穎皆生員生平攻詩文晚著彙研瑣譚十

國朝三才集卷之三十三
卷補遺一卷沒於賊懷王掇拾奇零釐爲三卷刻而行之其世系
歷官與他行事之可紀詳管侍郎幹珍所爲傳茲特書其大節及
得自崧述與向之傳聞有異者

右墓表趙懷玉撰

故事臺缺三年卽更番還內地候選丙午緯堂秩滿代者未至是
冬賊鋒熾命其子西渡曰城亡與亡令職也汝未仕可歸奉母其
子不忍去遂糾鄉勇爲守禦計十二月壬子賊至君與參將瑚圖
里禦之手刃賊四人賊稍退參將馳逐賊南去君回署集鄉勇民
壯且賚且諭將激以擊賊而賊復集邑故無城遂突入縣署左右
皆潰走縣尉史君謙欲自刎君挽其手曰死誠善何不殺賊死耶

遂挺劍手擊數賊賊刃交下斷指三君瞑目罵不已中賊槍而殞
子荀業亦持刀格賊力竭與史尉同日被害

右傳略管幹珍撰

湯荀業

湯荀業字楚儒一字與竹緯堂公長子也隨父之官林逆作亂將
及鳳山緯堂公見賊勢倡謂公子曰汝無官守可以去對曰事母
有弟在父以死守城兒以死從父忍臨難苟免耶聞者壯其言越
日賊至公朝服仗劍坐堂上公子佩刀侍賊上階公殺賊數人公
子亦拔刀格殺以身翼蔽其父賊蜂擁兵刃交下父子皆遇害

張維屏曰於戲臣死忠子死孝忠臣孝子萃於一門此邦家之光

國朝詩林卷之三十一
名教之效也吾友湯雨生騎尉爲忠臣之孫孝子之子蒙 恩世襲雲騎尉遂以文人而爲儒將與余訂交垂二十年昨自浙郵書屬爲尊甫與竹先生墓表因未見詩是編無從采入爰撮舉其大節附識於緯堂公事之後

右聽松廬文鈔張維屏撰

周大綸

公諱大綸字理夫其先居山東平度州五世祖始遷爲直隸天津縣人乾隆二十年由貢生捐州同職改捐鹽課大使分發福建丁母憂去官服除復職調莆田縣平海縣丞公以微職遊歷海疆垂二十年廉慎儉貧逾賤民所衣官服破敝塵垢十月猶衣紗葛上官以爲迂周之弗受以貧遺妻子歸子然一官特立不倚最後調臺灣府彰化縣丞數年知民頑憂慮見於色公狀長八尺餘豐準口橫闊面赤色虬髯志形於口坦直無顧忌任滿例引見辭於縣縣以衣惡出所服贈之公以手揮曰蓄此所以飽賊也謁於道道詢問民俗好尚公曰民將不孫殆欲畔也道曰吾將往察曰不

可驛馬船具足以擾民吏役假官勢科於縣縣假官至之費科於民是促之畔矣道怒斥不信假公事滯公於諸羅未幾賊匪林爽文果倡眾犯城遞至諸羅公憤曰吾亦朝廷官何坐視城陷乃擢鬚奮入縣署縣令適與老幕客對飲酒公至斥曰此何時尙飲酒耶縣令曰我文官無力遏賊勢死也死也公張目髯倒起睨縣令曰賊烏合眾諸羅民素尙義城雖孤以死力守之未必陷也國家建官命能守不命能死坐致民逆死以塞責小丈夫也終弗聽恨恨出趨居民葉友伯家謀所以禦賊計是夜賊已入城據縣署有見公者曰爹也縛去敬公賢不忍殺而勸受其偽官公且罵且諭副賊以掌摑公頰公撫頰大哭曰此顛乃爲賊汙以首觸柱

額裂血淋漓賊猶欲其從也囚之數日始遇害

右傳焦循撰

按周公國史
附見杭富傳

四庫全書

卷

李喬基

李喬基名安善以字行嘉應州人善搏擊盡得少林法客臺灣見
土豪嘯聚白晝相讎殺歎曰變將作矣乃簡北莊數百人團練之

廣東嘉應平遠鎮平僑寓者
謂之客人南北路各百餘莊

其法先鍊氣次筋骨又次搏擊久之

膚堅如鐵則大喜曰真健兒乾隆五十一年十一月丁酉林爽文
反北路旬日間彰化淡水諸羅俱陷郡城大震喬基召諸健兒曰
賊眾十餘萬負山據險一鬪而出遂破三城所不即取郡者懼吾
粵人躡其後耳吾出兵以牽制之賊至則守去則擊相持久則援
師且至而賊不足平矣皆曰善乃合北莊得萬餘人以諸健兒領
之莊爲柵里爲臺計畝以爲糧臺者擊柵者守一莊有賊諸臺應

之賊數至皆敗走十二月辛亥喬基率三千人從前令張貞生復彰化擒僞官楊振國高文麟等既而食盡士卒多散去城復陷明年正月壬辰從總兵柴大紀復諸羅獲僞軍師侯元喬基自起義兵與賊二十餘戰皆帕首著短後衣持長桿陷陳衝堅無不一以當百前後斬馘以萬計賊銜之以萬金購喬基首二月喬基與從子舉柏率健兒數十人赴鹿港請火藥爲賊所偵庚戌還至青埔伏發眾禦之殺賊數百人賊大至矢石交下突圍而出失舉柏喬基三入賊中傷左股遂被獲諸健兒皆戰死喬基罵賊賊誘之罵益厲賊怒斷其舌縛而射之猶不屈乃磔焉喬基輕財任俠與眾同肝膽至是白衣冠而哭者萬餘人皆曰誓不與爽賊俱生也是

年十月癸亥嘉勇侯福康安渡海義兵從之盡復北路明年正月
丁卯獲林爽文又一月復南路臺灣平是役也死事之烈以喬基
爲最事 聞卹贈知縣銜子端柏後六月戰死次子枝三廕授浦
城縣丞世襲雲騎尉先是康熙六十年朱一貴反臺灣其族兄紀
率義民從軍以功授都司尋改侍衛出爲常州參將雍正十年從
兄瑞先以征土番功授千總至八 南北莊稱忠毅者必曰李氏云

右傳吳蘭修撰

按李公又見次卷壽同
右傳後張士元書事

四庫全書

三

鄭嵩 徐慶等

鄭嵩福建晉江人由武舉發本省以千總用乾隆三十九年補福建海壇鎮右營千總四十四年升左營守備四十七年升右營遊擊四十九年調臺灣水師協右營遊擊五十一年十一月逆匪林爽文滋事陷彰化勢甚猖獗總督常青飭嵩等移駐彈壓時有逃營把總高大捷卽獲正法奉 旨交部議敘五十二年二月賊踞鳳山總兵郝壯猷率師攻鳳山北嵩率師由海道攻鳳山南前後會剿賊由北道遁復鳳山並隨剿下淡水臺灣水師協左營把總徐慶右營外委陳必高陣亡三月參將瑚圖里白山豬毛爲賊阻嵩援之至硫磺溪賊圍合官兵失利福甯鎮標中營千總邱安國

左營千總王奕魁右營外委陳烈福建水師提標左營把總甘瑞
龍右營外委黃振元桐山營把總鄭日新外委湯貴臺灣南路營
外委許鵬飛陣亡賊勢益熾擁復陷鳳山嵩奮勇抵禦被槍卒金
門鎮標右營把總江順寶臺灣鎮標中營外委陸銓戰死北路理
番同知王雋解餉至鳳山石佛頭罵賊遇害事平奉 旨嵩廕雲
騎尉世職子良弼襲慶必高安國奕魁烈瑞龍振元日新貴鵬飛
順寶銓雋俱廕雲騎尉慶福建南靖人必高福建同安人安國福
建霞浦人奕魁福建福鼎人烈福建霞浦人瑞龍福建同安人振
元福建平和人日新福建霞浦人貴福建福安人鵬飛福建靖江
人順寶福建詔安人銓福建臺灣人雋浙江仁和人乾隆二十一

年舉人三十一年大挑一等分發福建以知縣用三十九年題補
長樂縣知縣四十二年調晉江縣知縣四十七年升本職

右 國史館本傳

四庫全書

卷一百一十四

楊彪 黃殿臣等

楊彪山西平定人由武舉授江南江淮衛領運千總乾隆四十六年七月升福建汀州鎮標右營守備四十七年九月調臺灣鎮標右營守備五十一年十一月逆匪林爽文滋事彪隨臺灣總兵柴大紀勦捕五十二年三月賊數萬窺嘉義時遊擊林光玉守東門遊擊李隆守南門彪與守備陳明德等營北門外復遣把總蔡開祥等赴城西要截礮發賊逸彪乘勢追殺有功五月奉 上諭楊彪等著交總督常青查明具奏候朕降旨議敘獎擢以示鼓勵六月賊分踞嘉義彪率兵抵大崙莊竭力堵殺賊始退時有浙江溫州鎮標中營千總黃殿臣調赴攻勦先禦賊於沙岡鯽魚潭擒獲

有功至是陣亡同亡者臺灣鎮標右營把總郭得勝浙江温州鎮
標左營把總陳世棟陳彪廣東提標海門營把總麥逢春臺灣北
路協中營把總武成烈劉連陞福建銅山營外委陳威福建陸路
提標中營把總徐德陞前營把總黃拱辰臺灣南路淡水營把總
蕭世結臺灣水師協中營把總陳元生右營把總任贊元廣東南
澳鎮標左營把總李松金門鎮標右營外委蕭富臺灣水師協左
營外委汪瑞麟中營外委洪大猷福建水師提標左營外委彭大
猷龍巖州城守營右軍外委許國忠左軍外委藍志純臺灣鎮標
左營外委沈賢福建陸路提標左營外委柯連陞後營外委蘇安
武閩浙督標右營外委孫進廣東南澳鎮標左營外委許飛鳳臺

灣鎮標水師左營額外外委包定邦廣東南澳鎮標左營額外外
委廖廷高閩浙督標左營額外外委黃一登周正春右營額外外
委沈登俊臺灣鎮標右營額外外委段昭明福州城守左營額外
外委楊永貴右營額外外委陳國棟八月賊圍嘉義益急彪勦賊
西門外戰死事平奉 旨贈楊彪都司銜廕雲騎尉子名揚襲殿
臣得勝世棟彪逢春成烈聯陞德陞拱長世結元生贊元松富瑞
麟洪大猷彭大猷國忠志純賢連陞安武進飛鳳俱廕雲騎尉威
廕恩騎尉餘卹如例殿臣浙江秀水人得勝福建靖江人世棟彪
俱浙江永嘉人逢春廣東澄海人成烈福建閩縣人聯陞福建長
汀人威廣東饒平人德陞福建南靖人拱長世結俱福建晉江人

元生福建同安人贊元福建閩縣人松福建福清人富福建同安
人瑞麟福建福清人洪大猷福建南安人彭大猷福建同安人國
忠福建閩縣人志純福建長汀人賢福建詔安人連陞福建靖江
人安武福建靖江人進福建閩縣人飛鳳廣東南澳人定邦福建
永定人廷高廣東南澳人一登正春登俊俱福建閩縣人昭明福
建長汀人永貴國棟俱福建侯官人

右 國史館本傳

貴林

貴林滿洲鑲藍旗人姓章佳由護軍補烏槍藍翎長乾隆三十四年隨征緬甸十月至新街進克老官屯敘功頭等三十五年補護軍校三十七年委署護軍參領三十八年補副參領三十九年補山西河堡營參將四十六年授廣東羅定協副將五十二年三月臺灣林爽文滋事貴林帶粵兵赴臺灣隨將軍常青守禦府城八月賊圍諸羅縣城常青令副將魏大斌往援失利復遣貴林與總兵蔡攀龍等同往官兵入城及半賊突出遮殺貴林等後至不得入轉戰至正音莊與遊擊楊起麟都司杭富皆歿於陣時督臣李侍堯據知府楊廷理誤報貴林勦賊有功奏入得旨貴林賞戴

花翎復 諭曰副將貴林等協力攻勦奮勇可嘉應加升擢所有
浙江溫處鎮總兵著貴林補授旋以貴林陣亡據實覆奏 諭曰
據李侍堯奏九月初一日柴大紀有信至府城稱蔡攀龍孫全謀
帶兵七八百名及運送糧餉之義民三千到諸羅其貴林楊起麟
杭富俱在正音莊陣亡等語貴林等前經常青派赴諸羅援應奮
勇打仗甚爲出力是以降旨將貴林補授總兵楊起麟補授參將
俱賞戴花翎今貴林楊起麟同都司杭富因勦捕賊匪臨陣捐軀
殊屬可憫貴林著照總兵例議卹十一月 上因句到朝審官犯
黃仕簡任承恩均以福建提督征勦臺灣逆匪退縮獲罪 上量
予免句復 諭曰貴林楊起麟諸人皆因奮勇勦賊臨陣捐軀卽

敕部從優議卹一律得給世襲以示軫恤設郝壯猷當賊擾鳳山時能奮不顧身投命疆場亦可與貴林同邀卹典是與其死於國法曷若歿於戎陣刑賞昭然惟人自取如能共矢蓋忱著有勞績必躬膺茂賞承受渥恩若畏怯倖生必致自蹈重愆身罹憲典庶幾人知敵愾士皆用命毋負朕整飭戎行諄諄告戒之至意尋命入祀昭忠祠襲騎都尉仍 賞卹如例長子丹巴多爾濟五十二年襲族歿次子尙安襲

右 國史館本傳

Table with 10 columns and 1 row. The table is mostly empty, with some faint markings in the rightmost column.

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

174-526

楊起麟 比能成等

楊起麟福建閩縣人乾隆二十四年武舉揀選營千總隨本省撫標效力期滿三十八年補福建銅山營千總三十九年投福建水師提標中營守備五十年投廣東南澳鎮左營遊擊五十一年閏七月調臺灣安平協中營遊擊十一月逆匪林爽文滋事起麟隨臺灣總兵柴大紀率師勦捕五十二年正月與遊擊邱能成督師至荊仔尾賊突至福建陸路提標左營千總葉榮前營千總吳聯貴臺灣水師協左營把總郭拔萃臺灣北路中營外委陳鳳臺灣鎮標中營額外外委蘇國珍陣亡能成等奮力追殺復嘉義上諭邱能成奮勇當先攻開嘉義城門並將城內餘匪殲盡甚屬可

嘉著該督撫於事竣後送部引見旋奉 旨補授臺灣鎮標左營
遊擊二月賊三千掠嘉義城北之大坪頂起麟與能成等以兵八
百破之賊復約南路逆黨夾攻嘉義起麟等前後抵禦賊退時海
壇鎮總兵郝壯猷督師至大湖連破賊壘復鳳山烽火門守備陳
昌登中礮卒三月賊聚牛稠山北勢莊起麟能成等直前邀殺擒
獲多名賊復窺嘉義遊擊林光玉守東門李隆守南門起麟能成
等守北門別遣把總蔡開祥赴城西要截礮發賊逸起麟等乘勢
追殺駐師火燒莊四月賊將犯郡城擁眾數萬分擾各門營盤並
連掠柴頭港草店尾桶盤棧諸處福建水師提標右營遊擊邱維
揚澎湖水師協左營把總余壽右營把總王澤高福甯鎮標左營

外委鄭朝鳳先後陣亡起麟等勦殺有功五月奉 上諭遊擊楊起麟邱能成等著交常青查明具奏候 朕降旨議敘獎擢以示鼓勵賊擾麻豆莊閩浙督標中營參革千總盧思聰羅源營參革外委姚登陣亡起麟等馳赴應援駐師鹽水港賊復糾大武隴逆匪攻南潭署南澳鎮標右營遊擊林世春千總謝元碣石鎮標右營外委劉茂貴盧鳳陣亡賊進擾田中央建甯鎮標中營守備署遊擊唐昌宗黃巖鎮標左營千總署守備魏際隆中營把總羅洪燦建甯鎮標左營外委潘健衢州鎮標左營外委吉兆陣亡六月大紀以嘉義四面賊踞惟鹽水港爲郡城要道委起麟守之賊攻鹿仔草先是正月竹塹巡檢張芝馨被害至是賊益肆鴟張福州城

守營把總張射斗桐山營把總涂國章延平城守左營外委李大
魁陣亡賊復擁眾至大崙莊官兵鏖戰半日損失過多適能成巡
哨至礮轟其後賊始退能成守鹿仔草 上諭邱能成楊起麟等
著交福康安查明如遇有參將缺出卽奏明升補以示鼓勵賊圍
嘉義福建水師提標後營千總潘金標臺灣南路淡水千總蔡連
陞福州城守左營千總謝際雲邵武城守左營千總陳忠耀右營
外委王恩榮汀州鎮標右營千總鍾川賜延平城守右營千總黃
國恩候補千總陳桓璧陣亡時嘉義幾絕餉道起麟雇番民暗運
接濟得 旨嘉獎八月起麟能成與副將貴林爲頭隊援嘉義入
城方半被賊截轉戰至正音莊起麟與貴林陣亡廣東增城營守

備馬大雄臺灣水師協中營千總陳邦材臺灣鎮標左營額外外
委陳洪猷遇害能成得出尋以西門番仔溝禦賊受傷身故緣督
臣李侍堯奏未晰 上諭廣東大鵬營參將員缺卽著楊起麟補
授其遊擊邱能成著交福康安遇有參將缺卽奏請升補起麟能
成俱著賞戴花翎用示鼓勵後事 聞奉 旨加贈起麟副將銜
廕雲騎尉子清茂襲能成加參將銜廕雲騎尉子金襲維揚加參
將銜子炎襲榮聯貴陳鳳昌登壽澤高朝鳳思聰世春元茂貴
盧鳳昌宗際隆洪燦健兆射斗國章金標連陞際榮忠耀川陽國
恩桓璧大雄邦材俱廕雲騎尉登大魁廕恩騎尉餘卹如例能成
福建侯官人榮福建福清人聯貴拔萃俱福建晉江人陳鳳福建

閩縣人國珍福建龍溪人昌登福建閩縣人維揚廣東連平州武
舉壽福建同安人澤高廣東南澳人朝鳳福建羅源人思聰福建
閩縣人登福建連江人世春廣東陸豐人元廣東南澳人茂貴盧
鳳俱廣東陸豐人昌宗湖南邵陽人際隆浙江永嘉人洪燦浙江
黃巖人健福建建安人兆浙江西安人芝馨直隸南皮人射斗福
建侯官人國章福建詔安人大魁福建建陽人金標福建閩縣武
舉連陞福建長汀人際榮江西宜春武舉忠耀福建霞浦人恩榮
福建邵武人川暘福建長汀人國恩福建龍溪人桓璧福建南平
武舉大雄陝西咸甯武進士邦材福建同安人洪猷福建閩縣人

右 國史館本傳

杭富 林王得等

杭富湖南乾州人乾隆三十七年以馬兵隨征金川三十九年六月攻克喇穆山梁及日則了日功列超等拔補外委十月克邁過爾山梁受石傷拔補把總十一月破格魯古賊碉受槍傷擢千總四十年二月攻遜克爾宗槍傷左手十一月兵部補敘該布達什諾超等功及噶爾丹寺頭等功前後共功加三十等紀錄二十一次將軍阿桂奏富經九十餘戰得槍石傷三次攻勒烏圍時下水拽橋有功得 旨賞戴藍翎擢廣東撫標中軍守備四十一年凱旋與宴紫光閣五月丁母憂告假歸九月赴任四十七年保舉送部引 見准註冊四十九年投督標中營都司五十一年二月署

新會營參將五十二年四月赴剿臺匪林爽文六月以兵五百至
二層瀘山接應賊退七月復破賊南潭有功督臣常青奏請 賞
戴花翎八月賊圍嘉義奮勇往攻入城方半被賊截轉戰至正音
莊陣亡同亡者廣東撫標前營千總林玉得中營把總楊振鳳李
振明左營把總苗承霖前營把總姚夢麟劉斌全中營外委劉鳳
騰後營外委劉文全羅定協右營外委吳紹介福建建甯鎮標中
營把總鄭飛鵬右營把總官廷梅汀州鎮標左營外委熊發得水
師撫標後營額外外委余騰飛邵武城守右營額外外委王恩榮
防賊連擾老店及蔦松廣東右營把總徐得升福建水師撫標中
營把總蔡江臺灣北路中營額外外委高文得陣亡賊復擾半天

曆福建水師提標後營千總署澎湖協右營守備胥獻珪澎湖協
右營千總陳淮左營外委葉文郁孫文元右營額外外委余應彪
陣亡九月賊擾大城厝詔安營千總湯國寶同安營把總曾超羣
雲霄營外委沈揚芳陣亡十月賊擾三十張犁閩浙督標水師營
把總林肇升臺灣鎮標左營額外外委林彪陣亡十二月賊擾內
山千總阿吉陣亡五十三年正月賊擾水底蔡守備職銜鄭其仁
福建撫標右營把總嚴廷選陣亡其文職先後殉難者彰化縣丞
周大綸署斗六門巡檢羅漢門縣丞陳聖傳署鳳山縣教諭葉夢
苓訓導陳龍池署猫霧揀巡檢渠永湜事平 諭廕富雲騎尉世
職子榕保襲玉得振鳳振明承霖夢麟斌全鳳騰文全紹介飛鵬

廷梅發得得升江獻珪淮文郁國寶超羣揚芳肇升其仁廷選俱
騰雲騎尉餘卹如例玉得振鳳振明承霖夢麟鳳騰文全俱廣東
歸善人斌全廣東花縣人紹介廣東羅定人飛鵬江西臨川人乾
隆三十年武舉廷梅福建南平人發得福建長汀人騰飛福建同
安人恩榮福建邵武人得升廣東曲江人江福建晉江人文得獻
珪俱福建同安人淮浙江平湖武舉文郁文元俱福建同安人應
彪廣東南澳人國寶福建閩縣人超羣福建平和人揚芳福建詔
安人肇升福建古田人彪福建侯官人阿吉四川雜谷腦人其仁
福建臺灣武生廷選福建閩縣人大綸直隸天津人聖傳廣西平
樂人乾隆十五年舉人夢苓福建閩縣舉人龍池福建侯官人永

澧湖南祁陽人

右 國史館本傳

國朝人物列傳卷之五十五

五十五

| | | | | | | | | |
|--|--|--|--|--|--|--|--|--|
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |
| | | | | | | | | |

THE UNIVERSITY OF CHICAGO LIBRARY

1111

174-538

國朝耆獻類徵初編卷三百五十六目錄

忠義二十六

壽同春

邢敦行

高黑子等

鄧永亮

盧文魁等

許世亨

尚維昇

張朝龍

李化龍

王宣

楊興龍等

英林

明柱等

張純

李世俊等

劉越

蕭德等

王檀

劉光國等

朱國瑞

黃達魁等

岑宜棟

黎致明等

長春

多爾濟等

台斐英阿

哲森保

阿滿泰

國朝詩林卷之三十一

| | | | | | | | | | | | | | | | | | | | |
|--|--|--|--|--|--|--|--|--|--|--|--|--|--|--|--|--|--|--|--|
| | | | | | | | | | | | | | | | | | | | |
|--|--|--|--|--|--|--|--|--|--|--|--|--|--|--|--|--|--|--|--|

國朝耆獻類徵初編卷三百五十六

通奉大夫前署江西巡撫江西布政使司布政使湘陰李桓輯

忠義二十六

壽同春

乾隆五十一年林爽文反臺灣不旬日有眾數萬於是隳彰化陷鳳山所嚮如破竹獨淡水城不下淡水圍竹木爲城無土石自其年十二月至明年五月攻最久而城獨完民不爲賊文武官莫在惟諸暨人壽先生爲之守先生姓壽名星字同春以字行而壽先生之稱爲著以習文法佐人治吏事至臺灣當是時淡水同知潘凱前沒於生番代者程俊方按捕大甲城中空無人爽文以其眾

入程俊子倉卒攜印走而俊亦別戰死先生與其輩數十人俱縛坐堂皇下賊故聞壽先生能識官事顧不知孰爲先生姑一一誰何之已乃從先生求計畫先生曰而屬以烏合之眾頓兵荒城中何以食官軍至聚而殲旃靡及矣凡兵分則見強合則示弱而奚若賊故搜城中無積儲則皆曰然因脫先生械畱其黨守城而自出四掠於是壽先生客淡水久其胥徒皆故熟習其士民皆故信服頤指目語精神響答潛糾義兵風雨儵合出不意就同知聽事駢斬畱守賊三十六人卽日閉城門爲朝廷守賊聞大駭悉眾返攻先生部勒其民日夜登陴樵蘇旣斷發屋掘鼠得閒輒出選鋒擊賊有死者明年五月賊稍稍引卻道路通署同知徐夢麟始

以印至次第招安白石湖剏洗金貂尾寨擒叛官彭喜夢麟諸所
施爲一切倚先生爲辦是時爽文負嶠據大里杙自固我兵環營
其外疑莫敢入先生不勝忿謂夢麟曰賊介恃其眾今日戰明日
戰可勝殺乎不如入也速入取其首餘將瓦解夢麟以其言上書
軍門不報三請然後得指麾由大甲分六路進攻先生別以若干
人由西路入而鹿港之兵遷延失期會旣入無援馬蹶被獲賊恨
先生久至是大喜相與攢刃支解之時先生年七十有一矣又明
年嘉勇郡王渡海檻爽文斬京師臺灣平有旨贈先生知縣蔭
其子聰一官聰今知江蘇之鹽城縣

王芑孫曰壽先生死十年知婁縣張君昌運示余金匱楊摺所爲

壽先生誅摺有筆其敘先生死事頗詳覈其文作於壽先生未被恩詔時憤當時所以議先生者太過然先生所樹立皦然如是矣彼議者何人哉其是非要勿足論也於著令先生當附傳 國史顧史臣載筆藏在祕館世或不具見余故因張君之請別爲私傳俾聰副諸其家他日讀摺文者庶幾於余言徵信焉

右傳王芑孫撰

太學生壽同春浙江諸暨人客於臺灣當林賊起時同春在淡水廳同知程俊署中年已七十餘矣竹塹城旣陷俊先被害同春親至各村莊召募鄉民同官兵擊賊復塹城擒賊王作等四名乾隆五十一年十二月也明年十二月同春率鄉民駐烏牛關進偪三

十張犁地賊伏發鄉民潰同春馬蹟被執賊牽至大里杙以刃脅降不動復勸誘之同春大罵賊乃支解之時又有李喬基者廣東嘉應州人也在彰化倡義出家財募兵協守鹿仔港與賊戰數十台進攻大里杙又戰牛馬莊陷於賊迫降不屈賊膊之主帥以其事聞於 朝壽同春李喬基皆 贈知縣廕一子以知縣用 國家之卹死事者誠優矣同春族父達一與余通好示余以二人事狀如此并及劉滿姑滿姑別紀

右書事張士元撰

邢敦行 高黑子等

邢敦行直隸定州人乾隆四十三年一甲一名武進士授頭等侍衛四十七年授兩廣督標後營參將五十二年擢三江口協副將五十三年十月出征安南於黎城擊賊陣亡同時遇害者廣西左江鎮標都司高黑子梧州協右營守備劉永泰廣東增城營右營守備馮天璵右翼鎮標右營右哨外委千總劉振宗左營左哨外委千總蔡耀魁廣西撫標左營右哨頭司外委把總凌光裕左江鎮標左營右哨外委千總黃起忠中營左哨外委千總張坤中營右哨額外外委黃起智中營右哨額外外委盧崇耀右營左哨額外外委楊輔恆右營右哨額外外委楊振德南甯城守營右哨二

司外委把總賴起勝左哨頭司外委把總李如棟右江鎮標中營
左哨外委千總周宗斌慶遠協左營外委千總闕如成右營外委
千總邵永亮右營二司外委把總李傑三司外委把總黃飛驢賓
州營左哨頭司外委把總會楊麥嶺營右哨二司把總蘇德侯事
聞議卹奉 旨敦行廕騎都尉世職子承誥襲餘俱廕恩騎尉世
職永泰子文鳳襲天璵子朝高襲振宗子裕祖襲耀魁弟耀清襲
光裕子燦芝襲起忠繼子承基襲如棟子紅襲傑子世芳襲飛驢
子建猷襲餘襲無考黑子順天大興人乾隆三十七年由行伍隨
征金川以功拔補外委擢千總四十一年以京城巡捕營千總用
四十二年補圓明園千總四十七年擢南營守備五十二年擢本

職隨征安南 賞戴花翎永泰山東臨邑人乾隆四十五年武進
士授藍翎侍衛五十年補本職天璵廣東茂名人由行伍拔補把
總升千總乾隆五十二年正月隨勦臺灣功列一等五十三年四
月升本職振宗廣東清遠人耀魁廣東曲江人光裕廣西臨桂人
起忠廣西宣化人坤廣西宜山人起智廣西宣化人崇耀廣西西
林人輔恆廣西平樂人振德廣西河池人起勝廣西新安人如棟
廣西馬平人宗斌廣西上林人如成廣西臨桂人永亮廣西宜山
人傑廣西平樂人飛驒廣西梧州人楊廣西河池人德侯廣西臨
桂人

右 國史館本傳

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

鄧永亮 盧文魁等

鄧永亮湖南長沙人由行伍於乾隆二十七年補湖南長沙協額
外外委三十年七月拔外委把總三十五年補把總三十七年授
本協右營千總尋調撫標右營千總三十八年七月征金川十月
隨攻阿喀木雅美美卡鄂克什美諾等處賊寨功列超等十一月
捕賊乾海子獲賊寨數十三十九年攻克喇穆喇山及日則了
口賊礮三十餘七月攻克該布達什據其木城礮卡八月克邁過
爾山梁皆功列頭等四十三年擢江南徽州營守備五十年擢廣
東南雄協都司五十二年五月署增城營參將五十三年隨征安
南與廣西麥嶺營都司盧文魁奮勇擊賊同歿於陣五十四年正

月師次富良江廣東左翼鎮標中營守備俞振耀中營右哨千總
曾鳳高左營左哨外委千總林顯貴中營右哨二司外委把總姚
剛右營右哨二司外委把總趙大光左營右哨頭司外委把總黃
揚大鵬營左哨千總鄭文光右哨二司外委把總黃成璉廣西鬱
林營千總會浦同時俱力戰陣亡事 聞議卹奉 旨永亮廕雲
騎尉子興相襲文魁廕雲騎尉子延齡襲餘俱廕恩騎尉振耀子
維宗襲文光子鴻襲鳳高子陳生襲剛子良福襲大光繼子遇春
襲揚兄信襲成璉弟成鳳襲浦子勝邦襲顯貴子襲無考文光江
西豐城籍湖南永順人乾隆三十七年由行伍隨征金川三十九
年補湖廣提標右營把總升永州鎮標左營千總旋擢湖廣提標

中營守備四十九年升本職振耀廣東陸豐人鳳高廣東香山人
顯貴廣西新安人剛廣東潮陽人大光廣東東莞人揚廣東增城
人文光廣東順德人成璉廣西新安人浦廣西宣化人

右 國史館本傳

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

廣東省立第一師範學校

許世亨

乾隆五十四年夏四月丙申 諭前因許世亨隨同孫士毅收復
黎城甚爲奮勇因加恩晉封子爵嗣以該提督殺賊陣亡其子爵
仍令伊子承襲本日召見升任副將慶成詢以安南情形據稱阮
惠糾眾搶奪黎城時孫士毅與許世亨帶兵前進見賊匪眾多在
富良等江據險抗拒孫士毅卽思渡江勦殺意欲捐軀同殉經許
世亨再三攔阻並告以總督係統兵大臣非鎮將可比設有疏虞
於國體攸關未便輕入遂派慶成護送並令薛忠牽挽孫士毅馬
韁退出卽帶領將弁等大呼直進奮勇衝殺旋卽陣亡等語許世
亨在軍營連次與賊打仗奮勇出力懋著勤勞當此危急之際又

復能持國體力勸孫士毅統師入關設無該提督勸阻孫士毅孫士毅不能退出大體所關更屬難於辦理許世亨深知大義見及於此實堪嘉憫許世亨著晉贈爲伯卽令伊子承襲

五月辛亥 予安南陣亡廣西提督贈壯烈伯許世亨諡昭毅廣西左江鎮總兵尙維昇諡直烈閩粵南澳鎮總兵張朝龍諡壯果並 予祭葬入祀昭忠祠

右東華錄王先謙編

許壯烈世亨成都人先世回民公以行伍起家征金川時以功洊至專闡阿文成公頗器之曰武臣中識大義者惟許某一人而已任廣西提督會安南國王黎維祁爲其鄰順化王阮光平所逐叩

關請兵其時孫文靖公士毅爲廣督自負將才意主用兵公曰蠻夷相攻王者不治一旦兵連禍結未易已也孫不聽其言乃率領兩廣諸鎮兵伐阮光平初不意王師至又所率兵寡因回順化調兵孫公遽以大捷聞入黎城據其王宮飲酒賦詩不以賊爲意公諫曰我兵深入重地自應慎重況光平未戰遽退恐有不測宜及其未至振旅入關上計也孫曰介冑之士爾何知也及光平復率師至維祁驟棄國走賊勢洶涌孫茫然失措欲以身殉公叩馬諫曰公爲大臣若有所傷有關國體世享一介武夫受上知遇位至擁旄以身殉國可也因令諸將護孫公入關獨率數百人赴敵盡沒焉光平遂尾追文靖至富良江將及我師總兵尙

公維昇平南王裔也少年勇銳率兵禦之轉戰竟日尙手戮數十人甲盡毀焉以後援不及撫劍歎曰丈夫死綬志也然不死大敵而亡於小醜未果盡吾之勇聊以洗先世之恥可也因自剄死孫公遂撤江橋狼狽率殘卒入關總兵張朝龍李化龍亦先後死焉所有輜重甲仗盡爲敵獲事 聞 純皇帝以公爲知大體甚加惋惜封壯烈伯祀昭忠祠其子軍門公文謨以侍衛擢至福建提督川楚之役亦以勇健世其家

右錄宗室昭樾撰

康熙五年安南黎維禕禙所受明敕印 詔封安南國王六傳至維禕而有阮氏之亂初阮鄭世爲左右輔政嗣鄭專國事而出阮

氏於順化號廣南王由是世仇構兵及維禡權益下移鄭棟忌廣南之強乃誘其土酋阮惠共攻滅廣南惠與棟並稱王黎王無如何乾隆五十一年棟死子宗幹內鬩幹遣其臣貢整藉廣南兵以滅宗於是阮氏復專國明年維禡卒嗣孫維祁立阮惠盡取象載珍寶歸廣南使貢整留鎮都城整思扶黎拒阮以王命奪回象五十惠使其將阮任以兵數萬攻整整戰死維祁出亡阮任遂據黎京亦有自王志五十三年惠復以兵誅阮任請維祁復位維祁知叵測不敢出有高平府督阮輝宿扈嗣孫母妻宗族遁至廣西太平府龍州邊督臣孫士毅撫臣孫永清先後以聞上令置其家於南甯府遣陪臣回國密報嗣孫並命孫士毅移檄安南各

路示以順逆早反正時維禡弟維袖維祉皆出避難維袖死維祉來投士毅欲令維祉權攝國事 上慮其兄弟日後嫌疑不許令土田州岑宜棟護維祉出口號召義兵時阮惠亦叩關請貢表言維祁不知存亡請立故王維禡子維禳並迎其母妃回國 上知惠狡計緩師令孫士毅嚴斥之乃 命孫士毅及提督許世亨率兩廣兵一萬出關以八千直擣王京以二千駐諒山爲聲援其雲南提督烏大經以兵八千取道開化廳之馬白關踰兕河入交阯界千有百里而至宣化十月末粵師出鎮南關 詔以安南亂後勞瘁不堪供億其運餉內地滇粵兩路設臺站七十餘所 王師所過秋毫無擾孫士毅許世亨由諒山分路進

諒山卽宋廣州狄青奪崑崙關處也

總兵尙維昇副將慶成率廣西兵總兵張朝龍李化龍率廣東兵
調各土兵義勇隨行聲言大兵數十萬各守隘賊望風竄遁惟扼
三江之險以拒十一月十二日尙維昇慶成以兵千餘五鼓抵壽
昌江賊退保南岸我兵乘之浮橋斷皆超筏直上賊霧中自相格
殺我兵遂盡渡大蹂大搏張朝龍亦破賊柱石十五日進軍市球
江江闊且南岸依山高於北岸賊據險列礮我師不能結筏諸將
以賊勢繚曲賊望不及遠乃陽運竹木造浮橋示必渡而潛兵二
千於上游二十里溜緩處小舟宵濟十七日我師乘筏薄岸相持
正急適上游兵已繞出其背乘高大呼下擊聲震山谷賊不知
王師何自降瓦解潰北十九日薄富良江江卽在國門外賊盡伐

沿江竹木斂舟泊對岸然遙望其陣不整知眾無固志乃覓遠岸
小舟載兵百餘夜至江心奪其戰艦一遂載兵二百餘許世亨親
帥之渡江復奪小舟三十餘更番渡兵二千分擣賊營賊昏夜不
辨多寡大潰焚其十餘艘獲總兵侯伯數十黎明我師畢濟黎氏
宗族百姓出迎伏道左孫士毅許世亨入城宣慰而出城環土壘
高不數尺上植叢竹內有甌城二則國王所居宮室蕩盡而黎維
祁匿民村是夜二鼓始出詣營見孫士毅九頓首謝捷 聞初
王師之出也 上慮事成後冊封往反稽時致 王師久暴露於
外先命禮部鑄印內閣撰冊郵寄軍前孫士毅遂以二十二日宣
詔冊封黎維祁安南國王並馳報孫永清歸其家屬維祁表謝請

於乾隆五十五年詣京祝八旬萬壽 詔俟安南全定維那能自立許來朝是役也乘思黎之舊民與各廠之義勇先驅嚮道又許世亨張李等皆新自臺灣立功之戰將故得以萬餘兵長驅深入不市月而克復國都其雲南烏大經之兵尙未至也 詔封孫士毅一等謀勇公許世亨一等子諸將士賞賚有差時阮惠已遁還巢穴孫士毅謀造船追討孫永清奏言廣南距黎都又二千里用兵萬人設糧站卽需運夫十萬與鎮南關至黎城等 上以安南殘破空虛且黎氏累世孱弱興廢未嘗非運數旣道遠餉艱無曠日老師代其搜捕理 詔卽班師入關而孫士毅貪俘阮爲功師不卽班又輕敵不設備散遣士兵義勇懸軍黎城月餘阮氏謀知

虛實於歲暮傾巢再舉襲國都而我師方信其來降之誑詞晏然不知也明年正月朔軍中置酒張樂夜忽報阮兵大至始蒼黃禦敵賊皆象載大礮衝陣我師眾寡不敵黑夜自相蹂躪黎維祁挈家先遁滇師聞礮聲震天亦退走孫士毅奪渡富良江卽斬浮橋以斷後由是在南岸之軍提督許世亨總兵張朝龍以下官兵夫役萬餘皆擠溺死焉士毅走回鎮南關盡焚棄關外糧械火藥數十萬士馬還者不及一半其雲南之師以黎臣黃文桐嚮道得全返黎維祁母子復來投奏 聞 上以士毅不早班師且阮惠已敗復來必非旦夕所能糾合何漫無籌備致挫國威損將士命褫職來京待罪以福康安代之阮惠既踞安南自知賈禍大懼王師

再討又方與暹羅構兵恐暹羅乘其後啟關謝罪乞降改名阮光

平明史安南國王皆有二名以其一名事中國列表貢遣其兒子光顯齎表入貢言守廣南

已九世與安南敵國非君臣且蠻觸自爭非敢抗中國請來年親

覲京師並願立廟國中祀死綏將士又聞暹羅貢使將入京恐媒

孽其短乞天朝勿聽其言福康安先後以聞上以維祁再

棄其國並冊印不能守是天厭黎氏不能存立而阮光平既請親

覲非前代莫黎僅貢代身金人之比且反側無常不足廬南顧之

憂乃允其請其黎維祁賞三品銜編旗安置京師五十五年阮

光平來朝祝釐宴熱河山莊班親王下郡王上賜冠帶受封歸

右記魏源撰按安南之役許壯烈伯世亨實為首功且殉難最烈錄此數則稍見梗槩俟得國史本

傳再行
補錄

尙維昇

尙維昇漢軍鑲藍旗人平南親王尙可喜第七子之隆和碩額駙
領侍衛內大臣生崇廩和碩額駙任盛京五部尙書生玉德任參
領生維昇由官學生乾隆三十七年十二月授鑾儀衛整儀尉三
十八年十二月遷治儀正四十一年十二月擢廣西右江鎮總兵
五十三年隨兩廣總督孫士毅出師安南十一月戰市球江乘筏
搶橋奮勇直進捷 聞 賞戴花翎十二月渡富良江斬獲甚眾
隨士毅入黎城五十四年正月士毅撤兵先至市球江屯兵南岸
力戰俱陣歿二月 諭曰前據孫士毅奏提督許世亨等在安南
市球江以南迎堵賊眾因橋斷不能過江殺賊陣亡業經降旨將

許世亨授爲子爵令伊子承襲其餘鎮將俱交部從優議卹第念該提鎮等隨同孫士毅收復黎城奮勇出力嗣因撤兵稍遲致被賊匪猝至圍繞許世亨等能不避鋒鏑直衝殺賊臨陣捐軀殊堪憐憫所有提督許世亨總兵張朝龍等以及陣亡各官兵俱著該部查明准入昭忠祠尋部議總兵尙維昇加一等照提督例給予騎都尉又一雲騎尉世職 賜諡直烈嗣阮光平額降遵 旨於安南立祠五十六年正月 諭曰總兵張朝龍尙維昇出師安南陣亡前經降旨從優議卹均照提督例給予騎都尉又一雲騎尉世職本日兵部將張朝龍之子張文貴帶領引見襲職因念張朝龍尙維昇帶兵前赴安南屢著勞績迨後力戰陣亡奮不顧身尤

堪嘉憫著再加恩均賞給三等輕車都尉世職令伊等之子承襲
用示朕褒嘉勇烈有加無已至意維昇子政達攷子宗蕙襲

右 國史館本傳

日本書紀卷之六十一

十一

張朝龍

張朝龍山西大同人寄籍貴州由黔西協馬兵於乾隆三十二年隨征緬甸戰老官屯槍傷左肩三十七年隨征金川於斯當安資哩東瑪美美等處奮勇奪礮三十八年八月補外委把總十月隨大軍攻阿喀爾布里布朗郭宗十二月補安南營把總隨參贊大臣海蘭察由大板昭進勦三十九年六月大軍攻克喇穆喇穆色溯普朝龍先登礮斬一賊授古州鎮標千總十一月攻遜克爾宗先登被槍傷十二月攻康薩爾山四十年正月戰勒吉爾博二月擢都勻協守備三月攻達佳布唵吉被槍傷八月隨攻勒烏圖克之九月賞戴藍翎十月隨攻西里阿穰曲獲木城十餘閭十月

隨攻雅瑪朋獲礮寨甚夥十二月攻格隆古索隆古一帶礮寨克之擢黔西協都司四十一年金川平敘功加二十八等紀錄二十五次 賞戴花翎四十二年十月調署天柱營都司四十三年實授四十七年十二月擢廣東撫標右營遊擊五十一年九月遷中軍參將五十二年臺灣逆匪林爽文叛朝龍領廣東兵進剿九月隨總兵普吉保克復笨港燬尖山宜梧等賊寨二十六又於山子腳殲賊三百餘賊擾元長莊普吉保伏兵禦之朝龍由無底潭進十一月由大排竹擒賊四進剿斗六門時賊匪萬餘分據大埔林中林大埔尾朝龍隨參贊大臣海蘭察攻中林克之追至庵古坑殺賊不可勝計 賜誠勇巴圖魯名號進攻大里杙右肩中槍傷

十二月勦集集小半天等處五十三年爽文就擒逆黨莊大田敗
鼠那嶠眾尙數千朝龍與諸軍分隊追至柴城遂合攻瑯嶠擒大
田臺灣平 詔圖形紫光閣列後三十功臣中 命儒臣擬贊曰
金川之役錫翎襲績載樹殊勳截途飛鏑抵庵古坑乘勝鷹擊獎
勳有加惻忱倍激三月遷廣東黃岡協副將五月擢福建南澳鎮
總兵七月安南構亂朝龍奏接兩廣督臣孫士毅調領兵丁赴勦
諭曰勉爲力攻以俟恩賞十一月大兵由壽昌進擊市球江時賊
匪屯江岸士毅隔江攻之令朝龍帶兵二千暗渡繞出賊後賊驚
潰大兵過江勦殺斬獲甚多捷 聞 賞荷包二對五十四年在
市球江南堵勦因橋斷不能過江同提督許世亨總兵尙維昇戰

歿 賜諡壯果奉 諭入祀昭忠祠見許世亨傳部議朝龍照提
督例給予騎都尉又一雲騎尉世職嗣阮光平額降遵 旨於黎
城立祠五十六年正月奉 諭再加恩賞給三等輕車都尉世職
詳尙維昇傳子文貴襲

右 國史館本傳

李化龍

李化龍山東齊東人乾隆二十五年武進士授藍翎侍衛二十九年擢貴州銅仁協都司三十二年征緬匪經略大學士公傅恆調赴滇省隨征十一月師次老官屯化龍用大礮轟擊殺賊甚眾三十四年十一月擢荔波營遊擊三十七年大兵征金川將軍溫福調赴川省五月派攻固卜濟瑪爾迪克等碉卡克之嗣進攻路頂宗明郭宗等處化龍力戰有功三十八年三月師次昔嶺化龍射死賊目一功列超等九月擢丹江營參將十月復隨征小金川由北山梁進擊阿爾克布里克之進克別斯滿十一月隨都統海蘭察克兜烏山梁復連克路頂宗明郭宗等處旋克美諾十二月擢

甘肅靖遠協副將三十九年正月進攻大金川隨海蘭察由谷噶
一路進兵攻克喇穆喇穆登古山梁二月進克雅博山梁身被石
傷 恩賜縣甲一襲八月攻克遜克爾宗十一月克格魯古山梁
四十年三月克羣泥及木思工噶克山梁被槍傷 賞戴花翎十
一月攻索隆古科布曲及喇烏喇山梁奉 旨李化龍著每案功
加三等再給功加一等四十二年四月隨大軍攻破噶拉依金川
平定功列超等奉 旨李化龍著加三等功再給一等功四月擢
江南壽春鎮總兵八月調山東登州鎮總兵四十五年 上南巡
途次接 駕八月復摺請 陛見 諭曰李化龍自調山東登州
鎮總兵上年已歷三載奏請陛見未蒙俞允迄今又屆一年遵例

奏請陞見上年所以未允准者卽以今歲南巡道經東省李化龍
自應接駕隨營當差也今春南巡旣經召見面爲訓示令其回任
矣自應明春接算俟隔三年後再行循例奏請方見據實陳奏乃
今甫經數月卽爲此奏所稱犬馬戀主等語可見並非中誠不過
習爲具文一奏此事實爲外省惡習李化龍著傳旨嚴行申飭外
省提鎮三年陞見原借以考驗人材察其能否乃年力就衰者惟
恐於朕前露其衰頹而吝惜者又或計圖省費往往於未應奏請
之時不過虛文陳奏皆非出於本心此等虛陋之習實爲可鄙旣
爲提鎮大員不應出此言也嗣後凡曾經因事召見人員俱著扣
准三年奏請陞見其文職大員亦著照此遵行將此傳諭中外知

之四十八年四月調江南壽春鎮總兵甫抵任值阜陽監犯越獄
化龍親往查拏兵部照例議處 諭曰總兵李化龍到任未久又
不同城且聞信卽親往查拏尙知奮勉有何過處著免其交部議
處十月調古州鎮總兵旋丁父憂回籍五十年續丁母憂五十一
年閏七月署廣東左翼鎮總兵五十二年八月實授時臺灣逆匪
林爽文滋事派領粵兵赴臺協剿至鹿仔港酌議汀州鎮總兵普
吉保帶兵進剿化龍畱守時賊犯諸羅化龍於九月十八日密令
遊擊穆騰額帶兵由番仔溝進至大肚溪作疑兵親率遊擊裴起
龍署遊擊陳士芬守備徐大鵬等隨義民由八卦山直抵柴坑賊
蟻聚拒官兵奮勇進攻燒寮房二十餘處殺賊百餘生擒二獲器

械無算二十日至中寮擒斬賊十餘二十二日於大肚溪復斬賊二百餘賊望風潰奏入 諭曰李化龍因普吉保帶兵進攻畱駐鹿仔港防守今能探察賊情乘虛進擊奮勇攻勦殺賊多人奪獲器械望風奔潰李化龍亦屬奮勉可嘉著交部議敘嗣奉 旨李化龍著軍功加一級五十三年回任安南內訌兩廣督臣孫士毅檄委隨征十一月渡壽昌江復進至市球江欲渡阮酋率兵於江岸力拒十六日化龍用大礮轟退賊眾急造浮橋與總兵張朝龍等率兵徑濟阮酋棄寨遁遂渡市球江入黎城五十四年正月阮酋糾眾復來黎惟祁棄城遁士毅退兵至市球江口先渡化龍力戰失足落水淹斃奉 諭總兵李化龍雖因失足落水淹斃究屬

歿於王事亦照陣亡例議卹 命入祀昭忠祠世襲騎都尉 賜
祭葬如例

右 國史館本傳

王宣 楊興龍等

王宣四川奉節人由越巂營槍兵乾隆三十二年七月隨征緬甸補戰兵三十六年五月隨征金川補馬兵三十七年攻甲爾木獲石卡功列超等拔外委三十八年正月進攻大金川當噶山梁獲石卡二月攻克第五礮並功列超等議敘加一等三月拔補戛邊營把總七月至達烏守禦十月由墨壘溝一路收復小金川之得里日寨及赤爾丹思僧格宗功列超等三十九年正月克獲拉窠絨布寨卡卡角功列頭等皆議敘加一等三月隨攻斯底七月由宜喜進攻達爾圖首先撲卡獲石卡二列超等 命從優議敘功加三等又功加一等九月擢永甯左營千總四十年正月擢阜和

營中軍守備四月由達爾圖進攻基木斯丹當鳴山梁獲石卡三
記功 賞戴藍翎十一月克獲達撒谷諸處換戴花翎十二月攻
扎烏古四十一年二月金川平回營四十三年五月補行引 見
交軍機處記名十月調泰甯營中軍守備四十五年四月調維州
右營守備九月授廣東南雄協都司五十年保舉引 見擢廣西
提標前營遊擊五十二年八月調赴臺灣征逆匪林爽文以擊賊
嘉義功加四等又勦賊斗六門並列超等 賞捷勇巴圖魯名號
五十三年三月事竣回營授廣西撫標中軍參將七月隨征安南
升鎮安協副將五十四年正月於市球江擊賊陣亡同時戰歿者
廣西鬱林營參將楊興龍廣西思恩營遊擊于宗範廣東左翼鎮

標左營右哨千總毛應龍事 聞議卹奉 旨王宣楊興龍千宗
範俱廕雲騎尉毛應龍廕恩騎尉宣子廷魁襲興龍子廷璧襲宗
範子安泰襲應龍子國斌襲興龍湖北江夏人乾隆二十五年由
行伍補提標把總三十五年升千總三十八年隨剿金川攻克阿
喀爾布里布朗郭宗底木達各碉卡功列頭等三十九年正月進
攻大金川博羅瓦山梁撲礮殺賊得優敘擢湖南鎮筵鎮右營守
備四十年五月攻克舍圖旺卡遜克爾宗七月攻克蕃則大海昆
色爾各山梁九月攻克莫魯古山梁十月攻克西里峯受槍傷擢
湖南辰州協都司十一月攻克珙布曲甲木爾索隆古拉枯各礮
卡十二月攻克喇嘛寺禱噶拉依計前後凡八十五戰得超等功

牌者七四十一年凱旋回營四十六年升綬甯營遊擊五十三年
升本職宗範直隸完縣人由乾隆三十九年武進士授三等待衛
效力期滿補本職應龍廣東香山人

右 國史館本傳

英林 明柱等

英林滿洲正黃旗人姓烏雅由護軍校擢副護軍參領乾隆五十
二年以廣東參將用五十三年二月署兩廣督標前營參將九月
隨征安南五十四年正月擊賊於市球江與廣東署提標右營遊
擊明柱同戰歿師出黎城廣東龍門協右營水師都司富桑阿分
發廣東都司丞秦廣西右江鎮標右營都司珠敦署廣東新會營
守備瑚圖凌河俱歿於陣事 聞議卹奉 旨英林廕雲騎尉繼
子官明襲明柱廕雲騎尉子富保襲餘俱廕恩騎尉丞秦子長明
襲珠敦子圖善襲瑚圖凌阿子額勒登額襲富桑阿無嗣停襲明
柱滿洲鑲黃旗人姓瓜勒佳乾隆三十三年由護軍隨征緬甸三

十五年回京三十六年隨將軍溫福征金川閱百三十五戰得功牌三十有三三十七年十二月 賞戴藍翎四十年七月授護軍校五十一年十月署副護軍參領尋實授五十二年十月分發廣東以遊擊用五十三年八月署本職富桑阿滿洲鑲黃旗人姓瓜勒佳由健銳營藍翎長授護軍校委署護軍參領乾隆五十二年發往廣東以都司用五十三年補本職永泰滿洲正黃旗人姓赫舍里由委署烏槍護軍參領發往廣東以都司用珠敦漢軍正藍旗人姓趙乾隆四十三年由文生員補鑾儀衛整儀尉四十五年擢治儀正四十八年擢本職五十三年隨征安南 賞戴藍翎瑚圖凌阿滿洲正白旗人姓他塔喇由護軍校於乾隆三十六年隨

征金川得頭等功牌六解金川賊進京 賞緞五匹乾隆五十二年十月發往廣東以守備用五十三年署本職

右 國史館本傳

張純 李世俊等

張純貴州大定人由貴州水城營兵乾隆三十二年出師緬甸力戰十四次領超等功劄一拔把總三十七年出師小金川攻獲賊礮木城石卡功列超等擢千總三十八年征大金川攻獲日寨四礮經副將軍明亮奏 聞 諭曰千總張純搶取日寨四礮突前殺賊得有重傷亦屬出力可嘉著加恩以守備用遇缺卽補並著賞戴孔雀翎以示獎勵四十一年補貴州清江協守備四十四年升湖北道士汛營都司五十年升直隸宣化鎮遊擊因都司任內逃兵未獲處分撤回原任五十一年補湖廣督標中營都司五十二年升廣西提標右營遊擊五十三年隨征安南 賞銳勇巴圖

舊名號五十四年正月於黎城擊賊陣亡同時戰歿者廣西富嘉
營把總李世俊隆林營把總唐正隆賴得勝賓州營把總邱崇茂
桂林營把總陳大佩外委唐徐衡楊秉曙歐陽甯隆林營外委韋
士華王斐章又臨陣衝散查明被害者廣東提標左營左哨千總
楊起龍右翼鎮標右營左哨千總張得高春江協右營右哨千總
李嵩廣西提標中營千總李彪左營千總馬正強右營千總鄧應
相前營千總譚經魁思恩營千總馬君相左江鎮標左營千總黃
起仁梧州協千總關明得平樂協右營千總甘雨民行營千總游
朝亮兩廣督標左營左哨把總梁廣德右營右哨二司把總張鵬
事 聞議卹奉 旨張純李世俊唐正隆賴得勝邱崇茂陳大佩

唐徐衡楊秉曙歐陽甯韋士華王斐章俱廕雲騎尉餘俱廕恩騎尉純子心智襲大佩子韜襲徐衡子祚襲秉曙子世龍襲甯弟乙襲士華子正榮襲斐章子引定襲正強子廷蔭襲甯民子佩襲君相子子佩襲起仁子桂芳襲朝亮子承孫襲廣德子東勝襲鵬子輝祖襲餘襲無考世俊廣西平樂人正隆廣西西林人得勝廣西武緣人崇茂廣西上林人士華廣西西林人斐章廣西宣化人大佩廣西臨桂人徐衡廣西馬平人秉曙廣西平樂人甯廣西臨桂人起龍廣東歸善人得高廣東曲江人嵩廣東東莞人彪廣西馬平人正強廣西西林人甯民廣西武緣人經魁廣西上林人君相廣西臨桂人起仁廣西宣化人明得廣西宜山人應相廣西馬平

人朝亮廣西平樂人廣德廣東香山人鵬廣東高要人

右 國史館本傳

劉越 蕭德等

劉越四川成都人由本省提標左營馬兵乾隆三十二年隨征緬甸事戴回營三十六年隨征小金川以攻克達烏圖有功十二月拔提標中營額外外委三十七年正月補提標前營外委隨攻資哩寨瑪爾底路頂宗南北山梁及明郭宗布朗郭宗俱在事有功九月擢提標後營左哨頭司把總十月大兵由南山梁克獲碉卡三十九年正月攻克谷噶了口並喇穆喇穆山等處功列超等復以功列優敘加三等再加一等二月由喇穆喇穆山溝捕賊番斬賊十餘尋擢夔州協左營千總六月攻喇穆喇穆之左右山梁復攻色溯普及該布達什諾功列頭等一超等一八月攻遜克爾宗

被槍石傷者再十月克之肩中槍骨斷四十年正月擢提標後營
守備三月帥木坪兵攻木思工噶克五月攻下巴木通八月攻勒
烏圍賊巢功皆超等仍以優敘加三等再加之等閏十月攻西里
山梁滾布等處十一月攻科布曲索隆古雍中喇嘛寺喇里依等
處俱有功四十一年九月題署建昌鎮嘉順營都司四十四年五
月實授四十九年五月擢廣東提標前營遊擊五十二年七月隨
剿臺灣逆匪林爽文八月擊賊銅盤隨攻蔦松毀各處賊寮尋又
隨征北路十月至麻豆莊茅港尾等處盡毀賊寮十一月領兵解
嘉義圍大軍遂通斗六門進擊大里杙五十三年二月捕莊大田
於南路獲之又帥熟番協捕逆黨林永等先以鹿仔草失守越被

効降都司自後遇戰益奮屢著勳績三月將軍福康安等疏請仍
畱遊擊之任十一月隨征安南戰於市球江復戰於富良江有功
恩旨准其開復五十四年正月於黎城遇敵陣亡同時戰歿者廣
東平鎮營遊擊蕭德提標右營左哨頭司把總嚴有章右翼鎮標
左營右哨二司外委把總任大有平樂協左營外委千總林華青
右營左哨二司額外外委朱禮富賀營外委把總黎朝英春江協
右營右哨二司外委把總莫愈光廣西提標前營右哨外委千總
劉昌龍賓州營左哨外委千總蒙世俊嘉甯協右營右哨二司外
委把總胡炳熙右營左哨二司外委把總姚敬文左營右哨二司
外委把總周仰聖左營左哨頭司外委把總胡忠秀麥嶺營左哨

頭司外委把總白雲龍右江鎮標左營額外外委白萬成事 聞
議卹奉 旨越廕雲騎尉餘俱廕恩騎尉越子家駒襲德子大全
襲大有子高魁襲朝英子太光襲愈光子昭球襲昌龍子金柱襲
敬文子仁福襲餘襲無考德湖南沅陵人由行伍拔升千總乾隆
四十四年升湖北施南協右營守備五十年升廣東興甯營都司
五十三年升本職有章廣東增城人大有廣東曲江人華青廣東
開建人禮廣東香山人朝英廣東陸豐人愈光廣東陽江人昌龍
廣西象州人世俊廣西上林人炳熙廣西嘉甯人敬文廣西永甯
人仰聖廣西新安人忠秀廣西融縣人雲龍廣西平樂人萬成廣
西武緣人

右 國史館本傳

日本書紀卷二十六

三

王檀 劉光國等

王檀江南陽山人乾隆二十六年武進士三十五年補福建邵武營守備三十八年調臺灣鎮標左營守備四十三年升石樓營都司五十一年升廣西提標遊擊五十三年隨征安南五十四年於黎城擊賊陣亡同時陣亡者廣東興甯營都司劉光國提標前營右哨外委千總羅鳳高後營右哨外委千總馮壯勳中營左哨外委千總鄭亮華左營左哨外委千總蔣國泰前營右哨頭司外委把總廖應龍後營左哨頭司外委把總李聲榮左營右哨二司外委把總鍾連英右營左哨頭司外委把總劉耀華右營右哨二司外委把總劉得華惠州協右營左哨頭司外委把總魏正雄新惠

營左哨二司把總饒式忠兩廣督標中營左哨外委千總關俊中
營右哨頭司外委把總馬士華左營左哨頭司外委把總李觀得
右營左哨二司外委把總武俊右營右哨二司外委把總王光德
前營左哨頭司外委把總沈岐山後營右哨頭司外委把總李廷
標左營額外外委吳秀芳右營額外外委梁珊前營額外外委鍾
國寶廣西提標後營右哨外委千總馬羣臣後營右哨二司外委
把總吳忠耀前營額外外委陸上柏右營額外外委劉成亮中營
外委袁成剛中營額外外委李元左營額外外委湯正強右營額
外外委陳國明義甯協左營左哨外委千總黃振雄右營左哨頭
司外委把總王萬年左營左哨外委千總楊交右營把總陸成右

營左哨二司外委把總龍魁左營左哨頭司外委把總鄧國泰事
聞議卹奉 旨 卹廕雲騎尉世職子兆夢襲餘俱廕恩騎尉世職
光國子暈襲鳳高子子義襲蔣國泰子金星襲應龍子承恩襲聲榮
子國瑞襲連英子振耀襲魏振雄子從盈襲式忠子顯明襲關俊
子悅可襲士華子戊廣襲觀得子五慶襲武俊子元陞襲光德子
連官襲岐山子麟瑞襲餘襲無考光國湖南桃源人由武舉充兵
部差官效力期滿乾隆五十年授廣東提標左營守備五十三年
升本職鳳高廣東歸善人壯勳廣東香山人亮華廣東東莞人蔣
國泰廣東高要人應龍廣東清遠人聲榮廣東曲江人連英廣東
潮州人耀華廣東香山人得華廣東南雄人魏振雄廣東歸善人

式忠廣東高要人關俊廣東開建人士華廣東陽江人觀得廣東
陸豐人武俊廣東增城人光德廣東高要人岐山廣東歸善人廷
標廣東潮陽人秀芳廣東順德人珊廣東香山人國寶廣東曲江
人羣臣廣西馬平人忠耀廣西新安人上柏廣西宣化人成亮廣
西西林人成剛廣西武緣人元廣西臨桂人正強廣西梧州人國
明廣西新安人黃振雄廣西上林人萬年廣西馬平人交成魁俱
湖南綏甯人鄧國泰湖南岳州人

右 國史館本傳

朱國瑞 黃達魁等

朱國瑞湖南保靖人由行伍補靖州營把總乾隆三十七年隨征金川三十八年補永州鎮標右營千總四十一年調沅州營千總四十七年擢補廣西平樂協右營守備調右江鎮標左營守備五十二年七月隨征安南五十四年正月於黎城擊賊被害同時遇害者廣東督標前營左哨二司把總黃達魁提標中營左哨頭司把總謝廷超中營右哨頭司把總邱振元左營右哨二司把總張高賢右營左哨頭司馬兵署把總何文光右營左哨二司把總黃瑞高前營左哨頭司把總王英朝前營右哨二司把總潘標廣西提標中營把總戚坤左營把總鍾廷華右營把總李枝榮陳世明

前營把總彭剛後營把總余成龍張振祥撫標右營把總秦世堯
左江鎮標左營把總黎志榮外委張琮右江鎮標中營把總李茂
英廣東右翼鎮標左營左哨頭司把總黃上文廣東提標左營右
哨二司把總張國寶右營左哨二司把總孫有亮廣東右翼鎮標
左營右哨二司把總邱得陞中營右哨二司把總陳喜福潮州鎮
標中營右哨二司把總葉英高慶遠協左營把總劉玉成右營把
總璩映日平樂協左營把總會志信春江協左營右哨二司把總
嚴廷瑞龍門協左營右哨二司把總許昌義事 聞議卹奉 旨
國瑞等俱廕恩騎尉國瑞子文芳襲廷超子文興襲振元子永泰
襲高賢子耀宗襲文光子鍾明襲瑞高弟英高襲英朝子鳳鳴襲

標子承剛襲坤子德義襲廷華子啟宇襲枝榮子宏光襲有亮子
朝鳳襲振祥子連奎襲世堯子紹謙襲上文子招第襲得陞子曰
顯襲喜福子文安襲英高弟維顯襲玉成子廷璽襲映日子嘉驥
襲廷瑞子振綱襲昌義子克文襲餘襲無考達魁福建詔安人由
武舉分發廣東以千總補用乾隆三十四年降補督標前營左哨
二司把總五十二年六月隨剿臺灣逆匪屢經打仗有功廷超廣
東歸善人振元廣東曲江人高賢廣東潮州人文光廣東歸安人
瑞高廣東東莞人英朝廣東順德人標廣東長甯人坤廣西新安
人廷華廣西馬平人枝榮廣西梧州人世明廣西象州人剛廣東
嘉甯人成龍廣西融縣人振祥廣西馬平人世堯廣西臨桂人志

梁廣西宣化人茂英廣西歸順人上文廣東曲江人國寶廣東陽
春人有亮廣東開建人得陞廣東增城人英高廣東歸安人玉成
廣西宜山人映日廣西平樂人志信廣西賀縣人廷瑞廣東陽春
人昌義廣東欽州人琮籍無考

右 國史館本傳

岑宜棟 黎致明等

岑宜棟廣西田州土知州二十四世祖翔自宋崇甯間授安撫使世襲田州知州至宜棟襲職後乾隆二十八年緝獲東蘭州貓匪加二級三十年廣西撫臣馮鈞奏右江鎮總兵李星垣婪索宜棟銀兩部議照濫行供應例降一級調用因有級抵銷免其降調三十一年至三十四年征緬甸解軍需牛馬七次得頭等功牌七三十八年捕獲上林縣逆匪給四品職銜銀四百兩四十八年子照科場舞弊寘於法議革宜棟職上以宜棟究不知情且承襲土官已久別無過犯加恩畱任五十三年檄征安南領土兵三千從平孟口擊賊至富良江與大兵合賞戴花翎五十四年正月於

黎城外力戰陣亡時廣西提標後營守備黎致明亦戰歿同時遇害者嘉甯協右營守備劉應璵融懷營守備陳洪順兩廣督標右營守備李振光廣西慶遠協右營守備郭升榮又廣西凌雲縣知縣袁天達試用府經歷張誠委辦臺站亦被害事 聞議卹奉

旨宜棟廕雲騎尉子煜襲致明廕雲騎尉應璵洪順振光升榮俱廕恩騎尉天達誠俱廕雲騎尉致明子元龍襲應璵子喬兒襲洪順子金禮襲振光子鳳鳴襲升榮子宗訓襲天達子璜襲誠子繼昌襲致明貴州都勻人由行伍補千總乾隆三十二年隨征緬甸四十年隨征金川五十二年升本職八月隨征臺灣以功 賞戴花翎五十三年隨征安南十二月 賜堅勇巴圖魯名號應璵洪

順俱廣西宣化人振光廣東和平人俱由行伍出身乾隆五十二年隨征臺灣俱有功 賞應璵花翎洪順振光藍翎升榮廣西馬平人由行伍出身五十三年隨征安南 賞戴藍翎並都司頂帶天達福建人誠浙江人

右 國史館本傳

日本書紀卷之三十一

三十一

長春 多爾濟等

長春滿洲正藍旗人姓那拉乾隆二十七年由護軍從將軍明瑞出師伊犁有戰功三十年派赴烏什擊賊奪獲馬匹器械前後功列超等二次頭等十四次二等八次得功牌六三十二年選入健銳營訓練三十三年征緬甸隨大學士公傅恆擊賊於老官屯得頭等功牌三十四年補護軍校三十六年署護軍參領三十七年揀發四川以都司委用三十八年正月署安阜營都司時大兵方征金川赴丹壩軍營聽調七月提督董天弼令防守瑪讓三十九年正月總兵五福檄防康巴達隘口十月大兵攻日旁之戴石山令長春分攻巴貢沿河以牽賊勢十一月隨五福攻克滅金嶺進

據卜籠礪卡又調防格魯克古要隘賊來犯力戰敗之是月奉

旨實授川北鎮右營都司四十年正月參贊大臣額森特令攻沿
河甲爾奈等處獲石卡二二月令攻羣尼格什齊等寨克之五月
進攻喀爾丹寺擊敗賊目奪賊卡一燬賊寨三功列超等九月參
贊大臣海蘭察令長春帶兵三百齎三日糧由達烏達圍繞攻當
噶克底埽賊礪搶上山梁奪卡五乘勝進攻集古腦賊卡斃賊百
餘賊遁又隨攻勒烏圍克之功列超等十月帶兵攻克西里山梁
殺賊二百餘燬賊寨六功列超等閏十月擊柵進攻奔魯布木木
城燒斃數十賊餘賊皆竄奪獲石卡七十一月率兵三百隨海蘭
察攻克科布曲索隆古們都斯得木巴爾諸寨乘勝進攻安布魯

奪據峯頂礮卡又攻克則朗喀克下至溝底焚燬賊卡六並班列
超等又攻克雍中喇嘛寺等處遂進圍噶拉依賊巢皆有功四十
一年金川平回本營四十二年二月署左營遊擊四十四年總督
文綬以卓異薦引 見奉 旨准註冊四十六年二月授建昌鎮
中營遊擊四十七年十二月調赴西藏駐防五十一年期滿回營
五十三年署越嶲營參將五十五年調署成都城守營參將五十
六年十一月調征廓爾喀五十七年五月在擦木力戰有功奉
旨賞戴花翎授甘肅城守營參將又攻濟隴礮帶兵奮力先登中
槍斃六月海蘭察帶兵至雅爾寨拉博爾東拉等處攻木城石卡
索倫佐領多爾濟建昌鎮標右營都司伊魯爾圖俱力戰歿於陣

同時將軍福康安擊賊於東覺山驍騎校哈第雅岱奮勇殺賊歿
於陣先是大兵由濟隴攻熱索橋四川別思滿寨額設屯把總授
守備銜阿庫擊賊戰歿進攻協布魯八角礮寨額設屯外委授守
備銜色郎九子寨額設屯把總布昆太屯外委千總銜安多朋俱
力戰陣亡事 聞議卹長春等奉 旨俱廕雲騎尉長春子富昌
阿襲伊魯爾圖子色楞額襲哈第雅岱子賈任襲阿庫子德木太
襲多爾濟子扎拉渾布襲色郎子噶登布魯襲餘襲無考多爾濟
滿洲正白旗人姓業克忠世居呼倫貝爾地方由司轡長襲佐領
兼襲雲騎尉世職授巴爾呼副總管委署長隨征廓爾喀先在濟
隴勦賊有功 賞戴花翎伊魯爾圖蒙古鑲白旗人姓博爾濟吉

特初爲烏槍護軍及隨征金川力戰有功前後屢得功牌奉 旨
賞戴藍翎補烏槍護軍校金川平凱旋擢署烏槍護軍參領與宴
紫光閣旋發往四川以都司用尋補四川建昌鎮標右營都司哈
第雅岱索倫正白旗人姓都拉爾由驍騎校隨征金川屢得功牌
餘姓籍俱無考

· 右 國史館本傳

圖書集成彙編

卷三

台斐英阿

台斐英阿滿洲正白旗人姓庫雅拉乾隆三十六年由護軍補司
轡長三十八年授乾清門藍翎侍衛三十九年三月奉 旨赴金
川軍營領隊七月與內大臣海蘭察等取喇穆喇穆山梁攻得碉
座圍燒木城又進撲尾碉燬木城二次日乘霧循喇穆喇穆山梁
下勦西南兩山麓皆克之 命從優議敘給予頭等功牌一復督
兵攻撲該布達什諾奪碉前進克大木城進圍遜克爾宗毀碉二
百餘座十月攻克默格爾以西碉寨及凱立葉前山梁碉卡
上嘉其奮勇擢三等待衛十一月由羅卜克鄂博踰溝攻格魯克古
了口將沙木拉渠革什式岡等寨盡破之四十年三月同領隊大

臣福康安等攻勒吉博爾山脊克兩碉四月同福康安等攻薩克
薩谷山梁全行克獲六月攻舍圖在卡進至覺拉喇嘛寺克之并
將喇嘛科爾三寨所屬之卦爾沙巴等寨掃蕩無遺 賞給拉布
凱巴圖魯名號七月偕海蘭察等攻章噶山峯遂取舍爾都拉後
山據兩峯乘勝克寨落二十餘處進攻托古魯台斐英阿潛從山
梁陟險攀援上盡破之進攻勒烏圍克之賊退保達思里九月官
兵從達烏達圍進攻海蘭察分兵七隊台斐英阿領其一從懸崖
上下夜半抵達烏達圍奪獲達沙布梁一碉天明至當噶克底乘
霧薄其碉賊眾悉就戮十月官兵分路進攻達思里山下碉寨台
斐英阿帶兵援應隨攻阿穰曲地方克大碉木城各二殲賊甚眾

據第一山峯十一月攻阿穰曲山下寨落竄奔布魯木山峯賊硯克各要隘進攻舍勒圖租魯瓦喇占薩爾克爾古什拉斯等寨連克之得 旨優獎四十一年正月偕福康安等攻雍中喇嘛寺盡降其喇嘛擢二等待衛三月金川平凱旋 賜宴 賞緞十端銀百八十兩繪像紫光閣 上親製贊曰一木難支眾擎易舉嘉我諸臣心同力努人自爲戰各有所成攻康薩爾直達賊營四十六年四月赴蘭州營勦撒拉爾逆回偕領侍衛內大臣海蘭察等敗賊於龍尾山梁踰水磨溝上華林寺殲賊無算閏五月由華林寺南直抵賊卡先在卡邊埋伏隨由寺前撲入賊平擢頭等待衛管押逆回進京四十九年六月從勦甘肅石峯堡逆回偕參贊大臣

海蘭察等在隆德底店地方往來勦捕屢有克獲七月偕海蘭察等同各兵由石峯堡東南小駁進攻馳至賊巢殲戮無數賊平以功賞副都統職銜九月補公中佐領五十年擢御前侍衛旋授正藍旗滿洲副都統五十三年擢正紅旗護軍統領五十六年調鑲黃旗以失察護軍盜糧鑄二級畱任是年隨征廓爾喀五十七年三月上以台斐英阿人尙曉事著同參贊大臣海蘭察領兵爲一路四月諭同領隊大臣成德在聶木濟隴一帶分駐往來策應以壯聲勢六月隨將軍福康安分攻據木克之進攻濟隴率索倫勁旅於山坡要地往來衝擊師至旺噶爾台斐英阿帶兵渡瑪爾城河薩木楓山襲取賊寨大兵亦進至東覺山賊卡甚密台斐

英阿噶殪紅衣兩賊目及賊兵甚眾共取賊寨十一生擒七十六人賞都統銜授散秩大臣七月大兵連破噶拉及堆補木二山至帕朗古奪橋進偪甲爾古拉山賊之路來犯台斐英阿射斃紅衣賊目二突中槍卒於陣年五十二歲上以其身臨行陣奪隘攻堅著照都統銜賜卹賞銀千兩予祭葬諡果肅廓爾喀平大兵凱旋再繪像紫光閣列十五功臣上製贊曰首攻擦木繼克濟噶身先士卒奮勇成功遂至帕朗偪甲爾古直進殞身痛惜心楚恩賞騎都尉又一雲騎尉世職子安貴承襲嘉慶七年十一月卒安貴子蘇章阿承襲

右 國史館本傳

哲森保

哲森保滿洲鑲藍旗人姓薩克達初爲吉林烏拉馬甲乾隆三十四年隨征緬甸十月借侍衛阿爾蘇拉在新街擊賊得二等功牌一又隨副都統明亮擊賊於老官屯得三等功牌一三十七年由吉林烏拉前鋒奉 旨來京授前鋒校三十九年補前鋒藍翎長九月山東壽張縣奸民王倫聚眾滋事隨大學士舒赫德赴勦侍衛音濟圖擒王倫將就縛突有賊持械出拒哲森保射斃之疏入得 旨嘉獎 命有應升之缺卽行升用四十年擢藍翎侍衛四十六年四月赴蘭州勦撒拉爾逆回蘇四十三四十七年五月大軍由龍尾山踰水磨溝攻華林山哲森保槍斃騎馬賊目身中槍

傷經欽差大學士阿桂奏 聞 諭曰哲森保趕殺賊匪頭目勇
往可嘉且又受其槍傷著阿桂查明該侍衛見係何等職銜卽奏
明加二等升用以示獎勵尋擢三等侍衛 賞法福禮巴圖魯名
號四十八年遷二等待衛 命在乾清門行走四十九年勦逆回
於石峯堡受石傷列爲出眾得頭等功牌一三 擢頭等
侍衛五十年授公中佐領五十六年隨征廓爾喀五十七年五月
將軍福康安攻擦木乘夜雨分五隊會攻哲森保於翁果爾海領
兩隊兵由東西兩山分進天明五隊會合克之乘勝攻濟官寨直
趨陽布至熱索橋賊撤橋不得渡福康安畱兵牽綴密令哲森保
與阿滿泰等東越戕綠大山繞熱索橋上游斫樹紮筏潛渡南岸

仍沿河疾下駮撲橋卡賊駭愕奔竄官兵乘勝搭橋一時并濟遂
奪熱索橋事 聞 賞副都統職銜軍至協布魯分三路哲森保
順山進攻賊潰竄焚其五寨七月同海蘭察分路繞至博爾東拉
與賊力戰左膝中槍得 旨賞銀百兩福康安令回濟隴大營調
養至協布魯創發卒 賞卹如陣亡例廓爾喀平哲森保列後十
五功臣繪像紫光閣 命儒臣擬贊 諭入祀昭忠祠 賜騎都
尉世職子富永襲兼二等侍衛

右 國史館本傳

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

1950
 1951
 1952
 1953
 1954
 1955
 1956
 1957
 1958
 1959
 1960

1961

阿滿泰

阿滿泰姓郭佳氏本黑龍江達呼爾披甲乾隆二十四年隨征回疆閏六月攻喀什噶爾城七月由拉阿楚爾至巴達克山擒賊霍集占等三十四年挑護軍入滿洲正白旗三十八年授藍翎侍衛隨征金川攻當噶爾拉山梁三十九年二月賊番從庚額特山口出阿滿泰與前鋒參領巴克坦布等搶占要地槍矢齊發賊殪者眾副將軍明亮以 聞 諭曰此次賊番竟敢從庚額特了口前來經阿滿泰巴克坦布等帶兵奮擊殲斃頗多甚爲可嘉著存記檔案俟攻得馬爾邦一并奏請交部優敘七月進攻達爾肚山梁克之九月攻克格木勾截甲索賊人來路四十年三月與侍衛

阿蘭保等攻科拉木達奮勇撲礮賊迎拒別有賊從西南來援我兵分頭迎擊賊竄四月攻加素得楞等山及儒集寨五月擢三等侍衛 賜扎努恩巴圖魯名號閏十月攻扎烏孤山梁十二月攻加雜肚絨布巴魯坦諸處四十一年金川平凱旋繪像紫光閣列後五十功臣 命儒臣擬贊四十二年十二月擢副護軍參領四十六年派勦蘭州逆回七月攻華林寺殲賊百餘身受創得 旨嘉獎四十七年擢護軍參領四十九年征逆回於石峯堡六月與侍衛額勒登保率數騎從隆德閒道偵賊底店途遇牧放賊生擒四人復與涼州鎮總兵蘇靈領固原涼州兵攻賊底店奪卡奉 旨賞副都統銜七月隨大兵圍石峯堡毀其巢派追逃竄餘匪八

月擢頭等侍衛五十六年十月隨征廓爾喀五十七年五月將軍
福康安分兵五隊攻濟隴阿滿泰由中路破擦木隘口殲賊遂抵
濟隴撲官寨破東北隅乘勢克之進至熱索橋賊毀橋掘拒阿滿
泰等領屯土兵東踰栽綠山繞上流紮筏潛渡還破卡六月從協
布魯渡河順山進攻燬賊巢至雅爾寨大兵分三隊阿滿泰等爲
次隊七月至博爾東拉前山登其巔繞賊卡上奮勇下壓大敗之
破木城三石卡七奉 旨授鑲紅旗蒙古副都統遂進至堆補木
由帕朗古攻橫河大橋北岸賊敗回南岸排槍抵禦阿滿泰率先
衝奪大兵乘勢過橋阿滿泰中槍落水陣亡疏入 賜祭葬如例
入祀昭忠祠 賞騎都尉世職廓爾喀平列前五功臣再繪像

紫光閣 御製贊曰遇有絕險莫弗身先詎惟力勇實以忠堅攻
堆補木奪橋命殞馬革未能更切哀憫子巴彥巴圖承襲世職見
兼三等侍衛

右 國史館本傳

國朝耆獻類徵初編卷三百五十七目錄

忠義二十七

索多爾凱 年鏞等

墨爾根保 圖爾岱山等

張占魁 魏玉龍等

色丹巴 江巴安錯等

明安圖 伊薩納等

潘大用 蔣善治等

季光德 牛志得等

彭鳳堯 子佩蘇
丁光國等

朱慶錦 王鳳翔等

宋如椿 江瑤等

王一魁 饒德豐等

從大雄 高雄勝等

雍忠伊沙斯 王占爾吉等

王重品 徐綱等

趙福 夏尙惠等

六達色 廣惠等

婁太王占 桑吉撒爾吉等

坤朋 桑卡等

韓文秀 宋仕聯等

葉攀鳳 沈福榮等

邢麟 劉奉等

正身... 卷之三十三

姚國泰 張忠選等

熊起鵬 何肇勤等

滕家瓚 族弟家泰 施錦等

朱永清 子殿俊孫全福等 劉昇等

朱慧昌 費增運等

程文韜 馮周勝等

馬匡周 李占元等

温布 卡襪等

國朝耆獻類徵初編卷三百五十七

通奉大夫前署江西巡撫江西布政使司布政使湘陰李桓輯

忠義二十七

索多爾凱 年鑄等

索多爾凱滿洲正紅旗人姓阿拉爾由黑龍江索倫馬甲於乾隆五十一年奉 旨住京爲親軍五十二年隨征臺灣勦逆匪林爽文於彰化得頭等功牌一二等功牌四又勦逆匪莊大田於鳳山得頭等功牌二五十二年授藍翎侍衛五十五年擢三等侍衛五十六年隨征廓爾喀五十七年六月擊賊於烏達什喀力戰有功擢二等侍衛 賞尼經額巴圖魯名號七月攻堆補木山口之象

巴宗賊卡槍傷落巖身殞時四川會鹽營遊擊年鏞隨大兵攻勦東覺山奮勇衝擊受重傷越日死二等侍衛英貴協領策巴杰佐領委署參領袞德依俱力戰陣亡署烏槍護軍參領額勒謹被重創卒於軍委署參領扎烏太署防禦特古特驍騎校中景額護軍校噶嚕岱筆帖式額爾經額並與賊戰於帕朗古相繼陣亡額外驍騎校通吉禪署護軍校阿凌敦布藍翎長德木喀拉同禦賊於沙喀勒俱力戰傷亡事 聞議卹索多爾凱騰雲騎尉襲無考年鏞通吉禪俱廕八品官餘俱廕雲騎尉年鏞子年長阿襲英貴子齊扎布襲策巴杰姪丹貝渾布襲袞德依兄圖屯保襲特古特子濟爾噶勒襲中景額子訥蘇肯襲噶嚕岱子景文襲額勒經額子

舍圖肯襲通吉禪子薩木布奈襲阿凌敦布子扎勒罕太襲德木
喀拉子福尼雅杭阿襲年鏞漢軍鑲黃旗人策巴杰蒙古正白旗
人姓烏扎拉英貴索倫正紅旗人姓都拉爾袞德依索倫鑲紅旗
人姓薩木齊扎布額勒謹滿洲正黃旗人姓舒穆魯扎烏太呼倫
貝爾正藍旗人姓博勒濟格爾特古特呼倫貝爾鑲藍旗人姓鄂
哩木蘇中景額滿洲正紅旗人姓伊爾根覺羅噶嚕岱蒙古正黃
旗人姓楚莫特額爾經額索倫正白旗人姓薩瑪喜爾通吉禪索
倫鑲黃旗人姓都拉爾阿凌敦布呼倫貝爾正紅旗人姓唐古忒
德木喀拉索倫正黃旗人姓兀扎喇

右 國史館本傳

墨爾根保 圖爾岱等

墨爾根保滿洲正紅旗人姓阿拉吉爾本黑龍江馬甲乾隆五十年奉旨住京爲親軍五十二年調赴臺灣剿賊前後得頭等功牌三三等功牌一五十三年授藍翎侍衛五十五年遷三等侍衛挑在乾清門行走五十六年隨征廓爾喀五十七年五月大兵攻擦木爾雨夜偕侍衛阿哈保帶兵由東西兩山梁繞至賊後遏其去路賊驚潰遂克擦木爾又擊賊於熱索橋率屯練及土兵東逾畏綠大山由上游潛渡沿河疾行直撲賊卡殲賊無算大兵奪熱索橋以功擢二等侍衛八月由雍鴉烏蘇特進攻喀勒拉山山巔有木城二賊憑高放槍投石墨爾根保與侍衛圖爾岱奮勇登山

攀援木城徑上俱中槍歿於陣及大兵至堆補木擊賊陣亡者四
川九子寨額屯千總授守備職銜額勒克圖把總授守備職銜窟
素吉外委察西吉余舟他窟佑吉巴勒爾寨把總別穴舟乾保寨
額設屯把總授守備職銜阿什舟把總章朋外委扎日豆爾吉扎
太亨朋上孟董寨屯千總職銜羊中太下孟董寨屯把總職銜倉
旺朋雜谷腦屯把總職銜曾納木耳吉撒爾甲外委扣太絨爾吉
別思滿寨屯外委職銜克冷布事 聞議卹奉 旨墨爾根保繪
像紫光閣列後五十功臣 命儒臣擬贊 恩廕雲騎尉弟那蘇
圖襲餘俱廕雲騎尉額勒克圖子扎拉桑阿襲窟素吉子桑吉襲
余舟他子沈扎朋襲窟佑吉子別爾吉忠襲察西吉弟科五什舟

襲別穴舟子桑吉襲章朋子江都朋襲扎日豆爾吉子阿木嘉爾
忒襲倉旺朋子都雅坤尼襲會納木耳吉子渾卜圖嘉襲扣太絨
爾吉子扎什木布哈襲扎太子渾都吉爾襲亨朋子齊旺扎什襲
羊中太子固勒肯朋襲克冷布子任占太襲圖爾岱無嗣停襲餘
襲無考圖爾岱蒙古鑲白旗人姓白佳乾隆三十四年由閒散隨
征雲南有功挑馬甲尋補護軍從征金川前後屢得功牌三十八
年授藍翎侍衛四十年擢三等侍衛五十年升二等侍衛餘姓俱
無考

右 國史館本傳

國朝通志卷三十五
四

張占魁 魏玉龍等

張占魁四川成都人由行伍於乾隆二十八年擒巴克喇嘛有功三十四年補額外外委三十六年隨征小金川先攻克達烏次攻木耳寨擒賊七尋補外委三十七年赴西路軍營時大軍抵美諾獲銅佛等件隨參領巴克丹布解送入京 恩加賞賚仍赴軍營三十八年補把總旋升千總四十一年升四川松潘鎮標右營守備四十五年調懋功營守備四十六年率兩金川屯兵隨征撒拉爾逆回閏五月進攻許望坪身被數創猶力戰六月攻華林山殲賊甚夥賊退踞華林寺植木城圍之焚其寺盡殲賊兵四十八年改補崇化營守備四十九年隨征石峯堡逆回以功 賞戴藍翎

五十年擢懋功協都司五十二年隨征臺灣逆匪林爽文有功

賞換花翎並 賜固尼杭阿巴圖魯名號五十五年升綬靖營遊擊五十六年隨征廓爾喀五十七年三月守康薩橋閭四月由聶拉木軍營進次宗爾喀五月節次進攻擦布滾瑪噶爾轄爾甲邦杏等處直抵濟爾噠賊無數奪獲焚燬賊寨四十餘尋補甘肅甘州城守營參將駐防堆補木八月進攻喀勒拉木城中槍陣亡時四川建昌鎮標右營都司魏玉龍擊賊於堆補木槍傷墜巖歿陝甘督標中營千總李殿元四川懋功協慶甯營千總李端提標左營千總唐忠榮俱先後力戰陣亡又有四川阜和協左營把總張治平戰歿於東覺山泰甯營右司把總李德勦賊於喀勒拉力

戰死龍安營右司把總余奉璋平番營外委千總柳成景戰歿於
帕朗古事 聞議卹俱廕雲騎尉占魁孫國棟襲玉龍子天受襲
殿元子文秀襲端弟寅襲忠榮子紹基襲治平子禮襲德子祥林
襲奉璋子元輔襲成景子國良襲玉龍四川西昌人殿元甘肅舉
蘭人端四川成都人忠榮四川雅州人治平四川華陽人德四川
清溪人奉璋四川溫江人成景四川松潘人

右 國史館本傳

四
十
一
年
十
月
十
日

八

174-644

色丹巴 江巴安錯等

色丹巴四川乾堡寨屯守備乾隆五十二年隨剿臺灣逆匪林爽
文攻克六集埔水沙連進攻斗六門解嘉義圍以功晉都司職銜
賞戴花翎五十六年隨征廓爾喀五十七年九月擊賊於堆補木
力戰陣亡是役也空銜屯守備江巴安錯行營千總王朋空銜千
總生根土千總別什丹耳吉把總肯朋合爾朋納布巴本空銜屯
把總噶登朋布納我若舟穴日舟別若瓜格洛聶噶朋俱力戰死
時巴旺土參將吉太戰歿於別蚌寨土千總甲噶土把總精拉朗
吉奔戰歿於後藏行營千總生格戰歿於協布魯行營千總銜阿
榮戰歿於巴斯朗山屯外委窟太戰歿於東覺山土千總木洛特

巴戰歿於二道橋屯干總扎什姜木戰歿於烏倫嶺行營把總甲
喀什澤立俱戰歿於熱索橋事 聞議卹色丹巴甲噶稽拉朗吉
奔木洛特巴扎什姜木俱廕雪騎尉餘廕無考色丹巴子扎什爾
吉襲餘襲無考江巴安錯巴本俱四川雜谷腦屯兵噶登朋安敦
寨屯兵王朋河東寨屯兵生根河西寨屯兵肯朋子午寨屯兵合
爾朋烏雅寨屯兵別什丹爾吉布納俱九子寨土兵我若舟穴日
舟俱月朗谷土兵別若瓜格洛聶噶朋俱七星寨土兵納布甲噶
俱宅壘寨屯兵吉太甲喀什稽拉朗吉奔俱巴旺土兵生格阿榮
俱九子寨屯兵窟太八角礪寨屯兵木洛特巴扎什姜木俱巴底
土兵澤立汗牛寨屯兵

右 國史館本傳

國史館本傳
卷二十七

明安圖 伊薩納等

明安圖蒙古正紅旗人姓博爾濟吉特乾隆二十九年由雲騎尉世職升三等侍衛三十年署蒙古正紅旗副護軍參領三十一年升補副護軍參領三十五年授湖南保靖營遊擊三十八年隨征金川歷陣共五十四次屢著戰績奉 旨優敘四十一年凱旋升授山西北樓營參將五十一年擢湖北黃州協副將五十六年升湖南鎮筸鎮總兵六十年正月黔楚逆苗石柳鄧石三保等勾結肆逆明安圖聞警卽帶弁兵馳往鴉酉等處堵禦身先進剿被賊阻永綏協副將伊薩納督兵往援偕明安圖奮勇殲賊力竭俱陣亡四月苗匪於永綏之滾牛坡邀截軍糧雲南鶴麗鎮標中營遊

擊永舒四川阜和協左營都司班第共擊之歿於陣先後事 聞
議卹明安圖廕騎都尉伊薩納等俱廕雲騎尉明安圖子倭興額
襲伊薩納子存住襲永舒子福祿襲班第子德克金布襲伊薩納
蒙古正白旗人姓巴雅拉乾隆二十七年由護軍隨征烏什得功
牌七三十四年隨征緬甸有戰績旋調金川前後共得功牌二十
二永舒蒙古正黃旗人姓巴岳武乾隆三十八年由烏槍護軍隨
征金川以功擢驍騎校師施揀發雲南以守備用洊升本職班第
滿洲鑲白旗人由烏槍護軍校隨征緬甸以功擢四川綏甯營守
備復調征金川以攻克西里等處敘功洊升本職

右 國史館本傳

潘大用 蔣善治等

潘大用湖南零陵人乾隆三十四年由行伍拔補湖南永州鎮標右營外委三十六年四月升本標左營把總三十七年隨征兩金川殺賊受傷升臨武營千總五十三年十一月升鎮筵鎮標中營守備六十年正月隨勦黔楚逆苗於鴉酉擊賊陣亡同時陣亡者鎮筵鎮標中營千總蔣善治左營千總鄭廷松符士奇右營把總丁天榮永綬協左營把總楊開科王廷玉右營把總唐紹華楊運泰鎮筵鎮標前營外委劉成業永綬協左營外委黃正貴丁起鳳右營外委孫登元祁大禮鎮筵鎮標前營外委胡子鳳右營額外外委戴廷極前營額外外委溫爾讓永綬協左營額外外委冉承

昌劉應麟事 聞議卹大用善治廷松士奇天榮開科廷玉紹華
運泰成業正貴起鳳登元大禮俱應雲騎尉襲次完時給予恩騎
尉世襲罔替子鳳廷極爾讓永昌應麟均卹如例大用弟大受襲
善治子才傑襲廷松子國鴻襲士奇子萬年襲天榮子啟麟襲開
科子清瓊襲廷玉子國選襲紹華弟紹光襲運泰子日訓襲成業
子大貴襲正貴子日孝襲起鳳子祿經襲登元子紹興襲大禮子
國柱襲善治湖南綏甯人廷松士奇俱湖南鎮寧人天榮湖南武
陵人開科湖南永綏人廷玉紹華俱湖南鎮寧人運泰湖南綏甯
人成業湖南鎮寧人正貴起鳳登元俱湖南永綏人大禮湖南邵
陽人子鳳廷極爾讓俱湖南鎮寧人永昌應麟俱湖南永綏人

右 國史館本傳

國史館本傳

| | | | | | | | | |
|--|--|--|--|--|--|--|--|--|
| | | | | | | | | |
|--|--|--|--|--|--|--|--|--|

牛志得等

德湖南善化人乾隆三十六年由行伍拔補湖南撫標右營外委三十七年隨征兩金川累次殺賊受傷補本營把總四十四年十月升本營千總五十二年隨剿臺灣有功五十四年十一月升鎮筓鎮標前營守備六十年正月隨征黔楚逆苗擊賊於鴉西陣亡是月湖南永綏協右營千總牛志得擊賊於糯米汛貴州鎮遠鎮標候補千總李紹銘擊賊於盤塘坳湖南永綏協右營把總孟國興擊賊於葫蘆汛左營外委李廷梅擊賊於高巖汛湖南鎮筓鎮標右營把總汪宏擊賊於廟坳右營外委田云富聶紳同擊賊於瓜子巖汛湖南永州鎮標前營把總楊昌富湖南鎮筓鎮標

中營把總王宏禮外委何四海唐宏詔前營外委馬仁貴同擊賊
於黑上寨俱力戰陣亡二月貴州黔西協右營千總柯成林左營
把總盧仲擊賊於松桃廳俱傷亡貴州貴陽營外委何學成擊賊
於鳳凰廳陣亡事 聞議卹光德等廕雲騎尉襲次完時給予恩
騎尉世襲罔替成林仲廕雲騎尉光德子文鶴襲志得子紹連襲
紹銘姪逢陞襲國興姪士榮襲廷梅子大治襲宏子順章襲云富
子宏茂襲紳子興榮襲昌富姪勝仁襲宏禮姪大受襲四海子由
禮襲宏詔子承訓襲仁貴姪朝樑襲成林子毓蘭襲仲子國棟襲
學成子正應襲志得湖南靖州人紹銘貴州黃平武舉國興湖南
乾州人廷梅宏云富俱湖南鎮筵人紳湖南乾州人昌富湖南永

綏人宏禮湖南鎮筭人四海湖南乾州人宏詔仁貴俱湖南鎮筭人成林貴州黔西武舉仲貴州黔西人學成貴州貴陽人

右 國史館本傳

國朝通志卷之三十三

三

彭鳳堯子佩蘇
丁光國等

彭鳳堯廣東連山人由舉人於乾隆三十一年揀發湖南以知縣用三十六年補會同縣知縣四十一年調善化縣知縣四十九年升永順府同知五十四年緣事降一級調用五十五年引見奉旨仍發湖南以同知用五十七年補永綏廳同知六十年貴州松桃廳苗匪石柳鄧等滋事湖南永綏廳與松桃接壤黃瓜寨苗匪石三保等勾結響應鳳堯等隨鎮筸鎮總兵明安圖帶兵剿捕至鴉酉寨賊勢甚熾接仗失利鳳堯偕其子佩蘇率兵衝擊於盤扣被戕排補美巡檢丁光國花園巡檢戴文煥俱死之時賊陷乾州署同知寶慶府通判宋如椿自刎死河溪巡檢江瑤偕其子朝棟

被戕嗣是邵陽縣里田司巡檢方相袞以迎催糧餉遇賊於巖門
被圍大兵救援不及相袞死之先後事 聞均 賜卹如例相袞
得 旨照知縣例議卹均 賞雲騎尉世職襲次完時以恩騎尉
世襲罔替鳳堯孫鍾漣襲光國子長泰襲文煥子堪襲如椿子鈞
襲瑤孫啟瑞襲相袞弟相宸襲佩蘇朝棟均 贈從九品銜光國
江蘇江都人文煥四川中江人如椿漢軍鑲紅旗人由監生補刑
部筆帖式升司獄乾隆五十八年推升是職瑤安徽休甯人相袞
安徽桐城人由監生捐從九品揀發湖北改撥湖南補是職

右 國史館本傳

朱慶錦 王鳳翔等

朱慶錦湖南武陵人乾隆三十五年五月由行伍拔補湖廣提標中營外委十一月升本標中營把總三十七年隨征金川奮勇殺賊受傷四十年七月升本標左營千總五十二年三月升湖北德安營守備五十六年二月調湖南永綏協左營守備六十年正月隨剿黔楚逆苗於奔尙力戰陣亡時賊攻乾州城陷湖南鎮筵鎮標前營外委王鳳翔遇害又湖南永綏協左營外委蕭世貴禦賊於排補美貴州鎮遠鎮標右營額外外委黃士得貴州銅仁協左營額外外委李廷燦禦賊於十八棧俱死之二月賊仍犯乾州及永綏鳳凰三廳湖廣提標右營千總彭正剛提標中營左哨二司

把總王德鳳湖廣辰州協左營左哨頭司把總王之智隨勦於潭
江河口貴州威甯鎮標右營千總郭廷貴隨勦於嗅腦湖廣提標
前營右哨二司額外外委周上友隨勦於喜鵲山梁貴州黃平營
外委把總龍勝榜隨勦於堡腳場貴州黔西協左營外委口得智朱良佐
隨勦於璧多山貴州清江協右營外委楊光先隨勦於鵲兒嶺貴
州撫標左營額外外委劉直輔隨勦於安靜關湖南永綏協右營
外委杜顯奇隨勦於雲摩嶺湖南武生田慶年隨勦於黃羅坳皆
力戰陣亡事 聞議卹慶錦等俱膺雲騎尉世職襲次完時給予
恩騎尉世襲罔替士得廷燦直輔均卹如例慶錦姪安邦襲德鳳
子正官襲正剛子國棟襲上友子耀宗襲餘襲無考鳳翔湖南鎮

算人世貴湖南永綏人士得貴州鎮遠人廷燦貴州銅仁人正剛
德鳳俱湖南武陵人之智湖南永綏人廷貴貴州大定人上友湖
南武陵人勝榜貴州思南人得智貴州黃平人良佐貴州大定人
光先貴州石阡人直輔貴州龍里人顯奇湖南澧州人慶年湖南
鳳凰廳人

右 國史館本傳

國朝書目考卷之六十一

三

宋如椿 江瑤等

宋如椿漢軍鑲紅旗人乾隆五十九年以寶慶通判權乾州廳同知事明年正月黔楚苗石柳鄧石三保等叛廳苗響應居民爭逃竄如椿召居民諭曰若屬先人邱壟皆在不可棄同知地方官當爲若效死守皆許諾已而見賊勢張甚棄去者大半如椿乃被髮跣足周走號呼勸之守自旦至夕不絕聲訖不聽賊旋攻西門如椿仗劍出禦傷左骹歸遂北向再拜自刎從人張忠在側固遣之弗去亦被創死此二十四日事也方賊攻急如椿度不可支呼巡檢江瑤佩廳印令赴辰州求援瑤出城遽遇賊死其子朝棟挈印送辰歸覓父尸與家屬俱遇害嘉慶八年 敕祀昭忠祠以瑤配

右傳李元度撰

王一魁 饒德豐等

王一魁湖南乾州人乾隆三十四年二月由行伍拔補湖南鎮筵鎮標中營外委六月拔左營把總三十五年擢右營千總三十七年隨征金川敘功三十九年升湖廣督標右營守備四十六年升湖北蘄州營都司五十二年升山東高唐營遊擊五十七年署山東濟南城守營參將是年因失察逃犯降三級以守備用五十八年銓補廣東肇慶協守備五十九年告病回籍六十年正月黔楚逆苗滋事一魁督率家丁隨總兵袁敏悉力堵禦賊陷乾州一魁被戕同時原任湖北荊門州學正饒德豐在籍防堵罵賊遇害是年六月賊擾巖門湖南邵陽縣里田司巡檢方相袞以迎催糧餉

國朝通志卷之三十三
遇害先是賊擾奔尙湖南永綏協右營額外外委杜進陣亡事
間議卹一魁德豐相袞俱廕雲騎尉世職進卹如例一魁子芳壽
襲德豐子自倣襲相袞弟相宸襲德豐湖南乾州人乾隆三十七
年由廩貢生選授湖南慈利縣訓導五十七年推升本職相袞安
徽桐城人由監生捐從九品於乾隆四十年揀發湖北試用四十
三年改撥湖南五十年三月補本職進湖南永綏人

右 國史館本傳

從大雄 高雄勝等

從大雄湖南芷江人由行伍於乾隆三十七年隨征大小金川迭被創功列頭等拔外委三十九年擢靖州協把總四十一年遷千總五十四年升鎮筓鎮標右營守備六十年隨征黔楚苗匪時鎮筓鎮總兵明安圖於永綏廳鴉西地方被圍提督劉君輔遣大雄等救援由西路抄後夾攻敵八級奪爬城梯三十餘馬三匹槍矛甚多嗣以隆圍附近苗匪糾眾滋擾時聚時散大雄帶弁兵追捕至薰蕩突遇匪眾合圍猝中槍傷陣亡湖南宜章營千總高雄勝保靖營千總姜上清永綏協把總楊昌仁永定營把總熊宗柏九谿營把總楊方進撫標左營外委穆上得澧州營外委劉大升貴

州撫標後營外委何良柱湖南衡州協中營額外外委潘世洪俱
死之永綏協千總宋開範亦因傷殞命事 聞均 賜卹如例
賞雲騎尉世職襲次完時以恩騎尉世襲罔替開範廕雲騎尉大
雄子鎮龍襲雄勝子師靈襲上清子維雄襲昌仁子勝奇襲宗柏
子經保襲方進子得龍襲上得子宗謀襲大升子發科襲良柱子
其清襲開範姪世燾襲世洪照馬兵例 賞卹雄勝湖南宜章人
隨征大小金川經五十一戰洊升是職上清鎮草鎮人昌仁永綏
廳人宗柏永定人方進大升俱武陵人上得開範俱長沙人良柱
貴州普定人世洪湖南衡陽人

右 國史館本傳

雍忠伊沙斯 王占爾吉等

雍忠伊沙斯四川乾堡寨額設屯千總乾隆四十六年隨征甘肅
蘭州敘功 賞戴花翎四十九年隨征石峯堡逆回奮勇力戰
賞呼爾博巴圖魯名號五十二年隨征臺灣有功 賞加都司銜
五十六年隨征廓爾喀有功 賞加參將銜六十年隨剿黔楚苗
匪擊賊於滾牛坡陣亡時春三月也嗣是四月屯外委王占爾吉
擊賊於蘇麻寨空銜屯外委入納阿甲擊賊於黃瓜寨屯外委斯
達爾吉擊賊於椰木陀俱陣亡五月空銜屯外委阿忠擊賊於沙
兜寨八月屯外委郎木爾吉空銜屯外委桑結擊賊於楊柳坪九
月空銜屯外委六窟阿忠擊賊於摩手寨俱陣亡先後事 聞均

賜卹如例雍忠伊沙斯王占爾吉斯達爾吉郎木爾吉 賞雲騎尉世職襲次完時以恩騎尉世襲罔替雍忠伊沙斯子扣五思甲襲壬占爾吉子思達拉襲斯達爾吉子板登爾甲襲郎木爾吉弟阿松襲壬占爾吉四川別思滿寨人八納阿甲下孟董寨人斯達爾吉宅壘寨人阿忠漢牛寨人郎木爾吉河東寨人桑結河西寨人六窟阿忠上孟董寨人

右 國史館本傳

王重品 徐綱等

王重品四川成都人乾隆三十七年由行伍調征兩金川拔四川永甯營外委四十二年隨剿石峯堡十一月補督標右營把總十二年二月升建昌鎮標右營千總四十六年四月擢漳臘營守備五十九年二月授貴州黃平營都司五十九年二月授湖北宜昌鎮標中營遊擊六十年四月派剿黔楚逆苗隨總兵張廷彥攻保靖遇賊於上官壩奮擊之賊敗遁追至龍家坳毀其巢尋帶兵六百赴長潭猝遇賊擊斃數十人進攻盤車賊眾二千伏山坳突出重品悉眾力戰縱火焚寨六賊首入因天雨瀟滑墜馬遂遇害同時陣亡者湖北宜昌鎮標中營左哨頭司把總徐綱宜昌鎮標左營右

哨二司把總張捷祖宜昌鎮標左營左哨額外外委劉廷懷湖北
遠安營外委把總劉大用湖北荊州城守營外委趙步高是月攻
勦狗扒巖陣亡者湖南鎮筵鎮標右營千總冉世林鎮筵鎮標左
營左哨二司外委把總米富坤攻勦腊夷寨陣亡者四川投效武
舉樊啟昌貴州上江協左營外委把總張信先後事 聞議卹俱
給雲騎尉世職重品子舜年襲啟昌弟啟榮襲餘襲無考綱湖北
雲夢武舉捷祖湖北襄陽人由難廕補本職廷懷湖北東湖人大
用湖北江陵人步高湖北宜昌人世林湖南瀘溪人富坤湖南鎮
筵人啟昌四川廬山人友信貴州都勻人

右 國史館本傳

趙福 夏尙惠等

趙福湖南零陵人乾隆三十五年由行伍拔補湖南武岡營外委
三十七年隨征兩金川得頭等功奉 旨優敘旋補本營把總四
十六年十一月升本營千總五十六年升鎮筸鎮標中營守備六
十年五月以黔楚逆苗滋事駐守淶溪口遇賊擾高村率兵保護
殲殺甚多因賊繞出其後奮勇衝擊與湖南衡州協外委夏尙惠
同時陣亡是月大兵由四都坪抵長蔭坡湖南鎮筸鎮標前營把
總熊世龍湖南寶慶協把總劉昇湖南澧州營把總劉應聯湖南
沅州協外委把總楊祚興俱擊賊陣亡尋大兵攻克大烏草河賊
寨雲南武舉投效軍營鄧元輔四川阜和協右營外委萬欽俱擊

賊陣亡大兵旋由烏草河進抵沙兜寨貴州威甯鎮標右營千總
張賢四川松潘鎮標左營額外外委馬天輔俱擊賊陣亡又大兵
剿冷風坳賊寨湖北督標左營把總尹大用陣亡先後事 聞議
卹福等騰雲騎尉襲次完時俱給恩騎尉世襲罔替天輔卹如例
福子心梅襲尙惠子大誥襲世龍子宗貴襲昇子守誼襲祚興子
定平襲應聯子世斌襲元輔子宗潛襲欽子玉林襲賢子萬青襲
大用襲無考尙貴湖南衡陽人世龍湖南鎮筵人昇湖南邵陽人
祚興湖南澧州人應聯湖南芷江人元輔雲南昭通武舉欽四川
萬縣人賢貴州安順人天輔四川江油人大用湖北江夏武舉

右 國史館本傳

陳子葦塘官爲余述趙將軍事趙將軍者名福官鎮葦營守備未詳何許人或曰籍永州乙卯春從大帥征苗以麻陽之淶溪爲鎮葦糧道令將軍率兵百人守其地約士卒嚴居民安之五月望溪福制軍兵從狗陂嚴潰歸賊勢張甚聚苗眾近萬人謀絕鎮葦糧道合力攻淶溪時守兵先抽調其半民語將軍兵寡賊勢大宜避去將軍曰兵衛民將統兵爾輩可去吾奉命守淶溪去淶溪一步卽失職苗至將軍怒馬奮槊當先拒敵士卒從之殺苗數十人苗愈集分番更戰辟苗難民憫將軍苦戰不得食潛爲納棗餽將軍揮之曰此豈吾食時耶且爾輩胡不速去賊之不遽追戮爾以我在此也我死合力以追汝無噍類矣民泣涕去麾下五十人感將

軍義無一逃戰至一晝夜溪橋被苗撤士卒死且盡將軍手持過山鳥槍連三放斃苗十餘人指掌焦爛不能持身中數槍時溪水方漲投溪死民隔溪望者咸痛哭是役也以散卒數十戰苗萬人將軍雖死而苗之健者斃無數苗怖曰諸將盡如趙將軍吾屬甯有遺哉急撤去難民數千賴之得全活鎮守糧道亦藉以無阻自將軍死後淥溪上風雨之宵輒聞兵甲戰鬥聲民謂將軍之靈架數椽祀之曰趙將軍廟葺塘曰吾往來淥溪道上過將軍廟懷其義烈未嘗不感歎欷歔也古所稱能捍大患以死勤事合於祀典者將軍庶其無愧也歟

右紀略歸如煜撰

六達色 廣惠等

六達色蒙古鑲黃旗人姓巴里由烏槍護軍果升公中佐領乾隆三十二年隨征緬甸三十九年派勦山東逆匪王倫皆有戰功五十九年揀發雲南以遊擊補用六十年派勦逆苗吳半生五月隨雲貴總督福康安攻克四馬寨老學寨董旺寨等處直抵青竹山梁殲賊無算六達色受槍傷亡六月湖廣提督劉君輔督兵進勦張馬坪苗匪併死抵禦江西鉛山營都司廣惠奮力追捕猝被槍傷歿貴州撫標左營遊擊綽奇亦勦賊於銅仁陣亡事 聞議卹六達色綽奇均廕雲騎尉廣惠奉 旨照遊擊例廕雲騎尉六達色子保海襲廣惠子如成襲綽奇子文通襲廣惠滿洲鑲黃旗人

姓赫舍里乾隆三十二年由前鋒隨征緬甸得功牌一三十七年
調征金川積功遷護軍校五十一年授江西南昌城守營守備五
十二年隨勦臺灣屢著戰績擢本職綽奇滿洲正白旗人姓烏扎
拉乾隆三十二年隨征緬甸新街老官屯諸戰皆與焉三十八年
調征金川先後共百餘戰身被數槍得功牌二十四四十四年
旋預紫光閣宴 賞賚有差尋補烏槍護軍校四十四年 賞戴
花翎委署烏槍護軍參領 十五年授直隸宣化鎮都司五十三
年擢本職

右 國史館本傳

婁太王占 桑吉殿爾吉等

婁太王占四川下孟董寨額設屯把總乾隆五十二年隨征臺灣
有功 賞戴花翎五十六年隨征廓爾喀所至奮勇 恩加遊擊
銜六十年隨剿黔楚苗匪攻大烏草河借空銜屯外委桑吉撒爾
吉歿於陣攻高望坡守備銜屯外委木耳結亦死之時夏五月也
嗣是七月大兵再攻大烏草坡空銜屯把總澤朗空銜屯外委可
凱絨爾吉俱陣亡九月攻龍角峒空銜屯外委肯蚌陣亡十月攻
正大營空銜屯外委則六耳扣太傷亡十一月攻得盤山空銜屯
外委我仰生格耳吉陣亡十二月攻桃花寨空銜屯外委阿噶兒
姜參可納郎俱歿於陣攻普定寨空銜屯外委生根爾吉陣亡

後事 聞均 賜卹如例 妻太壬占木耳結 賞雲騎尉世職 襲
次完時以恩騎尉世襲罔替 妻太壬占無嗣 未襲木耳結子雍思
明襲桑吉撒爾吉木耳吉阿噶兒姜參俱四川乾堡寨人 澤朗河
西寨人可凱絨爾吉肯蚌俱河東寨人 則六耳扣太我仰生格耳
吉俱下孟董寨人 可納郎八角礪寨人 生根爾吉宅壘寨人

右 國史館本傳

坤朋 桑卡等

坤朋四川乾堡寨額設屯把總乾隆五十六年隨征廓爾喀有功
恩賞都司銜並 賞戴藍翎六十年隨剿黔楚逆苗七月於高望
坡陣亡是年四月逆苗擾狗坡坪都司銜桑卡奮勇禦之先是乾
隆五十二年桑卡以屯外委出師臺灣有功 恩加都司銜 賞
戴藍翎至是歿於陣嘉慶元年四月逆苗窮竄結石岡空銜守備
克丕空銜土外委阿思太同歿於陣是月空銜土千總章滾空銜
土把總王相擊賊於火麻營陣亡土把總康泰擊賊於廖家衝傷
亡六月土外委金保納他爾擊賊於廖貢坡陣亡土外委阿皆擊
賊於馬鞍山陣亡九月土外委賈格爾擊賊於黃土坡陣亡事

聞議卹奉 旨坤朋桑卡廕雲騎尉襲次完時給恩騎尉世襲罔
替坤朋子汪扎思甲襲桑卡子郎由泰襲克丕阿思太章滾王相
康泰金保納他爾阿皆賈格爾俱卹如例桑卡四川襍谷腦寨人
克丕四川巴底寨人阿思太章滾王相俱四川瓦寺寨人康泰四
川革布什咱寨人金保納他爾阿皆賈格爾俱四川瓦寺寨人

右 國史館本傳

韓文秀 宋仕聯等

韓文秀山西樂平人乾隆四十六年武進士四十七年選授廣西撫標左營守備五十年升貴州安義鎮標右營都司六十年松桃廳苗匪石柳鄧與湖南永綏廳苗匪石三保句結滋事文秀奉檄剿捕於茶它柳夯等處奮勇進擊傷亡是秋八月也先是閏二月賊擾印家灣湖南永州鎮標中營把總宋仕聯陣亡五月賊擾烏草河巖壁堪貴州畢赤營千總王隆歿於陣六月賊擾竹山坳四川普安營右哨把總李獻廷傷亡七月賊擾椽木樹猿猴寨古丈坪火雞衝等處貴州銅洞營把總陣龍外委吳燦魁古州鎮標中營外委王朝文雲南楚雄協外委何亮古州鎮標中營額外外委

黃鑲俱歿於陣四川重慶鎮標外委譚虎雲南新甯營額外外委
趙筠俱傷亡先後事 聞均 賜卹如例文秀獻廷虎俱膺雲騎
尉仕聯隆龍燦魁朝文亮均 賞雲騎尉世職襲次完時以恩騎
尉世襲罔替文秀子維清襲仕聯子庶光襲隆子國瑞襲獻廷子
秀芳襲龍弟陞襲燦魁子本義襲朝文子世英襲虎子榮富襲亮
無子未襲鑲筠均照馬兵例 賞卹仕聯湖南桂陽人隆貴州畢
節人獻廷四川彭縣人龍貴州安順府人燦魁朝文俱黎平府人
亮雲南楚雄人鑲貴州錦屏人虎四川巴縣人筠雲南新平人

右 國史館本傳

葉攀鳳 沈福榮等

葉攀鳳湖南武陵人乾隆三十八年由行伍隨征兩金川四十三年十二月拔補湖廣提標前營外委四十四年二月擢本標右營把總四十五年二月升本標左營千總五十二年隨剿臺灣擒獲賊首莊大田功列超等奉 旨從優議敘五十四年六月升四川督標右營守備六十年二月派剿黔楚苗匪三月隨總兵達音泰進攻爆木山乘夜薄賊巢多所斬獲平明賊目八九人各執紅白旗鳴金指麾悉眾抗拒攀鳳直前奮斫殲其三人自辰至午戰益力賊驚潰事 聞 諭曰守備葉攀鳳直入賊寨斫死賊目甚爲勇往著查明具奏量加獎賞尋奏明出力情形奉 旨賞戴藍翎

擢松潘鎮右營都司八月攻克烏隴巖進抵楊柳坪力戰歿於陣
時湖北襄陽城守營千總沈福榮亦擊賊於楊柳坪死之是月又
有攻柳夯陣亡者貴州新添營把總王有榮戰於黃毛坡陣亡者
雲南楚雄協外委胡世雄戰於毛豆塘陣亡者雲南督標右營外
委陳鼐戰於古莊坪傷亡者湖南澧州營外委榮大春事。聞議
卹俱給雲騎尉世職攀鳳子肇慶襲大春子有德襲餘襲無考福
榮湖北均州人有榮貴州平越人世雄雲南楚雄人有榮世雄俱
於乾隆三十七年隨征兩金川有戰績鼐雲南昆明人乾隆五十
四年曾出征安南大春湖南澧州人

右 國史館本傳

祁麟劉奉等

祁麟四川西昌人乾隆三十七年由行伍隨征金川有功拔建昌鎮標左營外委三十八年七月補永甯營把總四十二年十月升冕山營千總旋派駐防西藏五十三年九月推升福建建甯鎮標左營守備經四川將軍鄂輝奏留四川補用旋補將軍標右營守備六十年隨剿黔楚苗匪八月攻克烏隴巖進抵楊柳坪擊賊陣亡先是三月攻鴨保寨陣亡者貴州威甯鎮標左營千總劉奉湖北襄陽城守營千總黃國安湖北均房營把總官芝攻滾牛坡陣亡者四川黎維營千總王治雲南新甯營千總羅士榮貴州平越營把總杜宗雄雲南新甯營外委王元貴州都勻協左營外委黃

正高攻巨多坡陣亡者貴州定廣協左營把總鄧國榮外委陳廷
松攻蘭草坪陣亡者雲南武定營千總馬有功攻梁帽寨陣亡者
貴州古州鎮標中營千總蔣有仁攻竹子山陣亡者貴州永安營
額外外委鍾得琛事 聞議卹麟等俱應雲騎尉世職襲次完時
給予恩騎尉世襲罔替得琛卹如例麟子均德襲奉弟兆襲治子
永福襲士榮子有光襲宗雄子文陞襲元子克猷襲正高子松齡
襲餘襲無考奉貴州威甯人國安芝俱湖北鄖陽人治四川成都
人士榮雲南鶴慶人宗雄貴州平越人元雲南新平人正高貴州
都勻人國榮貴州定番人廷松貴州貴陽人有功雲南楚雄人有
仁貴州鎮遠人得琛貴州永豐人

右 國史館本傳

國朝傳狀頁數列編

卷三百五十二 忠義二十七

三

姚國泰 張忠選等

姚國泰浙江鄞縣人由行伍於乾隆三十二年拔甯波城守營外委三十五年擢左營把總三十九年遷右營千總四十九年升溫州城守營守備五十二年隨剿臺灣逆匪殲戮甚夥敘功五十九年升湖廣督標中軍都司六十年湖南永綏廳黃瓜寨苗匪石三保等與貴州松桃廳苗匪石柳鄧句結滋事國泰隨總督福凝等進剿擊賊於楊家寨陣亡鎮筸鎮標左營把總張忠選亦死之時秋八月也嗣是十月大兵攻鴨保寨貴州朗洞營把總舒開彪四川軍標右營外委趙榮貴州撫標左營外委萬元英中營額外外委晏忠倫歿於陣四川重慶鎮標左營外委馬世奉傷殞命十一

月賊擾茶它山湖南靖州協把總楊再金陣亡十二月賊擾普定寨麻馬峒等處貴州大定協左營外委顏得奉四川安阜營額外外委劉玉林俱陣亡是年賊擾尙湖南永綏協右營額外外委杜進陣亡先後事 聞均 賜卹如例 賞雲騎尉世職襲次完時以恩騎尉世襲罔替世奉廕雲騎尉國泰子萬清襲忠選子廷龍襲開彪弟定彪襲榮子天祿襲元英子士佐襲世奉子榮貴襲再金子正考襲得奉子成連襲忠倫玉林進照馬兵例 賞卹忠選湖南保靖人開彪貴州開泰人榮四川成都人元英貴州貴陽人忠倫貴筑人世奉四川成都人再金湖南鎮筵鎮人得奉貴州大定府人玉林四川宜賓人進湖南永綏廳人

右 國史館本傳

國史館本傳

三三

國朝通志卷之三十三

三

熊起鵬 何肇勤等

熊起鵬貴州黔西人乾隆三十七年由行伍出征金川屢敘戰功三十九年三月拔補貴州長寨營外委四十年五月補都勻協左營把總是年十一月升補提標後營千總五十三年八月升朗洞營守備十月調黎平營守備六十年隨征黔楚逆苗九月擊賊於龍角峒石城受槍傷亡是月攻馬腦寨陣亡者廣西提標中營守備何肇勤廣西撫標左營外委童上標攻關廂坪陣亡者廣西梧州協右營千總王勝龍廣西提標右營千總羅應龍廣西提標左營外委馬騰雲攻摩手寨陣亡者廣西賓州千總譚會龍攻竹葉坡陣亡者貴州綏甯營千總楊枝芬攻巖碧山陣亡者雲南昭通

鎮左營額外外委蕭毓瑞事 聞議卹起鵬廕雲騎尉世職肇勤
等俱廕雲騎尉世職襲次完時給予恩騎尉世襲罔替毓瑞卹如
例起鵬子聲元襲肇勤子俊挺襲上標子之奇襲應龍子國義襲
騰雲子維清襲勝龍子全斌襲會龍子雲珖襲枝芬子炤襲肇勤
浙江江山人乾隆四十年七月由行伍拔補浙江衢州鎮標中營
外委洵升本職上標廣西臨桂人應龍廣西馬平人騰雲廣西臨
桂人勝龍廣西宣化人會龍廣西賓州人枝芬貴州都勻人毓瑞
雲南思安人

右 國史館本傳

滕家瓚族弟家泰
施錦等

滕家瓚湖南麻陽人由生員捐布政司理問職銜乾隆六十年正月乾州逆苗滋事家瓚居高村偏近賊燄同兄監生家瑞弟武生家瑤招集鄉勇三十餘名捐貲給糧設卡堵禦有功經湖廣總督福甯奏聞奉旨賜八品職官家瓚自正月至四月共打仗十八次殺賊八十餘名賊恨之專攻高村入武生滕家泰宅索家瓚所在家泰挺身頂認意圖保全一村賊遂磔家泰殺家丁九口九月家瓚禦賊新寨殺賊二旋被刃傷歿於陣先是二月平頭司巡檢施錦以逆苗突至率鄉勇抵禦於石灰窯力戰陣亡閏二月生員王廷槐以投效軍營於亭子關擊賊陣亡五月監生吳開宗以

投效軍營於大烏草河擊賊陣亡先後事 聞議卹家瓚錦廕雲
騎尉襲次完時俱給恩騎尉世襲罔替家瓚子國興襲錦襲無考
廷槐開宗卹如例家泰奉 旨以武生能知大義致遭慘害實爲
可憫著查明伊子年歲奏明賞給官職旋奉 旨賞其子國祥五
品官職願就文武聽其自便家泰湖南麻陽人錦江蘇元和人廷
槐湖南鳳凰廳人開宗四川秀山人

右 國史館本傳

滕家瓚者麻陽縣人也居高村與苗壤接乾隆六十年苗民石三
保等叛大掠麻陽家瓚悉出家財數十萬招集鄉里丁壯數千以
禦苗殺賊無算苗深讐之一日家瓚率眾守溪口苗賊驟圍高村

曰出家瓚乃已於是家瓚之族弟家泰挺身出而語其村人豈可
惜吾一身而延害一村遂大罵賊我卽瓚也賊剝家泰皮家泰罵
不絕口至死不更一辭又執其家口始知非家瓚也瓚聞而馳歸
救之已無及矣家瓚屢以殺賊有功大吏具聞 上命賞以八品
職官一日戰歸福督部親見勞之家瓚有族叔紹光及族人亦身
被創家瓚曰瓚旣受 國恩敢顧家歟且家已破矣苗管也有殺
賊報 國而已復慷慨往溪口與數百人共守之賊大至急攻之
家瓚力關絕援其從者曰賊指名索夫子殆難免矣盍易服而行
以求援也易服而死賊去官軍至求家瓚所在以易服故賊不識
其屍遂收其屍葬焉初高村之圍家瓚從或者言先以妻子寄他

縣故其子得免於難家瓚仗義輕財好施與又善撫眾有信行遠
近之人一時皆慕家瓚名不舉其姓但稱瓚也瓚有力嘗負一鐵
礮擊賊輒殪云

贊曰逆苗蠶動之初大軍未集變發倉卒家瓚獨奮身仗義傾家
貲執干戈以報國何其忠且烈也苗燄方熾遇險要斬旗陷陣
使賊憚而不得騁瓚勞爲多家泰激昂捐軀義代兄死以全一鄉
亦烈士哉帝錫褒封揚光九幽湖南之士雖在鄉閭聞風慕效
共敵王愾瓚爲導夫先聲也

右傳徐鏐慶撰

滕鄉勇家瓚麻陽人苗匪叛時公同弟兄數人糾合鄉兵屢破賊

岩苗人憚之謂曰滕爺爺福文襄王倚爲左右手甚寵信之公爲之畫策指視苗洞山川險易如指掌聞苗人憚之聞公兄弟他出夜中潛兵圍宅全家被害兄弟甚憤激請兵於王會王疾甚他將忌公勇略不與一卒且調撤其鄉兵公乃率兄弟某隻身入苗峒力殺數十人遂被害事聞於朝上甚惋惜贈雲騎尉世襲其家云

右錄宗室昭榘撰

日本書紀卷之三十三

三

朱永清子殿俊孫全福等

朱永清湖南長沙人官永綏協排料汛外委乾隆六十年苗變永清率子殿俊殿珍殿臣孫全福全壽禦之闔家被害時又有劉昇邵陽人由寶慶協把總從征鎮筸苗隸副將某戲下出兵日某逗畱不前昇於眾中出謾語某銜之師至狗爬崖令昇率百人爲前鋒約舉白旗發後援昇策馬轅陣賊不能支將卻退旣偵軍無後繼復悉銳搏戰昇連舉白旗旗失復解所服白帛招之某故按兵不發昇戰死百人殉焉其死極慘酷骨體糜粉無可收瘞者事聞 贈雲騎尉世職祀昭忠祠入主時旋風暴起吹氣作血腥襲眾幾仆其精魂不泯如此又楊通倫永綏廳人監生與同里監生

彭宗聖皆饒於財苗叛出資募鄉勇竝招集難民數百人日夜堵禦力絀俱遇害諸生楊宗璋手刃數苗力竭死游連貴於鴨保寨力護提督劉君輔出重圍負重創死許方遠禦苗力絀赴井死楊勝文罵賊死楊進被圍自經死

右傳李元度撰

朱慧昌 費增運等

朱慧昌浙江山陰人由貢生於乾隆三十九年捐納通判四十九年補授興化府通判五十三年調補漳州府通判五十五年題升臺灣北路理番同知六十年臺匪陳周全等滋事在鹿仔港禦賊被戕彰化城陷典史費增運死之同時被戕者臺灣水師左營遊擊曾紹龍外委任尙標臺灣鎮標左營左哨千總郭雲秀中營千總吳見龍事 聞以慧昌等雖辦理匪案本有疏漏但究係放於王事准照傷亡例 賜卹慧昌增運紹龍尙標雲秀見龍俱廕雲騎尉世職增運江南震澤人由監生於乾隆三十九年捐吏目籤掣福建試用四十九年借補屏南縣典史五十五年調補本職紹

龍福建長汀人由乾隆二十七年武舉揀選營千總隨本省撫標效力期滿三十八年補閩安水師左營千總四十四年升提標中營守備五十三年題補金門鎮標左營遊擊五十五年調補本職尙標福建閩縣人由行伍於乾隆四十二年拔補閩安水師左營額外外委六十年補本職雲秀福建龍溪人由義民於乾隆五十三年擒獲賊目郭漢生奉 旨以千總補用五十五年補雲霄營千總六十年調補本職見龍福建長汀人由行伍於乾隆四十五年拔補邵武城守營額外外委四十九年調補汀州鎮標中營外委五十一年升右營右哨二司外委把總五十六年升本職

右 國史館本傳

程文韜 馮國勝等

程文韜雲南南甯人乾隆三十三年五月由行伍拔雲南曲尋協外委三十五年閏五月補本協把總三十六年十月升本協千總五十三年升臨元鎮右營守備旋調東川營守備五十四年調征安南有戰績五十九年五月升臨元鎮左營都司六十年隨勦黔楚逆苗六月隨雲貴總督福康安出土地塘東山梁進攻賊潰七月賊踞西涼上中下老西七寨地勢險峻文韜率兵直撲其寨斃賊二百餘嘉慶元年正月進攻馬鞍山賊聚眾突至文韜爭先勦殺被槍傷歿雲南鶴麗鎮左營額外外委馮國勝同時陣亡是月大兵攻連雲山大坡等處四川富和協把總馬世傑湖南鎮筵鎮

標前營外委李正祿俱傷亡廣西三里營把總蕭玉亮擊賊於璧
多山陣亡貴州鎮遠鎮標中營把總劉友朋同時傷亡貴州清江
協右營外委蔣文藩擊賊於騎馬山陣亡九月四川松潘鎮標右
營外委周廷玉擊賊於強虎寨陣亡先後事 聞議卹文韜玉亮
文藩廷玉世傑正祿友朋俱廕雲騎尉國勝卹如例文韜孫一清
襲世傑子正卿襲正祿子文蛟襲友朋子朝勇襲文藩孫道純襲
玉亮廷玉襲無考國勝雲南麗江人世傑四川成都人乾隆五十
五年拔阜和協右營外委五十六年隨征廓爾喀五十七年正月
進攻聶拉木奪碉卡數十功列超等五十九年補本職正祿湖南
芷江人玉亮廣西賓州人友朋貴州黃平人文藩貴州鎮遠人廷

玉四川成都人

右 國史館本傳

國朝書影類錄初編

卷三百五十七

目錄二十一

四

馬匡周 李占元等

馬匡周雲南元江人由行伍於乾隆三十年拔臨元鎮標右營外委隨征普洱屢次殺賊有功三十八年擢把總四十三年遷千總五十二年升廣南營守備五十九年調撫標左營守備六十年隨勦黔楚苗匪攻烏隴等寨擒獲有功嘉慶元年擊賊於馬鞍山陣亡貴州下江營把總李占元天柱營把總蕭倫擊賊於社神堂俱陣歿時春正月也嗣是二月賊擾高吉坨貴州大定協左營把總柴應登陣亡賊復擾火里坪四川越嶲營額外外委鍾得勝陣亡三月賊擾貴道嶺雲南開化鎮標右營額外外委周紹夏陣亡賊復擾茨巖雲南大理城守營額外外委黎正榮陣亡七月賊擾人

坪山六品頂帶楊玉林奮身衝擊陣亡賊復踞小竹山雲南八寨
衛千總藍紫瑩爭先攻擊偕貴州遵義協標右營外委杜雲龍歿
於陣九月貴州丹江營左哨千總王玉佩擊賊於鐵廣坪奮不顧
身中刃傷陣亡廣東潮州城守營千總邢雄高擊賊於強虎寨陣
亡廣東高州鎮標左營外委易樹邦亦傷亡十一月賊擾馬頭山
四川川北鎮標右營額外外委雍純修奮勇禦之戰歿是年賊踞
乾州大兵由全璧嶺進勦至馬鞍山山路叢雜廣東潮州城守營
把總嚴有勝戰歿廣東撫標左營千總黃國喜攻山後石隆等寨
力竭陣亡先後事 聞黃國喜得 旨加一等議卹餘 賜卹如
例均 賞雲騎尉世職襲次完時以恩騎尉世襲罔替樹邦廕雲

騎尉匡周姪應龍襲占元子清恩襲倫無嗣未襲應登姪雲驥襲
玉林子志和襲紫瑩弟紫玉襲雲龍子思名襲玉佩子映榮襲雄高
子光熙襲樹邦姪熙賢襲有勝子元亨襲國喜子廷標襲得勝紹
夏正榮純修均照馬兵例 賞卹占元雲南雲南府武舉人倫貴
州鎮遠人應登平遠州人得勝四川越嶲廳人紹夏雲南文山
人正榮太和人玉林四川邛縣人由行伍隨征石峯堡回匪奮勇受
數傷乾隆六十年檄赴黔楚軍營屢著勞績 賞戴藍翎並給是
銜紫瑩雲南昆明人貴州古州籍雲龍貴州遵義人玉佩鎮遠人
由行伍洊升是職雄高廣東海陽人由行伍洊擢把總隨征臺灣
屢著戰功升千總嘉慶元年攻克苗寨及收復乾州俱在事有功

賞戴藍翎樹邦廣東吳川人純修四川閬中人有勝廣東增城人
國喜南海人由行伍洊升是職

右 國史館本傳

按 國史王玉佩別有本傳附見嚴有勝黃國喜二人王玉佩別有本傳附見

楊王林藍紫榮杜雲龍雍純修四人嚴有勝又見官啟文傳均按月編列次卷

温布卡襍等

温布四川綽斯甲人乾隆三十二年隨土舍擢爾佳木燦出征金川攻宜喜山梁敘功 賞土都司職銜嘉慶元年調勦黔楚逆苗二月於三堡嶺擊賊陣亡四月逆苗踞全璧嶺抗拒大兵空銜土把總卡襍奮勇擊賊陣亡賊擾連峯坳大兵搶占山梁截斷賊路冒雨追擊斃賊甚夥空銜土把總舍拉陣亡六月大兵攻松桃乾堡土外委生格傷亡攻乾州巴旺土把總客依傷亡九月攻大壩角格布什咱土都司朗結傷亡十月攻平隴巴底土把總龍爾陣亡革布什咱土把總本太黨壩土守備納平結同時傷亡十一月攻馬頭山巴旺土外委甲噶太陣亡事 聞議卹温布龍爾甲噶

大俱廕雲騎尉襲次完時給恩騎尉世襲罔替生格朗結本太納
平結俱廕雲騎尉世職卡襍舍拉卹如例温布子思達拉襲餘襲
無考卡襍四川巴底寨人舍拉四川沃日寨人生格四川乾堡寨
人客依四川巴旺寨人朗結四川革布什咱寨人龍爾四川巴底
寨人本太四川革布什咱寨人納平結四川黨壩寨人甲噶太四
川巴旺寨人

右 國史館本傳

國朝耆獻類徵初編卷三百五十八目錄

忠義二十八

曾攀桂 王吉鼎

蕭水清 子其馨等 黃義峯等

劉大成 吳國華等

黃仁 林江等

邱作訓 張鼎等

黃應文 子揆等

王翼孫

色凌額 德勝等

劉景齡 蔡國棟等

官啟文 劉永清等

揚瑪太 格角雍忠朋等

楊治凝 陳高龍等

羅廷弼 任作慧等

曾眷 羅萬年

章憲 趙朝珍等

蕭永齡 張德輝等

劉天錫 王邦甯

邢雄高 最有勝等

王玉佩 楊玉林等

花連布

孟景源 趙瑗等

張大鵬 子希賢孫應朝等

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

國朝耆獻類徵初編卷三百五十八

通奉大夫前署江西巡撫江西布政使司布政使湘陰李桓輯

忠義二十八

曾攀桂

王吉鼎

曾攀桂貴州都勻府人由武舉揀發廣西乾隆二十七年補東蘭營千總三十三年擢慶遠協右營守備四十四年升江南廣德營都司四十六年升提標後營遊擊五十三年升中軍參將五十八年升湖北鄖陽協副將六十年八月署宜昌鎮總兵十二月宜都枝江兩縣奸民聶傑人劉盛鳴等以防範苗匪爲名聚眾謀爲不軌託稱白蓮教私製紅白布帽及火器軍械拒捕滋事時攀桂駐

宜都城內祇有兵五十名署巡撫惠齡撥滿兵五十名鶴峯州兵
一百名檄攀桂會同防禦珠隆阿色拉布等督率剿捕嘉慶元年
正月攀桂進剿白田賊卡克之戮四十餘名二月賊由謝家衝肆
掠犯望佛山大營攀桂偕守備王吉鼎迎擊之戮二十餘人偪至
山坳遇伏匪千餘人突出攀桂奮勇前擊連中數槍墜馬陣亡吉
鼎亦衝入賊隊手刃數人中槍陣亡事 聞得 旨俱著加一等
議卹攀桂 賞騎都尉世職吉鼎 賞雲騎尉世職襲次完時均
以恩騎尉世襲罔替攀桂子體乾襲引 見以都司用吉鼎子廷
桂襲吉鼎湖北南漳人由襄陽鎮標外委以軍功洊升是職

右 國史館本傳

蕭水清

子其馨等
黃義峯等

君蕭氏名水清廣銓其字廣東平遠人祖炎福建興化府知府父
應銳貴州平遠州知州君以國子監生得縣尉簽掣湖北乾隆乙
巳楚省大饑君奉檄襄理武昌屬邑振務補鄖陽府保康縣典史
嘉慶元年二月白蓮教謀反姚之富齊王氏起襄陽曹海揚郝中
耀起房竹王蘭曾世興起保康各數萬眾保康賊與襄陽房竹持
角齊王氏尤鷲勇剽掠州郡與王蘭等會於保康之白谿溝保康
巨奸楊昭受妖婦僞封爲內應邑人有密告者君詭以檢查丁籍
突入昭室接其篋得賊移書喝令武士縛之押赴獄實以法徇於
眾曰逆賊罪惡滔天賊黨楊昭已正典刑敢有潛謀不軌者與之

同罪賊深銜之會苗寇作亂守城營兵調遣四出縣令某選懦畏賊藉他事出境城中空虛賊乘其隙君給印札百餘道曉諭四鄉激以忠義團練鄉勇殄殲寇賊事平之日各旌其庸鄉勇未集賊已大至直抵郭外吹角數聲大呼渡河瞬息登岸旌旗糝雜飛矢擊彈紛集如雨君率眾登陴城故土築高不踰丈冒賊鋒刃殺傷過半然猶慷慨死守五日夜不少懈賊肉薄緣梯而上城上人飛亂瓦擲巨石或用長矛刺其股或用鐵綆曳起梟其首於竹竿尋遣詣郡乞師爲賊邏者所覺懼郡兵至圍益急二十日平明君周城巡視知事不可爲乃旋署時君次子其薰季子其芬以應邑試歸粵君之夫人及長子其葵等皆在署君語之曰城且陷吾義不

屈爾曹其自爲計夫人林氏日報 國盡忠願相從地下其馨曰
古人父死忠子死孝今日之舉兒敢忘諸又徧問家人皆願從死
無異言君笑曰能如是乎吾死不朽矣遂出城已陷君遇賊於縣
治前罵賊不屈死之同日殉難者學博黃君義峯吳君珍義與賊
巷戰力盡被執不屈死之君長子其馨幼子其芳族子祚超妻弟
林良鳳力戰並死夫人林氏子婦韓氏孫女瀛仙及僕婦婢女等
皆闔戶自刎賊入見積尸滿室幼穉二人嘔於尸側問之一爲君
女一爲君長孫步丹年皆八歲以矛刺之殞絕於地明日賊退復
蘇林良鳳之弟良材避賊獲免攜之而去人以爲忠誠所感云保
康民人旣殮君尸方謀所以復君讎者三月將軍恆瑞總兵文圖

以秦兵援楚復竹山解房縣圍直趨保康有烏呼埡者縣西之峻嶺也林密路險一夫當關下臨粉青河水深浪急一望浩淼賊據形勝官軍屢戰不利次日平旦賊忽奔潰官軍乘之遂過河領隊侍衛呢瑪善督諸軍並進見有頭插小青箬籃人蔽山而來呼聲震天地比哨探始知爲君印札所集鄉勇由樵採小路攻賊擒賊首王蘭曾世興獻於軍門所有插小青箬籃者印札中所示別賊之號令也將軍聞之歎息良久並以君罵賊不屈闔門殉節事聞於朝奉旨恩卹保康死事人員贈君縣丞入昭忠祠給世職以君長孫步丹襲雲騎尉夫人林氏等並祀節烈祠長子其馨等並祀昭忠祠歲時官爲奠祭旣而其薰聞難自粵至楚歸君之

喪百姓擁柩而哭皆曰此蕭公也爲吾民而死何以報之有仆地
慟絕者鄖陽守王君敘其事書於碑時人作詩紀之爲生氣千秋
集余在都下見之並遇君之故人得詳述其顛末云

外史氏曰烈士貞臣蹈湯赴火效忠之迹或殊處臣之理則一良
以半通之綬莫非王臣五斗之粟亦叨恩寵守其志而不變行乎
心之所安奮厲其智勇致命於危難如蕭君者偉然烈丈夫矣若
其全家引決婦孺死忠健兒能磔石以投人國殤爲厲鬼以殺賊
雖古史所載奚多觀焉

右傳盛大士撰

國朝文獻通考卷之...

...

劉大成 吳國華等

先生諱大成字先己一字耐村瑞州新昌人也代有偉人父曰校芳篤雅稱庠序母氏熊知書能文先生生而穎異甫能言母授以孝經四子書輒成誦比就傅愈勤學夜則侍父母聽講解不倦父嘗命督耕則挾冊誦田閒九歲母卒哀毀過成人事繼母熊曲得其歡父遘危疾以身代禱尋愈及父卒毀幾滅性教育諸弟悉周摯有同母弟三歲失母攜其食寢十餘年後弟卒遺三女養嫁之如所生幼有文名爲諸生課甚辛丑成進士適籤選屆期以母老不忍離母諷以祿養始就選授湖北竹山知縣甫下車訴牒百餘逐一剖決開道民感悟多不願終訟者居官儉約所需一不累民

民甚安之竹山古上庸地僻居萬山中界川陝最易藏奸明季爲流寇出沒巢穴先生力行保甲甫月餘值枝宜教匪猖獗襄鄖所轄奸黨潛結城守者悉戒嚴竹山故無城雖設專營駐防因勦苗匪調去畱者僅百名先生捐廉募鄉勇製軍器掘濠編柵事未集道偵役捕得匪黨十餘人鞫之有約期搶據竹山語卽飛牘告急集僚屬謀曰吾守具未完爲賊乘必困與坐以待困不如出據險要相機堵禦皆曰然方派撥閒賊已據保康與接壤先生乃以與史吳國華守縣治守備孫掄魁別守隘所有武陽堡界保康親率眾當其衝納縣印於懷語弟大猷曰吾守此土與存與亡分也倉卒未能迎養心常耿耿汝速歸善事老母爲我謝母兒此生不能

再侍膝下矣無它囑旋據險設伏遶健足偵探終夜無少休而賊已越後嶺入縣焚掠矣國華不能支與掄魁先後至武陽先生率之赴勦道遇賊槍斃其匪十數賊來益眾遂潰退保武陽孫與吳議請援先生曰邑已失待援需時何益吾死此決矣孫吳出點兵勇不滿百漏已三下親信梅蘭馨者獨侍側令出探隘口比反先生已肅衣冠佩印綬北向自經矣孫吳踵至愕然亦殉焉時嘉慶元年二月二十二日也年六十七事 聞得 旨褒卹 贈知州銜給恩騎尉世職及祭葬銀建昭忠祠於本郡始先生以名諸生孝友恂恂文章著鄉閭及登黃甲宰嚴邑莅事未百日不獲竟其用然臨大節就義從容卒膺 國恩榮列祀典爲科名增重於戲

可謂完人也。已余識先生晚當之官竹山時餞之京邸聽其言藹然仁者閱一年而聞其以死事獲旌旣喜忠烈之克昭而悲其遽逝又幸生平之得親炙其人也故爲之傳子三人並文而賢曰璧者庚午副舉與余善

右傳辛從益撰

黃仁 林江等

黃仁四川大竹人由舉人於乾隆五十五年選安徽銅陵知縣引見調補湖北當陽知縣嘉慶元年二月仁聞縣屬有教匪緝獲之甫收禁嚴鞠賊黨有在東湖者約當陽城中軍流人犯及附教之書役勾通搶劫仁見賊倉猝至今令其子士騏匿印赴湖廣總督畢沅軍營呈之城陷仁被戕 諭曰當陽逆匪滋事不過烏合之眾見在大兵雲集無難力就殲除惟該縣黃仁當賊眾攻城之時見勢危急令其子士騏改裝藏印乘間逸出赴畢沅處呈繳旋因城破被戕實堪嘉憫著加恩照知州例議卹三月長陽西界榔坪九洲毗連巴東歸州有賊林之華戈統希糾眾數千焚掠各鄉村捐

職縣丞林江與署巴東縣知縣黃應文等往剿之二十六日抵沙平林之華遣其黨李問祥等三十四人僞爲鄉民狀齎米肉犒師江同應文等察其詐知賊欲乘夜劫營問祥等潛爲內應卽軍前斬之戒嚴以待是夜賊果至我兵擊退之次日至查角石突遇賊數千值大雨火藥淋溼我兵不能施放槍礮賊圍益急江手刃數賊殺執旗賊目一與應文及遊擊邱作訓俱歿於陣作訓應文自有傳二年三月楚匪由桐柏之出山店夜竄入河南葉縣保安驛驛丞張煥集勇拒之手持槍傷數賊賊圍之急于履謙力救護賊以棍擊之跌入溝煥受刀槍傷二十三處俱透膜入骨死煥殺賊時卽懷印賊剝其衣印亦劫去事 聞 上嘉之照知縣例議卹

以示獎勵仁照傷亡例給雲騎尉世職江煥照陣亡例給雲騎尉
世職襲次完時給予恩騎尉世襲罔替江浙江上虞人煥安徽婺源人議敘未入流乾隆五十一年選本職

右 國史館本傳

邱作訓 張鼎等

邱作訓福建連城人由武舉補浙江提標中營千總三十七年升
廣東英德青岡汛守備四十四年遷順德協中軍都司四十八年
升湖北宜昌鎮標水師前營遊擊六十年苗匪焚掠湖南永順縣
之梳頭溪古丈坪田家岡等處作訓以巡撫惠齡檄調弁兵協防
有功嘉慶元年何宗訓股匪犯東湖當陽縣與枝江宜都賊聶傑
人等相接應當陽城破作訓偕巴東縣知縣黃應文東湖縣知縣
何學青統兵克復之擒宗訓及其子示能復於楊家垵剿其餘黨
至羅衝口殲擒甚眾惠齡等亦擒獲傑人於深衝口時賊黨林之
華戈統希糾眾於長陽縣榔坪九洲焚掠將出深衝口以應灌灣

腦張正謨股匪惠齡以作訓擊東湖賊甚勇檄常德營守備張鼎
守長陽而令作訓與黃應文率兵進剿至沙坪之華遣其黨僞爲
鄉民犒師藉作劫營內應詰問得實悉誅之是夜賊果至作訓擊
退之次日追至查角石賊悉眾合圍作訓手刃數人歿於陣時張
鼎行至秀峯橋遇賊奮擊伏發鼎轉戰益力受重傷墜馬死是月
總兵鄂輝等率陝兵擊賊於襄陽府屬瓦子岡殲斃甚夥陝西宜
君營額外外委郭章手刃七人力竭死之先後事 聞得 旨邱
作訓張鼎著加等議卹郭章照守備例議卹均 賞雲騎尉世職
襲次完時以恩騎尉世襲罔替作訓子岡襲鼎子桂林襲章子鳳
朝襲鼎直隸順天府人章陝西中部人由行伍於乾隆三十七年

隨征金川以功洊升是職

右 國史館本傳

黃應文 子拔等

黃應文直隸天津人由吏員於乾隆三十五年考授八品職銜四十年捐納府經歷分發湖北試用四十二年補德安府經歷五十二年派運閩省軍米咨部議敘五十六年署黃陂縣知縣五十八年署江夏縣知縣五十九年署巴東縣知縣嘉慶元年教匪聶傑人糾眾滋事擾及枝江宜都境而宜昌屬之宋家嘴對馬山各有人屯聚分擾當陽遠安東湖等境與聶傑人等相接應文奉檄帶兵四十名鄉勇四百餘名會營員堵剿尋偕東湖知縣何學青遊擊邱作訓破賊於宋家嘴殲二十餘人俘楊添祥等十一人沿途盤獲奸細楊家學等四人遂移兵攻對馬山殲賊首何宗訓及

其子示能等十五人俘二十三人又敗宗訓餘黨於楊家垸殲二百餘人又敗之於羅家衝殲百餘人俘百二十餘人總督畢沅以聞諭曰署巴東縣黃應文帶兵殺賊甚屬出力已用硃筆圈出著該督撫將該員存記遇有應升之缺升用以示獎勵是時巡撫惠齡已擒獲聶傑人移師剿鶴灣腦逆首張正謨而傑人黨林之華等糾眾擾長陽西界及巴東歸州毗連之榔坪九洲四出焚掠且聲言欲出深衝口救應張正謨應文奉檄往剿率其長子廩生揆偕遊擊邱作訓候補縣丞林江行抵沙坪林之華遣其黨李問祥等三十四人僞作鄉民齋米肉犒師應文疑其詐執訊之究出賊欲乘夜劫營藉爲內應卽軍前斬訖戒嚴以待是夜賊果至應

文等徹夜勦禦賊敗走翌日追至查角石賊伏發於霧雨中蜂擁而至我兵槍礮齊施擊斃數百人會雨甚火藥淋溼賊圍益急邱作訓死之事詳作訓傳應文猶奮力勦殺手刃數人江並殺執旗賊目一名揆亦殲擒賊目數名眾寡不敵應文父子及江俱受重傷歿於陣時當陽縣知縣黃仁聞縣屬有教匪緝獲之甫下獄賊黨在東湖縣者約當陽城中軍流人犯及附近之書役勾通劫獄仁於倉猝聞令其子士騏匿印赴總督畢沅營呈繳城陷仁被戕襄陽呂堰驛巡檢王翼孫以聶傑人餘匪由枝江竄擾率兵勇堵禦陣亡先後事 聞 諭曰知縣黃應文及伊子廩生黃揆殺賊捐軀殊堪憫惻著咨部加等議卹並著查明黃應文如尙有子嗣

於事竣後送部引見黃仁得 旨照知州例議卹王翼孫 賜卹如例均 賞雲騎尉世職襲次完時以恩騎尉世襲罔替應文子振襲江仁未襲翼孫子嘉福襲江浙江上虞人仁四川大竹人由舉人於乾隆五十五年選安徽銅陵縣知縣引 見調補是職翼孫江蘇長洲人

右 國史館本傳

王翼孫

嘉慶元年春湖北襄陽縣黃龍壩賊起三月二十九日至呂堰驛
巡檢王君翼孫以拒賊死事 聞有 旨下部視縣丞例議卹入
祀昭忠祠 賜祭葬照四品以下 予雲騎尉世襲罔替於是父
兄收其遺衣以三年正月日招魂葬於吳縣楞伽山塢其兄芑孫
具行狀事實來匄爲文以揭諸墓嗚呼 國家卹死褒忠之典至
隆極備入祀昭忠者欽天監擇日工部作主翰林院立傳君以微
員下秩休有烈光與公卿之死綏者等又奚借於貞石之鐫雖然
祠祀領於太常史傳存於祕院外人不能盡見也何以表忠義之
節彰彰焉若揭日月而行是表亦曷可少哉君負才跡施不屑爲

科舉之業少善騎射能開五石弓乘騎能日行二三百里乾隆五十年考充宗人府供事 玉牒成議敘發湖北補興山縣典史緣失察驛卒毆死人落職尋復原官仍發湖北效用補授今職當是時枝江賊起詭稱白蓮邪教當陽遠安應之鄖陽宜昌施南荊州諸府州縣所在嘯聚其起於黃龍壩者勢張甚而呂堰當驛道之衝無城可守君聞募鄉勇潛設戒備而賊已大至君率眾迎擊殲其先鋒三人遂登大橋以禦賊賊來益眾鄉兵各潰散去君手刃數賊賊不敢近用矛環刺受傷重跳而投於水賊憤鉤得君猶瞋目怒罵不已因攢刃殺之毀其尸於橋下比賊退吏人廖之義往求其尸不獲見橋下沙中有衣跡之乃君迎擊時所衣者因取以

歸而是年八月官軍獲賊俞宗武搜其懷得君巡檢司印又自供親刃驛官狀甚悉於是君之尸雖不可得而死節大著於當世方事之殷也胡君齊崙知襄陽府事檄君入城君曰某職守在呂堰堰我死地也不往及將戰曰吾死矣作家書以別父兄付弓兵劉祿又命祿先詣官廨取印以上於府蓋君之見危授命卓然不惑其志素已定矣豈比於勢不獲已而始爲湛身絕脰之舉歟君短小精悍少日入故昭信伯李君奉堯幕中遊歷南北所過山海關古北口皆能記其扼塞指其形勢又從入閩夜捕盜昏黑墮海漢中援巨石而出又嘗乘騎過通州馬逸爲車壓幾殆其後馳驟如故不以自悔及署長樂縣丞會湖南永綏苗民亂縣令圍鄉勇不

給口食吏且以爲奸民憤怒君條列數事上之不行及君去長樂民果變君初至呂堰鎮預立禦賊章程一鄉勇十名設頭目一名頭目十人設總頭目一人各相鈐制統於巡檢司一附近村落單丁獨戶皆遷於鎮選壯者充鄉勇以備遣用一設哨探一定功過一儲軍食一禁遷移鄉勇之外居民各安畊種毋聽傳聞輕去失業一鄉勇團聚各習技藝不得飲酒賭博蓋其區處經畫類如此若得一旅之師一城一障而守之必能挫鷓張之勢收廓清摧陷之功而僅僅捐軀蹈刃以身殉職良可悲已嗚呼君負才不偶巡檢九品官耳初無死綏之責社稷人民之寄而忠義所激計不旋踵世之擁連城握重兵者聞之宜如何其愧怍而見君之備膺

卹典賞延於世又宜如何感激奮勵歟自君歿殘喘游魂馳走秦
蜀聞大軍已分道合圍文武在事之臣咸以君爲職志韡刀而戰
取螯弧而登滅此朝食當在旦晚聞君旣獲死所而餘風遺烈猶
足以鼓孱夫懦將之氣俾宏濟於艱難則君亦可無憾於九京焉
矣君字以燕江蘇長洲人十世祖爲明大學士文恪公整曾祖續
縣學生祖世琪乾隆十二年舉人官欽縣教諭父寅熙 封登仕
郎如君官娶尤氏生女一無子以芑孫次子嘉福後其卒也年方
四十二云

右墓表王昶撰

乾隆六十年十二月余視學貴州還京以小除夕抵湖北之呂堰

曠黑中有迎拜馬首者余起驚詢則吾友王君芑孫之弟呂堰驛
巡檢王翼孫既抵館揖之入其所言皆民間疾苦與差務駱驛貌
憔悴而公服破壞余悚然異之已復出其寄兄芑孫之書與一文
楮余愍其宦貧出囊中金持贈以別行數驛作書與湖北大吏言
君之賢大吏復書云君懇直屢忤上官上官及其同官無悅之者
余又爲夷然不憚者久之越五月得芑孫書則君以禦賊不屈死
矣方嘉慶元年正月湖北逆民猝起於是鄖陽荊州宜昌施南諸
府州縣所在如蝟毛襄陽府屬南漳等縣亦相應和旋起呂堰當
南北之衝無城郭可守君日夜焦灼屢啟上官求擘畫皆不報君
不得已自起行村鎮爲畫守禦策時縣中官吏捕邪教嚴株及里

黨一方囂然具擔索欲移徙君急慰止之揭榜曉示俾耕種如常
會賊已起襄陽之黃龍壩君預立備賊章程八條一凡鄉勇十名
設頭目一人頭目十人設總頭目各相轄而統於巡檢司一附近
小村口戶單弱悉遷呂堰鎮一鄉勇能自食者聽其無食之人爲
設飯廠立糧餉總頭目司其事他若擅自遷徙及飲酒賭博皆有
厲禁部署甫定賊大至攻呂堰三月二十九日君出迎擊禽賊目
劉方達劉漢德陳起蛟三人縛斬驛前又自作官文書詣當事告
急然賊勢益盛君所部寡弱度不可守乃作書別父兄付弓兵劉
祿持去且便取巡檢司印上府又令從人徐升聞道行而身上大
橋禦賊頃之復令小吏廖之義趣劉祿之義走未數步見賊已過

橋有數賊方環視橋下之義意君已投河死遂跳免比賊退之義
還見橋下沙壓露衣乃君迎擊賊時所著繼襄陽知府跡徐升至
辨認亦如之義言八月某日賊再陷呂堰領兵者從賊手獲君巡
檢司印賊目俞宗武自言親殺驛官且言驛官從橋上獨身接戰
連刃數人既中矛創甚自投於水賊眾憤鉤出之並褫其衣刀槩
叢集猶罵不絕口乃死君死節事至是乃大白然前此或傳君已
死或以爲未死而余則斷斷然必君之死蓋立談數刻而見君之
性定也自君死賊過呂堰無不顛敗若有躡之者輒驚曰此巡檢
君之靈爲立廟羅拜乃去或曰君遺骸亦賊所營葬則君族弟仲
光至呂堰訪問所得也事 尚存 旨入昭忠祠依縣丞例議卹

文視四品以下世襲雲騎尉襲次完更襲恩騎尉罔替 朝廷所以報死節之臣可云厚矣嗚呼君一巡檢耳慮事之周臨命之定如此然則大吏守 天子封疆而數百縣起烏合未定之賊任其往來豕突化爲萬千蔓延無已以致傷我實心任事之吏與守死不去之民及事已過或又以輕敵債事之咎委之則平日以君爲憇以君爲忤上官者宜也又吾聞湖北之宜昌四川之達州逆民起事之始皆因州縣偏迫藉此逃死而君以一巡檢獨善拊循其民無事則勸之耕桑有事則偕爲守禦至危苦萬狀而民卒不忍舍去迨君死而一鎮之民死於賊死於路死於飢寒者亦遂無庶類嗚呼君可謂賢也已且大吏不能禦賊而巡檢禦賊大吏能遷

延避賊而巡檢獨當賊之衝日夜殺賊奮不顧身乃力竭而爲賊
所殺此奇節也亦僅事也余爲天子史臣而不能傳奇節志僅
事則不稱職是懼故因君兄芑孫之請而爲直書之以揭諸其墓
又幸余之尙及藏君並尙能斷君之必死也若君平日行事以迄
世系生卒歲月詳秦兵備瀛與君兄芑孫所爲行實及狀中不更
贅

右神道表洪亮吉撰

色凌額 德勝等

色凌額滿洲正白旗人姓鈕祜祿吉林烏拉馬甲原隸鑲黃旗於
乾隆三十九年九月挑額外護軍上虞備用處拜唐阿四十六年
四月放藍翎侍衛四十九年七月升三等待衛五十二年十二月
升二等待衛五十三年八月因剿平臺灣逆匪奮勇出力 賞雲
騎尉世職六十年三月擢乾清門頭等待衛是月調征黔楚逆苗
由下老虎巖進剿墨池汛殲賊甚多四月進剿榔木陀山梁克之
遂乘勝進兵黃瓜山由登高坡前進冒雨力攻克其寨五月由小
紅巖進攻克獲大小喇耳山梁嗣復由雷公山追擊爭先攀陟奮
勇窮追連克苗寨六十餘木城石卡三十五殲賊甚眾得 旨獎

賞六月進偪河兜寨由四路口繞攻盤喇多喜等寨尋又設伏兵於盤基坳山澗出其不備槍箭齊發賊潰敗嗣復由土地塘東山梁進攻衝截賊眾七月分兵進剿古哨營殲賊五百餘奪其山梁八月色凌額偕貴州清江協副將德勝攻克上下狗腦坡九月德勝復進剿茶宅山梁奮力直上奪其寨十月色凌額德勝復偕護軍參領巴圖魯常山進抵高多寨圍攻逆苗吳半生力屈降之遂乘勝追擊色凌額繞至龍角峒北面山梁德勝常山由正路進偪分投剿殺其克寨二十餘十一月大軍直趨天星寨色凌額與德勝分路進擊克獲垂藤董羅苗寨緊偪鴨保寨色凌額直撲賊巢生擒逆苗吳半生賊黨吳八月尋復由地良坡進取平隴色凌額

借德勝常山分路進剿克獲對面高斗山梁嘉慶元年正月色凌額擊賊於擒頭坡及騾馬峒坡脚等處盡克之二月賊苗由連雲山來犯色凌額德勝常山分投力擊賊稍卻遂繞攻桃花寨抵騎馬兒山苗匪併力抗拒眾數萬勢甚熾常山德勝俱中槍歿色凌額以奮勉有功 賞蟒袍一襲三月色凌額由高吉陀撲剿克其石卡四斃賊數百尋又攻取長吉山石城身先士卒殲斃逆苗四五十人中槍歿十一月三等侍衛巴彥察擊賊於平隴窮力追剿亦中槍陣歿先後事 聞議卹色凌額又給一雲騎尉俟前 賞給雲騎尉准襲一次後再給子恩騎尉世襲罔替德勝常山均 恩子騎都尉俟襲次完後給子恩騎尉世襲罔替巴彥察廕雲騎

尉色凌額子托謨洪阿襲德勝子蘇都凌阿襲常山姪尙安布襲
巴彥察子達蘭泰襲德勝蒙古鑲藍旗人姓兆雅素特乾隆三十
年由閒散承襲雲騎尉游擢本職常山滿洲鑲藍旗人姓瓜勒佳
乾隆五十二年由前鋒隨征臺灣有功補護軍校五十六年出征
廓爾喀敘功列超等游擢本職巴彥察滿洲正黃旗人姓敖拉

右 國史館本傳

劉景齡 蔡國棟等

劉景齡漢軍鑲黃旗人由武舉於乾隆三十四年授鑾儀衛整儀尉三十五年遷治儀正三十九年授陝西建安堡都司四十三年升甘肅巴彥戎格營遊擊調提標中軍遊擊四十六年隨征靜甯州回匪力戰擒賊以功最升湖北德安營參將嘉慶元年五月李文高股匪踞胡家砦將侵孝感勾結文家大塘賊文禮成等四出焚掠直徧楊店漢陽知府圖桑阿率兵剿之賊散去景齡聞孝感有警偕湖北德安營把總蔡國棟率兵六十人馳救旋會江西遊擊福凝阿分路進剿景齡與賊遇奮力迎敵殲戮甚眾時天已暮兩甚景齡冒雨攻擊賊匪千餘人突出合圍景齡歿於陣蔡國棟

亦死之先是江西南安營把總黃超雲擊胡家砦賊於黃金廟陣
亡是時福凝阿等進兵至劉家大灣遇賊掘取所窖糧穀擊之江
西南贛鎮標把總馬文亮殲賊數人墜塘死先後事 聞得 旨
劉景齡照副將例蔡國棟黃超雲照千總例議卹馬文亮 賜卹
如例均 賞雲騎尉世職襲次完時以恩騎尉世襲罔替景齡孫
每凝襲國棟子敦壽襲超雲子安瑣襲文亮子國禎襲國棟湖北
江夏人超雲文亮俱江西贛縣人俱由行伍擢是職

右 國史館本傳

官啟文 劉永清等

官啟文四川松潘人乾隆五十二年由行伍隨征臺灣逆匪著有勞績五十三年拔補四川松潘鎮標左營外委五十七年隨征廓爾喀攻克熱索橋殺賊有功五十八年四月調補四川提標右營左哨二司把總十月升前營千總調補茂州營千總六十年隨剿黔楚苗匪十一月升補慶甯營守備嘉慶元年五月擊賊於連峰坳與四川崇化營千總劉永清力戰俱歿於陣是月雲南臨元鎮標左營外委王宗鳳雲南曲濶協右營外委馮坤擊賊於全璧嶺陣亡雲南昭通鎮標左營外委趙執和同時傷亡先是四月貴州黔西協右營左哨把總楊烈擊賊於豹盤山傷亡六月雲南曲濶

協右營千總熊芝林擊賊於乾州陣亡廣東增城營左營把總嚴有勝擊賊於馬鞍山陣亡陝西普安營外委秦申亦同時傷亡廣西提標前營把總鄧得擊賊於廖貢坡陣亡湖南長安五寨營外委王廷弼擊賊於鳳凰廳陣亡四川提標中營外委李雲龍擊賊於黃連坡陣亡事 聞議卹啟文等廕雲騎尉襲次完時給恩騎尉世襲罔替執和烈申廕雲騎尉啟文無嗣停襲宗鳳子世俊襲坤子朝榮襲執和子鵬飛襲芝林弟芝祥襲烈子紹坤襲有勝子元亨襲申姪正鵬襲廷弼子萬選襲雲龍子文貴襲餘襲無考永清四川松潘人由行伍拔補四川慶甯營把總因征廓爾喀以功賞戴藍翎旋補本職乾隆六十年以隨勦黔楚逆苗攻克黃瓜寨

等處有功奉 旨換戴花翎 賞給喀什巴圖魯名號宗鳳雲南
建水人坤雲南寧威人執和雲南昭通人烈貴州威甯人芝林雲
南昆明武舉有勝廣東增城人申陝西襄城人得廣西馬平人廷
弼湖南芷江人雲龍四川雙流人

右 國史館本傳

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

揚瑪太 格角雍忠朋等

揚瑪太四川別思滿寨屯守備乾隆五十六年隨征廓爾喀屢立戰功六十年隨勦黔楚苗匪嘉慶元年擊賊於連峯坳受傷歿行營屯外委格角雍忠朋擊賊於火里坪亦傷亡時夏五月也先是二月行營屯外委尼瑪擊賊於高吉地受傷歿三月行營屯外委收豆阿太擊賊於納貢山行營屯外委郎卡阿那擊賊於茨巖俱戰歿行營屯外委占巴思甲擊賊於平逆坳受傷歿四月漢牛寨屯把總革宗多吉擊賊於結石岡受傷歿行營屯外委色木色囊擊賊於灣溪嶺戰歿嗣是六月行營屯外委撒必沙甲揚忠澤郎擊賊於灣溪行營屯外委戎不阿扎擊賊於麥地溪行營屯外委

湯奈阿咱納擊賊於黃連坡俱陣亡上孟董寨屯外委江木參擊
賊於馬鞍山受傷歿七月行營屯外委卡唯王占擊賊於大壩坪
行營屯外委生根擊賊於捧風坳八月行營屯外委瓊六沙加朋
擊賊於強虎哨九月行營屯外委八格只木耳甲擊賊於興隆坪
十月行營屯外委姜安木楚擊賊於養牛塘俱戰歿是年四月賊
竄結石岡空銜守備克丕空銜土外委阿思太戰歿空銜土千總
章滾空銜土把總王相擊賊於火麻營陣亡土把總康泰擊賊於
廖家衝傷亡五月雲南孟夏土把總刀文龍隨勦威遠猓匪牛肩
山戰歿六月土外委金保納他爾擊賊於廖貢坡土外委阿皆擊
賊於馬鞍山土外委賈格爾擊賊於黃土坡俱陣亡二年二月猛

班土把總周靖擊賊於土地塘戰歿先後事 聞均 賜卹如例
刀文龍周靖俱 賞雲騎尉世職襲次完時以恩騎尉世襲罔替
江木參革宗多吉俱廕雲騎尉文龍子世爵襲靖子朝經襲江木
參子阿旺襲革宗多吉子蒼旺根布襲格角雍忠朋四川八角礪
寨人尼瑪色木色囊生根俱河東寨人收豆阿太湯奈阿咱納卡
唯王占瓊六沙加朋俱雜谷腦寨人郎卡阿那下孟董寨人占巴
思甲別思滿寨人革宗多吉姜安木楚俱漢牛寨人撒必沙甲揚
忠澤郎戎不阿扎俱上孟董寨人八格只木耳甲河西寨人克不
巴底寨人阿思太章滾王相金保納他爾阿皆賈格爾俱瓦寺寨
人康泰革布什咱寨人刀文龍雲南猛戛寨人周靖猛班寨人

國朝...
三

右 國史館本傳

楊治凝 陳高龍等

楊治凝山東高唐州人乾隆三十七年武進士授藍翎侍衛四十二年選廣西梧州協標中軍都司四十五年調右江鎮標左營都司四十七年擢中營遊擊五十三年遷湖北武昌城守營參將六十年二月黔省苗匪滋事連結楚苗總督福凝帶兵進剿以治凝署行營中軍副將抵鎮筓鎮苗匪連次擁眾來犯治凝隨福凝擊退之並破斃數十人遂進克得勝坡獅子口閏二月勦南北山苗匪治凝由南山梁西進斬獲甚眾三月帶兵五百名駐守巖門山五月隨福凝進擊苗匪於瀘溪縣之四堵坪殲二百餘名賊四十餘級救出難民千餘給糧安撫之復擊賊於長蔭坡轉戰兩晝夜

職戮無算六月賊連日犯鎮算城治凝隨福凝竭力守禦並出擊
分勦計前後十三晝夜不辭勞瘁奮勇超羣功列一等嘉慶元年
五月隨福凝勦湖北教匪於來鳳縣擊走之七月進攻旗鼓寨賊
譚貴巢賊踞高岡爲木城坡坎重疊濠溝間隔我兵奮躍仰攻越
五日克之治凝以首先上木城中槍傷歿於陣時廣東右翼鎮標
右營把總陳高龍擊賊於鳳凰山陣亡先是五月署四川懷甯營
右營把總劉朝品泰甯營外委楊學上建昌鎮標外委汪奉彩湖
北施南協把總黃國珍俱以攻寨陣亡湖北鄖陽鎮標守備陳世
文擊旗鼓寨股匪於近鳳山襄陽鎮標前營把總周言斌宜都營
把總劉榮擊賊於來鳳卡俱陣亡先後事 聞得 旨楊治凝著

照副將例議卹並查明有無子嗣餘 賜卹如例均 賞雲騎尉
世職襲次完時以恩騎尉世襲罔替治凝無嗣繼姪聯萼襲高龍
子繼勛襲朝品子鍾汝襲學上子恩舉襲奉彩子茂襲國珍子大
成襲世文子鳳高襲言斌子式光襲榮子朝相襲高龍廣東連州
人朝品四川冕甯人由廕襲署是職學上雅安人奉彩西昌人國
珍湖北恩施人世文湖南芷江人由行伍游升是職言斌湖北嘉
魚人由武舉授是職榮鶴峯州人

右 國史館本傳

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

174-772

羅廷弼 任作慧等

羅廷弼湖南沅陵人乾隆四十三年武進士授三等侍衛鑿儀衛行走四十八年選陝西神道嶺遊擊四十九年甘肅石峰堡回匪滋事檄往汧陽一帶防守隘日六十年升甘肅靈州營參將嘉慶元年三月檄勦陝西西安教匪旋調往雒南縣堵緝七月四川總督宜縣檄廷弼帶兵由湖北荆門州赴當陽會勦尋擢廷弼爲甯夏中衛副將率兵駐眾山之尾守護嗣以大軍進攻東山岡賊營廷弼帶兵伏山後賊繞東北岡後直犯山巔伏發賊驚竄廷弼率兵奮力追擊殲斃無數追至山下以樹木叢深水田中隔收兵駐守奏入 上以廷弼殲賊甚眾 賜玉扳指大小荷包等件翌日

賊復分六隊越山岡直犯糧臺廷弼率兵首先迎擊射七人刃四
五十人賊猶恃眾前進廷弼復匹馬衝先連射數人箭盡賊眾攢
擁身被矛傷四處墜馬經親隨弁兵奮勇救出旋以傷重歿於營
甘肅興武營外委署本營中軍把總任作慧亦陣亡時我兵分路
截殺追奔數十里賊殘盡隨營效力千總羅萬年以力戰死之事
聞 諭曰羅廷弼首先迎擊殺賊多名傷重捐軀殊堪憫惻著照
副將例議卹仍賞銀三百兩料理喪事伊子俟服闋後送部引見
以示軫卹作慧萬年 賜卹如例均 賞雲騎尉世職襲次完時
以忠騎尉世襲岡替廷弼子萬通襲作慧子聯第襲萬年子紹瓊
襲作慧甘肅甯夏人由行伍於乾隆三十七年隨征金川面中槍

傷拔額外外委尋擢外委調署是職萬年湖北棗陽人由武舉選
是職

右 國史館本傳

新編 皇朝通志 卷三十三

三

曾眷 萬年

曾眷福建霞浦人由行伍於乾隆四十四年三月拔補福甯鎮標中營外委九月擢左營把總四十八年遷桐山營千總五十九年擢四川提標前營守備嘉慶元年派征湖北邪匪時賊首覃家耀屯巴東之譚家村眷隨總督福甯由支井河擊之賊見我兵卽吹角鳴鑼聚黨抗拒禦我兵益奮殲斃二百餘賊竄堰塘灣據其山梁而苦桃溪茶料坪尤險隘總兵慶溥遊擊呂朝龍分路進攻焚其寨賊遂竄歸譚家村我兵躡之由山徑撲上賊巢眷奪卡尤力生擒賊目二十八人其墜巖死者無算眷以創重歿於陣同時有隨營效力千總羅萬年率鄉勇隨將軍永保攻鍾祥之鄧家岡賊將

犯大營永保設伏待之少頃賊蜂擁至我兵槍礮齊發斃賊甚眾賊欲越濠而過我兵殲之而東南山溝復有賊繞其後直撲糧臺遊擊涂登弼守禦甚固賊不敢近乃折回西北我兵分路截殺俱敗走我兵追奔數十里賊幾燼萬年以力戰陣亡先後事 聞得旨曾眷羅萬年俱著咨部議卹均廕雲騎尉世職襲次完時各給恩騎尉世襲罔替眷子世榮襲萬年子紹瓊襲萬年湖北棗陽人由武舉揀選千總

右 國史館本傳

章憲 趙朝珍等

章憲廣東欽州人由行伍於乾隆四十年拔化石營外委四十二年擢欽州營把總四十七年升千總五十七年遷四川督標左營守備嘉慶元年湖北教匪竄陝西漢中鳳縣一帶屯黃柏山恃險負隅其西北有老米山高約萬仞一線盤上可通一憲隨總督福凝由小簿道嶺連攻數次不能得手復分兵繞道以簿道嶺山尾奪卡二座總兵諸神保又從地口撲上賊卡拋擲火彈燬其屯糧乘勢四面仰攻賊墮巖死者無算遂抵老米山麓攀藤附葛魚貫而上出賊不意奮勇攻擊戮斃甚夥餘夥大潰奪其三卡其第四卡高據山頂更爲扼險憲帶兵前進仰面上攻奮不顧身迭殲

多匪以受傷歿於陣時湖北荊州城守外委趙朝珍隨尙書惠齡
於黃柏山合勦林之華之匪其一梳泉涼風臺等處路甚歧雜朝
珍於一梳泉進攻先躍過濠手刃數賊入其卡大兵繼之賊不能
支追奔至涼風臺賊復有眾救應短兵相接戮百餘匪朝珍以深
入受槍傷歿於陣四川提標前營守備曾眷隨福凝擊賊於湖北
巴東縣譚家村由山徑撲其巢擒賊目二十八人眷奮擊尤力以
創重陣亡四川越嶲營把總羅舉睿隨總兵諸神保進勦賊從上
坪下溝直犯中坪官兵營卡舉睿以受傷歿於陣先後事 聞章
憲曾眷羅舉睿 賜卹如例趙朝珍得 旨加等議卹均 賞雲
騎尉世職襲次完時以恩騎尉世襲罔替憲子式成襲眷子世榮

襲舉睿子進連襲朝珍子光國襲眷福建霞浦人由行伍於乾隆四十八年洊升千總五十九年升是職舉睿四川成都人由行伍隨征金川屢戰立功拔越嶲營額外外委補瀘甯營外委乾隆四十六年調是職朝珍湖北江陵人由行伍拔是職

右 國史館本傳

圖書集成彙編
第 三 百 四 十 八

三

蕭永齡 張德輝等

蕭永齡直隸正定人由行伍於乾隆四十二年拔正定鎮標左營額外外委四十四年擢行唐汛把總四十六年調龍固營把總四十九年遷大名協左營牙里集千總嘉慶元年四月檄剿湖北教匪六月擊棗陽縣張家壩賊匪有功升正定鎮標左營守備八月偕河南河北鎮守備劉天錫等隨將軍恆瑞都統永保於鍾祥縣奮力揆捕賊由雙溝北竄我兵自北而南衝入賊隊縱橫截殺賊復遁入舊輒堡據守我兵前後圍剿縱火焚燒殲戮無數俘二三百名餘匪潰遁我兵追擊至呂堰驛等處轉戰七晝夜永齡天錫歿於陣正定鎮標左營千總張德輝龍泉關左哨把總閻永傑順

德營把總崔晟皆死之是年正定鎮標樂城汛把總婁連登擊賊於陳家河山東兗州鎮標中營把總閻臣擊賊於賈家梁俱陣亡先後事 聞得 旨蕭永齡著加等優卹餘 賜卹如例均 賞雲騎尉世職襲次完時以恩騎尉世襲罔替永齡子廷鳳襲天錫子紹武襲德輝子廷會襲永傑子逢凱襲晟子繼忠襲連登子克端襲臣子福興襲天錫直隸昌黎人乾隆五十二年武進士以營守備用五十二年授是職德輝宣化人由行伍於乾隆四十二年拔行唐營外委四十五年擢正定鎮標龍固營把總四十八年升是職永傑晟連登俱正定人臣山東嶧縣人

右 國史館本傳

劉天錫 王邦甯

劉天錫直隸昌黎人乾隆五十一年武進士以營守備用五十二年授河南河北鎮標左營守備嘉慶元年調赴湖北軍營協剿邪匪九月賊自鍾祥經官兵剿敗後奔竄雙溝有入豫省之勢將軍恆瑞等帶兵追剿天錫隨往適賊從雙溝向北逃竄我兵自北而南縱橫截殺斃賊無算賊竄臨河之舊甄堡我兵縱火焚燒前後圍剿生擒二三百名賊分路奔竄我兵追至呂堰驛等處堵剿輾轉七晝夜未嘗少息天錫受傷歿於陣先是賊聚鍾祥之鄧家岡隨營效力把總王邦甯亦隨恆瑞進剿賊分三股抗拒我兵亦分路截殺賊向東南山溝潛行抄進欲襲大營我兵不動聲色以逸

待勞賊蜂擁而來我兵槍礮齊發擊斃多名賊抵死直前撲進濠邊我兵箭射矛刺拋擲火器賊不敢直撲復向西北抄襲官兵奮勇截殺賊紛紛敗逸生擒賊目十一名餘黨一百名邦甯力戰死先後事 聞得 旨劉天錫王邦甯俱著咨部議卹均應雲騎尉世職襲次完時各給恩騎尉世襲罔替天錫子紹武襲邦甯子幼尙未承襲邦甯湖北穀城人由武生於嘉慶元年帶領鄉勇剿捕邪匪奮勇出力 賞給六品頂帶以把總用

右 國史館本傳

按篇中附王公邦甯又見孟景源傳作邦凝未知孰是並存俟考

邢雄高 嚴有勝等

邢雄高廣東海陽人乾隆四十二年三月由行伍拔潮州鎮標右營額外外委六月補城守營外委四十五年升把總五十二年從征臺灣屢著戰功升千總嘉慶元年三月偕把總嚴有勝外委黃國喜從征湖南苗匪官兵攻克全壁嶺馬鞍山黃連坡及收復乾州雄高皆與焉七月以搜捕苗寨功 賞戴藍翎尋攻克三盆坪竹山坡強虎哨茶葉坪諸處雄高皆以驍勇著九月追賊至平隴力戰死之事 聞 賞卹如例國喜以征苗匪功拔增城右營把總升撫標左營千總尋隨副都統明亮攻平隴之賊山後石隴諸寨賊首石柳鄧巢穴在焉官兵擒柳鄧誅之國喜以攻撲賊寨力

竭陣亡 上命加一等議卹賊之據乾州也官兵由全壁嶺進剿
行至馬鞍山山路叢雜有勝戰歿 賞卹如例與雄高國喜並
恩廕雲騎尉世職雄高子光熙襲國喜子廷標襲有勝子元亨襲
國喜南海人有勝增城人均由行伍升本職

右 國史館本傳

王玉佩 楊玉林等

王玉佩貴州鎮遠人由行伍補鎮遠鎮標右營外委乾隆五十九年十一月拔補本營把總六十年正月隨征黔楚逆苗奮勇立功嘉慶元年八月拔補丹江營左軍左哨千總是年九月擊賊鐵廣坪奮不顧身中刃傷陣亡先是七月賊擾大坪山六品頂帶楊玉林挺身衝殺陣亡尋賊踞小竹山勢甚熾入寨衛千總藍紫榮爭先攻擊身冒石矢陣亡貴州遵義右營外委杜雲龍同時陣亡十一月賊擾馬頭山四川川北鎮標右營額外外委雍純修奮勇禦之陣亡事 聞讖卹玉佩玉林紫榮雲龍俱廕雲騎尉襲次完時給予恩騎尉世襲罔替純修卹如例玉佩子映榮襲玉林子志和

襲紫榮弟紫玉襲雲龍子思名襲玉林四川郫縣人乾隆四十九年由行伍隨征石峰堡逆回奮勇打仗身帶數傷六十年調赴黔楚軍營爭先殺賊屢著勞績大學士公福康安奏請 賞給本銜並 賞戴藍翎紫榮雲南昆明人貴州古州籍雲龍貴州遵義人純修四川閬中人

右 國史館本傳

花連布

花連布蒙古鑲黃旗人姓額爾特德乾隆三十九年二月由健銳營前鋒擢藍翎長累遷火器營烏槍護軍校委署烏槍護軍參領四十四年十一月揀發湖廣以參將用四十八年十一月補湖北武昌城守營參將五十一年八月調湖廣提標中軍參將五十二年十月擢湖南辰州協副將五十五年八月擢貴州安籠鎮總兵六十年二月雲貴總督大學士忠銳嘉勇公福康安征黔省逆苗疏通松桃銅仁兩路餉道飭花連布率兵以先福康安既抵銅仁令花連布分路趨正大營解其圍斃賊百餘獲糧二千餘石奏入諭曰黔省苗匪與楚省苗匪勾結蔓延滋擾梗塞道路福康安不

待兵齊卽帶見在官兵分路進攻立解正大營之圍總兵花連布
打仗殺賊亦爲得力並著加恩賞戴花翎交部議敘軍功加
一級紀錄二次閏二月從啞喇塘進經阿寨營安靜關諸處沿途
勦賊復由巖板橋進連奪碉寨奉 旨花連布著再交部議敘部
議軍功加一級紀錄二次又從上麻洲下麻洲高坡塘上下長坪
進攻嗅腦至松桃兩旁賊寨堆木石阻路花連布拆填坑壕福康
安統兵進擊斃賊甚多 上以花連布奮勇出力 賞給剛安巴
圖魯名號仍如例 賞銀百兩三月奪長衝塘山卡落塘斃賊無
算生擒十人時永綏城被圍八十餘日花連布繞道往援擊賊於
梁帽寨且戰且前抵永綏解其圍 上嘉賞之又擊賊於小排吾

勦巴茅汛鴨西黃瓜寨諸賊巢連破大寨五獲糧五百餘石四月
由滾牛坡翻山下勦腊夷寨槍傷左腋 上獎勵之又 諭曰花
連布此次帶兵打仗雖受槍傷幸俱不重此時是否傷已平復殊
爲廩念五月由葫蘆坪進攻黨槽三家廟諸苗寨克之奪卡七擊
上竹排下竹排各苗寨燬之 上疊加獎賚又 諭嘉獎交部議
敘部議軍功加一級紀錄二次六月勦桿子坳賊匪七月據古哨
營山梁 上以花連布節次攻解圍城極爲奮勇 命補授貴州
提督時偵得首逆吳半生往來馬鞍山塔金盛華哨糯塘蝦蟆峒
古雙坪諸處糾眾苗計拒官兵花連布偕內大臣額勒登保率兵
會總兵那丹珠等翼兵於爆木林山梁三路合撲連克苗寨十餘

處沿途追剿深入數十里自成光寨至下狗腦坡山勢愈險賊匪
嘯聚甚眾福康安派額勒登保及侍衛綸布春分兵兩路抄上狗
腦坡花連布一路抄下狗腦坡花連布率屯番身冒賊槍攀藤附
葛直上山頂賊漸卻分兵下壓會額勒登保綸布春繞出賊後之
兩路兵夾攻之福康安焚狗腦坡上下苗寨花連布攻伐竹木隨
處薰塞沿途大小巖峒匪冒火爭逃擊斃者十七八又偵得吳
半生竄匿古雙坪一帶八月福康安率花連布等冒雨搶占山梁
斃賊千餘又令由貓頭進連克茶林礪上麻衝下麻衝諸寨甫下
黃毛山坡賊數千從對面山沿坡接衝下額勒登保促兵奮壓花
連布繞賊後夾攻殲戮無算九月由長坪齊集粵西官兵會將軍

興肇率滿漢各兵隨勦隨進連克馬腦寨豬革寨殺苗坪竹子寨諸寨落復分兵攻巖板井讓水沱溪頭綠樹衝關鑲坪一帶全克之是月二十日吳半生至高多寨福康安督同花連布等分路競進四面嚴密攻圍吳半生詣軍投首奏入得旨花連布著從優議敘部議軍功加二級時將乘勝搗賊巢以龍角峒爲鴨保緊要門戶二十七日福康安派花連布分兵三路繞道進攻其克鷲洛下水壩重寨扣堡斗沙斗恩科峒霧露等寨二十四處次日黎明齊聚龍角峒山梁迎面攻寨賊眾乞降不許仍奮擊自辰至酉賊潰亂官兵躍入石城殺賊無算其附近未勦之黃毛坪蜡爾關鄧款臥黨溝沙做基大窩等十五處寨落相率來投十月初七日分

剿大坡腦得勝山雷達山磨水山大小高巖喜鵲坡尖頭山清平
山大小木城石卡三十餘處連克之又分花連布等爲四路於二
十二日四更由鴨保山撲鴨保寨西南兩面是夜朔風大作徧山
樹木震動山溝路窄於黑暗中覓徑凡遇溝濠各攀援跳越而上
拋擲火彈焚賊窩棚俄而各山坳賊卡火光齊發槍聲駱驛惟時
風益猛窩棚竹木著火俱飛各卡苗匪惶駭無措官兵撲開木城
七石卡五斃賊無算隨舉垂藤董羅諸苗寨全克之十一月初一
日抵賊巢初二日暮密圍賊目吳八月於臥盤寨縛之二十日攻
小天星寨翌日克之分兵中天星大天星各寨繞道進攻黃衝口
巖窠山騎馬上寨坡大地坡小峰各賊卡一十三處連克之抵

得盤山梁十二月初四日撲木營山梁賊向山後遁暮雨雪冒雪
進圍地良坡焚其寨初五六日復冒雪進攻八荆桃花諸寨全克
之初十日克高斗山梁十三日攻普定寨斃賊甚多生擒賊匪四
十餘賊目二名十八日克馬峒坡腳山兩汾河川峒各山梁燬苗
寨三百戶獲大礮二器械無算二十七日撲金嶺衝木城據其山
梁嘉慶元年正月初二日克吉吉寨山梁十五日撲上連雲山相
持竟夜天明賊始退進攻巖峒大寨三十餘戶賊匪盡克之二十
七日擊賊於猴子山蛇退嶺諸處兩晝夜二月十三日抵壁多大
山連夜進剿殲斃無數生擒賊五十七要犯二二十四日抵高吉
坨抵巴金灣盡焚諸賊寨三月初一日撲高吉坨對面山梁斃賊

數十兩岔溪伏苗蠶起迎擊之抵平逆坳奪卡三初六日擊賊於擒頭坡相持一晝夜斃賊無數乘勢搜剿初九日抵禾粟山據頂下歷賊衝突十餘次連擊之賊潰竄二十三日據其三連克貴道嶺七星坡苗家坵槽石岡諸處石卡四十餘焚山下苗寨三百餘戶抵長吉山據石城左右大小山包木卡石卡三十餘處競上山梁舉茶山茨巖等有名大山平隴一帶緊要屏障全克之又據捷定坪筆架山勒兆堵瀑水源堵山梁連日獲賊三十七四月二十八日大雨後克蠻溪嶺紫泥山油麻灣茶坵諸處賊卡八九處撲廖家衝山梁據之又進據山梁七座五月十三日雲貴總督大學士忠銳嘉勇貝子福康安卒於軍總督一等宣勇伯和琳督兵於

二十八日撲全壁嶺賊卡令花連布率將弁鼓勇截賊各路兵往來追剿斃賊無算斬級三十餘六月由馬鞍山赴乾州將渡河慮桿子坪泡水賊匪抄襲花連布等分路剿附近周圍苗寨七月初旬徧搜鴉溪大坡壘黃茅田狗兒寨梨樹七方橋三世狯湯家寨吳家寨施金坪雙塘奔陀大壩坪諸處民村苗寨抗拒者盡戮之攻至大莊八月由強虎哨分兵進攻後坡新寨麻里灣諸處大小賊卡十餘座斃賊甚多是月三十日四川總督一等宣勇伯和琳卒於軍 上命湖南巡撫姜晟與花連布熟商妥辦統計花連布以征苗軍功疊蒙 恩賚二十次九月清溪縣高承德等以邪術聚眾知縣王懋德被戕貴州巡撫馮光熊奏入 諭曰此等教匪

倉猝糾合人數諒屬無多易於辦理見在花連布帶兵往捕伊係本省提督且久歷戎行而馮光熊又調撥附近兵勇親往查辦想不難剋期撲滅但必須將戕官之犯嚴拏務獲詳悉問明從重辦理方足以儆兇頑而申國憲將此傳諭知之旋偕馮光熊奏攻槐花坪四寨報聞嗣又攻破小竹山賊巢奏曰小竹山路分歧恐賊匪四出滋蔓撥官兵就各要口集鄉勇堵禦十八日賊匪二三千分擁撲卡官兵分擊槍礮並發斃賊三百餘人斬級百三十二斫斃逆渠高承芳並賊目五賊眾竄山梁堅拒連日偵得賊黨脅附之眾漸生離異駱驛遁出二十二日乘機進攻賊眾仍死拒官兵奮擊奪卡直入小竹山賊巢礮斃無算槍斃首逆高承德及戕

知縣王懋德之犯陳仰瞻賊匪乘夜潛由雙岔山溪鐵礦坪竄入大小鬼壘官兵跟蹤進逼尾追見在兜擒務盡根株得旨嘉獎鬼壘距小竹山三十餘里壘在高岡之上陡坡深澗迂迴險峻官兵既於各要隘派兵嚴堵二十五日巳刻賊匪搶夏家衝鄉勇營卡花連布派副將海格參將施縉等兩路攻山梁擊散之奪卡四壘上賊匪千餘復由衝內攢擁撲拒海格施縉兩邊追壓花連布由中路進追賊至壘邊督兵奮攻賊見攻甚急俱於半坡擲石以拒又賊別黨從澗內突出堵截我兵花連布已上壘及數丈頭中石滾跌巖下半坡及澗內賊合撲之諸將併力殺退而花連布傷重旋歿於陣馮光熊奏入諭曰花連布因賊匪搶奪夏家衝

奮兵攻擊被賊匪擲石身故雖係冒險輕進但究屬歿於行陣深堪憫惜著加恩賞給太子少保銜仍交部議卹並入祀昭忠祠伊子侯承襲世職後帶領引見以示軫念部議給予騎都尉兼一雲騎尉世職襲次完時給予恩騎尉世襲罔替卹銀八百兩 賜祭葬如例諡壯節子富慶承襲

右 國史館本傳

提督花連布滿洲鑲白旗人以世職歷官貴州南籠鎮總兵余視學此方始識之公性質直與人交有肝膽自言少時讀書習習論語左傳襲職後乃輟讀學政例歲試武生童必移文所轄總督乞派副將以下一員監視騎射蓋立法之始恐文臣不諳弓馬故余

試南籠所派適公標下參將余按定制正坐演武廳而參將及提調之知府左右坐公聞不悅日晚會譙公所尙愠見於色余笑曰非妄自尊大實向例若此耳況公不讀左氏乎王人敘諸侯之上語未竟公意頓釋後兩人者意氣合遂約爲兄弟時從弟顯吉留太守署中一日見公以公之官稱之公不悅曰吾與若兄交汝何外我耶因拉入署中令妻子出見歲時饋問若骨肉焉歲乙卯公當入 覲半道適銅仁紅苗殺官吏反貝子福康安以總督進勦檄畱公隨營素稔公勇令結一營當大營前禦賊悉以勦事委公大營日宴會或雜以歌舞公則晝夜巡徼飢不及食倦不及寢苗匪又獸駭豕突或一日數至公竭力堵禦賊已退乃敢告貝子如

此百晝夜鬢髮畢白余時報滿將入都以書別公復書曰事勢至此與君永訣矣他日史館中爲余作佳傳可也時公已擢提督加太子太保後半歲公禦賊山梁上轉戰益奮中巨礮一鳥槍三旋墮入深澗中詬罵不絕口賊欲鉤出之乃自力轉入巖石下折頸乃死事定諸將弁百計出其屍則顛骨皆寸寸折兼失一臂特旨賜祭葬并建碑墓上余時正派撰進擬文字碑文卽余所擬進也公死事曲折亦槩括爲敘入云

右書事洪亮吉撰

按篇內述公滿洲鑲白旗人又謂擢提督加太子太保後半歲及均與本傳不

符竝存俟考 國史具載復兼錄此者以事蹟可備旁徵也

花軍門連布滿洲人以世職洊至南籠鎮總兵官性質直與人交

有肝膽少時讀書曾習左傳故於戰法精妙乙卯春入 覲半道
值銅仁紅苗殺官吏反福文襄王以總督進勦檄畱公隨營素稔
公勇令首先解永綏圍公率百餘騎長驅直入破燬苗砦數十苗
人皆烏合眾未見大敵大驚曰天上神兵至耶何勇健乃爾因遠
相奔潰永綏之圍立解時公著豹皮戰裙故苗人呼爲花老虎云
右錄宗室昭榘撰

何事者用幾分
○ 卷三十四

三

孟景源 趙瑗等

孟景源江蘇上海人由行伍於乾隆四十二年拔江南提標右營外委四十六年擢把總五十一年升千總五十九年遷江西南昌城守營守備嘉慶元年十一月隨征湖北教匪時姚之富股匪被剿到處散屯景源隨將軍恆瑞擊之分路競進至棗陽縣草店圍其寨賊合力迎拒副都統碩雲保掘其隘自上下壓恆瑞偕總兵王文雄等前逼之賊復分爲三作犄角勢我兵奮力橫衝槍箭如雨賊大潰其自北面來者亦被總兵德光等擊退嗣復有賊相策應將撲大營我兵擊斬無數賊不支悉遁入巢會日暮我兵露處竟夜追剿益厲逐北三十餘里沿途殲三四千人俘二百餘破十

一屯悉焚之景源連日轉戰被傷歿於陣先是賊撲大營時隨營效力把總王邦凝力戰死賊由白水寺分竄棗陽之張家壩連營十餘處山西太原鎮標左營千總趙瑗隨恆瑞進剿乘夜往攻悉奪之瑗以創重陣亡事 聞均 賜卹如例 賞雲騎尉世職襲次完時以恩騎尉世襲罔替景源子永銓襲瑗子勉學襲邦凝子幼未襲邦凝湖北穀城人由武生於嘉慶元年帶鄉勇協剿出力給六品頂帶以把總用瑗山西臨汾人由行伍洊升是職

右 國史館本傳

張大鵬 子希賢孫應朝等

張大鵬陝西紫陽人子曰楚常希賢紹堂孫曰應朝應邦應選應達應祿應愷應試應爵惟應朝應邦應選嘗入學爲諸生餘皆布衣無爵位而咸篤於忠義嘉慶元年賊犯紫陽洞汝二河是時官軍未集賊勢頗張居民惶恐大鵬獨與其子孫出家財募鄉勇八百餘人助有司爲守禦未幾賊掠龍形響水二溝楚常率眾擊之殺三人遂前攻賊寨直山峻霧作中傷而歸後三日賊至大水溝觀音堂地紹堂率眾擊殺賊魁王正穆等六十餘人又三日希賢與賊戰於桃園復殺其魁巫雲富等三十一人當賊之起勢特猛銳雖官軍亦避其鋒至是連見殺傷意大憤十一月朔遂率其黨

數千人擁擁而至希賢首出逆戰中槍死紹堂率眾據險隘入賊隊中復爲所殺大鵬氣益奮更率其孫應達應祿應愷應試等持械深入衝突躍呼所殺傷甚眾以眾寡不侔五人皆戰死而應爵亦被傷於是應邦應選走赴陝甘總督宜縣營請軍進剿居無何遂與官軍破賊於米谿十二月應選復自募健勇六百餘人攻賊於五作雲地賊眾殲焉事聞上嘉獎特命應邦以訓導卽選而應選給予訓導職銜是歲也應朝投效四川軍營渡河溺死上命與大鵬等皆入昭忠祠初張氏父子及孫凡十有二人自賊之興戰死者七人溺死者一人傷者二人至是生而全者應邦應選二人而已及明年賊犯紫陽縣城應選復募二百人赴城救援

四年五月賊犯西鄉五年十二月賊復至紫陽應選率兵防禦皆有戰功

贊曰當賊起時諸省士民招鄉鄰結營皆助官軍而殺賊者蓋亦有矣論忠義之尤則未有如紫陽張氏者朱主事桂楨屬余記其事余因爲張大鵬傳或疑大鵬身爲布衣非有官守之責奈何捐軀糜家率子孫死賊手詩不云乎率土之濱莫非王臣彼有官而全軀畏死者則可議矣若大鵬者胡忍議之也

右傳管同撰

卷之八

八

八

國朝耆獻類徵初編卷三百五十九目錄

忠義二十九

德克登額 善住等

何元卿

尙維岳

袁國璜

高傑 倪占鼇

石陣圖 廖廷超等

王太和 康恆彩等

貴隆 額勒精布等

傅成明 楊振邦等

佟貴 清福等

保德 扎爾杭阿等

陸霖 張宁陽等

馬自易 馬殿元等

王相龍 吳玉等

蕭大鐘 鍾明亮等

佛住

和倫 永謙等

王化龍 石得明等

江鱗 龐德佩等

曾艾 曾彰泗

崔崑 李華純等

楊君璽 林元臣等

楊潭 郭德元等

托克托布

大清宣統元年...

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

國朝耆獻類徵初編卷三百五十九

通奉大夫前署江西巡撫江西布政使司布政使湘陰李桓輯

忠義二十九

德克登額 善住等

德克登額滿洲正白旗人姓索綽絡西安駐防由驍騎校委署參領乾隆三十八年隨征金川四十六年剿撒拉爾四十九年剿石峯堡二處逆回皆與焉屢戰皆克敵有功嘉慶元年派剿湖北邪匪十一月署總督永保等攻剿襄陽府棗陽縣屬之草店賊匪德克登額隨西安將軍恆瑞從西北一路進剿黎明會合併力圍擊賊分路抗拒我軍施放進步連環槍向前攻擊殲斃甚眾賊不能

支退回賊屯大軍露處竟夜圍守賊巢次日仍隨恆瑞等趁勢併力追殺中傷陣亡是月擊賊於穀城縣屬之張家集陣亡者藍翎長善住二年三月復擊賊於張家集陣亡者烏槍護軍校福德保九月於荆門州遠安縣屬之白雲觀擊賊陣亡者驍騎校倭興額十月烏槍護軍校明山亦於張家集擊賊陣亡先後事 聞議卹德克登額善住福德保倭興額明山俱廕雲騎尉襲次完時給予恩騎尉世襲罔替德克登額子善慶襲福德保子固甯阿襲倭興額子察星阿襲明山子德恆襲善住無嗣善住滿洲正白旗人姓李佳福德保滿洲正黃旗人姓舒穆祿倭興額滿洲鑲白旗人姓都雅爾明山蒙古鑲白旗人姓莽魯特

右 國史館本傳

國史館本傳

二

圖書集成彙編

卷一

何元卿

何元卿四川華陽人由行伍出師金川攻克約咱山梁等處乾隆三十八年派赴西路美諾三關橋隨剿三十九年五月攻克博羅克山梁六月攻喇穆喇穆山梁等處奮勇殺賊兩手受石傷拔永甯協標外委十月攻邁過爾格魯山梁等處四十年帶領土兵攻克遜克爾宗等處六月補馬邊營把總十一月攻克索隆古勒烏圍等處奪賊碉數座五十四年以隨征臺灣有功升馬邊營千總五十七年旋征廓爾喀攻克擦木至瑪噶爾轄爾甲等處奮勇殺賊頭受石傷升疊溪營守備十二月題升四川督標中營都司五十八年十一月帶領土司入 覲六十年二月率兵弁鄉勇征苗

匪至川黔交界殺賊六名奪紅旗一桿餘匪畏懼退回十八日於秀山堵禦苗匪勦殺五十餘人生擒三十四名並奪獲匪旗上有統兵元帥字樣閏二月護綏甯營參將是月黔楚苗匪竄入川省大肆焚掠距秀山縣城僅二三十里元卿督率兵勇悉力堵禦苗匪不敢進逼並隨署四川總督孫士毅赴貴道溪一帶遙望火光騰起卽帶兵馳往元卿手刃數賊苗匪敗走追至王瓜壘共殺苗四十人生擒三名嗣於各隘口先後盤獲漢奸六十一名奏入奉上諭著和琳傳旨超等賞給參將銜並賞戴花翎初八日楚省苗匪由龍巖嘴前來滋擾元卿奉督臣檄偕參將張志林帶兵由濫橋一路繞出賊後痛加勦殺三月帶兵在石耶一帶巡查盤獲奸

細龐獨么一名六月賊匪數十於楚省上游水淺處過岸從洪安直撲川省卡隘元卿帶兵三百名痛加殲剿賊匪四散逃回九月赴沿邊山坳駐劄有賊千人至老李溪滋擾元卿帶兵前進殺賊二百餘人生擒楊老倫吳老四二名復於駝家坡堵剿割獻首級賊人帶傷逃去是年補四川提標中營參將嘉慶元年三月署四川總督孫士毅擊白蓮教賊於坐仙坪分兵兩路進攻命元卿守東面山梁元卿望見賊匪後隊擾動知督臣已攻其南面山梁遂亟進兵攻之至山坳與督臣會合賊匪竄入獅子坪山中藏匿元卿帶兵越嶺窮追奏入 賞給副將頂帶遇缺卽補五月紅巖堡集匪數千元卿帶兵進發夜半望見樹林間隱隱有賊直前剿殺

賊匪傷斃者不可勝數餘眾駭逃七月隨同署四川總督福甯向
旗鼓寨追剿賊巢之外均有小卡爲死守計我兵繞道而進拋擲
火彈燒燬小卡數重寨內大隊之賊四出迎拒我兵奮勇擊殺斃
賊甚多奏入 賞給綠玉扳指火鑷包大小荷包仍存記遇有總
兵缺出卽行升用二十八日向三堡嶺剿賊賊匪紛紛遁逃被我
兵追殺踏斃者不可勝計奏入 賞玉扳指大小荷包十月隨署
總兵福甯從張家村進剿併力攻擊撲入賊營殺死賊目田洪等
三名生擒賊目二十八名旋奉 旨升授陝西興漢鎮總兵是月
搜剿賊匪奪獲賊卡五處奏入 賞給大小荷包十一月由梅子
口翻山至黃家場匪眾奔入大東林山內官兵自十一日卯刻至

十二日酉刻追剿數十里殺賊千餘奏入 賞給大小荷包二十
日帶兵搶據橫山子山梁燒燬賊卡二座生擒賊匪二十三名賊
匪乘我營卡未定於二十一日率黨夥三四千人蜂擁而來元卿
督率將弁斃賊多名生擒賊匪十二名二十二日寅刻賊復率五
六千人分作五路前來我兵悉力攻擊賊匪退而復前者數次我
軍因連戰三日疲乏元卿奮不顧身向前搶撲被賊戕害事 聞
賞卹如提督例 恩賞騎都尉兼雲騎尉世職孫勝先承襲

右 國史館本傳

圖書集成醫部全錄
卷一百一十四

三

| | | | | | | | | | |
|--|--|--|--|--|--|--|--|--|--|
| | | | | | | | | | |
|--|--|--|--|--|--|--|--|--|--|

尙維岳

尙維岳漢軍鑲藍旗人由馬甲於乾隆三十一年擢鑾儀衛整儀尉三十三年升治儀正三十八年選直隸倒馬關都司四十六年升四川順慶營遊擊五十一年咨調來京承襲勳舊佐領引見後仍四川本任嘉慶元年教匪徐添德等滋事維岳以署總督英善檄赴東鄉縣軍營分路扼險堵剿賊犯泉水鋪卡都司石陣圖等擊走之賊復糾眾二千餘撲東山廟卡將奪路由東鄉與豐城場賊合維岳奮勇率兵迎敵射斃執旗賊目並殲百三十餘匪賊愈蠶至維岳猝中槍陣亡事聞得旨尙維岳著照參將例加等議卹賞雲騎尉世職襲次完時以恩騎尉世襲罔替維岳子

日本書紀卷之六十五

政華襲

右 國史館本傳

袁國璜

袁國璜四川成都人由行伍於乾隆三十三年拔督標右營外委三十六年補把總隨征金川屢立戰功三十八年升黎雅營千總旋隨參贊舒常進攻綽斯甲布賊方運石修碉卡國璜卽率兵擊之賊遁又攻馬爾邦馬爾邦爲甲索後路賊恃爲固國璜乘賊無備斫門徑進勦殺甚多燬其三碉將軍明亮奏入 賞戴藍翎以守備用十二月升陝西延綏鎮左營守備四十年五月升四川雅州協右營都司俄以在南路時克復革布什咱全境並率降番攻達爾圖功皆最 賞換花翎四十一年升四川阜和營遊擊金川平四十八年授陝甘督標右營參將五十年升甘肅中衛協副將

五十一年調陝甘督標中軍副將五十二年五月擢江南狼山鎮總兵時臺灣林爽文不靖國璜隨陝甘總督福康安往征之賊據諸羅勢頗張國璜率兵徑進遇賊於興化店賊併力拒我兵奮勇剿殺賊始潰獲械無算遂焚其莊旋進剿斗六門賊萬餘立爲三莊截我路我兵亦分路進國璜攻大埔尾克之追奔二十餘里遂克復斗六門斗六門爲南北要隘久爲賊踞至是始復得 旨交部議敘旋以攻克水沙連大里杙等處 賜號博濟巴圖魯五十二年正月賊遁小半天山山勢險峻林箐深密我兵扳藤而登賊驟下槍礮如雨我兵勇氣彌厲賊敗竄乃由歸子頭內木柵各隘口分路進山乘夜追賊至麻著社賊首林爽文潛匿東勢角山徑

隘不容乘馬遂徒步陟險沿山搜捕賊又逸入打鐵寮我兵圍之
遂於老衢崎生擒其魁是役也國璜與參贊海蘭察力爲多奏入
諭部議敘旋乘勝進剿賊匪莊大田於牛莊灣裏溪賊二千餘迎
拒我兵橫衝賊陣賊敗走過溪阻隘國璜率兵躍而過射斃一賊
賊始逃我兵追剿擒獲無算賊竄踞紫城我兵水陸並進國璜隨
海蘭察往來殲戮賊不能逸俱就擒得 旨咨部從優議敘臺灣
平 命圖書後三十功臣於紫光閣國璜與焉詞臣擬贊曰夙昔
行陣茲督兵隊志勇而堅望風賊潰偵蹤歷險遂搜山內分兵扼
要是用嘉賚七月告病回籍五十五年起署四川建昌鎮總兵五
十六年授四川重慶鎮總兵廓爾喀反國璜請自效 上鑒其誠

命率土兵赴藏隸福康安軍營五十七年八月我兵至堆補木石口之象巴宗山上有木城二石卡三大石卡一我兵攻之城內賊出拒卡內賊堅守爲犄角國璜衝其陣殺賊百餘連奪賊卡賊潰時夜將半賊踞橫河橋我兵分爲二國璜由帕郎古進攻至甲爾古拉卡內賊齊出我兵奮擊之賊遁過橋乘勢追勦克其卡殲賊甚眾五十八年廓爾喀平 命圖畫後十五功臣於紫光閣國璜復與焉詞臣擬贊曰甲爾古拉擐甲橫戈衝賊中堅爭隘渡河拔自行閒素嫺紀律貌像紫光厥功可述六十年二月黔苗石柳鄧爲亂結連楚苗石三保將窺蜀境國璜馳赴防堵閏二月黔苗竄入貴道溪國璜隨四川總督孫士毅進攻之擒賊甚眾時楚苗亦

由襲龍巖嘴竄入國璜遂率兵由東面山梁據賊上游賊屬集國璜馳下斬賊目一我兵槍箭所斃不可勝計餘賊由山溝而逸三月賊竄至小溪小塘坡大蠻莊等處國璜與總兵達音泰合兵前進殲賊無算餘多落巖死遂駐小溪賊來犯皆擊退之六月賊踞董蕩大山山爲永綏隆圍要路國璜正在隆圍整兵爲備適提督劉君輔進勦遂與夾攻賊敗退隆圍附近之賊復糾集撲我營出沒無常國璜防禦甚力七月攻克紀容米惹兩寨焚其巢又由觀音巖進攻林家寨石家寨吳家寨等處皆克之得 旨優獎嘉慶元年四月獲奸民楊正紋等偵知賊將撲營卽伏兵爲備屆期賊果眾至遂克賊於丁家坡瓦窰灣得 旨褒賞五月密飭降苗偵

緝賊首石三保於哄哄寨獲之八月賊目石代噶於老旺寨將脅
從降苗肆焚掠國璜潛率鄉勇往擒之得 旨咨部議敘十月擒
賊目石老必前後 賞賚珍佩甚多事未竣楚蜀邪匪滋擾旋接
兵部侍郎英善檄馳赴達州十一月賊屯天星橋國璜率都司石
陣圖由七里峽進勦賊負嵎抗拒我兵奮勇擊之賊眾大亂斬殺
千餘追奔數十里遂克復天星橋 上嘉之十二月賊遁入橫山
子國璜潛攻其卡焚之賊奔出我兵圍而殲焉遂奪據山梁賊乘
我兵立營未定糾其黨三四千人蜂擁而至國璜戰倍力並以大
礮轟擊之賊稍退次日復聚併力奪營國璜迎擊斃賊三百餘賊
來愈眾轉戰三日歿於陣奏入奉 上諭總兵袁國璜率士卒直

前深入因眾寡不敵致被戕害奮不顧身實堪軫惜著咨部照提督例議卹 賜祭葬如例加 恩賞騎都尉兼一雲騎尉世職子起襲

右 國史館本傳

國朝書月文卷不湖
卷三百五十一

高傑 倪占鼈

高傑四川成都人由行伍於乾隆三十三年拔城守左營額外外委三十六年補右營外委四十五年遷把總五十年升千總五十六年保舉守備旋署提標左營中軍守備五十九年大邑縣民王應龍等滋事悉擒之奉旨以應升之缺題補六十年從征黔楚逆苗疊攻其寨解永綏圍功最補城守右營守備嘉慶元年又於馬鞍山結石岡諸處戰甚力是年升梁萬營都司八月派赴達州剿捕邪匪十二月賊屯柏樹場爲我兵所克盡遁入橫山子地勢險峻賊設卡三座外掘濠溝負嶠固守傑隨總兵袁國璜於二十一日大霧迷漫出不意圍其頭卡槍礮齊發並擲火彈焚其草棚賊

勢急外奔遂殲焉賊眾前來迎敵總兵何元卿亦至奮勇俱上奪
據山梁焚卡二座擒匪黨二十餘斬之傑因力戰受傷陣亡先是
元卿勦賊小劫賊敗竄入獅子坪我兵越嶺窮追有四川松潘鎮
標守備倪占鼇擒殺其魁被匪眾追及亦歿於陣先後事 聞奉
旨高傑倪占鼇俱照例議卹均廕雲騎尉世職襲次完時給予恩
騎尉世襲罔替傑子定邦襲占鼇子開祥襲占鼇四川廣元人

右 國史館本傳

石陣圖 廖廷超等

石陣圖直隸博野人由乾隆己酉科武進士以營守備用五十五年補四川重慶鎮標中營守備嘉慶元年十月賊焚掠達州東鄉之麻柳場陣圖隨刑部侍郎英善川東道李憲宜勦捕之賊乘早霧來攻泉水鋪營陣圖率眾迎截殲賊無算奏入奉 旨以應升之缺升用十一月賊於汪家山分起屯聚我兵分路勦捕陣圖隨總兵袁國瓚率弁兵由七里峽至天星橋一路進攻克之十二月賊竄入橫山子山梁負隅抗拒二十一日陣圖隨國瓚乘霧潛至賊卡四面合圍焚燒草棚賊奔竄我兵截擊之殲賊甚眾二十二日賊乘我兵營卡未定分路來攻陣圖悉力堵禦賊始退二十三

日賊分五路直攻營卡陣圖隨國瑣迎敵奮力追剿遇伏轉戰三日被創陣亡是月綏甯協千總廖廷超固關營把總劉佐清俱以擊賊歿於陣先後事 聞得 旨石陣圖著加一等議卹廖廷超劉佐清均議卹如例俱廕雲騎尉世職襲次完時給予恩騎尉世襲罔替陣圖子現瑞襲廷超子明文襲佐清子雲魁襲廷超四川成都人佐清直隸正定人

右 國史館本傳

王太和 康恆彩等

王太和順天大興人乾隆六十年正月由捐守備銜投效軍營隨征黔楚逆苗奮勇出力經大學士公福康安保題奉旨以守備補用嘉慶元年十二月擊賊於貴魚坡太和與把總康恆彩爭先撲寨連刃數賊旋被賊裏住同時陣亡是月廣東撫標左營千總戴得新貴州平越營千總黃國喜雲南昭通鎮標前營千總楊兆熊同擊賊於石隆戰歿先是十月貴州古州鎮標左營額外外委羅天壽擊賊於平隴陣亡同時陣亡者雲南臨元鎮標右營左哨二司把總閔世昌十一月廣西提標前營右哨千總王熊飛擊賊於馬頭山陣亡事聞議卹太和等俱廕雲騎尉世職襲次完時

給子恩騎尉世襲罔替天壽卹如例太和子耀先襲恆彩子元福襲得新子世科襲國喜子廷彪襲兆熊弟兆璟襲世昌弟世華襲熊飛子甯襲恆彩四川雙流人乾隆三十七年由行伍隨征兩金川四十三年十月拔補四川富和協外委五十六年調征廓爾喀殺賊受傷敘功補四川將軍標右營把總得新貴州都勻人國喜廣東南海人兆熊雲南昭通武舉世昌貴州清江人天壽雲南建水人熊飛廣西馬平人

右 國史館本傳

貴隆 額勒精布等

貴隆滿洲鑲黃旗人姓吳扎拉氏充成都營馬甲乾隆四十六年
隨征甘肅道回五十三年由委前鋒出師西藏巴勒布有功授驍
騎校 賞戴藍翎五十六年征廓爾喀奮勇殺賊擢額外防禦嘉
慶元年隨征四川達州教匪十一月賊首徐添德等攻撲東山廟
卡欲奪路由東鄉徑奔豐城會合賊首冷倬貴隆從刑部侍郎英
善等由麻柳場進攻殲賊無算賊竄至汪家山我兵乘勝追殺焚
燬山寨並擒賊九十餘名十二月貴隆從散秩大臣佛住勦豐城
賊賊以被困日久傾巢而出張家觀賊亦率眾數千分四路過河
攻撲大軍面背受敵貴隆竭力抵禦歿於陣同亡者防禦額勒精

布常福驍騎校常齡委驍騎校法什尙阿其擊賊於達州橫山子
梁茅坪陣亡者委前鋒校齊克星阿事 聞得 旨貴隆額勒精
布著加等議卹常福常齡法什尙阿齊克星阿照例議卹均廕雲
騎尉襲次完時給予恩騎尉世襲罔替貴隆子那爾胡襲額勒精
布子智興襲常福子喀通阿襲常齡子吉爾通阿襲法什尙阿長
孫忠甯襲齊克星阿子少住襲額勒精布蒙古正藍旗人姓巴岳
忒氏常福蒙古正黃旗人姓拜依特氏常齡滿洲鑲紅旗人姓鈕
祜祿氏法什尙阿蒙古鑲白旗人姓伊勒克氏齊克星阿滿洲鑲
藍旗人姓扎拉氏

右 國史館本傳

傅成明 楊振邦等

傅成明直隸大興人由行伍拔補督標右營外委旋擢把總遷千
總乾隆三十八年升後營守備三十九年升中營都司四十四年
擢後營遊擊五十三年升江西吉安營參將六十年調撫標中軍
參將嘉慶元年檄赴湖北軍營協剿教匪時李文高股匪踞孝感
縣之胡家砦成明以布政使祖之望檄帶兵二百馳赴楊店楊店
在胡家砦東二十餘里賊時出焚掠附近村落我兵四面據險堵
之成明擒獲有功尋由楊店進剿至黃金廟密林中遇伏成明等
奮擊之殲戮甚眾賊益糾眾圍攻成明陷於陣以守備陳之壯力
救得出傷重旋歿甘肅涼州鎮標把總楊鎮邦甯夏鎮標把總何

起蛟俱死之事 聞均 賜卹如例 賞雲騎尉世職襲次完時
以思騎尉世襲固替成明子錦襲振邦子繼思襲起蛟子萬金襲
振邦甘肅甯朔人起蛟甯夏人

右 國史館本傳

佟貴 清福等

佟貴伊爾根覺羅氏滿洲正紅旗人由護軍於乾隆三十八年隨征金川補藍翎長歷遷護軍校副護軍參領嘉慶元年揀發四川以參將用署越巂營參將檄赴達州剿捕教匪時徐添德股匪屯亭子堡距州城五十里蹂躪及麻柳場佟貴以署總督英善檄偕遊擊范楫各領兵三百名由山徑分進會甘草埡賊匪被剿亦竄至亭子堡佟貴奮勇進擊毀其巢賊併力相抗我兵冒矢石殊力戰戮賊目一人餘眾悉潰佟貴乘勝追捕斬獲無算將薄風洞口會日暮山勢險峻樹木深密賊拒守甚嚴兵不復進嗣因英善率兵由大路進攻密遣佟貴率眾繞雙廟子太埡口樵徑抵風洞口

與大兵爲援大兵先至與賊久相持迫佟貴兵至賊衆紛竄至沙
坨溝佟貴追擊之殲其渠餘匪復爭相合圍佟貴轉鬪力竭歿於
陣時貴州凱里營都司保德擊賊於鳳陽山身受槍傷歿於陣四
川川北鎮標右營都司清福亦以捕卯崗賊功最著進至烏流廠
死之安阜營都司百壽擊賊於麻柳場陣亡先後事 聞得 旨
佟貴清福均加等議卹餘 賜卹如例均 賞雲騎尉世職襲次
完時以恩騎尉世襲罔替佟貴子承志襲保德子德亮襲清福子
烏雲珠襲百壽子永祥襲保德塔他爾氏滿洲正白旗人由前鋒
洊升是職清福烏諾特氏滿洲正藍旗人百壽漢軍鑲黃旗人

右 國史館本傳

保德 扎爾杭阿等

保德滿洲正白旗人塔他爾氏由閒散拔前鋒乾隆四十五年補前鋒校五十二年擢委前鋒參領是年遷貴州凱里營都司嘉慶元年川省徐添德等賊匪滋事保德隨總督勒保在竹子山平家崖等處截擊賊均向鳳陽山老林內合眾同奔我兵因在磨垣山溝內不得地勢遂搶上山梁賊匪直前攻撲我兵儘力下壓槍斃賊二百餘名生擒楊紹宗等二十八名餘匪四竄保德身受槍傷歿於陣二年護軍校扎爾杭阿在湖北樂家莊擊賊陣亡前鋒校永強阿在湖北隨營擊賊陣亡先後事 聞得 旨保德扎爾杭阿永強阿俱著咨部議卹均廕雲騎尉世職襲次完時各給恩騎

尉世襲罔替保德子德亮襲扎爾杭阿弟扎隆阿襲永強阿子慶雲襲扎爾杭阿滿洲鑲白旗人永強阿滿洲正黃旗人

右 國史館本傳

陸霖 張寧陽等

陸霖江蘇昭文人由監生捐納從九品乾隆五十一年補四川大甯縣典史五十八年調赴湖北竹谿縣蒼蠅溝拏獲教匪胡仲元等保舉引 見得 旨以知縣用嘉慶元年檄赴達州東鄉防堵時達州徐添德股匪犯東鄉境分股竄大東林渡散秩大臣佛住督弁兵隔河施放槍礮賊不能越尋踞張家觀佛住於沿河一帶防河東鄉豐城場冷俸股匪由姚家壩隘口往攻城佛住分兵堵禦張家觀賊知佛住兵單直撲過河霖偕東鄉縣知縣張寧陽典史楊永錫同時擊賊陣亡事 聞均加等 賜卹 賞雲騎尉世職襲次完時以恩騎尉世襲罔替霖子棠襲寧陽未襲永錫子連

捷襲寧陽浙江仁和人由監生於四庫館議敘府經歷補四川潼川府經歷乾隆五十七年升東鄉縣知縣嘉慶元年九月東鄉天星橋東林河等處教匪滋事寧陽嚴密堵禦十月達州賊由太平寨犯東鄉偕遊擊尙維岳等於各隘口防之永錫山西浮山人嘉慶元年選是職

右 國史館本傳

馬自易 馬殿元等

馬自易甘肅張掖人由行伍於乾隆四十年隨征金川攻克噶郎
噶黑山梁達烏圖等處力戰受傷復進攻噶喇依勒烏圖科布曲
率眾奪峒克之拔行營外委四十六年隨征撒拉爾逆回於水磨
溝龍尾山華林山等處奪獲軍器殲賊無算補甘肅肅州鎮標左
營把總四十七年遷前營把總四十九年勦石峯堡賊平之得

旨馬自易以千總卽行補用旋升肅州鎮標後營千總歷署中營
南古城堡等處守備五十八年署右營守備嘉慶元年派赴湖北
勦捕教匪時賊首胡知和廖明萬季九萬王自儉據紫陽之五作
雲五作雲舊名板廠寨順治年間嘗有寇據之四面皆高山峻崖

前洞河右大道河左汝河後班鳩關賊寨外築石城中爲木城其
出入要路率眾拒守甚力十二月望日大雪總兵柯藩索費英阿
乘雪繞後路奪據班鳩關總督宜縣率兵自洞河口小徑魚貫而
入十八日至五作雲賊猶堅守馬自易跳上石城戰甚力賊合圍
之數重自易歿於陣水泉堡外委馬殿元甘肅提標中營外委魏
朝鳳救自易皆歿於陣二十日寨破知和明萬九萬皆死王自儉
逸紫陽平事 聞得 旨馬自易照守備例議卹馬殿元魏朝鳳
俱照千總議卹均廕雲騎尉世職襲次完時給予恩騎尉世襲罔
替自易子麟襲殿元子春和襲朝鳳子琴襲殿元甘肅永昌人朝
鳳甘肅皋蘭人

右 國史館本傳

國史館本傳

三

11

11

王相龍 吳玉等

王相龍四川冕甯人由行伍於乾隆三十六年隨征金川經百八十餘戰奪寨卡百餘座殲戮多名拔冕山營外委歷升直隸正定鎮標右營中軍守備陝西波羅協中軍都司甘肅庫爾喀喇烏蘇營遊擊調提標大馬營遊擊嘉慶元年隨陝甘總督宜縣勦興安府教匪先除漢江迤北之賊以殺其勢相龍率兵由小米溪進攻力戰踰時殲百餘人會四川東鄉縣王三槐等匪屯踞張家觀相龍偕遊擊圖興阿等夾攻後河洗其巢又偕守備李廷臣等襲板橋卡縱火力攻賊遁相龍乘勢追襲殲五百餘人生擒二十一人賊竄清杠渡擁眾渡河圍巴州甚急相龍率鄉勇迎擊力竭歿於

陣四川漳臘營外委吳玉亦死之時署肅州鎮標右營守備馬自
易中營外委魏朝鳳水泉堡外委馬殿元隨總督宜縣擊賊於陝
西紫陽縣之五作雲舊名板廠寨前界洞河寨外築石城賊據守
甚力宜縣率兵乘大雪自洞河口魚貫而入至五作雲賊猶堅守
自易躍上石城賊合圍數重自易力戰死朝鳳殿元俱歿於陣是
年湖北均房營外委蔡大勇擊賊於四川大甯縣寶塔路陣亡甘
肅西甯鎮標右營外委牛本漢巴暖營額外外委簡和隨宜縣擊
賊於興安府將軍山本漢奮躍上巖登巖牆中矛而墜和越至牆
根牆傾被壓均死之先後事 聞得 旨王相龍加等議卹馬自
易照守備例魏朝鳳馬殿元照千總例議卹餘 賜卹如例均

賞雲騎尉世職襲次完時以恩騎尉世襲罔替相龍子金棟襲自
易子麟襲朝鳳子琴襲殿元子春和襲玉子棲鳳襲大勇子正國
襲本漢子祿襲和照馬兵例 賞卹自易甘肅張掖人由行伍於
乾隆四十年隨征金川力戰受傷拔行營外委四十六年隨征撒
拉爾逆回擢把總四十九年以隨剿石峯堡賊功升千總五十八
年署是職朝鳳皋蘭人殿元永昌人玉四川松潘廳人大勇湖北
均州人本漢和俱甘肅西甯人

右 國史館本傳

蕭大鐘 鍾明亮等

蕭大鐘字秀川湖南新化人父有光以事安置來鳳大鐘遂占籍來鳳爲縣學生嘉慶元年教匪起大鐘與其友陳瞻蔚圍練鄉勇三千餘人禦賊於兩河口芭蕉塘唐家堡等處賊不敢近又奉大帥委入賊砦招降首逆黃長清凡千餘人貝子福康安督師至復檄同官兵計誘胡正中等於三堡嶺就擒者無數賊恨之一日復奉檄往指甲坡被執賊脅以刃不屈賊倒縛大鐘於樹叢射之大鐘至死罵不絕口有曾承恩者亦新化人寄籍竹谿爲縣學生教匪亂起承恩練鄉勇捍衛閭里屢與接仗身瀕於死者數矣以州銜效用積勞成疾卒又鍾明亮醴陵人由行伍授撫標右營千總

川匪竄入湖北檄調隨營屢戰有功五年閏四月十九日大兵進剿五王燕砦明亮率其屬大呼陷陣馳入重地身被十七創死
敕祀昭忠祠

右傳李元度撰

佛住

佛住滿洲正白旗人其先蘇完人姓瓜勒佳氏高祖內大臣華普由漢軍奏改入籍父三泰戶部侍郎殉葉爾羌之難自有傳佛住於乾隆二十四年由閒散承襲三等子爵旋襲散秩大臣五十二年襲族佐領五十五年授阿克蘇領隊大臣五十六年以失察邪教降二級畱任六十年授四川成都副都統嘉慶元年以失察家人代商攜玉罰俸二年七月往哈密辦事十月抵西安聞達州教匪肆起請協同英善剿滅教匪後再赴哈密報 允是時賊從麻柳場敗後進撲東山廟卡欲與豐城賊合佛住與勒禮善適先後率兵至因分三路進攻十一月佛住由風廂壩越山伏袁家壩俟

麻柳場兵到以礮爲號奮勇齊發次日兵皆集值大雪微止佛住
由小路攻撲毀其卡賊奔潰殲戮不可勝計旋馳抵東鄉縣屯兵
東山廟隘口賊果竄至由大東林渡口潛渡佛住卽率協領塔克
慎知縣劉清等隔岸施槍礮斃數十人賊不能渡遂分竄十二月
復偕英善勒禮善擒傳教之徐添富蒙 賞喜字玉扳指套各一
箇荷包金銀寶各一分金銀錢各一枚二年正月豐城賊因被困
久傾巢而出直撲姚家壩隘口遊擊范林守備楊成白俱陣亡賊遂
迫東鄉佛住分兵堵截適張家觀匪眾數千分四路河水涸處直撲
過河各卡兵抵禦不止佛住率眾竭力接戰因兵力稍單被害奏
入得 旨佛住本係派往哈密辦事大臣因路經陝省請赴川勦

賊今在東鄉捐軀伊父三泰從前亦係陣亡尤爲可憫伊本有世襲子爵著交部從優議卹應給騎都尉又一雲騎尉尋議騎都尉併爲一等子加一雲騎尉子瑞齡襲

右 國史館本傳

三十三

三十三

和倫 永謙等

和倫蒙古鑲黃旗人姓杭阿坦乾隆三十六年由前鋒隨征緬甸身歷二十九戰三十八年隨征金川屢立戰功得功牌三五十年四月授甘肅瑪納斯左營千總五十四年擢涼州鎮標後營中軍守備嘉慶元年派赴四川剿捕邪匪二年正月隨陝甘總督兼管四川總督宜綏分兵圍攻太平縣屬通天觀迤西之官帽山賊卡賊聚眾於卡併力抗拒施放槍礮擗石勢甚熾和倫奮不顧身首先衝突項受槍傷沒於陣是年四月陝西固原鎮標右營中軍守備永謙隨理藩院尙書惠齡等於陝西山陽縣剿捕邪匪追至馬路坪與賊力戰陣亡三年八月山西大同鎮標中營中軍守備雙

德勦捕陝西西鄉縣邪匪偪至菜子溝山內老林兩面兜圍殲戮
淨盡雙德奮力勦殺身受重傷歿於陣先後事 聞奉 旨和倫
雙德著加等議卹永謙卹如例俱廕雲騎尉襲次完時給予恩騎
尉世襲罔替和倫子噶爾噶蘇迪襲永謙子富森布襲雙德子達
洪阿襲永謙滿洲正黃旗人姓吉立特由烏槍護軍於乾隆五十
三年補驍騎校是年七月擢本職雙德滿洲正紅旗人姓棟鄂由
護軍校於乾隆五十八年授山西渾源營守備六十年調本職

右 國史館本傳

王化龍石峯勇等

王化龍甘肅固原州人乾隆四十六年武進士發陝西撫標中營以守備用四十九年隨征石峯堡回匪歷戰八次擒賊有功補左營守備五十五年擢陝西孤山營都司旋調陝甘督標中營都司嘉慶元年二月檄勦湖北教匪時襄陽府孟家集賊匪潛劫大營經官兵殲戮無算賊猶抗拒直撲我營化龍偕遊擊巴哈布等縱馬馳突槍箭齊發復率鄉勇從後抄擊殲擒賊首多名餘匪竄至樊城縱火被城上用礮轟斃無數賊始退其樊城沿河賊匪亦將乘勢渡河化龍督兵施放槍礮擊翻小船十餘隻賊莫能渡六月賊擾及棗陽縣城化龍奉檄偕知縣王廷珪嚴密防守賊屢次攻

圖均經擊退下部議敘並 賞戴花翎二年二月調甘肅涼州鎮
標中營遊擊尋檄赴四川達州一帶堵剿借山西太原鎮標右營
右哨二司把總石得明由黃草嶺進攻賊眾悉力衝突化龍得明
均歿於陣先是石山堡賊匪竄至官渡口窺伺蚊蟲谿糧臺我兵
連日追殺外委劉吉死之賊將趨達州我兵分路迎擊賊遂撲蘆
花嶺等處外委許建英死之先後事 聞得 旨俱著加等議卹
化龍得明俱 賞給雲騎尉世職襲次完時以恩騎尉世襲罔替
餘卹如例化龍子重廉襲得明子祥襲得明山西臨汾人吉建英
籍貫子嗣俱無考

右 國史館本傳

江麟 龐德佩等

江麟雲南順甯人乾隆三十六年六月由行伍拔永昌鎮標左營外委四十三年六月補騰越鎮標中營把總四十五年十二月升本營千總五十年十月俸滿引 見以守備補用五十四年四月補昭通鎮標右營守備嘉慶二年正月隨征平彝狝苗攻克阿依寨豬場等處奮勇有功二月檄守黃泥河適苗匪越河滋擾疊肆焚掠麟爭先堵禦陣亡時雲南昭通鎮標中營把總龐德佩雲南督標左營把總馬河圖雲南曲尋協左營額外外委曾繼先擊賊於抹角是月雲南曲尋協右營把總楊溥左營外委張昆宇擊賊於董谷山貴州長壩營把總楊烈外委梁國章擊賊於冊亨汎城

雲南尋霑營右哨把總曾偉擊賊於安籠鋪均陣亡事 聞議卹
鱗等俱旌雲騎尉襲次完時給予恩騎尉世襲罔替繼先卹如例
鱗子應聲襲德佩子澤襲河圖子朝輔襲溥子培潤襲昂字子彩
襲烈弟奎襲國章弟國瑞襲偉子廷璽襲德佩雲南思安人河圖
雲南昆明人繼先昂字俱雲南南甯人烈貴州貴陽人國章貴州
興義人偉雲南宣威人

右 國史館本傳

曾艾 曾彰泗

曾艾字虎卿一字同俊別署雲溪新化人父承妣乾隆壬申恩
科舉人試甘肅西隆知縣艾幼而開敏有膽略讀書過目成誦能
詩工書善騎射喜談古人忠孝節義事西隆歸病篤艾割左臂血
以和藥父卒痛不欲生服闋以例貢考授四庫館膳錄期滿議敘
以州同分發江西歷署安福龍泉安仁知縣所至有聲以母憂回
籍服闋將詣補會辰州苗變嘉勇貝子福康安奉命督師艾素
以敏練受知貝子詣軍門呈請效力貝子喜令守麥地汛旋調辦
行營文巡捕先後從大軍攻克黃瓜砦大小紅巖嗅腦營烏宿河
鴨保砦等處奏以軍營相當缺出儘先補用嘉慶改元題補貴州

永豐州分防州同貝子薨始抵任州隸南籠故苗地州同駐冊亨在萬山中尤險遠難治艾至清訟獄革陋規裕倉儲苗日來謁諭以督率各砦各安本業民夷悉安乃遣人迎致眷口甫至而南籠种苗七柳鬢等遽叛艾聞警語駐防楊把總柳外委日冊亨距南籠近勢易及今汎兵遠赴大營土城又單薄事且奈何惟有與君等戮力死守而已卽傳諭四鄉亭目招集良苗繕城堞治器械定條約明賞罰令出肅然已而賊至艾奮勇出擊賊披靡次日大至艾分令兩汎守西北門僕余昇陳德等守東南門而以其戚張蓋英僕朱輝山守衙署接應各門火藥僕段廷富守倉廩給發兵民糧餉分布已定而自守東門礮臺往來策應相持半月戰五十餘

合屢有斬獲生擒數十賊是時城中男婦不滿五百人婦女亦改裝登陴艾懸重賞募敢死士縋城間道告急十餘輩久之外援不至已賊數萬蜂擁圍城艾督率兵民禦三晝夜而圍不解有白巾賊魁執旗於眾中指揮艾一矢斃之賊少卻忽報北門火起賊撲入繞至西門楊把總死焉艾率眾趨救遇賊於城西隅巷戰艾手刃十餘賊中槍暈血罵賊死時二年二月二十一日也僕余昇陳德毛升楊燦龔祥王升任德劉奉朝崔升皆力戰死妾余氏陳氏及兩婢子郭姐僕婦李氏潘氏皆自刎張蓋英於亂軍中覓得其次子江與段延福朱輝山負之逃江號泣曰吾父母皆死何以生爲賊尾及之中槍而殞蓋英延福死之輝山被槍落巖箐負痛奔

報大營事 聞奉 旨倍加優卹改南籠爲興義府永豐爲貞豐
州艾之初殉也義民等收其尸藁葬城南隅兩廣總督吉慶題其
墓事平其兒子潢與其長子湘跡至墓所啟殯輿歸而禮部檄至
行取平生事蹟付史館立傳工部製牌位入祀昭忠祠江與蓋英
入祀忠義孝弟祠余氏陳氏入祀節孝祠郭姐李氏潘氏等建坊
旌表殉僕十六口盡與優卹湘廕雲騎尉世職同縣鄧顯鶴爲之
作死事狀復列其事於五君子詩中閱十年而有曾彰泗死洋縣
之事

曾彰泗字孔林一字互川艾族兄弟也高祖宗意自有傳父慎字
敬成以四川德陽籍副榜中式己亥 恩科舉人博雅通擅以名

德重於楚蜀間爲時聞人尤工書法人爭慕之彰泗少儻有志
量書法道秀似其父嘉慶辛酉充德陽縣拔貢生 朝考卽用知
縣分發陝西試延川知縣有善政能得民隱乙丑權洋縣未幾死
甯陝鎮新兵之難初川陝教匪之被勦於官兵也以終南山爲窟
穴其地表延千數百里深崖密箐虬松喬柏漢唐以來歷供樵採
名曰老林竄入之黨皆身經百戰驍悍難制之猾賊官兵乘之莫
可誰何朝議改五通通判爲同知添設甯陝廳鎮總兵募兵六千
分十大營鎮之而以積年立功無業可歸之鄉勇充伍籍以收桀
驁爲善後計天下所稱新兵也初任總兵劉之仁草創未踰年以
勞卒署任韓自昌未而月遇猾賊苟文明大股戰死於是陝大吏

以楊芳得士卒心奏升之而朝命已授芳爲甯陝鎮總兵芳固名將與忠武公遇春同族同以勦賊積功稱二楊者也以次勦滅苟文明諸大股及擠添零匪南山廓清會遇春以補行穿孝去固原提督移芳駐固原而以參將楊之震權甯陝鎮時嘉慶十一年二月事也新兵素難馭陳先倫陳達順尤桀驁喜亂驟離主帥司儲又誤扣米折遂倡眾作亂七月初六日初更兵變戕署總兵中軍及鎮廳兩城官弁遂連破營城十九處洋縣與焉彰泗拒守七晝夜援兵阻細水河不能至城遂陷彰泗大罵賊而死時八月朔日也洋縣民保眷屬潛出不及於難初彰泗之殉難也子庭槐方十歲其妻某氏欲以身殉曰夫死何可獨生彰泗弟某爲之解曰

程嬰杵曰一死於十五年之前一死於十五年之後古人許之嫂
之畱身撫孤又何恨焉事 聞奉 旨優卹史館立傳 予雲騎
尉世職有漢南山長城固岳某者爲纂傳彙未及眷屬脫難事果
勇侯楊芳旣收降叛眾斬先倫達順二人復於彰泗傳中增入其
弟語而世始知彰泗眷口得免於難其子庭槐遂得廕雲騎尉世
職

志曰國家以廕卹之典昭忠之祠待疆場死事之臣所以矜寵隆
重之者至矣士當其時有不致命遂志捐軀犯難以圖報於萬一
者哉顧考寶慶自入 國朝來忠節之士可紀者甚少何哉蓋世
亂則以節義相耀時平則以無事爲福大抵然矣今紀郡中得襲

雲騎尉世職者凡五家而新化曾氏不十年兩與斯典與勳衛諸
家同列氏族雖曰門才之盛亦邑里之光也洋縣事初不詳後遇
果勇侯楊勤勇公始得悉其本末今其家仍歸原籍爲新化人云

右傳鄧顯鶴撰

崔崑 李華純等

崔崑雲南昆明人乾隆四十八年武舉隨營效力五十七年十二月拔補曲尋協右營千總六十年二月隨剿黔楚逆苗屢戰著有勞績十月升補尋霑營守備嘉慶二年正月調剿興義狝苗二月禦賊於永甯州崑與貴州安南營把總李華純俱力戰陣亡四月大兵進剿碧峯山山勢陡險賊層層紮卡抗拒我兵奮勇登山盡毀卡寨殲賊甚多貴州提標左營把總高以謙前營把總陳欽安義鎮標中營把總李錦俱身受槍石陣亡同時貴州畢赤營把總朱宜揚擊賊於壩陽陣亡先是雲南提標左營額外外委沙蒼擊賊於下山塘陣亡雲南城守營額外外委陳漢玉擊賊於巴隴聖

陣亡事 聞議卹崑華純以謙欽錦宣揚俱廕雲騎尉襲次完時
給子恩騎尉世襲罔替蒼漢玉俱卹如例崑子耀祖襲華純子國
樑襲以謙子耀先襲欽子貴全襲錦子德源襲宣揚子曜襲華純
貴州安南人以謙貴州安順人欽貴州普定人錦貴州興義人宣
揚貴州安順人蒼雲南太和人漢玉雲南昆明人

右 國史館本傳

楊君璽 林元臣等

楊君璽山西臨汾人由行伍拔補太原營外委於乾隆三十七年
擢石樓營把總四十五年升太原鎮標右營千總四十九年隨征
甘肅石峯堡逆回屢戰立功五十四年推升河南撫標右營守備
嘉慶元年二月派剿湖北邪匪四月賊圍襄陽君璽奮力擊退之
賞都司頂帶二年三月總兵張文奇追剿隨州西竄第一股賊匪二
君璽帶兵四百名馳往接應行抵欒川地方猝遇第二股賊匪二
千有餘君璽奮勇截殺轉戰四時眾寡不敵身受重傷而歿同戰
歿於陣者河南撫標左營左哨千總林元臣河北鎮標右營千總
張榮標澗池汛千總王玉成千總頂帶河北鎮標左營把總劉天

貴事 聞奉 旨楊君璽猝遇賊匪奮力截殺受傷陣亡殊爲可惜著照都司例議卹餘卹如例君璽元臣榮標玉成天貴俱廕雲騎尉襲次完時給予恩騎尉世襲罔替君璽子甯德襲元臣子祥麟襲榮標子俸襲玉成子濂襲天貴子廷禮襲元臣河南睢州人由武生於乾隆五十一年拔補撫標左營額外外委五十二年補左哨外委五十三年擢河南撫標右營右哨二司把總五十八年擢本職榮標河南杞縣人由武舉於乾隆五十一年投營效力於五十七年擢補陝州鎮標右營左哨頭司把總五十九年擢本職玉成由行伍於乾隆四十五年拔補開封鎮標右營額外外委四十九年擢河南鎮標右營右哨頭司把總五十年調左營左哨頭

司把總五十一年擢本職天貴由行伍於乾隆四十六年拔補開
封營額外外委四十六年補河陰汛外委五十八年擢本職嘉慶
元年四月隨總兵慶溥帶兵攻剿湖北當陽屯賊匪奮勇先登賊
卡連刃數賊毆中槍傷 賞千總頂帶玉成天貴俱河南祥符人

右 國史館本傳

國事考原典行不悉二
二名二トヨナ

三三

楊潭 郭德元等

楊潭甘肅靈州人由行伍於乾隆三十七年隨征金川歷戰有功四十年四月拔白土路營外委十月進攻泊咱爾呢及巖峒洋子嶺等處十二月進攻得木特木當噶爾馬爾邦官寨等處俱奮勇殺賊功列超等擢陝西提標右營左哨二司把總四十一年正月連戰數次各有勝獲二月凱旋四十四年遷左營千總四十六年隨剿甘肅逆回戰甚力升延綏鎮標中營守備五十三年升甘肅莊浪協三眼井都司五十八年擢陝西河州鎮標中軍遊擊嘉慶元年檄剿四川教匪二年三月隨提督柯藩侍衛明興擊王三槐股匪於金峩寺時署廣州將軍明亮於馬耳峯督兵進剿距金峩

寺五里許其前爲大冉家堙口其左爲雞爪嶺明亮欲奪雞爪嶺以橫擊冉家堙口約柯藩明興攻姚家寨以牽賊勢令總兵艾如文朱射斗率兵攻雞爪嶺南北路而馬耳峯下有地曰棋盤石賊守之甚堅令索費英阿伏兵於馬耳峯下俟如文射斗兵至從巖壁山下壓攻取及柯藩明興率兵至姚家寨賊覺拒守甚力金峩寺賊亦率眾來援潭領土兵繞至賊後攀援而上出賊不意奪其寨潭爲擗石所擊歿於陣柯藩明興由姚家寨與艾如文朱射斗進攻遂奪雞爪嶺四月索費英阿等由雞爪嶺進兵偕提督穆克登阿副都統銜侍衛西津泰及艾如文會攻冉家堙四川川北鎮標中營千總郭德元會鹽營千總王大倫綏靖營把總馬玉成建

昌鎮標左營外委胡得貴靖遠營外委余正朋俱奮勇先登同破
於陣我兵益進爲木城十四於馬耳峯下圍之三槐突圍逃遂燬
其寨金峩寺平事 聞得 旨楊潭照參將例議卹餘 賜卹如
例均 賞給雲騎尉世職襲次完時以恩騎尉世襲罔替潭弟鴻
襲德元子京茂襲德貴姪田裕襲正朋子應龍襲德元陝西華州
人大倫四川成都人玉成四川宜賓人得貴四川西昌人正朋四
川彭山人

右 國史館本傳

新刊 大正 昭和 年表

三三

托克托布

托克托布滿洲正白旗人姓博勒多爾濟由烏槍護軍於乾隆四
十三年授護軍校四十七年授委護軍參領五十七年授副護軍
參領六十年授甘肅西甯鎮標左營遊擊嘉慶二年三月隨征邪
匪奪獲雞爪嶺賊巢賊糾眾來撲擊走之又撲棋盤石皆爲我軍
擊敗賊眾以金峩寺山勢險峻可以屯據又欲暗從西南山陰往
襲明月場羅江口搶掠軍糧並糾合王家寨方山坪各處匪眾同
拒官兵提督穆克登阿等赴勦飭所在嚴禦防賊西竄已而賊眾
二三千人至重石子焚掠托克托布同參將增順等率兵邀擊殺
賊甚眾賊退踞重石子山嶺托克托布偕遊擊薛大烈奮勇進攻

5320.45

1573329

國史館藏書

國史館藏書
卷三十三

三

賊恃險死拒大烈受傷托克托布轉戰殺賊力竭陣亡事 聞得
旨托克托布著咨部議卹均 賞給雲騎尉世職襲次完時以恩
騎尉世襲罔替子霍隆襲

右 國史館本傳

174-890



21101000161416